



BIBLIOTHECA S. J.  
Maison Saint-Augustin  
ENGHIEN

D 92/13

<sup>A</sup>  
f 23

D 92/13

Scelopis 1790



Auteur : Bonaventure-Niël d'Argonne O. Carth.

DE OPTIMA  
LEGENDORUM ECCLESIAE  
PATRUM  
METHODO

In quatuor Partes tributa,

*Ex Gallico in Latinum Sermonem translata,  
& nonnullis annotationibus  
illustrata,*

INTERPRETE J. F. R.  
SACRAE THEOLOGIAE DOCTORE,

*Ne transgrediaris terminos antiquos, quos posuerunt  
Patres tui. Proverb. C. 22. V. 28.*

*9. 9. 1776*



AUGUSTAE TAURINORUM. MDCCXLII.

EX TYPOGRAPHIA REGIA.  
*Superiorum permissu.*



3.10.



## PRÆFATIO INTERPRETIS.



*UUM* saniora Theologiæ  
 Studia ex incorruptis  
 Scripturæ, & Traditio-  
 nis fontibus petita, atque  
 durissimo, quo dulum op-  
 pressa fuere, Pseudo-Scholasticæ imperio  
 soluta, novum in dies incrementum acci-  
 piant, Sanctorum iccirco Patrum lectio,  
 quos Christiana Religio veluti locupletissi-  
 mos Traditionis testes veneratur, ac sus-  
 picit, iis omnibus, qui ad Ecclesiasticæ  
 Scientiæ acquisitionem contendunt, post  
 Divinas Literas pernecessaria est: dicente  
 Hieronymo Epistola decima, „Post Scrip-  
 „ turas Sanctas Doctorum Hominum

## P R Æ F A T I O

„ *Tractatus lege.* „ *Atque illud quanti ponderis sit , tum cultissimæ Nationes aliæ , tum præsertim Itala adprime novit ; ut argumento sunt quamplurimæ Sanctorum Patrum Editiones , quæ undique prodeunt , novisque in dies Typis cuduntur .*

*Verum quia suspicari quis posset , ne juniores Theologiæ Cultores , qui exactis Studiorum curriculis ad hoc Scientiæ genus animum appellere debent , vel nimia suscepti oneris magnitudine deterreantur , vel non satis inde fructus percipiant , propterea quod aut ordo quidam , & methodus necessaria desideretur , aut præviis cognitionibus careant , quibus sublati , nulla profectus spes esse potest ; rem iccirco non inutilem facturum me esse putavi , si Opusculum DE OPTIMA LEGENDORUM ECCLESIAE PATRUM METHODO , quo tum illorum lectionis necessitas ostenditur , tum planissima indicatur via ad Ecclesiasticæ Scientiæ acquisitionem*

## INTERPRETIS.

*sitionem, in illorum gratiam, quibus Sermo Gallicus parum perspectus est, in Latinum translatum, & pauculis quibusdam Annotationibus illustratum in lucem proferrem. Quam ego quidem provinciam libenter suscepi, non ob utriusque Sermone, Gallici, & Latini peritiam, non ob Eruditionem Ecclesiasticam, quæ quidem novi quam tenuia in me sint, quam exilia, sed quia per otium, quo singulari Superum Immortalium beneficio largissime fruor, id facilius perficere posse viderer.*

*Quanta vero sit hujusce Operis utilitas, quin longius dicendo persequar, vel una illius lectio abunde compertum, perspectumque facere poterit. Quod si eruditissimos, æquissimosque rerum aestimatores consulere cuiquam libeat, persuasum illi profecto erit, plurimum in eo esse judicii, ejusdemque exquisitissimi; illius Auctorem, quod sibi proposuerat, accuratissime absolvisse, saniores, perfectioresque re-*

## P R Æ F A T I O

*gulas adhibuisse, ac demum amplissimis juxta, ac spinosissimis studiis viam parasse. Testem appello omnium integerrium, gravissimumque Patrem Mabillonium, qui in suo de Studiis Monasticis Tractatu hujus Operis summarium exhibet, ejusque lectionem omnino commendat.*

*Lutetiæ Parisiorum hætenus vulgatum fuit, omisso Auctoris nomine. Quo tamen legentibus fiat satis, quorum alii curiositate quadam, alii grato animo ducti, Auctorum nomina scire cupiunt, quis fuerit hujusce Tractatus Auctor paucis indicamus. NATALIS ARGONENSIS illi nomen, Lutetiæ ortus est, Caesidicum egit ad annum usque ætatis octavum, & vigesimum: Carthusianum deinde institutum amplexus ab emissâ professione PONAVENTURÆ sibi nomen adscivit. Electus autem Carthusiæ Sancti Juliani Rhotomagensis Vicarius, hunc Tractatum edidit anno millesimo sexcentesimo octuagesimo*

# INTERPRETIS.

gestimo octavo; vita demum functus est anno millesimo septingentesimo quarto in Carthusia Gallionensi, annos natus novem, & sexaginta.

Opusculum hoc duabus primum Partibus, secunda nimirum, & tertia constabat; anno autem millesimo sexcentesimo nonagesimo septimo dimidio auctum fuit, addita nimirum prima, & quarta Parte, atque iterato editum, opera, & studio Petri Belbestri, qui Franciscanorum Parisiensem Bibliothecam praeerat, licet nullo Religiosi Instituti vinculo adstrictus; quod Opus secundo editum, Latinitate donatum in lucem ego proferendum suscepi.

Duo praeterea extant ejusdem Auctoris Opera: alterum, cui titulus, *Melanges de Litterature, & d'Histoire* sub nomine de Vigneul de Marville: cujus postremam Editionem anni millesimi septingentesimi vigasimi quarti emendavit quibusdam in locis Abbas Baniex; alteri vero

## P R Æ F A T I O

*titulus*, l'Education, Maximes, & Reflexions de Moncade, avec un discours du sel dans les ouvrages d'esprit.

*Neque vero mirum cuiquam esse debet a Monacho Carthusiano lucubrata fuisse id genus Opera, quæ alioquin non mediocrem humanarum rerum notitiam postulant: quippe arctissima familiaritate junctus fuerat cum Viris ingenio, & eruditione præstantissimis, antequam Carthusianum Institutum amplecteretur, literarum deinde culturam, ac pristinam cum Viris eruditis consuetudinem nunquam intermisit. Hinc magna Epistolarum collectio, quarum aliæ de politioribus literis Gallico, aliæ de rebus Theologicis Latino Sermone conscriptæ, in magna Carthusia religiose servantur, una cum altero ejusdem Auctoris Opere in hoc Tractatu sæpe laudato, quod Historiam Theologiæ continet tum Veterum, tum Recentiorum absolutissimam.*

*Multa*



# INTERPRETIS.

*Multa sane commendatione digna est Carthusianorum modestia, qui, ut popularcm auram fugiant, neve inanem gloriolam captent, latere omnino, quam Librorum Auctores videri malunt. At non video tamen quid causæ esse possit, cur Opus a Monacho vita jam functo, aliisque Libris jam editis celeberrimo conscriptum, Literariæ Reipublicæ subducatur, a quo cæteroquin Viri studiosi uberrimos fructus percipere possent.*



# MONITUM AD LECTOREM

## *Secundæ Editioni Parisiensi præfixum .*



Secunda hæc Editio Opusculi *de Optima legendorum Ecclesiæ Patrum Methodo*, priorem, quæ aliquot ante annos (a) prodiit, dimidio excedit. Neque enim satis esse duximus argumentis, atque exemplis ea firmare, quæ de rebus ad utilem adeo lectionem necessariis, ac de methodo servanda, ut bene, feliciterque succedat, dicta fuerant; verum etiam consentaneum nobis visum est de auctoritate Patrum, deque illorum usu, & fructibus, qui percipi possunt, singillatim differere.

Equi-

---

(a) Nimirum novem annis.

## M O N I T U M.

Equidem res tanti momenti longiori sermone pertractanda videretur ; at quum id unum propositum nobis sit, ut junioribus Clericis ad optima studia contendentibus opem feramus, paucis hisce contenti fuimus, alias plura dicturi, nimirum in Opere, in quo tum Veterum, tum Recentiorum Theologia exhibebitur (b).

Quem Juvenes instituendi amor cepit, recta ratio postulat, ne gravius illis onus imponat ; quippe quum perdiscendis hoc genus arrium elementis plurimus labor impendendus sit, & , si longior ea ratio fuerit, & via, haud satis scio, an sit oneri succumbendum. Deinde qui erudiri cupiunt, ipsi sibi non desint oportet: neque vero sibi  
in

---

(b) Quod Opus in magna Carthusia scrupulose servatum nunquam in lucem editum est.

## MONITUM.

in animum inducant, in iis, quæ traduntur, Institutionibus, omnia, quæ optare possint, præsidia contineri. Non nihil illorum investigationi, & industriæ relinquendum. Equidem Methodus ad parandam aliquam Scientiam multum adfert adjuventi; at in illa una posita non sunt omnia. Describi quidem potest in tabulis via, quæ Romam, quæ Constantinopolim ducit; at illam carpere, longique itineris labores perferre, solius viatoris est.

Asperiores semitas pro viribus explanavimus, spinis etiam flores identidem inspersimus, Ecclesiasticæ Eruditioni, ut fieri potuit, profanam miscentes, veterum Ecclesiæ Patrum exempla secuti, quorum non modo Sententias, atque Doctrinam, verum etiam tractandi modum in hoc Ópere imitari studuimus.

# INDEX CAPITULUM,

*Quæ in hoc Tractatu de Optima legendorum Ecclesiæ Patrum  
Methodo continentur.*

## PARS PRIMA.

De Auctoritate Patrum Ecclesiæ.

- CAPUT I. **D**E Patris nomine, quo antiqui  
Ecclesiæ Doctores donari con-  
sueverunt, de diversis, quibus florere tempo-  
ribus, deque varia illorum auctoritate pag. 1.  
CAPUT II. Quid sentiant Hæretici de auctori-  
tate Patrum Ecclesiæ. . . . . 6.  
CAPUT III. Quid sentiant Romanæ Ecclesiæ  
Theologi de auctoritate Patrum. . . . 12.  
CAPUT IV. Quid sentiant de auctoritate Patrum  
ipsimet Ecclesiæ Patres. . . . . 17.  
CAPUT V. Quid sentiat Vincentius Lirinensis  
de auctoritate Patrum. . . . . 23.  
CAPUT VI. Quid sentiat Ecclesia de auctori-  
tate Patrum. . . . . 28.  
CAPUT VII. Ostenditur erroribus, antilogiis,  
aliisque mendis, quæ apud Ecclesiæ Patres non-  
nunquam occurrunt, auctoritatem, quam illis adse-  
rimus, illæsam manere, atque incorruptam. 31.  
CAPUT

# I N D E X

- CAPUT VIII.** Errata Patrum in Scientiis humanis nihil omnino detrahunt illorum auctoritati in rebus Fidei. . . . . 42.
- CAPUT IX.** Difficilis, atque spinosa, quæ apud Ecclesiæ Patres occurrunt, locutiones, eorum auctoritatem ne tantillum quidem ledunt . . . 49.
- CAPUT X.** Etiam si Patres Ecclesiæ nonnulla ex Scripturis Sanctis loca falso protulerint, in aliis etiam incuriose se gesserint, facta tamen est, & integra illorum in rebus Fidei auctoritas . . . . . 55.
- CAPUT XI.** Libri Ecclesiæ Patribus suppositi illorum auctoritatem nequaquam ledunt . . . 64.
- CAPUT XII.** Mutationes, & errata, quæ notantur in Patribus, illorum auctoritatem nullo modo minuant . . . . . 68.



P A R S

## CAPITUM.

### PARS SECUNDA.

De rebus necessariis ad Ecclesiæ  
Patres utiliter legendos.

CAPUT I. **Q**UA monto legendi sint Ecclesiæ  
Patres, quæve res postulentur  
ad eorum intelligentiam asse-  
quendam - - pag. 73.

CAPUT II. De varietate Linguarum, earumque  
in optimis studiis usu - - - 79.

CAPUT III. De Linguis ad perfectam Patrum  
intelligentiam assequendam necessariis, ac pri-  
mo de Lingua Hebraica - - - 86.

CAPUT IV. De necessitate Linguae Græcæ ad  
Ecclesiæ Patrum intelligentiam - - - 90.

CAPUT V. De necessitate Linguae Latine ad in-  
telligendos Ecclesiæ Patres - - - 93.

CAPUT VI. Quanti intersit scire Linguas, ut  
Patres in fonte legantur - - - 101.

CAPUT VII. De re critica, ejusque usu in le-  
ctione Patrum Ecclesiæ - - - 108.

CAPUT VIII. Ad intelligendos Ecclesiæ Patres  
Gentilium Libri legendi sunt - - - 120.

CAPUT IX. Quid conferre possit Scholastica ad  
lectionem Patrum Ecclesiæ - - - 129.

CAPUT X. Quam necessaria sit ad intelligendos  
Ecclesiæ Patres Sacræ Scripturæ lectio - 138.

CAPUT XI. Historiæ cognitio ad intelligentiam  
Patrum Ecclesiæ adprime necessaria est 149.

CAPUT

# I N D E X

<b>CAPUT XII.</b> <i>Digressio ad Historiam Ecclesiasticam, qua Patres Ecclesiæ spectat</i>	156.
<b>CAPUT XIII.</b> <i>De subsidiis, quæ ad intelligendos Ecclesiæ Patres ex Historia profana peti possunt</i>	163.
<b>CAPUT XIV.</b> <i>Permagni interest Scriptores Ecclesiasticos prius nosse, quam illorum opera legantur</i>	170.
<b>CAPUT XV.</b> <i>Quodnam emolumentum adferre possint veterum Scriptorum Collectores intelligendis Ecclesiæ Patribus</i>	174.
<b>CAPUT XVI.</b> <i>De Editionibus Patrum, ac primo de Manuscriptis</i>	182.
<b>CAPUT XVII.</b> <i>Quid opus sit, ut sanum, rectumque de veteribus Manuscriptis iudicium feratur</i>	188.
<b>CAPUT XVIII.</b> <i>De recentioribus Ecclesiæ Patrum Editionibus</i>	194.



PARS



## C A P I T U M.

### P A R S T E R T I A.

De ordine, ac methodo, qua Patres  
Ecclesiæ magno cum fructu  
legi possunt.

CAPUT I. **D**E ordine in lectione Patrum  
servando . . . . . 206.

CAPUT II. *Varie legendorum Ecclesiæ Patrum  
methodi proponuntur* . . . . . 212.

CAPUT III. *Omnes Patrum Tractatus ad qua-  
tuor suprema Capita referri possunt, nempe  
Scripturam Sanctam, Dogmata Fidei, Chri-  
stianam Morum Doctrinam, atque Disciplinam  
Ecclesiæ* . . . . . 221.

CAPUT IV. *De lectione Patrum Ecclesiæ in  
Sacram Scripturam* . . . . . 225.

CAPUT V. *De Methodo, quam tenuere Patres  
in Sacrarum Scripturarum interpretatione* 229.

CAPUT VI. *De iis, quæ necessaria sunt ad  
Ecclesiæ Patres in Sacram Scripturam cum fru-  
ctu legendos* . . . . . 238.

CAPUT VII. *De Patrum Ecclesiæ delectu, qui  
Scripturam Sacram exposuere* . . . . . 246.

CAPUT VIII. *De lectione Patrum Ecclesiæ,  
qui Dogmata Fidei exponunt* . . . . . 252.

CAPUT IX. *De præcipuis Patrum Operibus ad  
Dogmata Fidei deligendis* . . . . . 259.

CAPUT

## I N D E X

- CAPUT X.** *De ordine servando in lectione Patrum de Fidei Dogmatis differentium* - 266.
- CAPUT XI.** *De regulis Critices servandis in lectione Patrum Fidei Dogmata exponentium* 273.
- CAPUT XII.** *Quomodo variorum hominum moribus, & ingenio se se accommodarent Ecclesiae Patres in pertractandis Fidei Dogmatis* 283.
- CAPUT XIII.** *De loquendi modis, de vocibus, atque figuris, quas Ecclesiae Patres adhibent in exponendis Fidei Dogmatibus* - - 294.
- CAPUT XIV.** *De lectione Patrum Christianam Morum Doctrinam exponentium* - - - 307.
- CAPUT XV.** *Qua ratione comparare se debeat Lector ad perdiscendam Patrum Ecclesiae de Moribus Doctrinam, necnon de optimo quorundam hac in re delectu* - - - - 314.
- CAPUT XVI.** *De lectione Patrum Disciplinam Ecclesiae exponentium* - - - - 320.
- CAPUT XVII.** *De Methodo servanda in lectione Patrum Disciplinam Ecclesiasticam exponentium* - - - - 327.
- CAPUT XVIII.** *De Ritibus, quos Ecclesia ex Judæis desumpsit, atque Paganis* - - 337.
- CAPUT XIX.** *De Consuetudinibus Ecclesiae, quarum origo evidenter non innotuit, atque erroribus, & laxamentis Discipline* - - 343.

PARS

# CAPITUM.

## PARS QUARTA.

### De Usu Patrum Ecclesiæ.

- CAPUT I.** **M**agna Auctorum, & Librorum copia, quos ad acquirendam Ecclesiasticam Scientiam hactenus proposuimus, Lectorem detertere non debet . . . . . 348.
- CAPUT II.** De tempore in studiis insumendo, quod utilis, & constans in iis opera collocetur 352.
- CAPUT III.** Quæ adhibenda sit in Studiis accuratio, ac diligentia . . . . . 357.
- CAPUT IV.** Ab Antiquis, ut fieri potest, Studiorum methodus est repetenda . . . . . 361.
- CAPUT V.** Quis usus Annotationum, & Collectionum . . . . . 370.
- CAPUT VI.** Quis adhibendus sit modus in eorum usu, quæ ab Ecclesiæ Patribus colliguntur 380.
- CAPUT VII.** Novas Patrum Editiones vulgare ad eos solummodo jure quodam spectat, qui in eorundem Patrum lectione diu, multumque se se exercuerunt . . . . . 383.
- CAPUT VIII.** De Commentariis, Animadversionibus; Dissertationibus, Scholiis; & Notis, quibus Viri in lectione Patrum exercitati, eorum monumenta illustrare possunt . . . . . 397.
- CAPUT IX.** Vocabularia colligere, quæ ad antiquorum Ecclesiæ Patrum intelligentiam conducunt, illorum est solummodo, qui in eorundem lectione Patrum diu, multumque versati fuerunt 404.

CAPUT

## INDEX CAPITUM.

- CAPUT X.** *Patrum Opera interpretari illorum est solummodo, qui in eorum lectione se dudum exercuerint* . . . . . 408.
- CAPUT XI.** *Qui in Patrum lectione se se exercuerunt, instituendæ tum Scientiis, tum Moribus iuventuti prodesse possunt* . . . 414.
- CAPUT XII.** *Qui in Patrum lectione versati sunt, Sacras explanando Scripturas Ecclesiam juvare possunt* . . . . . 420.
- CAPUT XIII.** *Theologiam docere ad illos jure quodam spectat, qui Patres dudum versantur* 426.
- CAPUT XIV.** *Qui legendis Patribus assueverunt rerum, historicarum, necnon antiquitatum Ecclesiæ studio de Christiana Religione mereri plurimum possunt* . . . . . 431.
- CAPUT XV.** *Qui Ecclesiæ Patrum Doctrinam funditus norunt, Populos Sacris Concionibus præ cæteris erudire queunt* . . . . . 435.
- CAPUT XVI.** *Qui perspectos habent antiquos Patres, Scriptis suis Ecclesiam præ cæteris juvare possunt* . . . . . 444.
- CAPUT XVII.** *Quibus facultas non est, vel voluntas docendi, atque scribendi, ii Sanctorum Patrum lectione ad suimet ipsorum instructionem summo cum fructu uti possunt* . . . 453.
- EPILOGUS.** . . . . . 458.



DE

DE OPTIMA  
LEGENDORUM ECCLESIAE PATRUM  
METHODO.

PARS PRIMA  
De auctoritate Patrum  
Ecclesiae.

CAPUT I.

*De Patris nomine, quo antiqui Ecclesiae  
Doctores donari consueverunt; de di-  
versis, quibus florere tempori-  
bus, deque varia illorum  
auctoritate.*



Ravissimum, Sanctissimumque  
Patris nomen, quo Veteres Pa-  
triarchae appellabantur, utpote  
qui Patres-familias haberentur,  
atque Doctores, ex veteri Te-  
stamento in novum translatum  
est. Insigni hoc titulo eos celebravit Ecclesia,  
qui primis duodecim saeculis floruerunt, sive  
ab Apostolorum temporibus ad Divum usque  
Bernardum, qui *novissimus inter Patres* voca-  
tur, non eam quidem ob causam, quod defe-

*Nicol.  
Faber.  
Opus.*

Aceriat

cerint post ejus ætatem Doctores, sed quod una cum scholastica disputandi methodo, tunc recens inuenta novi etiam tituli a Doctoribus fuerint usurpati.

Novatores, quorum interest plurimum vitam, & imperium, ut ita dicam, Sanctorum Patrum coarctare, vix paulo post sextum Ecclesiæ sæculum illius fines producunt. Etsi enim sequioribus ætatibus in Christi grege præstantissimos fuisse Viros fateri cogantur, illos tamen tanquam sophistas, atque serviles Romanæ Curie Patronos, tanto honore prorsus indignos, ex albo Patrum expungunt. Verum qui vel oculos injiciat in libros de *Consideratione* a Divo Bernardo scriptos ad Eugenium Papam, eoque cum Divi Augustini monumentis conferat, intelliget profecto luculentissime, doctrinam Ecclesiæ duodecimo sæculo & summa libertate defensam, & omnibus præjudiciis immunem fuisse. Sed de his alias fortasse opportunius.

Interim vero universum illud Ecclesiæ Patrum imperium in tres ætates tribuendum est, quarum prima continet eos, qui tribus primis, altera, qui totidem proxime consequentibus sæculis, postrema, qui floruerunt ad tertium usque supra decimum sæculum, quo Scholastici in Scholis dominari cœperunt (1). Primæ ætatis Patribus pluri-

(1) In Ecclesia quidem Occidentali sæculo dumtaxat decimo tertio usurpari coepta est methodus scholastica: in Ecclesia

autem Orientali illius usus obtrivit a sæculo 8., quo florebat S. Johannes Damascenus.

plurimum reverentiæ debetur, eam præcipue ob causam, quod Apostolorum tempora proxime attigerint, sive ad priscæ Theologiæ fontes, ac veterum Traditionum originem propius accedant.

Neque vero minus colendi Doctores alterius ætatis, qui Fidei dogmata erudite simul, ac eloquenter exponunt, tuenturque. Quum enim id unum doceant, quod tradidere Majores, etsi antiquitate distent a priscis Doctoribus, auctoritate tamen haudquaquam differunt.

Posteriores vero, quanquam nec vetustate cum primis, nec eruditione, ac eloquentia cum aliis comparandi sint, quum tamen eademtaxat colligant, quæ ab Antiquis sparsa, & lata fuere, eundem ac illi jure quodam hæreditario percipere fructum putantur.

Neque leviter sane affirmandum, investam semel corruptelam temporis decursu in immensum crevisse. Nullo enim non tempore viguere Traditiones, quæ sanioris doctrinæ firmissimæ bases sunt, atque fundamenta, immo vero ab his erroribus, in quos humana plerumque conditio nos ducit, facilius caverunt postremi Patres, quam prisci, qui & paucioribus subsidiis instructi erant, & sibi persuadere non poterant, in prævum aliquando sensum esse detorquenda, quæ ipsi bona fide, & absque diligentiori cura proferrent.

Enim vero nullibi apud Patres posteriores reperire est mendosos, vel duriores loquendi modos, qui apud Veteres passim occurrunt, &

in omnium oculos insiliunt. Omnis enim illorum cura, & studium in eo versabatur, ut puram, illibatamque fidem servarent in præcipuis fidei capitibus, parumve solliciti erant de tam accurato illam exponendi modo, ut ab ullo reprehendi non possent. Quamobrem errata, quorum redargui solent, parum attentæ potius, quam depravatæ illorum menti sunt attribuenda.

Deinde agitur hoc loco de sana, puraque Sanctorum Patrum doctrina, non autem corrupta, & falsa, quam instar zizaniorum in medio tritici ita segregat Ecclesia, ut hodiernis temporibus non distingui fere non possint reprehendendæ Veterum opiniones ab iis, quæ vel nullius prope momenti esse creduntur, vel tanquam catholicæ excipiuntur.

Itaque qui Patrum auctoritatem ex universali Ecclesiæ fide metitur, ita animo comparatus esse debet, ut perinde velit eos Ecclesiæ consentientes sequi, ac ab Ecclesia dissidentes deferere.

Equidem nonnihil temporis concedendum est, quamvis enim una semper fuerit, eademque Ecclesiæ doctrina, illustrandæ tamen veritati alia tempora aliis aptiora sunt, atque accommodatiora. Recurrendum quandoque ad pristina sæcula, nonnunquam ad media, vel etiam ultima. Omnium vero tutissima via est, ad illam, ut fieri potest, ætatem accedere, qua pertractatæ quæstiones, & dubia explanata fuerunt. Ita qui de ineffabili Trinitatis Myste-

rio



rio certior fieri velit, eos potius adibit Patres, qui post Arium, quam qui ante scripsere: quippe vetustissimis illis temporibus Ecclesiæ Doctores, omni semota disputatione, illius Mysterii fide dociles, submissos, ac in rebus fidei dubitare nescios auditores instituebant.

Quæ quum ita sint, nemo non videt, quam accurato iudicio opus sit in diligendis Patribus, in tribuenda quibusdam majori præ aliis auctoritate, quum occasio id postulat, in cavenda denique fucata veri specie, qua decipiuntur ut plurimum, qui diligentiores in eorum delectu critice non adhibent.

Quanti vero illud interfit, operis decursu liquido constabit, in quo Patres prodibunt modo, ut locupletissimi, certissimique Traditionis testes; tum ut Doctores, qui suum de rebus dubiis iudicium præferunt; modo ut oratores, qui nihil certo definiunt; tum vero ut Philosophi, qui in rebus ad fidem non pertinentibus proprias philosophicas opiniones sequuntur.



## CAPUT II.

*Quid sentiant Hæretici de auctoritate  
Patrum Ecclesiæ.*

**Q**Uum primum Hæretici animo sibi proposuissent priscam, ac veram Ecclesiæ doctrinam funditus evertere, deserenda; iccirco illis erat Sanctorum Patrum auctoritas, quæ mirandi hujusce ædificii columnen est, ac firmamentum. Hoc tamen in capite ut essent acri, ac turbulento ingenio, sibi nunquam constiterunt, sed varios humanarum rerum motus, mutationesque pro temporum, & locorum diversitate, (quæ maxima profecto est) considerantes; illorum auctoritatem nunc acceperunt, nunc exploserunt, prout vel nobis advertari, vel illis favere videbatur.

Ariani Patrum primæ ætatis patrocinio gloriabantur, quos ex levissimo verborum cortice sibi consentientes judicabant. Pelagiani Græcis Patribus nitebantur, qui nulla moti occasione altius arcana gratiæ scrutandi, multa concedere visi sunt naturæ viribus, quibus Pelagii sectatores cuncta referebant accepta. Severiani Eutychianorum soboles Dionysium Arcopagitam proferebant, tanquam eorum deliriis faventem, quam ob causam de Dionysii fide dubitatum aliquandiu est apud Catholicos.

Eandem inierunt viam recentiores Sectarii: verum quantolibet impetu auctoritatem Patrum

im-

imminuere conentur; illa tamen vel ad sui defensionem, vel ad catholicam fidem sustollendam utuntur sæpissime. Nihil extat omnino apud veteres illos Theologiæ Magistros, quod cum novatorum figmentis non pugnet; incredibile tamen, quot modis illorum verba distorqueant, ut ad eam tandem rationem illos componant, qua suam doctrinam firment, nostramque fidem evertant. Exemplo sunt manifestissimo, quæ ad ravim usque opponunt, ex Sancto Epiphanio argumenta, quamvis omnium Sanctorum Patrum in firmanda gestis, & exemplis Catholicorum doctrina contra novatorum deliramenta facile princeps haberi possit.

Diu, multumque hæsit Lutherus, anteaquam Ecclesiæ Patrum auctoritatem exploderet, ac primis defectionis suæ temporibus horrendum æque, ac periculosum esse affirmabat aliquid æquis auribus accipere, quod universali Majorum doctrinæ adversaretur.

Calvinus vero, quum nullo usus esset Magistro, quidquid theologicis in Scientiis profecerat, illud Ecclesiæ Patribus acceptum referebat, suamque novam doctrinam ex Augustino hausisse prædicabat, qua in re turpiter eum aberrasse demonstrat eximie doctissimus Pater *Front* in libro *Antitheseon* Augustini, & Calvini. Sicubi vero Calvinus Græcos Patres repellit, ea solum mente id facit, ut iis sufficiat Latinos, a quibus meliora subsidia

*Aug. & Calv. Antith.*

per-

perperam expectat ad turbulentissimam suam doctrinam stabiliendam.

Quemadmodum vero in defendendis, ita in repellendis Patribus non veritatis studio, sed solo suarum novitatum amore ducuntur, argumenta undequaque congerentes, miscentesque; ut hac in re, quæ alioquin plurimi momenti est, perturbationem, confusionemque maximam adferant.

Non omnes tamen pari animi æstu feruntur. Nonnulli remisse, ac moderate se gerunt: alii vero improba quadam temeritate, ac intolerabili violentia Sanctos Patres hæreseon paternos, fideique desertores traducere non erubescunt. Testem habemus præ cæteris Ministrum *Dumoulin*, qui Divum Cyprianum Doctorem adprime spectabilem Anabaptistis impudentissime adnumerat, cujus acerrimæ calumniæ reprehensionem meruit vel ab ipsis Sæctæ suæ defensoribus.

*Apol.  
proCan.  
Dom.  
Colom.  
Class.  
Epist.  
Cajaut.*

Nonnulli indignanter addunt, Patres fuisse homines sine literis, & ingenio, præcipites, inconsideratosque, atque adeo indignos, qui sanæ mentis iudicio cum quolibet profano scriptore comparentur; in divinarum Scripturarum expositione eos nihil consecutos effutiunt, ac longe postponendos inclytis *Protestantibus*, qui eas nostris temporibus explanarunt.

Quo in genere non inficiamur, profecto quosdam ex Novatoribus multum profecisse. Veteres etiam Hæretici pari cum laude scripserant,

rant, adeout trium, quatuorve sæculorum spatio illorum emendationibus uti non dubitarit Ecclesia (2). Verum cūnam debent eruditionem, quam efferunt tantopere Novatores? nonne Sanctis Ecclesiæ Patribus, quorum lucubrationes novis inventis forte fortuna amplioribus locum dedere? quibus tamen jure, ac merito gloriari nemo potest, quin priscos illorum fontes agnoscat, ac veneretur. Revera si penitus expendantur, quæ Grotius, alique recentiores Hæretici scripsere, compertum plane fiet, nihil ab eis novi inventum, sed in meliori solum lumine collocata, quæ ex antiquis Catholicorum libris hauserunt.

*Sim.  
Rep. &  
quelqu.  
Theol.  
de Holl.*

Quidam ex recentioribus Scriptoribus decem fortasse Veteres eruditionis suæ amplitudine exæquabit; verum decies majora præ Veteribus habuit commoda; & emolumenta. Itaque quum recentiores scripturarum Explanatores antiquis præstare videntur, iis anteponendi non sunt, eadem fere ratione, qua nefas esset præponere majoribus posteros, qui longa annorum, & parentum serie illorum divitiis fruuntur.

*Ponten.  
disc. sur  
les anc.  
et les  
modern.*

Hac in re Novatores parumper temperare potuissent & animo, & verbis. Dallæus, qui tam vehementer Ecclesiæ Patres insectatus est, vel ab ipsis Sectariis doctioribus, atque prudentioribus objurgari meruit. Et sane quam

(2) Hæ nimirum sunt versiones Aquilæ, Symma-

ci, & Theodotionis. Vide notam 24.

*Colum.  
Bibliot.*

quam Calvinistæ, Galli, ac Presbyteriani librum Dallæi plurimi faciant; Anglicani tamen, vulgo Episcopales, minus rigidi, & paulo æquiores parvi omnino pendunt. Istum Dallæi factum minimum inter ejus opera locum tenere censent, atque hoc unum in animo habuisse inquit Dallæum, ut Patrum dignitatem, & veteris Ecclesiæ splendorem obscuraret.

Johannes Fell Oxoniensis Episcopus in præfatione Egregiæ, quam vulgavit, Sancti Cypriani editionis profitetur, se non modo ab eorum consilio abhorreere, qui Patrum verenda nudare student, verum etiam niti velle, ut filium reverentem decet, quæ illis exciderunt, menda æterno silentio premere: dignissimum sane, piissimumque consilium, quod ab egregio viro Vincentio Lirinensi desumit.

*Apolog.  
Patr.*

Neque vero Minori studio fertur doctissimus Ecclesiæ Anglicanæ Theologus Scrivenerus in defensione Patrum, quam suscepit in apologia contra Dallæum. In ea Sanctos Patres omnium aptissimos esse docet judices ad finiendas controversias, quod præjudiciis vacui fuerint, quibus hodierna ætate cuncta refertissima sunt, quodque optimo animo, & charitate non ficta scripserint, neque de omnibus differere, ut nostris temporibus fit, libere adgressi sint, sed multo perfectiori intelligentia Sacros Codices, variosque Scripturarum sensus ampliori cognitione assecuti fuerint.

Jacobus

Jacobus Usserius Armachanus in Hibernia Archiepiscopus celeberrimus æquo animo eos ferre non potest, qui Ecclesiæ Patribus succensere audent. Grotius, Arminianæ Sectæ defensor Sanctos Patres magno semper in honore habuit. Andreas etiam Rivetus, quum rigidioribus Calvinistis sese adjunxerit, in eos invehitur, qui priscos Doctores gravissimis injuriis afficiunt, quorum beneficio, ingratis eorum industria, & labore otiose utentibus via explanata fuit.

Hic tamen Minister iis solum Patribus auctoritatem inesse fatetur, quos cum Scripturis Sacris consentire manifestum est: „ Scripturæ,  
„ (inquit) credimus propter se, Patribus autem  
„ tem propter consensum cum illa: sunt enim  
„ ( subdit ) testes veritatis, eamque digito  
„ monstrant: Scripturæ vero & Patrum, &  
„ nostrum omnium iudices, Quam Riveti doctrinam temporis successu pro certissimo dogmate tenere Novatores.



## CAPUT III.

*Quid sentiant Romanæ Ecclesiæ Theologi  
de auctoritate Patrum.*

**R**omanæ Ecclesiæ Theologi, qui de auctoritate Patrum scripserunt, in varias abiecerunt sententias. Sunt enim inprimis nonnulli, qui eam cum auctoritate Prophetarum, divinorumque Scriptorum comparandam existimaverint; aliqui vero ita eam coarctarunt, ut quæ illis jure convenit, nulla fere sit reliqua; alii demum mediæ viæ insistentes, auctoritatem, quæ illis debetur, vindicarunt, quam vero nunquam iis tribuit Ecclesia, abjudicandam omnino censuerunt.

Primæ opinionis auctor vulgo creditur Abbas Fridegillus ineunte sæculo 9. In eandem sententiam concessit Interpres decreti, atque Sancti Augustini testimoniis omnino contrariis reponit, illius sententiam plurimi faciendam fuisse, quo tempore scripta Patrum non habebantur authentica; postea vero, quam illa certæ fidei agnovit Ecclesia, ad unum utque jota fidem iis adhibendam.

*Advers.  
Hæres.  
l. 1. c. 7.*

*Loc.  
Theol.*

Ejusmodi opinamentum irridet Alphonsus Castrensis. Illud pari modo explodit Melchior Canus post Agobardum olim Lugdunensem Episcopum, qui Fridegisum maximæ ignorantis insinuat, & risu excipiendum traducit, propterea quod Scripturarum, nescio quos, Interpretes



terpretes Prophetis, divinisque Scriptoribus, Symmacum S. Paulo, & Didymum S. Joanni Evangelistæ æquare non erubuerit.

Excusari fortasse possent Fridegismus, & Interpretes, quod adeo certam auctoritatem non omnibus indiscriminatim Ecclesiæ Patribus tribuant, sed nonnullis solummodo, iisque præstantissimis, nec quæcunque de re disputantibus, sed de præcipuis dumtaxat fidei capitibus, de quibus tam apte, tamque accommodate scripserunt, ut dignos existimarit Ecclesiæ, quorum sensa optaret, ac ipsamet verba in sanciendo Canonibus adhiberet.

Hac ratione Concilii Francofordienfis Patres dicere non dubitarunt, Ecclesiæ Doctores divinitus nobis datos fuisse; ut iis Institutoribus & Fidei Mytheria edoceremur, & ad æternam salutem recta duci possemus. Eodem modo Basilamon in Codice, quem Synodus Trullana probavit, pari cultu prosequenda affirmat & Patrum dogmata, & Conciliorum Oecumenicorum decreta.

Secundam vero sententiam de auctoritate Patrum tuetur Cardinalis Cajetanus, cujus hæc opinio est, in Sanctarum Scripturarum interpretatione, nullo virorum habito delectu, iis modo inhærendum esse, qui illarum sensum exponere, ac literam aptius explanare valent.

„ Et si quandoque occurrerit novus sensus Textui consonus, nec a Sacra Scriptura, nec ab Ecclesiæ doctrina dissonus, quamvis a torrente Doctorum alienus, æquos se præbeant

*Epist.  
Synodo*

*Præf.  
in Pen.  
targu*

„ beant Censores. Meminerint jus suum uni-  
 „ cuique tribuere: solis Sacrae Scripturae Au-  
 „ thoribus reservata est auctoritas hæc, ut ideo  
 „ credamus sic esse, quia ipsi ita scripserunt,  
 „ *Illos autem* ( inquit Augustinus ) *ita lego,*  
 „ *ut quantalibet sanctitate, doctrinaque præ-*  
 „ *polleant, non ideo credam sic esse, quia*  
 „ *ipsi ita scripserunt.* Nullus itaque detestetur  
 „ novum Sacrae Scripturae sensum, ex hoc,  
 „ quod dissonat a priscis Doctoribus. Sed  
 „ scrutetur peripicacius Textum, ac Contex-  
 „ tum Scripturae, & si quadrare invenerit,  
 „ laudet Deum: qui non alligavit expositio-  
 „ nem Scripturarum Sacrarum priscorum Do-  
 „ ctorum sensibus, sed Scripturae ipsae inte-  
 „ græ sub Catholicae Ecclesiae censura. Alio-  
 „ quin spes nobis, ac posteris tolleretur ex-  
 „ ponendi Scripturam sacram, nisi transferen-  
 „ do ( ut ajunt ) de libro in quinternum.

Certe quidem Patrum dicta non ita scrupulose accipienda sunt, ut iis quidquam proprio Marte inventum adjicere nefas esse credatur. Verum in dogmatis Fidei, quæ Sancti Patres cum universa Veterum traditione exponunt, ab illorum sensu deflectere religio est; alioquin semel constituta veritas deficeret, atque ad fidem non pertineret, quod eam spectare aliquando creditum est.

Quis enim neget, & hodie a Deo Optimo Maximo ad illustrandam veritatem hætenus nonnihil subobscuram hominum ingenia excutari posse? Quid ergo vetat, ne recentes pro-  
 deant

deant Scripturarum interpretationes, modo ratum sit integram haberi, constantem, & unanimum Patrum traditionem? Quid ni eorum sensa firmari, clarius elucidari, ac fusius explicari queant? eccur iis ducibus multa aperire non liceat? atque si uni, eidemque Patri duobus, vel tribus modis eundem Scripturæ locum exponere tuto licuit, quid causæ esse potest, cur illud recentiori non liceat interpreti, dum facta, testaque seruetur fides, & religio?

Veritas secum ipsa non pugnat: neque si recentiori placuerit Interpreti, nomine panis quotidiani, de quo sermo est in Evangelio, cibum corporeum intelligere, quem a Deo quotidie petimus; atque hæc expositio Antiquis ignota fuisset, ideo diffentire a Divo Hieronymo censendus esset, qui de cibo spiritali explicuit. Optime enim hæc duo secum invicem cohærent, atque cum universa fide nullo modo pugnant. Deinde in rebus dubiis, vel levioris momenti, salva, quæ debetur Ecclesiæ Patribus, reverentia, facultatem habet quisque propriam, licet ab iis diversam, opinionem proferendi; in constantissimis vero traditionibus, vel in dogmatis fidei illis concedere oportet, fascesque submittere.

Atque istud est, quod fateatur Cajetanus, quum a recentiori Interprete postulat, ut Ecclesiæ iudicio, ac definitionibus sese submittat. Quæ res, si rite, & ut par est, experta datur, eo recidit, nempe in rebus fidei discernendum

*Sim.  
resp. a  
quodam  
Theol.  
de Holl.*

dendum non esse ab unanimi Patrum consensu, illorum videlicet, qui non singularia placita ex interpretatione Scripturarum, sed Scripturæ sensum ex universa Ecclesiæ fide hauserunt: ut enim optime ait doctissimus quidam Theologus, „ Ecclesia columna est veritatis, quia „ custos non modo veterum traditionum, verum etiam sanioris Scripturarum expositionis. „ Atque quum veteres Patres docent, ad Ecclesiastam pertinere Scripturas, de illarum sensu perinde, ac de sacris Libris verba faciunt. „ Quamobrem Scripturarum auctoritate utentes ad stabilienda fidei dogmata non unumtaxat verborum cortici hærent, verum etiam sensum intimius pervadunt; eumque ex communi Ecclesiarum fide definiunt, quarum fundamenta jecerunt Apostoli.

Tandem, qui mediam tenent viam de auctoritate Patrum, ajunt, nonnunquam illorum sententias pro conjecturis habendas, adeoque ad probabiles solummodo referri posse, quas cuique pro libito probare, vel rejicere fas sit; ubi vero quidquam ad fidem pertinere unanimi consensione definiant, illis æque firmiter assentiendum esse, ac cuilibet Spiritus Sancti oraculo; neque enim in unam, eandemque sententiam, nisi Spiritu Sancto auctore, convenire uno animo possunt, qua in re tota veterum Doctorum auctoritas collocanda est.

Enim vero bifariam Sancti Patres spectari possunt, vel tanquam Doctores, qui proprias singulares sententias proferunt, vel tanquam locu-

locupletissimi, & integerrimi veterum Traditionum testes. Utcunque vero considerentur, illud alta mente tenendum, quod ait doctissimus *Holden* „servanda in necessariis unitas, „in dubiis libertas, in omnibus charitas.

## CAPUT IV.

*Quid sentiant de auctoritate Patrum, ipsimet Ecclesiæ Patres.*

**D**Ivus Augustinus sexcentis in locis ita <sup>Epist. p. 2. adin.</sup> legendos esse tradit Scriptores Ecclesiasticos, ut quantacunque polleant sanctitate, & doctrina, indubitata fides iis non adhibeatur, nisi rectæ rationi, divinisque Scripturis consentire certum sit, ac manifestum; adeo ut, iis sublati, illorum sententiæ nullo fundamento subnixæ improbari, immo etiam repudiari possint.

Addit idem Ecclesiæ Doctor, non ita legendos Sanctos Patres, sicut Prophetæ, & Apostoli, de quorum doctrina vel dubitare nefas est: nulla etiam lege constitutum fuisse, ut omnia Patrum dicta certo credantur, immo jus cuique esse pro facultate sua liberrimum de illis ferendi iudicium.

„Ego proinde fateor, (inquit amico suo Marcellino Doctor ille, tum scientia, tum „humilitate clarissimus) me ex eorum numero, mero esse conari, qui proficiendo scribunt,

„ & scribendo proficiunt; unde si aliquid vel  
 „ incautius, vel indoctius a me positum est,  
 „ quod non solum ab aliis, qui videre id  
 „ possunt, merito reprehendatur, verum etiam  
 „ a me ipso ( quia & ego saltem postea vi-  
 „ dere debeo, si proficio ) nec mirandum est,  
 „ nec dolendum; sed potius ignoscendum,  
 „ atque gratulandum, non quia erratum est,  
 „ sed quia improbatum..... Vos autem, qui  
 „ me multum diligitis, si talem asseritis ad-  
 „ versus eos, quorum malitia, vel imperitia,  
 „ vel intelligentia reprehendor, ut me nusi-  
 „ quam scriptorum meorum errasse dicatis,  
 „ frustra laboratis, non bonam causam susce-  
 „ pistis, facile in ea me ipso iudice supera-  
 „ mini..... Romani maximus Auctor Tullius  
 „ eloquii, *nullum unquam verbum*, inquit de  
 „ quodam, *quod revocare vellet, emisit*. Quæ qui-  
 „ dem laus, quamvis præclarissima videatur,  
 „ tamen credibilior est de nimium fatuo,  
 „ quam de sapiente perfecto..... Sed si in  
 „ bonam partem accipiat, ut quempiam  
 „ talem fuisse credamus, qui cum sapienter  
 „ omnia loqueretur, *nullum unquam verbum*,  
 „ quod revocare vellet, emisit: hoc potius  
 „ de hominibus Dei, qui Spiritu Sancto acti  
 „ locuti sunt, quam de illo, quem sic Cicero  
 „ laudat, saluberrima pietate credendum est.  
 „ Ab hac ego excellentia tam longe absum,  
 „ ut si nullum verbum, quod revocare vellem,  
 „ protulero, fatuo sim, quam sapienti simi-  
 „ lior. Illius quippe scripta summa sunt au-  
 „ thoritate

„ Auctoritate dignissima, qui nullum verbum,  
 „ non quod revocare vellet, sed quod revo-  
 „ care deberet, emisit. Hoc quisquis nondum  
 „ est assecutus, secundas habet partes modestiæ,  
 „ quia primas non potuit habere sapientiæ;  
 „ quia non valuit omnia non pœnitenda dili-  
 „ genter dixisse: pœniteat, quæ cognovit, di-  
 „ cenda non fuisse.

Gregorius etiam Magnus existimat, Sanctos *Moral.*  
l. 26.  
 Ecclesiæ Patres, quamvis in exponendis Scrip-  
 turis fusiori calamo scripserint, quam sacro-  
 rum Librorum Auctores, cum iis tamen com-  
 parandos non esse, e quibus, velut ex primis  
 fontibus, universa istorum scientia manavit;  
 aitque, illos falsa omnino laude celebrari,  
 quum ea virtute, auctoritateque donantur,  
 qua præditi nunquam fuerunt.

Ecce, inquit Augustinus, oculos vestros, *In Job.*  
*trakt. 1.*  
 & sensus istos corporis levatis ad nos, nec ad  
 nos, non enim nos de illis montibus; sed ad  
 ipsum Evangelium, ad ipsos Evangelistas,  
 quorum nomine verba facimus, oculos con-  
 vertere debetis: ii quippe montes sunt, e quibus  
 cœlestia Beneficia, ac divina charismata fluunt  
 uberrime.

Divus Hieronymus, qui suam cum Prophe-  
 tarum auctoritate æquandam non esse cense-  
 bat, de felici susceptæ Bibliorum interpretationis  
 exitu dubitabat magnopere. Fatetur, Patres  
 nonnunquam errasse, atque bene multa ab an-  
 tiquis Doctoribus imprudenter prolata, e quibus

successu

succellu temporis improbi homines cuderdis calumniis occasionem arripuere.

Epistola vero 151. æquissimo, quo pollebat censoris iudicio, carpit, suggillatque paullo vitiosas loquendi formulas, quæ Patribus Ecclesiæ nonnunquam exciderunt. Omnia, inquit ille, expendere in Scriptorum Ecclesiasticorum historia sibi propositum, adeo ut, quæ bona sunt, & laude digna, defendat, cætera vero relinquat, nec, nisi secundum Fidei Catholicæ regulas, & documenta ferat sententiam.

Hom. 2.  
in Exeg.  
Catech.  
4.

Epist.  
97. l. 7.

Neque vero Origenes, Cyrillus Hierosolymitanus, Ambrosius, alique demum Græci, Latinique Patres plus æquo sibi vindicant auctoritatis; verborum enim, quibus utuntur, genus, ac moderatio, si expendantur paullisper, perspicue ostendunt, ea, quæ conjectando dicebant, nunquam haberi voluisse pro immutabili sententia, sed hac solum mente protulisse, ut publici juris facerent animadversiones, & sensa, quibus redundabant.

Quamquam verò tam moderate sentiant, quum de unius, aut alterius singulari opinione agitur; attamen quum de unanimi, concordique omnium, vel fere omnium sententia in fidei dogmatis loquuntur, nullum errori locum esse pronunciant, atque unanimem illam consensionem certissimam regulam affirmant, quæ sine totius religionis iactura violari non possit. Quamobrem inquit Divus Augustinus eum, qui ab unanimi Patrum consensione discedit, ab universa etiam Ecclesia recedere.

Epist. in  
Iul.

Ut



Ut autem refellat Julianum Episcopum, utitur tanquam invicto argumento, sententia SS. Patrum de auxilio gratiæ, cujus vim omnem a natura repetebat Julianus. Quandoque Patres, inquit, absque ullo Fidei detrimento, a se invicem dissentiunt, nec inficiari quisquam audeat, nonnullos præ aliis rectiorem, solidioremque ratiocinationem instituere, atque celerius ad propositum finem pervenire. Verum, quid hæc ad præsens institutum? agitur enim de fundamentis Fidei, in qua Sanctorum Patrum auctoritas gravissimum pondus est, quod vos omnino opprimit, atque novitates, levissimasque ratiunculas, quas nobis obtruditis, in pulverem redigit, quum nihil uspiam docuerint, quod non invenerint in Jesu Christi Ecclesia creditum.

In rebus Fidei non propria quisque placita, sed Sanctorum Patrum Traditionem, & sensa consulere debet, inquit D. Clemens Papa *Epist. 34*. Veterum auctoritatem omni studio tueri nititur S. Irenæus; ac D. Epiphanius ad universalem Ecclesiæ Doctorum consensionem in exponendis Scripturis provocat Sectarios. *Har. 69.*

A recto veritatis tramite aberrat, ait D. Clemens Alexandrinus, qui Scripturas Sacras ex Sanctorum Patrum Traditione non explicat.  
„ Servemus (ajebat ad Gratianum Imperatorem  
„ Ambrosius) præcepta majorum, nec hæreditaria signacula ausu rudis temeritate violemus,  
„ sive servemus sanioris doctrinæ dogmata, tot  
„ Confessorum prædicatione firmata, tot, qui

nos præcessere, Sanctorum Martyrum sanguine signata, atque sacrata.

*In Dan.*  
12.

Quisquis ( ait Hieronymus ) ab unanimi Patrum consensione recedit, ad semetipsum periculosissime accedit, ea præcipue ratione, quod & Doctorum Ecclesiæ scientia careat, & lumine gratiæ, quo Deus Optimus humilium animos illustrare solet, sit destitutus. Divus Basilius, & Gregorius Nazianzenus in Sacrarum Scripturarum explanatione non sibi, sed uni Veterum auctoritati, atque sententiæ confidisse testantur,

Charisius Presbyter Philadelphiensis Ecclesiæ administrator in libello, quem contra Nestorium obtulit, Patribus Synodi Ephesinæ declarat, probum, honestumque Virum ita animo comparatum esse debere, ut dignam Patribus reverentiam, & fidem, quoties se prodit occasio, testatam facere cupiat.

D. Cyrillus in suo ad idem Concilium Apologetico pro duodecim Capitulis contra Episcopos Orientales ait, a quocumque sanæ mentis Viro Patrum sententiæ omni studio sequendas esse, propterea quod sapientissimi illi Pastores, quum dogmata Fidei ex Scripturæ Sanctæ oraculis, & ex Apostolica Traditione finierint, velut Orbis lumina habendi sunt, ac veluti naves excipiendi, quæ per universum terrarum orbem Verbum vitæ æternæ adferunt, diffunduntque. Et sane, ut ait Lan-  
,, francus, hæ Scripturæ, tamen illam excel-  
,, lentissimam auctoritatis arcem non obtinent,  
qua

„ qua donatæ sunt, quas Propheticas, five,  
„ Apostolicas nuncupamus, hoc tamen probare  
„ sufficiunt, quod hanc fidem, quam nunc  
„ habemus, omnes Fideles, qui nos præcesse-  
„ runt, a priscis temporibus habuerunt.

## C A P U T V.

### *Quid sentiat Vincentius Lirinensis de auctoritate Patrum.*

**V**incentius Lirinensis, celeberrimus quinti  
sæculi Scriptor, quum ab Antiquis col-  
legerit, quid de auctoritate Patrum Ecclesiæ  
sentiendum sit, fundamenti loco ponit, absque  
dubitatione credenda, quæ Patres constanti,  
atque unanimi consensu perspicue docuerunt.  
„ Quidquid (ait) non unus, aut duo tantum,  
„ sed omnes pariter uno, eodemque consensu  
„ aperte, frequenter, perseveranter tenuisse,  
„ scripsisse, docuisse cognoverit, id sibi quo-  
„ que intelligat absque ulla dubitatione cre-  
„ dendum.

Novatores, quibus hæc Vincentii doctrina  
non arridet, ut ab ejus Consectariis sese ex-  
pendiant, ajunt inprimis, illius doctrinæ sub-  
sidio non omnes, sed aliquas duntaxat hæreses  
expugnari posse, eas nimirum, quarum aucto-  
res recenter nati, satis otii, & temporis non  
habuere, ut vetera, quicum pugnant, monu-  
menta adulterarent. Quid enim juvat, inquiunt,

Traditionem proferre contra hæreticam opinionem, quæ altius jam in animis hominum inlederit, & ultimam obtendat antiquitatem.

Verum etiamsi hocce præsidio felicius nascentes, quam adultæ, vel senescentes hæreses refellantur, illud tamen certo affirmandum, nullum esse Hæreticorum inventum, quod ejus ope funditus non evertatur. In hoc autem negotio cavendum adprime, ut opportune, atque cum iis solum adhibeatur, qui tanti principii vim omnem, & robur intelligant.

Ita plerumque duro sunt, ac pervicaci ingenio Hæretici, ut nullius Scriptoris auctoritate ad meliorem frugem adduci possint. Quamobrem, qui cum illis disputat, satius habuerit soli Ecclesiæ definitioni inhærere, quam sine ulla profectus spe acriorem cum illis pugnam instituere. Ubi vero spes aliqua emendationis affulgeat, non alia validius ratione urgeri possunt, quam proposita Vincentii regula; eam, quippe veluti machinam commolitus est Lirinensis ad evertendas hæreses sua ætate nascentes, quæ contra quamlibet deinceps prodituram felicissimo successu adhiberi potest. Etenim quum Patrum traditio medium quodammodo locum teneat Sacras inter Scripturas, in quarum interpretatione versantur difficultates, & turbulenta hominum ingenia, a quibus illæ excitari solent, ad expugnandas hæreses omnium aptissimum, validissimumque præsidium reputanda est.

Instant

Instant Novatores, ajuntque, Lirinensis sententia labefactari potius, quam firmari auctoritatem Patrum, plus enim illi tribuit, quam par est, certitudinis, quum eam ab omni erroris suspitione vindicet; itaque res omnium iniquissima foret controversias Fidei ad eorum tribunal referre.

Ast tolle jus Patrum: ecquod quæso, reliquum erit tribunal, ad quod recurramus? nunquid Scriptura? Atqui origo illa est, & fons omnium, quæ vertuntur, difficultatum, quo fit, ut ea judice, nihilo certiores fieri possimus, sed magis, magisque potius fluctuemus, quum nonnisi confuse, obscureque controversias definiat.

Statutam revera legem habemus, at interpres desideratur, & judex, cujus beneficio legis sensus certo constet, evidenterque. Hunc Interpretem adprime necessarium esse nemo unus dubitat, ne adversariis quidem exceptis, quibus admodum familiare est Trinitariis, Anabaptistis, & Socinianis auctoritatem Patrum opponere, nobis vero Prophetas quosdam insolitos, inauditosque Pastores, quos postremis hisce temporibus tanquam novæ quædam sydera ad dispellendas mentis nostræ tenebras Deus præter morem excitavit.

Addunt præterea, Vincentium Lirinensem nonnisi dubitando locutum, adeo ut ne ipse quidem de illius principii veritate certus esse videatur. Deinde tot, ac tanta postulat ad certam Patrum auctoritatem, ut nunquam  
fere

fere locum habere possit; quæ si concurrant omnia, iis fidere haudquaquam difficile erit; verum quum vix, ac ne vix quidem concurrere possint omnia, eas tanquam certas ponere perinde est, ac arenam pro fundamento locare.

Proh futilem, inanemque cavillationem! Qui enim fieri potuit, ut Vincentio persuasum non esset de illius sententiæ veritate, quam ex communi Ecclesiæ sensu hauserat, iisque solum conditionibus proponit, quas recta ratio dicit, firmat, ac postulat a quovis Doctore divinitus misso? Revera quis fidem haberet proposito religionis Magistro, quem nullus certissimæ veritatis character distingueret?

Illud saltem pernecessarium est, inquit Livinensis, ut sint Viri singularis exempli in tuenda Ecclesiæ fide constantissimi, qui nihil, nisi ab Ecclesia catholica acceptum profiteantur, qui demum in religione nihil definiant, quod ex legitima Traditione Patrum divinæ Scripturæ explanatorum non hauserint.

Urgent demum adversarii, ajuntque, a nobis verbo tenus commendari unanimem Patrum consensionem, revera tamen, ubi se præbet occasio, deprimi, atque everti omnino, Quum enim altera ex veterum horumce Theologorum opinionibus optanda est, Ecclesiam adimus, ejus judicio alios probari necesse est, alios improbari.

Verum istud ad Ecclesiam perfugium æquissimum est, ac saluberrimum, eoque ne tantillum

lum quidem læditur Patrum auctoritas, immo magis, magisque firmatur. Etenim Ecclesia Veterum perinde, ac Recentiorum iudex est universalis, quæ parvi pendens præjudicatas singularium quorundam opiniones, in his, quæ fidem spectant, secundum communem Patrum sententiam jus dicit, atque pronunciat.

Neque vero Novatoribus fas est hanc Ecclesiæ auctoritatem in dubium vocare; quum hac in re, teste insigni illorum Ministro, a Romanis catholicis haudquaquam dissentiant, quanquam illud fortasse satis attente non considerant. Enim vero perpetuo opponunt Ubiquistis, Anabaptistis, Arminianis, atque Socinianis, contemptam ab iis Ecclesiæ vocem, & spiritum, quo regitur, ac gubernatur; indeque natos ajunt illorum errores, & schismata, quod Ecclesiæ sanctionibus parere detrectent; unumque duntaxat tribunal agnoscant, videlicet Sacrarum Scripturarum, quas pro suo quisque modulo exponit, sive potius pro libito contorquet.

*Le Proc.  
test. pa-  
cif. &  
Antier  
de Verré  
Minist.  
de la R.  
P. R.*



CAPUT

## CAPUT VI.

*Quid sentiat Ecclesia de auctoritate Patrum.*

**T**AM arcto nexu colligantur Patrum, & Ecclesię auctoritas in rebus Fidei, ut alterum sine altero nec esse, nec cogitari possit: una quippe Fides est, atque unus, idemque spiritus, quo utraque auctoritas simul atque iis nixa Religio christiana regitur, ac gubernatur. Et vero quid præstant Ecclesię Patres in aliquod Fidei dogma una voce, unoque animo convenientes? nimirum doctrinę in universa Ecclesia quavis ætate acceptę, ut tradidere Majores, testimonium perhibent. Quid autem præstat Ecclesia fidem suam in Conciliis exponens? nimirum firmat, atque indubitatę fidei declarat testimonium, quod dederunt Patres, iisdem dogmatibus in universa Ecclesia probatis, atque defensis.

Deinde quomodo impleri poterunt verba Christi promittentis Discipulis suis, ubi duo, vel tres congregati essent in ejus nomine, se in medio eorum adfuturum, nisi quum Patres in unum convenientes de dogmatis Fidei sententiam dicunt? testem appello Divum Augustinum, cujus ea mens est, unanimem Patrum consensionem in Fide omni erroris periculo vacare. Qua de re si dubitare paululum liceat, sponte fuit, Ecclesiam, amantissimam  
 alio-



alioquin Fidelium Matrem, cum illorum doctrinam probet, maximo in errore versari, suosque Fideles decipere; quo quid absurdius, quid magis horrendum excogitari potest?

Nulla unquam fuit ætas, qua Christiani concordia Patrum testimonio in rebus Fidei ultro non steterint, & ab eo dissentire perinde non duxerint, ac Ecclesiæ refragari, ejus doctrinam contemnere, & ab illius communione recedere: quod usque adeo verum est, ut Eutyches, vir omnium vaferrimus, idemque scelestissimus. hanc præcipue causam obtenderet, cur ab opinione sua non discederet, quod Sanctorum Cyrilli, Athanasii, aliorumque veterum Patrum auctoritate suffulta, absque totius Ecclesiæ contemptu derelinqui non posset. Verum insulsa omnino, atque temeraria excusatio, utpote quod Concilii definitionibus contradicere non posset, quin una Sanctorum Patrum doctrinam repudiaret, cujus ope Canones sanciebat Ecclesia in Concilio collecta.

Non credit in Dominum Jesum, qui Sanctis fidem non habet, inquit Apostolus, cuius verba exponens Divus Hieronymus ait, cum sincero corde in Deum non credere, qui fidem non habet Doctoribus, quibus tanquam instrumentis utitur Deus ad erudiendos Fideles. Atque idem semper fuit Ecclesiæ sensus; illudque adprime notandum in Synodo Constantinopolitana prima, in quam præcipui Sectariorum illius ætatis Episcopi convenerant, Nestarium Concilii antistitem hac solum via  
eos

eos aggressum fuisse, vehementer urgendo, ut aperte dicerent, vellent nec se stare iudicio Patrum, qui ante floruerant, quam nascerentur hæreses, de quibus agebatur.

Neque alio Patres Synodi Ephesinæ primæ usi sunt præsidio, ut expositiones Symbolo Nicæno ab ingeniis turbulentis, & seditiosis affictas refellerent, quam testimonio Patrum, qui veram illius intelligentiam aperuere.

Eodem in Concilio lecta sunt ex Majorum doctrina, quæ contra scelestissimum Nestorium dicta jam fuerant. In Concilio autem Chalcedonensi una cum Symbolis Nicæno, & Constantinopolitano objecta fuit Eutycheti Sancti Leonis Epistola ad Flavianum, aliorumque Patrum loca, quibus illius errores damnabantur.

Constantinopolitanæ Synodi Patres contra Theodori Mopsuesteni memoriam Divi Augustini sententiam de Sectariis ante, & post obitum damnatis statuerunt. Sic Præsules Synodi Nicænæ secundæ, Oecumenicæ septimæ ab exemplis, & auctoritate Patrum argumentum duxere, quo Sanctarum Imaginum cultum ad antiquissimam Traditionem cum Ecclesia simul ortum, atque compluribus miraculis firmatum, pertinere monstrarent.

Quid, quod Sacri Conciliorum Canones ex Veterum monumentis totidem ut plurimum, verbis excerpti sunt? exemplum præbent evidentissimum Canones Concilii Arausici secundi, qui totidem Augustini disputantis contra Semipelagianos verbis constant, atque sententiis.

Denique

Denique Synodus Tridentina antiquorum Patrum doctrinæ, sicuti aliorum Conciliorum epitome est, atque compendium; & quemadmodum Aquilejensis singillatim Concilii Caput fuit Divus Ambrosius, ita omnium generatim, quæ recipiuntur, Conciliorum Ecclesiæ Patres indubitanter dici possunt duces, & auctores.

## CAPUT VII.

*Ostenditur erroribus, Antilogiis, aliisque mendis, quæ apud Ecclesiæ Patres nunquam occurrunt, auctoritatem, quam illis adserimus, illam sam manere, atque incorruptam.*

UT felici successu dispellantur tenebræ, quas collectis undique Patrum sententiis offundere conantur Sectarii, miscentes invicem cum dogmatis Fidei, quæ ad disciplinam, quæ ad Philosophiam, vel etiam Grammaticen spectant, suis quæque loco statuenda sunt, ac tot machinationibus laudatum Vincentii Lirrenensis, sive totius Ecclesiæ Systema opponendum, quod vel uno primis constituto, quidquid blaterent Novatores, falsum, sibi non constans, atque fallacibus solum fucis illitum subito, ac perspicue dignoscetur.

Fatendum

Fatendum sane, nonnullos ex antiquis Patri-  
bus in opiniones ab Ecclesia improbatas abiisse.  
Sic Papias, Justinus martyr, Irenæus, aliique  
Millenariorum inventa, sic Clemens Alexan-  
drinus Philosophorum Gentilium placita opta-  
runt. Arnobius pariter, atque Lactantius in  
nonnullis peccant, in quibus se Oratorum  
magis, quam Theologorum scientiam calluisse  
ostendunt. Epiphanius in cæteris carpendis  
valde sollicitus, suis & ipse mendis non ca-  
ret. Divus Hieronymus de providentia Dei,  
qua res omnes creatas, etiam infimas mode-  
ratur, atque gubernat, parum digne sensisse  
videtur (3). Augustinus etiam non pauca pro-  
tulit,

[3] Hanc in D. Hieronymum  
cenfuram sumsit auctor hu-  
jus primæ partis ex Dallæo,  
qui exprobrat Sancto Hie-  
ronymo, quod sentiat com-  
ment. in Habacuc Cap. 1.  
summa Dei providentia cu-  
rari quidem genus huma-  
num, non autem creatu-  
ras ratione carentes. Quæ  
quidem censura iniqua  
prorsus est: non enim ne-  
gat Hieronymus, divina  
providentia res omnes crea-  
tas, quæcunque tandem  
eæ sint, repi, ac governa-  
ri, sed discrimen statuit  
solummodo inter admini-  
strationem rerum ratione  
utentium, & earum, quæ  
carent ratione; quod vide-  
licet erga res rationales pro-  
videntia Dei paterna sit,

atque benevola, non item  
erga cæteras. En ejus ver-  
ba „ Sicut igitur in homi-  
„ nibus etiam per singulos  
„ Dei currit providentia;  
„ sic in cæteris animalibus  
„ generalem quidem dif-  
„ positionem, & ordinem,  
„ cursumque rerum intel-  
„ ligere possumus. Verbi  
„ gratia quomodo nascatur  
„ piscium multitudo, &  
„ vivat in aquis: quomo-  
„ do reptilia, & quadru-  
„ pedia oriantur in terra,  
„ & quibus alantur cibis.  
„ Cæterum absurdum est  
„ ad hoc Dei deducere ma-  
„ jestatem, ut sciat per  
„ momenta singula quot  
„ nascentur culices, quot  
„ ve moriantur; quæ ci-  
„ micum, & pulicum, &  
„ musca-

sulit; quæ postea revocare coactus fuit. Sic denique Patres, qui primis tribus Ecclesiæ sæculis florere, de Mysteriis SS. Trinitatis, & Incarnationis parum castigate scripsisse videntur.

Illud etiam ingenue fatendum, non omnium in omni disputatione unam esse sententiam. Ita de die celebrandi Paschatis pugnabant Asiatici cum Romanis Episcopis; de rebaptizandis Hæreticis Cyprianus, alique Præsules Africani cum Stephano Summo Pontifice; de Animarum autem origine aliter Augustinus, aliter sensit Hieronymus (4); ita demum familiares

sunt

„ muscarum sit in terra  
„ multitudo; quanti pisces in aqua nati-  
„ scuntur, &  
„ qui de minoribus majorum prædæ cedere debeant. Non sumus tam fatui adulatores Dei, ut dum potentiâ ejus etiam ad ima detrahimus, in nos ipsos injuriosi simus; eandem rationabilium, quam irrationabilium providentiam esse dicentes.

[4] Consulto dixit Auctor hujus operis in quæstione de Animarum origine aliter sensit Augustinum, aliter D. Hieronymum, non autem disputasse. Quum enim intricatissima foret hæc quæstio, quam D. Hieronymus, maximam Ecclesiasticam quæstio-

nem, appellat, varie quidem senserunt laudati Ecclesiæ Doctores; nimirum Hieronymus in eam magis propendebat sententiam, quæ singulas singulis hominibus animas creare propugnat: Augustinus vero, præsertim post natos Pelagianos, eam magis probabat, quæ animarum propagationem defendit: at neuter tamen ita de sententia sua certus erat, ut oppositam condemnare auderet. Hinc Hieronymus ab Augustino ea de re consultus, respondit „ unusquisque in sensu suo abundet, Augustinus verò lib. de Gen. ad llt. Cap. 23. multis utrinque disputatis, litem fere sub judice relinquit „ nisi eorum sententia [subdit] qui

sunt nonnullis Patribus ad exponenda Myſteria Trinitatis, & Incarnationis quædam voces, quas alii repudiarunt; propterea quod plura inde duci poſſunt conſectaria extra modum abſona, & abſurda.

Immo vero non ſolum à ſe invicem aliquando diſſentiunt; verum etiam nec unusquisque ſibi ſemper, & ubique conſtat. Quis enim inficias eat; quosdam Patres ſucceſſu temporis, quæ primum defenderant, deſeruiſſe? quis neget, Divum Auguſtinum aliter Presbyterum, aliter Episcopum ſenſiſſe; atque locutum fuiſſe? Divum Hieronymum in exponendis Scripturis nonnunquam variaſſe? omnes demum generatim Doctores accuratius, multo dilucidius, atque nervoſius in dogmaticis tractatibus, quam aliis in locis mentem ſuam aperuiſſe?

Verum his, aliisve id genus, ſi paullo accuratius, atque maturius expendantur, ne minimum quidem læditur Patrum auctoritas; tum enim, quæ obtrudunt Novatores, fere omnia ſano ſenſu exponere difficile non eſt, tum etiam quantocumque numero collecta ponantur; auctoritatem Patrum in præcipuis religionis capitibus labefactare nullo modo poſſunt. Itaque hoc unum defendendum eſt de illorum auctoritate, ſcilicet eam, ubi concors eſt Patrum conſenſio in rebus Fidei, ab omni erroris labe immunem eſſe; qua ratione fiet, ut

---

„ qui animas ex parenti-	„ baptiſmo parvulorum
„ bus creati putant, de	„ præponderaret.

tis adversarii, quum demonstrare nequeant omnium, vel fere omnium defectionem a fide, aut falsam, & proprio Marte confictam Traditionem, pro certa, constanti, & antiqua ab iis propositam, animo fracti hæreant, eorumque argumenta, licet innumera, tanquam vanâ sophismata, quæ ad rem non faciunt, prorsus evanescent.

Neminem latet, Sanctorum Patrum nonnullos a recto tramite deflexisse, ita tamen, ut paucos admodum in suam traxerint sententiam: ab Ecclesia vero palam, & publice damnati non sunt, vel quod citra culpam, bonaque fide ea protulissent, vel ut benevola ejusmodi moderatione facilius ad bonam frugem revocarentur, vel demum quod paucissimi iis excidissent errores, quos mixta sanioris doctrinæ copia longissime superabat, eamque, pauculis erroribus neglectis, salvam, & incolumem tueri longe præstaret.

Certum est, atque indubitatum, quidquid cum unanimi Patrum consensu non cohæret (5), ad Ecclesiæ fidem minime spectare; quamobrem si quis in Religionis dogmatibus ab

C 2

una

[5] Adde: etsi illorum nonnullos patronos habeat, ac defensores. Hinc bene multa Religionis capita, in quibus finiendis Ecclesiæ Patres diu, multamque disenserunt, successu temporis ab Ecclesia, quæ columina est, ac firmamentum

veritatis, definita sunt vel publica declaratione, vel unanimi Fidelium ad pristinam veritatem recursu, quemadmodum contigit in quæstionibus de millenario Christi in terris regno, & de baptismo Hæreticorum.

unanimes consensione defecerit, ab Ecclesiæ quoque sensu defecisse censendus est, quippe qui in sola sistit omnium, vel fere omnium (6), ut ait Lirinenſis, concordia, atque unanimi sententiâ.

Atque Patres ut plurimum nonniſi in leviſſimis, vel hominum diſputationi relictis quæſtionibus diſſentiunt, ut optime de Auguſtino reponit Batavis quibuſdam Theologiſ recens Auctor, etiamſi de illius doctrina defendenda parum ſollicitus. „ Injuria (inquit), & im-  
 „ merito Auguſtini doctrina generatim ſpe-  
 „ ctata, & Pelagio oppoſita cum Traditione  
 „ Eccleſiæ pugnare creditur; illud autem unum  
 „ affirmari poteſt, ſingulares quaſdam opinio-  
 „ nes (7) pleriſque Patribus, qui eum præ-  
 ceſſerant

[6] Videlicet non illorum ſolummodo, qui uno, vel altero ſæculo vivunt, ſed qui ab orbis redemptione floruerunt, ad poſtremam uſque ætatem, qua vertuntur quæſtiones. Nemiſem quippe later, Eccleſiam multoties finiſſe quæſtiones non ex majori illius ætatis Fidelium numero, ſed potius ex minori. Exemplo eſt deſcriptio celeberrimæ diſputationis de baptiſmate Hæreticorum, in qua non Cypriani, ſed Stephani ſententiam ſecuta eſt, quanquam, teſte Auguſtino „ multi cum illo, „ cum iſto pauci fuerunt.

Atque, ut cætera miſſa faciam, hujus rei luculentiffimum præbet argumentum probabiliffimi laxioris condemnatio, qui ante decretum Alexandri VII. anni 1665., a pleriſque illius ævi Scriptoribus defendebatur acerrimè.

[7] Quas Simon ſingulares vocat Auguſtini opiniones, aliud proſecto illæ non ſunt, quam inconcuſſa gratiæ dogmata ab Auguſtino deſenſa, & a Summiſ Pontificibus, præſertim Cœleſtino, & Hormiſda, nec non ab univerſa Eccleſia recepta. Atque illa Auguſtini doctrinæ oppoſitio cum



„ cesserant, ignotas ex propriis principiis de-  
 „ promtas ab eo defensas fuisse; cæterum vero  
 „ communis illi fuit cum totius Christiani  
 „ Orbis Ecclesiis Fides, atque Religio.

Si qua vero extat in Fide discrepantia,  
 inter Patres, in sola locutionis varietate sita  
 est, aliis aliam sese explicandi viam ineunti-  
 bus, ut, quam defendendam susceperant, veri-  
 tatem firmitus, solidiusque stabilirent; aliis  
 aliter incedentibus, ut, quem metuebant, erro-  
 rem studiosius devitarent.

Hujusmodi Antilogiis, quanquam paullo dif-  
 ficilior, spinosaque reddatur lectio Patrum;  
 facta tamen est, rectaque illorum auctoritas.  
 Ergo ne rejiciendi erunt Patres, propterea  
 quod ægre conciliari queant? Id ne uspiam  
 factitatum est in Sacros Evangelistas? quis ta-  
 men ignorat, quam ardua, quamve laboriosa  
 sæpe res sit illorum verba componere? Intel-  
 ligi profecto non potest, qua fronte Novato-  
 res, qui in propriis Fidei confessionibus sibi  
 non

cum Traditione Ecclesiæ  
 excogitata fuit ab hostibus  
 gratiæ in opere, quod sup-  
 povere Launojo, quorum  
 calumniam erudite dete-  
 ctam refellit P. Serry in  
 opere, cui titulus: *Augu-  
 stinus vindicatus*, atque dam-  
 navit Clemens XI. anno  
 1704. Quamobrem merito  
 vapulat Simon ab Illustris-  
 Bosueto, quod debitam Pa-

tribus reverentiam non  
 exhibuerit, atque Novato-  
 ribus, & Socinianis, ut  
 alias pluries, sic etiam in  
 hoc capite favere videatur.  
 Quocirca in exemplum  
 quæstionum, quæ leviores  
 sunt, vel hominum dispu-  
 tationi relicta, & opinio-  
 num iisdem respondentium,  
 parum apta videntur lau-  
 data Simonis verba.



non constant [ quod tamen illorum interesset  
quammaxime ] Patribus Ecclesiæ levissimas ,  
nulliusque momenti discrepantias passim obji-  
ciant .

Neque mirum videri debet, antiquos Patres  
secum quandoque pugnare, toti enim erant in  
perlucutanda, illustrandaque veritate, quæ, ju-  
bente Deo, justissimis de causis, atque humanæ  
rationi imperviis, aliqua sui parte obscurata  
fuerat, ac præjudicatis hominum opinionibus,  
disputationibusque relicta.

Fuerunt inter Ecclesiæ Antislites, qui prop-  
ter Traditiones, de quibus dubitari poterat,  
aliis non raro succensuerint. Omni tamen se-  
posita contentione, de Vincentii Lirinensis  
effato, tanquam de indubio, & inconcusso  
axiomate apud omnes conveniebat, „ Quod si  
„ in ipsa vetustate duorum, aut trium homi-  
„ num, vel certe Civitatis unius, aut etiam  
„ Provinciæ alicujus error deprehendatur, tunc  
„ omnino curabit, [ Christianus Catholicus ] ut  
„ paucorum temeritati, vel inscientiæ, si qua  
„ sunt universaliter, antiquitus universalis Ec-  
„ clesiæ decreta præponat. Quod si tale aliquid  
„ emergat, ubi nihil ejusmodi reperiatur, tunc  
„ operam dabit, ut collatas inter se Majorum  
„ consulat, interrogetque sententias, eorum-  
„ duntaxat, qui diversis licet temporibus, &  
„ locis, in unius tamen Ecclesiæ Catholicæ  
„ communione, & Fide permanentes, magi-  
„ stri probabiles extiterunt; & quidquid non  
„ unus, aut duo tantum, sed omnes pariter  
uno

„ uno, eodemque consensu aperte, frequenter,  
 „ perleveranter tenuisse, scripsisse, docuisse,  
 „ cognoverint, id sibi quoque intelligat absque  
 „ ulla dubitatione credendum.

Quid, quod illa, quæ apud Patres nonnunquam occurrit, mendosa obscuritas suis & ipsa commodis non caret? neque enim *dies dies solummodo eructat verbum*, verum etiam *nox nocti indicat scientiam*, teste Scriptura: sive non modo quorundam splendore aliorum lux augetur, verum etiam minus perspicacium obscuritate acutiora excitantur ingenia, ut aliquid illustrius proferant, quod perficere, nisi aliorum erroribus moniti, forte fortuna ne cogitassent quidem.

In eadem fere navi versantur veritatis interpretes, ac fodinarum fossiores; quorum quum omnes sollicitè exquirant, pauci tamen prætiosum metallum inveniunt. Ita tamen se res habet, ut perinde qui terrosam arenam, ac qui optatam micarum copiam adfert, ad commune bonum conferre censeatur, quod uterque eadem mente, etiamsi dissimili fato laboret.

Non omnes Ecclesiæ Patres pari pollent ingenio, atque qui acutiori sunt, suos & ipsi habent naves, suosque patiuntur manes, qui ab imbecillitate naturæ sejungi non possunt: quamobrem nec tantillum nos movent, qui ajunt, Ecclesiæ Patres sibi non constare, eos crebro mutasse sententiam, nonnunquam pristinam revocasse, vel sapientiores postremis, quam primis vitæ suæ diebus vilos fuisse.

Quid enim hinc tandem colligitur? nimirum eos ab omni errore immunes nequaquam fuisse, & fidem, quum una sit, quia tamen neque evidenti traditione, neque manifestis Ecclesiæ definitionibus in quibusdam controversiis in aperto posita sit, acutioribus etiam ingeniis dubitandi, fluctuandique occasionem præbere: vel, ut paucis omnia complectar, in rerum Ecclesiasticarum cognitione non secus, ac in aliis scientiis novos in diem progressus fieri posse, atque Deum Optimum Maximum, qui humiliter postulantibus sapientiam pollicitus est, non in omnibus tamen statò quodam tempore, atque uno velut ictu oculi se daturum promississe; quæ quidem omnia ultro, libenterque concedimus.

De lib.  
arb. 1.  
a. C. 23.

In disputationibus de gratia, de libero arbitrio, & de prædestinatione scribendo se plurimum profecisse fatetur Divus Augustinus: „ Proficienter [ ait ] me existimo, Deo miserante scripsisse, non tamen a perfectione cœpisse: quandoquidem arrogantius loquor, quam verius, si vel nunc dico, me ad perfectionem sine ullo errore scribendi jam in ista ætate venisse. Verum addit illud minimi interesse, sed interest [ inquit ] quantum, & in quibus rebus erretur, & quam facile quisque corrigat, vel quanta pertinacia suum defendere conetur errorem.

Cuncta quidem Fidei dogmata uno, eodemque tempore divinitus Ecclesiæ commissa, sed non omnia simul evoluta, explicataque fuerunt

fuerunt (8). Quapropter a sapientissimis illis animarum Pastoribus obvolutam fuisse veritatem, & secus ac sentirent, evulgatam, ab illis denique panem spiritalem iniqua ratione distributum, nisi calumniator impudentissimus, iniquissimusque æstimator, qui cuncta illis prudentiæ, atque iudicii præsidia sublata voluerit, nemo unus auferit affirmare.

Christianæ veritatis documenta nunquam subduxerunt Ecclesiæ Patres; illam si quando deferuisse, vel non ex omni sui parte, ac numeris explicuisse videntur, non voluntatis culpa factum est, quasi fidem occulere, eamque deferere vellent, sed cognitionis defectu, quod eam probe perspectam non haberent. Ecquis enim vero post Apostolorum ætatem Christianæ Religionis dogmata candidius, quam egregii illi Antistites, quis studiosius evulgavit; illustravitque? nunquid adulterata ab iis Symbola, vel alio, quam communi totius Ecclesiæ sensu exposita? equidem prudens illi consilium, & œconomiam quandam adhibuere, aliamque viam inierunt cum Judæis, aliam cum Gentilibus,

[8] Satiùs multo, & accuratius dixisset Auctor operi hoc modo cuncta quidem Fidei dogmata uno, eodemque tempore divinitus Ecclesiæ commissa, simulque evoluta fuerunt a Spiritu Sancto, quo Doctore Apostoli ea didicerunt. Verum quanquàm omnia pari

religione servata in Ecclesia, non eodem tamen tempore, & modo, neque eadem perspicuitate Fidelibus sunt exposita, sed pro varia temporum occasione, alia citius, alia serius, nonnulla manifeste, cætera subobscurius explanata, fuerit.

tilibus, aliam cum Cathecumenis, vel Fidelibus differentes. At nunquid eapropter damnandi? ecquis hactenus ulque damnavit Apostolos, qui omnia omnibus facti sunt, ut omnes lucri facerent, atque ad veritatis cognitionem perducerent?

## CAPUT VIII.

*Errata Patrum in Scientiis humanis nihil omnino detrahunt illorum auctoritati in rebus Fidei.*

**V**ulgo etiam dici solet, in humanis scientiis parum eruditos fuisse Ecclesiae Patres, quæ ad Scripturas Sanctas explanandas, & Fidei dogmata firmanda plurimum utilitatis afferunt. Verum quid hæc cum illorum auctoritate, quæ artibus, & scientiis humana industria investis non innititur? Plurimum quidem illæ juvant Auctorem vel ad exponendas Scripturas, vel ad eas cum primigenio Textu conferendas, cujus generis sunt Dialectica, Grammatica, Chronologia, Geographia &c.: verum cujuscumque utilitatis ponantur, non ita tamen necessariae sunt, ut, iis sublati, tota ruat, atque evertatur Religio (9).

Nunquid

[9] Immo vero qui avidius ejusmodi scientias confutatur, obest potius, quam

profit Religioni Christianæ: quod sane fecisse videntur Novatores, qui in Sacra-

Nunquid enim, qui in ratiocinando quandoque peccat, in Fide Ecclesiæ labitur? ecquis ignorat, innumeros extare Viros, qui quum de illorum Religionis integritate dubitari non possit, tam prava utuntur ratiocinatione, ut quod palam, & publice profitentur, prorsus abnegare videantur? quid ergo interest, quod ab accuratioris Dialecticæ rudimentis nonnunquam aberrent Ecclesiæ Patres in colligendis Fidei conclusionibus, quo nihil facilius in longioris disputationis æstu, modo ratum sit prima sanioris doctrinæ capita ab iis firmiter defensa fuisse?

Ita ne verò Dialecticæ regulis hærent Plato, Aristoteles, aliique omnes insigniores Dialectici, ut ab iis nusquam defleant? profecto si cuncta illorum argumenta ad Dialecticæ trutinam revocanda forent, bene multa deficere dignoscerentur. Deinde quot extant Sophistæ, qui falsis innixi principiis, firmitus in illis perstant, quam ingenuiores Philosophi certissimis, atque inconcussis? Quod si Fidei puritatem ex aptiori disputandi methodo metiri

---

Sacrarum Scripturarum explanatione, quo suam in humanis scientiis peritiam ostentarent, tanto studio confecti sunt, quæ ad Grammaticam, Chronologiam, Geographiam spectant, ut Christianæ Religionis, ad quam tamen cuncta Spiritus Sancti verba collimant, pene obliti

videantur, ut merito exprobrat Grotius Illustris. Bossuetus in sua contra eundem dissertatione, nulumque fere invenire sit discrimen inter Scripturas Sanctas ab iis expositas, & profani cujuslibet Scriptoris, Poetæ etiam, si lubet, historiam.

tiri lubeat, sanior sæpe foret Hæricorum, quam Catholicorum Fides.

Minus sæpe rectam usurparunt Ecclesiæ Patres differendi methodum, ex pluribus etiam, quibus uti poterant, argumentis minus valida, minusve apta quandoque adhibuerunt. Quid tum? nimirum omnium hac in re mortalium sortem subiere, qui utcunque in negotiis diligentes, atque exercitati, falluntur nonnunquam, satis laboris, ac industriæ impendisse rati, modo satis ipsi sibi fecisse videantur.

Ipsa quoque Sanctorum Patrum critice non omni mendo caret. Immo plerisque Veteribus parum omnino perspecta fuit hæc scientia, Neque vero Hieronymus, ea in arte alioquin cæteris exercitior, in omnibus rei summam attigisse putandus, Hæret nonnunquam, unoque, vel altero vix presso vestigio subsidet, atque instar hominis cæcutientis huc, illucque dubius fertur, & anceps.

Augustinus vero eruditorum linguas nesciebat, quarum maximus usus est in re critices; neque mos usquam fuit in disputationibus de Sacri Textus historia, & literali expositione ad eum confugere. Quod etsi negari nequeat, audiendi tamen non sunt, qui in disceptationibus de Gratia Patrum Orientalium Traditionem, quorum exemplaria legere nesciebat, Augustino ignotam fuisse effutiunt.

Nam licet non ita Græce sciret, ut eorum monumenta se solo intelligeret, florente tunc temporis Ecclesia Græca, illius doctrinam ab  
ejusdem



eiusdem Episcopis, quicum amicitia conjunctus erat, sciscitari, & haurire potuisset. Deinde quis animum credere inducat, Divum Hieronymum Orientis incolam, cum quo eruditionis consuetudinem habebat Augustinus, eum in hujusmodi ignorantie tenebris deserturum? an non id potius ipse sponte fecisset, si quidquam in re tanti momenti, in disputatione, inquam, de Gratia, quæ non minimum erat illorum consuetudinis argumentum, Augustinum latere putasset?

Fatendum tamen, ab Ecclesiæ Patribus neglectam sæpe critices scientiam, nec nimium religiosa scrupulositate, præsertim in scrutanda verborum origine servatas ab iis Grammaticæ regulas. Atque illud in causa est, cur in suspicionem venerit Origenes levioris, exiliorisque in Hebraica Lingua peritiæ (10). Et enim in derivanda verborum origine sæpe justo liberior, sæpe etiam falsus est. Quanquam multa sit laude dignus, quod ethimologiam verbi *Satanas* a voce *Adversarius* duxerit, non autem

tem

[10] Hanc tamen suspicionem amovisse videntur Eusebius lib. 6. Hist. Eccl. Cap. 16. S. Epiphanius lib. de mensuris, & ponderibus, & D. Hieronymus in Cap. 3. epist. ad Titum, qui omnes uno ore affirmant, Origenem Hebraicæ Lingua eruditissimum fuisse.

se. Præterea ejus *Tetrapla*, *Hexapla*, & *Ostapla* eum in Hebraico sermone versatissimum ostendunt: quanquam in derivanda verborum origine nonnunquam (rarissime tamen) memoria lapsus sit.

tem a voce *Apostata*, ut immerito facit Justinus (11).

Eandem ob causam reprehenditur Optatus, qui nominis *Cephas* originem ex Græco verbo κεφαλῆ, quod *Caput* significat, petit potius, quam ex Syriaca voce, quæ *Petram* sonat (12), ut docet ipsemet Evangelista (13). Neque vero reprehensionem fugit Divus Ambrosius, qui vocem *Pascha*, apud Hebræos *transitum*, ex Græca voce, quæ sonat *pati*, derivat (14). Illud autem magnopere mirandum, ipsum etiam Hieronymum, quum istam Patrum libertatem virgula notet censoria, in eundem sæpe scopolum impegisse, quum nominum *Pauli*, *Philemonis*, *Onesimi*, quæ certe Græca sunt, vel Latina (15), ex Hebraico sermone emendicet originem.

Verum

[11] *Satanas* quippe derivatur a radice שטן *Satan*, adversari, odio habere. Justinus autem deduxit a radice סור *Sur*, discedere, unde סרה *Sara recessio*, *Apostasia*.

[12] *Cephas* enim fuit ex radice כף *Chip*, unde foemineum כִּיפָה *Chepha*, *Petra*.

[13] Mat. Cap. 16., ubi refert ea Christi verba v. 18. *Es ego dico tibi, quia tu*

*es Petrus, & super hanc Petram adificabo Ecclesiam meam.*

[14] *Pascha* enim originem dicit ex radice פסח *Pasach* transivit, unde פסח *Pasach*, transitus, Ambrosius autem derivavit ex Græca voce πασχω *Pasior*.

[15] Quod quidem attinet ad voces *Philemonis*, & *Onesimi*, perspicuum est, eas ex Græco sermone proficisci. Vox autem *Pauli* ex Græca voce πῦλος, latine *Pusillus* origi-

Verum in his, aliisque, si lubet, gravioribus mendis, Chronologiæ inquam, & Geographiæ; quarum maxima est ad Historiæ Sacræ intelligentiam utilitas, immo necessitas, peccarint Ecclesiæ Patres, haudquaquam tamen loco moveretur illorum auctoritas, quæ aliis omnino innixa est fundamentis.

Chronologiæ studia ætate sua jacuisse fatetur Augustinus: Illius inopia Justinus in gravissima errata lapsus est (16); eadem de causa plerique Patres antiqui de die natali Servatoris nonnisi dubitando locuti sunt: Chrysostomus, & Augustinus vigesimum quintum Decembris diem; Epiphanius vero sextum statuit Januarii; Clemens autem Alexandrinus aliorum refert sententiam, suam non prodit, aitque, aliis decimum nonum, vel vigesimum Aprilis, aliis vero vigesimum Maii magis probari.

Quod si hodiernis saltem temporibus certo finitæ forent id genus quæstiones, atque inter insigniores Chronologiæ Scriptores nulla reliqua foret controversia de mundi ætatibus, quæ aliter in Textu Hebræo, aliter in Græca interpretatione computantur; esset fortasse, cur  
Sancti

originem ducit, quod nomen sibi Saulus adscivisse creditur, vel ut se minimum Apostolorum ostenderet; vel a Paulo Sergio Proconsule, quem primum in Insula Cypri convertit ad Fidem act. 13.

[16] Exempli loco sit, quod

ait in *Oratione ad Græcos*, Ptolemæum Philadelphum ab Herode Judæorum Rege Propheticos primum libros, dein doctissimos Interpretes petiisse, quum hi Principes ducentum, & amplius annorum spatio distent.

Sancti Patres ab hujusmodi dictariis vindicarentur. Ast quum & hodie finitæ non sint, satius multo videtur veterum Scriptorum exemplo in illis supputationibus mendum agnoscere, atque id genus causam deferere, quam ne ipsi quidem, si reviviscerent, defendendam esse putarent.

Eadem est apud illos Geographiæ conditio, quam jejune admodum, exiliterque tractarunt. Sic Epiphanius fluvium Paradisi terrestris *Phison* confundit cum *Gange*, quo alluuntur Indi, alique plures *Gebon* a *Nilo* non distinguunt, ut notant Scaliger, atque Petavius.

Quum longe obscurissima sit historia Paradisi terrestris a Mose descripta, Antiqui juxta, ac Recentiores plura certatim conjectando dixerunt. At si Paradisus terrestris in eo loco situs erat, quem Tigris, & Euphrates in unum prope Apameam confluentes alluunt, ut censet Huetius, quot, amabo, illorum Interpretum conjecturæ a veritate alienæ, immo etiam risu, & cachinnis excipiendæ comparentur?

Quid ergo de illis sentiendum, qui in Cælis, qui subtus terram, qui in novo orbe, vel alio quolibet (nullus enim jam locus est, quem non aliquis somniarit Interpres) Paradisum terrestrem locarunt? quid de tot, ac tam variis conjecturis? agnoscenda videlicet in multis, quæ scire non refert, humanæ mentis ignoratio, quæ tamen dubitationis, vel erroris in Fide occasio esse nullo modo potest.

CAPUT

## CAPUT IX.

*Difficiles, atque spinosæ, quæ apud Ecclesiæ  
Patres occurrunt, locutiones eorum  
auctoritatem ne tantillum  
quidem ladunt.*

Quum de rebus plerumque altissimis agerent Majores nostri, multaque illorum ætate notissima forent, quæ postremis temporibus antiquata sunt, ac demum, quibus utebantur, linguæ obsoleverint omnino, multo iccirco apud illos, quemadmodum apud antiquos omnes Scriptores occurrunt spinosa, difficilia, intricataque.

Græce non omnes sciunt, Latine etiam pauci perfecte; cum enim amplissimus est latinus sermo, tum etiam plures pro variis ætatibus mutationes passus, atque ex patrio, ut ita dicam, solo apud exterarum regiones migrare coactus fuit.

Vel una barbararum vocum cognitio difficillima est, quibus tamen familiariter utuntur Scriptores Ecclesiastici, vitiosam, adeoque obscurissimam loquendi rationem plerumque consuetantes. Exempli loco sit Tertulliani stylus, qui quum verbis reapse latinis constet, singularis tamen adeo est in verborum delectu, atque dispositione, ut Salmasius verbo Grammatici jurare non dubitet, neminem unum

D

extare,

extare, qui ejus libellum *de Pallio* probe, atque perfecte cognitum habere possit. In eo enim Tertullianus stylum assumit Rhetorum antiquorum, quibus solemne erat inauditis sententiis uti, vocabulisque phaleratis, quo argumenta proposita magis augerent, atque amplificarent.

Omnium molestissima res est, atque laboriosissima Viro semidocto in lectione Patrum alienum identidem capere consilium, eorumque notitiam a vocabulariis emendicare, quæ didicisse non tam præclarum est, quam turpe nescire. Quid me commendatis ( aiebat olim lepide *D. du Cange* amicis de edito latino Glossario gratulantibus ) quum id unum præstiterim, ut barbaras, ineptasque voces, a quibus omnes abhorrent, in unum colligerem? Ecce sane Pater Vavassorius Latini sermonis peritissimus, inquebat extremis vitæ diebus, sexaginta annorum cursu se in id unum incubuisse, ut verbis à *D. du Cange* collectis, sermonem suum purgaret:

„ Non hic Romanæ Veneres, nec casta-  
„ loquendi

„ Vincula: tu palmam hanc ludi magister  
„ habe.

*Vid.  
Spelm.*

Quid, quod & ipsæ interpretationes, quæ levandi lectoris gratia perfici solent, quum levationem adferre videantur, scrupulum gravio-rem injiciunt? Insidet enim legentis animo dubitatio, ne eum fallat Interpres; nam re- vera paucissimæ extant interpretationes, quibus  
omni-

omnimoda fides adhiberi possit. Quæ ex Græco in Latinum sermonem, parum accuratæ; quæ vero ex Græco in Gallicum, etiam si propter sermonis analogiam (17) paullo accuratiores, quod tamen numero paucissimæ, exiguæ omnino sunt utilitatis. Rem omnium utilissimam faceret Græco sermoni, ( ut ajunt æqui æstimatores ) qui fidissimis exemplaribus Græcis Gallicam interpretationem adjungeret, qua, ut veriori, ac perfectiori Græcæ linguæ exemplo, aptius multo, quam Latina, illorum dictionis venustas, elegantia, atque figuræ exprimi possunt.

Neque vero subsidio interpretationum, quamlibet accuratæ sint, vel perfecta linguarum, quibus scribendo utebantur Ecclesie Patres, peritia, atque intelligentia tollitur omnis in illorum assecutione difficultas; adhuc enim perscrutanda manet eorum doctrinæ natura; adhuc enucleandæ singulares, quas adhibent, loquendi formulæ, quas, Divo Hieronymo teste, difficilius sæpe est omnino perspectas habere, quam quid sentiant, quidve doceant.

Epiphaniï opera, quod careant perspicuitate, pauci sunt, qui perfecte assequi valeant: Hilarii autem oratio, quum ventosa sit, turgidaque,

D 2

daque,

[17] Hæc autem sermonis Græci cum Gallico Analogia, in elocutionis, sive phrasæ similitudine sita est, quæ ex Gallicæ linguæ proprietate proficiscitur. Porro

autem Latinus sermo, quamvis e Græca lingua maxima sui parte dimanet, propriam tamen singularem habet, & a Græca diversam elocutionem.

daque, a communi recedit loquendi ratione; quam ob causam in suspicionem venit de pluribus in Fide Christiana erroribus (18).

Quorundam Patrum eloquentia, instar fucati nitoris, legentis oculos ita perstringit, ut vitia, quibus scatent in ratiocinando, eaque graviora plane non videant; aliorum autem menda apud mediocria, ac parum intentum ingenia tegit, subducitque eorum in differendo subtilitas. Tandem ignavis, atque infirmis gravissimum onus est profana eruditio, qua per multa Veterum monumenta redundant.

Quoties vero contigit, ut Ecclesię Patres veritatem, cuius partem aliquam defendebant acerrime, ob nimium, quo ferebantur, animi æstum, ex altera parte periculo exponerent? quum in hæresim proterendam nituntur, eo sæpius impetu alteri omnino oppositę ansam præbent' (19). Quocirca summa opus est mentis

[18] Tot tamen, tantisque laudibus celebratur ab eruditissimis Viris Facundo lib. 1. Cap. 4., Cassiodoro lib. de Instit. Divin. Cap. 17., & Hieronymo pluribus in locis, ut omnis de sana illius fide suspicio prorsus evanescat. Quod autem subobscura sit illius oratio, duo in causa sunt. Primo, quod de rebus altissimis ageret, iisdemque difficilissimis. Secundo, quod quum inter Latinos Scriptores omnium primus contra Aria-

nos disputarit, a Græcis Patribus multa desumere coactus fuit, ut notat apostolice D. Hieronymus in eplst. 49. ad Paulinum, ubi ait, Sanctus Hilarius Galliarum canoCothurno attollitur, & quum Græciæ floribus adornetur, longis interdum periodis involvitur, & a lectione fratrum simpliciorum procul est.

[19] Hac in re non leviter hallucinatur Auctor operis, atque censura, qua notat hoc



tis acie, æquissimoque iudicio, ut hæc omnia peripicue, placideque expediantur.

In Polemicis veterum Doctorum operibus præcipua controversiæ capita ab iis, quæ solius sunt accessionis, causam ab ejus argumentis sejungere, infiniti laboris est. His adde civilem, & Ecclesiasticarum cujusvis sæculi consuetu-

hoc loco Sanctos Patres, aliud profecto non est, quam teterrima calumnia ab adversariis sanctorum Patrum inventa. Nusquam enim melius, accuratius, atque nervosius Fidei mysteria exposuere, quam ubi acerrimam illius defensionem susceperunt, quam quum in proterendas hæreses totis viribus nisi sunt. Equidem contingit aliquando, ut alteram veritatis partem defendentes, alteram ejus partem periculo exponere prima fronte videantur, revera tamen nusquam exponunt. Quod autem eam periculo exponere videantur, non nimio, quo feruntur animi aestui, non illorum inconsiderantiæ, sed potius mysteriorum obscuritati, veletiam quandoque legentis perverfitati tribuendum. Sic tam involuta res est doctrina Ecclesiæ de gratia Christi, & humana libertate, ut, quum defenditur Dei

„ gratia, negari videatur „ liberum arbitrium „ inquit Augustinus lib. de *Gratia Christi* Cap. 45. Hinc occasionem arripuere Semi-pelagiani doctrinam Augustini, velut Manicheam traducendi; quum tamen ab hujusmodi Sectariorum deliramentis distet toto Cælo Augustini systema. Hinc Ecclesia, penes quam summa residet mysteriorum intelligentia, id genus sectaria parvi pendens, cunctis Fidelibus eorum præcipue Patrum doctrinam credendam proposuit, qui aliquod Fidei dogma defendendum acerrime susceperunt, qui in aliquam hæresim proterendam totis viribus nisi sunt, ut Athanasii contra Arianos, Cyrilli contra Nestorianos, Leonis contra Eutychetem, Augustini contra Pelagianos &c. Deinde confer, si lubet, hæc Auctoris verba cum Cap. 9. partis 3.

suetudinum notitiam, titulorum etiam, qui officiis, & dignitatibus Ecclesiæ, & imperii inditi erant, plurimarum denique rerum, quas scribendo denotabant; quæ omnia, quum ab ætate nostra longissime distent, probe cognoscere difficillimum est, indeque veteri Theologiæ plurimum obscuritatis accedit.

Quæ hætenus dicta sunt, dilucide simul, ac nervose proposita continent adversariorum argumenta, adeo ut jam conqueri non possint, illorum vim reticendo a nobis declinari. Quo tamen validius urgentur, eo infirmiora redduntur; nihil enim inde manifesto colligi potest, nisi omnes nævos, qui in Ecclesiæ Patribus, velut gravissima menda reprehenduntur, cum omnibus profanis Auctoribus, quorum explanatio in multorum deliciis est, illis esse communes.

Si enim ob multas, easque spinosas, quæ apud Patres occurrunt, difficultates, omnem illi auctoritatem amittant, sintque deserendi, non solum humanis scientiis, Philosophiæ, & Mathematicæ, verum etiam Scholasticæ Theologiæ valedicendum erit; omnisque fides veteris, & novi Testamenti libris deneganda.



## CAPUT X.

*Etiamsi Patres Ecclesiæ nonnulla ex Scripturis Sanctis loca falso protulerint, in alijs etiam incuriose se gesserint, facta tamen est, & integra illorum in rebus Fidei auctoritas.*

**Q**Uam levis momenti sit accusatio in Ecclesiæ Patres conflata de falsa Sacri Textus prolatione, ejusque verborum mutatione, vel una invictæ persuadet veterum Scriptorum consuetudo, quibus familiare fuit, ac receptissimum loca ex antiquioribus Auctoribus, ut eis in mentem venit, proferre, nulla verborum, sed sola sensus habita ratione [20]. Ecce enim id non præstiterint Patres, quod in proferendis Scripturis facere consueverunt Apostoli, ac Evangelistæ? ut enim ait Hieronimus „ in multis testimoniis, quæ Evangelistæ, vel Apostoli de libris Veteribus assumserunt, curiosius attendendum est, non eos

*In 17.  
C. 7.*

D 4

ver-

[20] Hujusmodi veterum Scriptorum consuetudinem secutus fuisse videtur Auctor hujus operis, qui ex antiquis monumentis sæpissime loca profert, ut in mentem ipsi venit, nulla

verborum, sed sola sensus habita ratione. Quamobrem veniam dabit lector, si multa offendet Vererum loca alijs ab Autographo Exemplari verbis expressa.

„ verborum ordinem secutos esse, sed sensum.

Scripturas aliquando Patres amplificant paraphrasi, quandoque contrahunt; ut plurimum vero non iisdem referunt, sed similibus verbis, quibus tamen illarum sensus patefiat, ac magnopere illustretur.

*Petav.  
de In-  
terr. l.  
14. C. 4.*

Quod autem ajunt, illos in operibus suis apocrypha quandoque monumenta licentius adhibuisse, futile prorsus est, & inane. Quum enim Apostoli illa usurparint ad defendendam veritatem (21), aliqua saltem auctoritate donarunt, ut inter sapientiores convenit Theologiæ Doctores (22).

Nonnulli etiam libri, licet apocryphi a Patribus proferri potuerunt, donec Ecclesiæ judicio res finiretur, quippe quæ successu temporis

[21] Ut Judas Apostolus in epist. V. 14., ubi inquit, *prophetavit autem, & de his septimus ab Adam Henoch &c.*

[22] Non ita facile convenit inter sapientiores Theologiæ Doctores de Auctoris nostri sententia, qua putat libros ab Apostolis prolatos, aliqua saltem auctoritate donatos fuisse. Immo vero maxima est inter Ecclesiæ Patres, & Theologiæ Doctores ea de re dissensio. Omnium autem tutissima via est, quam monstravit Origenes præfatione ad Commentarios in Cantica, ubi ait, Apostolos divino Spiritu afflatos certo nosse

quid ex ejusmodi monumentis desumi, quidve juvare posset; cæteros autem Scriptores, divinis illis subsidiis destitutos, nec certo noscere, nec sine periculo uti posse. Quamobrem Sacrorum Scriptorum exemplo excusari haudquaquam possunt Ecclesiæ Patres, apocrypha monumenta proferentes, nisi forte argumenta, ut ajunt, *ad hominem* inde promere, & urgere vellent. Quidquid tamen sit, illæsa manet illorum auctoritas, quæ nihil commune habet cum hac operum genuinorum prolaticne.

poris quasdam Scripturas in Sacrarum Canonem retulit, quas ante, ut *divinas* solum. *Scripturas*, vel, ut ajunt Patres Græci, *divinos sermones* *θείας γραφάς* Fidelibus proponens, illarum censui adscribendas non esse putabat (23).

Atque hæc causa est, cur Divus Hieronymus librum Tobiae, quem alibi traducit apocryphum, nonnunquam Sacrum appellet; cur Origenes iis solum accenseat, qui legebantur Cathecūmenis; Concilium vero Carthaginense, utur Rufinus expungendum credat, in libros Canonicos referat.

Ejusdem generis sunt libri Estheris, Sapientiae, Ecclesiastici, Machabæorum, necnon Baruchi, si tamen in unum cum Jeremia volumen redactus ea ætate non erat. Hæc enim volumina primis Ecclesiæ sæculis ut pia solummodo, atque ad populorum institutionem aptissima censebantur, posterioribus vero Divina, atque Canonica.

„ Plerique Veteres, ( ut ait doctissimus qui-  
 „ dam Criticus ) non alios habebant Cano-  
 „ nicos libros, quam ab Hebræis acceptos, a  
 „ quibus prisca fœderis Canonem mutuati fue-  
 „ rant. Verum multi post Esdræ Canonem a  
 „ Judæis Hellenistis conscripti, ad Ecclesiam  
 trans-

R.  
marg.  
jur. la  
Biblior.  
de M.  
Dupin.

[ 23 ] Hæc autem Ecclesiæ varietas in accipiendis, vel repudiandis quibusdam Scripturis non de universa Ecclesia intelligenda est, quippe quæ sicut in Fidei dogmatibus, ita in statuenda

librorum canonicitate errare, vel mutari non potest; sed de peculiaribus quibusdam Ecclesiis, quarum alie citius, alie serius sacra quædam volumina acceperunt.

„transmissi sunt, atque apud priscos Fideles  
 „eundem honoris gradum obtinuerunt, quem  
 „ceteri in Græca LXX. interpretatione con-  
 „tenti. Deinceps vero Fidelium complures,  
 „quibus, Hebræorum census innotuit,  
 „dubitare cœperunt, num par utrisque inesset  
 „auctoritas; neque invicem æquare ausi sunt:  
 „aliis contra traditione nixis, eos divinitus  
 „inspiratos reputantibus.

„Res in eo statu mansere, donec Africana  
 „Ecclesia postremos hosce libros Canoni, quem  
 „confecit, Scripturarum inseruit. Postea  
 „enim, quum diligentius quæsitæ aliarum Ec-  
 „clesiarum traditio in eandem sententiam  
 „conveniret, generatim accepti, atque in  
 „omnium Ecclesiarum Canonem relati sunt.

Hinc plane liquet eum esse divinæ Provi-  
 dentię ordinem, ut quemadmodum Orbem  
 universum, ita Ecclesiam variis lucis gradibus  
 illustret, neque statim, & illico, sed paulla-  
 tim, & pedetentim, quæ tenenda sunt, edo-  
 ceat; quam ob causam varietas opinionum,  
 apud Patres, non ab errore, sed ab accurata  
 veritatis inquisitione, quæ lentius, ac matu-  
 rius fieri debet, profecta est: nam Ecclesiæ  
 Patres prudenti, sinceroque iudicio non minus  
 in dubiis traditionibus accipiendis circumspe-  
 cti sunt, quam in certis, atque universalibus  
 defendendis acerrimi, fidissimique.

Pergunt adversarii, atque audacius illis ex-  
 probrant, quod alii aliorum sententias sibi  
 tacite adjudicarint. Verum quid inde derivari  
 potest.

potest adversus incorruptam Patrum auctoritatem; quippe quæ in communi, atque unanimi christianæ Fidei Sectatorum consensione tota sistit? qui, quum non omnes eodem tempore vixerint, mirum esse non debes, eandem, quam æqualiter omnes amplectuntur, doctrinam a Superioribus traditam, ab aliis deinceps Successoribus defensam fuisse.

Num vero vituperandi Patres Conciliorum exempla secuti, quorum antiquissimus mos est veterum Scriptorum verba, tacitis, immo nec etiam quæsitis illorum nominibus, ad eudendos Canones adhibere? satis enim esse putabant Antiquorum monumenta communiter ab Ecclesiis accepta, diligentiori omisso examine, Hæreticis opponere.

Immo veteri etiam consuetudine receptum est apud Scriptores, ut quidquid e celebrioribus Auctoribus collegerant, insitum operibus suis, omni prætermissa declaratione, in lucem ederent. Sic apud Horatium integra Græcorum, Latinorumque Poetarum loca occurrunt, quæ, ut erat perpolitus, in proprii nominis splendorem vertit. Idem de Cicerone, Quintiliano, Plutarcho &c. dicendum, qui ex Majorum suorum eruditione uberrimos elanculum fructus perceperunt.

Verum si quid est apud Patres, quod absolum, ineptumque videatur, illud profecto, quod in operibus suis Auctorum testimonia usurparint, de quorum fide dubitat Ecclesia. Ex sane hæret ancepis quandoque lector, & gradum  
sistit,

fistit, quum apud Divum Hieronymum integra Didymi, Origenis, & Apollinaris loca offendit. Animum tamen erigit, & recipit sese, quum videat Hæreticos etiam pervicacissimos non omnem fidem deseruisse, eosque, qui ex una parte turpiter labuntur, ex altera strenue, firmiterque consistere.

Indeque mos in Ecclesia inolevit Scriptoribus adprime catholicis eorum, qui damnati sunt, fragmenta nonnunquam inferendi. Severus Antiochenus, quum Hæreticus in Ecclesia habeatur, in veteri quodam super Evangelia commentario, quem refert Lambecius, Sanctis Patribus conjunctus reperitur. Eandem Biblia.  
Imper. inivit viam vetustissimus auctor Anonymus in Græcorum Patrum catena in Divum Johannem, eamque probat Cyrillus Alexandrinus in Epistola ad Eulogium, ea potissimum ratione, quod non omnia, quæ dicuntur ab Hæreticis, censenda sint hæretica, multorumque Fidei dogmatum confessionem cum illis communem habeamus.

Bene multas videre est apud Hæreticos aperte, manifesteque depravatas sententias, quarum insaniam honestus Vir ferre nullo modo potest. Nonnullæ intolerabilem audaciam, & improbam temeritatem sapiunt, quæ, quum falsitati, atque periculosissimis novitatibus viam parent, procul amandandæ sunt. Verum non desunt etiam adprime Catholicæ, quas non sine maxima veritatis injuria condemnare posses; sunt demum & aliæ, quæ, quum in ambiguo  
ver-



versentur, recto sensu intelligi, atque in bonam partem accipi queunt.

Hæreticos debita laude cumulare quis potest, quin reprehensionem ullam mereatur, quasi illorum errores amplexus sit, atque defenderit. Hoc fere modo de se ipse loquitur D. Hieronymus in præfatione nominum Hebraicorum. Origenem, ut sapientissimum Interpretem commendavi, cui plurimum gratiæ debeamus, non autem ut Doctorem, cujus sententiis, tanquam Sacramento rogati subscribere teneamur. Ipsius ingenii acumen admiror, non adeo tamen, ut pravam ejus doctrinam probandam existimem.

Ad perfectiorem, cumulationemque veritatis affecutionem nihil vetat, quin Hæreticorum, atque Gentilium eruditionem adhibeamus. Quis enim vero Hieronymum redargueret, quod Judæorum consilio usus sit, ut absolutiorem Linguae Sanctæ notitiam compararet, & quasdam notiones certius edisceret, quibus Sacri Codices plurimum illustrantur, semotis Christianæ Religionis principiis, præsertim quum ipsamet Ecclesia nonnullas Bibliorum editiones ab Hæreticis, ac Semijudæis elucubratas diu, multumque usurparit? (24)

Quum

[24] Quos vocat Auctor operis Hæreticos, ac Semijudæos, ii sunt, Aquila, Symmachus, & Theodotio, quorum interpretationibus usa est Ecclesia Græ-

ca ad ætatem usque Originis. Aquila ex Judæo Profelytus, inde Christianus, ad Judaicam Religionem reversus est; Symmachus primum Judæus, dein Chri-

Quum Ecclesiæ Patres Commentariis in Scripturam Auctores hæresi notatos inseruere, non ea id mente fecerunt, ut inde quidpiam auctoritatis illorum erroribus accederet, sed ut varietas opinionum inter antiquos Interpretes dignosceretur, uberrimusque fructus ex iisdem rebus perciperetur, quibus ignari homines, ingeniique expertes abuti potuissent.

Pari quoque modo, quum Divus Clemens Alexandrinus, alique Patres libros Apostolis falso ab Hæreticis adscriptos protulere, nunquam genuinos Apostolorum fœtus eos haberi voluerunt, sed iccirco usurparunt, ut Hæreticos, quibus illorum auctoritas probata erat, acrius premerent, quum ipsamet Ecclesia in disputationibus, & controversiis, salva Fidei integritate, (quod in omni re summo opere cavendum) illorum usum permetteret.

Verum quod opponi potest, Ecclesiæ Patres huiusmodi cum suspectis Scriptoribus consuetudine, ac familiaritate, nonnunquam eorum sententiis, nimis, quam par est, addictos videri, illud attentionis defectu contigit, nec quidquam lædit communem, totiesque laudatam unanimmem consensionem, in qua Patrum aucto-

---

Christianus, tandem Ebionis deliria adoptavit; Theodotio primum Marcionis, dein Judæorum instituta amplexus est, restantibus Irenæo l. 3. Cap.

24., auctore Synopsis, D. Athanasio adscriptæ, necnon Eusebio l. 6. Cap. 16., ac demum Hieron. præfat. in Daniele.

auctoritas in rebus gravissimis ad Religionem pertinentibus tota sistit.

Quod autem ad Gentilium libros aliquando recurrerint, illorum pondus, auctoritatemque non minuit. Perinde enim id facere poterant, ac Divus Paullus, qui in sermone ad Athenienses habitò, profanos etiam laudavit Auctores (25).

Neque vero, quos Ethnicos proferebant, eos iccirco sapientiæ, ac veræ Fidei lumine illustratos existimabant, sed mediis duntaxat in tenebris quandoque vera dixisse, quæ vulgaribus argumentis ad Christianam Religionem firmandam adhiberi solitis apposite conjungi poterant. „ Quum criticæ artis ea ætate nullus <sup>Tiff. hist. det. emp. 1.</sup> ferme usus esset, ( inquit Tillemontius ) „ eam ob rem, quæ veritati consentanea vi „ debantur, fideles æquo, ac simplici animo „ excipiebant, iisque ad refellendos Gentiles, „ apud quos id genus argumenta plurimum va- „ lebant, prospero successu utebantur.

Potior videretur esse locus exprobrandi Divi Hieronymo, quod suppositas Senecæ Philosophi ad Divum Paulum Epistolas, ut veras habuerit, atque genuinas; aliosque redarguendi, quod similia sæpe liberius in medium adduxerint, nisi periuasum omnibus foret, illos hæc in re conjectura ductos fuisse, vel leviori quada-

[25] Nimirum act. 17. V. 28., ubi inquit, *sicut & quidam vestrorum Poetarum di-*

*xerunt, ipsos enim & genus sumus, quæ verba desumpta sunt ex Arato Poeta.*

dam in Ethnicos indulgentia, qui pro maxima, qua pollebant, ingenii altitudine, Christianæ Fidei sublimitatem nonnihil attingere videbantur.

## C A P U T X I.

*Libri Ecclesiæ Patribus suppositi illorum auctoritatem nequaquam ledunt.*

**P**Lerique librorum Ecclesiæ Patribus falso adscripti adeo ab eorum mente, ac stylo abhorrent, ut ne dum utilitatem ullam adferre queant, immo a genuinis eorum operibus secerni mereantur, quæ sola æstimationem Patrum, auctoritatemque stabilire valent.

Multa vero habentur suppositionum genera. Primum eorum, qui ob quandam indiligentiam, & nominum similitudinem alicujus Scriptoris opus alteri ejusdem ætatis, pretii, atque sententiæ adtribuunt.

Alterum, quod, licet minus sincere factum videatur, humaniori tamen venia dignum est, a quibusdam Viris sanctitate præstantibus, recta cæteroquin mente usurpatum fuit, vel quo majorem operibus suis auctoritatem apud populum conciliarent, præfixis magnorum Virorum nominibus, vel quo popularem auram effugerent, vel quo demum a gravissima, molestissimaque inimicorum, quibus oppido fatigantur Auctores, invidia sese liberarent.

Vigilius

Vigilius Tapsensis refellendis Arianis, Nestorianis, & Eutychianis intentus, clarissima sibi nomina induxit Athanasii, Isacii Clari, & Augustini, qui cum iisdem Sectariis rem ante habuerant.

Atque si quis conjecturis locus est, suspicari licet, Auctorem librorum, qui Dionysio Areopagitæ dudum adscripti fuere, non alia ratione sibi clarissimum hoc nomen induxisse, nisi ut majori reverentia legerentur, indeque uberius in Ecclesiam redundaret emolumentum.

Nonnisi quodam modestiæ studio, & invidiæ declinandæ causa sanctissimus Presbyter Salvianus *Timothei*, & Vincentius *Lirinenfis Peregrini* sibi nomen adsciverunt. Verum quid quid sit, in tuto manet auctoritas Patrum; neque enim in nomine sita est auctoritas, sed auctoritate potius Patrum nomen maximam in Ecclesia commendationem acquirit.

Fatendum tamen, simulatis id genus nominibus Auctorum ætatem, dignitatemque (quod apud testes Traditionis præcipue spectandum est) inverti non raro, atque confundi. Ita Symbolo Athanasii plurimum auctoritatis detrahitur, si ab eo conscriptum non sit, sed a Vigilio Tapsensi, vel a Vincentio Lirinenfi, vel, quod longe pejus, ab Auctore Gallo decimi seculi, ut placet nonnullis (26).

Est

[26] Videtur etiamnum dubitare Auctor operis, an Symbolum, vulgo Athana-

si, ab eo conscriptum non sit. Illud quidem incertum est, obscurumque, quis fue-

Est & aliud suppositionum genus, quas Novatores *pias fraudes* appellant. Originem trahunt illæ ex immoderato imprudentum quorundam hominum studio, qui de Ecclesia magnopere se merituros, Fideique dogmata in meliori lumine posituros esse putantes, cufas in suis officinis orationes, inclytissimis illis Scriptöribus prorsus indignas, eorum operibus, vel partim, vel integras etiam quandoque inferuerunt.

Ejusmodi *Sycophantas*, ut eos vocant, acriter, vehementerque insectati sunt emunctioris naris Critici. Erasmus præ cæteris bilem continere non potuit præfatione in Divum Hieronymum, & alibi contra quendam ejus furfuris hominem, qui minutissimis sordibus consperferat Patrum opera, præcipue vero Sanctorum Ambrosii, Hieronymi, & Augustini. Eo devenerunt audaciæ (inquit Vir eruditissimus) ut illos insanire non injuria crederes; ejusmodi autem fragmenta adeo insulsa cernens adjecta, non aliud profecto esse diceres, quam vilissi-

---

zit illius compiler, at genuinum non esse Athanasii foetum, nullus jam superest dubitandi locus. In eo quippe Nestorii, & Eurycheris hæreses 60. circiter annis post Athanasii mortem investite damnantur; atque, quod magis etiam miran-

dum, nemo unus tantæ hujusce Symboli auctoritate usus est ad refellendos Nestorianos, & Eutychiannos; quæ si mature considerentur, inviste persuadent, Authorem illius Symboli alium omnino esse & D. Athanasio,

vilissimos pannos, detritosque, purpureis, iisdemque præclarissimis togis consutos.

Quamquam in hoc negotio culpa non vacat Erasmi, quod eam rationem obtendens, partem operum, vel etiam integros libros Patribus Ecclesiæ non sine maxima quandoque injuria surripiat. Sic Divo Basilio magnam eximii de Spiritu Sancto Tractatus partem detrudere ausus est; ac Divi Chrysostomi Commentarios in acta Apostolorum mutilavit, ejusdemque homilias in secundam ad Corinthios rejecit, ut supposititias; quum tamen genuinos ejus fœtus esse certo constet apud omnes.

Billa  
Observ.  
Sacr. l.  
3. C. 9.

Silentio prætermittimus hoc loco aliud quoddam genus fraudis, quæ non pia, sed impia prorsus dicenda est; quum enim Hæreticos habeat auctores, a quibus plerumque vitiatæ sunt Patrum editiones, ea nos uti velle, nemini in mentem venire posse crediderim. Verum est quædam *suppositio partis*, ut Jurisperitorum more loquamur, de qua, quum valde frequens sit apud Scriptores Ecclesiasticos, pauca dicenda sunt. In eo autem sistit, quod errore Amanuensium unus, idemque liber pluribus sæpe tribuatur Auctoribus. Inde maxima in Bibliothecarum indicibus oritur confusio, quum nempe sub variis Auctorum nominibus idem opus exhibetur. Exemplo sunt *Johannes Rubus*, & *Johannes Buissonius*, qui ejusdem Harmoniæ Evangelicæ Duaci primum editæ anno 1575., duo proponuntur Auctores, quamquam utrum-

utrumque illud nomen unius, ejusdemque sit Scriptoris, Gallice *Jean du Buiſſon*. At ſi non nihil operæ, ac diligentie adhibeatur, facillime id genus errata emendari poterunt; quæ cæteroquin ab auctoritate Patrum ita ſunt aliena, ut non ſolum eam non evertant, verum ne leviter quidem labefactare queant.

## C A P U T X I I.

*Mutationes, & errata, quæ notantur  
in Patribus, illorum auctori-  
tatem nullo modo  
minuunt.*

**E**Tiamſi ab editionibus Patrum ſuppoſiti omnes tractatus, ut recta ratio poſtulat, expungerentur, iiſque omnes abjudicaretur, de quorum fide aliquis eſt dubitandi locus; qui tamen reliqui forent genuini, ad vindicandam eorum, quam defendimus, in rebus Fidei auctoritatem, abunde ſufficerent.

Maxima illorum etiam Tractatum pars, quibus nihil ineſt non Orthodoxum, non ita neceſſaria exiſtimanda eſt, ut, iis ſecluſis, iccirco ruat Religio. Quamobrem modo concordem, atque unanimem priſcorum Patrum conſenſionem conſtanter tueamur, cætera ut-  
cunque



cunque utilia videantur, sine ullo prorsus periculo præteriri possunt.

Non illud sane dolendum, quod celeberrimi illi Doctores externis ejusmodi ornamentis exuantur, sed quod tot, ac tantas passi sint bonorum suorum jacturas, operum videlicet præstantiorum, e quibus ad defendendam contra calumnias, atque profanas Hæreticorum novitates Ecclesiam quamplurimum præsidii peti potuisset.

Maxima enim ab iis utilitas percipi posset, ut eorum, quæ supersunt, errata emendarentur, suumque in locum restituerentur ea, quæ desiderantur, vel ob amanuensium incuriam, vel propterea quod Patres non in omnibus quæstionibus parem adhibuerint perspicuitatem.

Interim vero perniciosissimam tot librorum jacturam, qui superstites evaserunt, & in omnium usu versantur, lenire quodammodo, ac refarcire videntur. Quanquam enim Deus O. M. Pastorum Scripta singulari providentia servaturum se non promiserit Ecclesiæ, ita tamen eam impense diligit, ut ad ejus doctrinam, & traditionem tuendam necessaria aman- tissime servaverit.

Quamobrem permultæ licet factæ jacturæ in causa esse non possunt, cur adversarii Patribus Ecclesiæ tanquam erroneis Fidem habere detrectent, utpote quod tam certa, ac stabilis auctoritas a nonnullis operibus injuria temporum amissis haudquaquam pendeat. Alio-

quin

quin nec ipsi Scripturæ Sacræ, ( quod absit ) sua constabit auctoritas, quum hodiernis temporibus complures illius libri desiderentur.

Perierunt libri Bellorum Domini, atque Iustorum; Prophetarum Nathanis, Gaddi, Semejæ, Addo, Ahizæ, & Jehu; liber etiam parabolarum, & gestorum Regum Israel; liber Samuelis, oratio Osai, necnon orationes Osizæ ab Isaia conscriptæ, tres etiam mille Salomonis parabolæ, incredibilis numerus Canticorum, & plura volumina de virtute plantarum, & animantium; item descriptiones Jeremizæ, & Prophetia Jonæ, ut missa faciam. Commentaria Johannis Hyrcani, & libros Jasonis, quæ omnia Divino astante Spiritu fuerant exarata.

Quæ, quum ita sint, quis nobis Scripturæ Patrum, longa temporum serie deleta adhuc opponat? potiori multo ratione objici possent errata, quæ in illorum operum editiones irrepiere, quibusque genuinus sensus omnino turbari videtur. Verum & illud minus firmum est, quam, ut auctoritatem Patrum evertat, quum paria non desint errata in ipso Sacrarum Scripturarum codice, quem unicam fidei suæ regulam sequuntur Hæretici.

Deinde rarius fortasse lapsi sunt, quam vulgo creditur, qua de re nec ipsos inter adversarios convenit, & illorum alii quædam excusant, vel etiam approbant, quæ ab aliis condemnantur. Sæpius malum ipsum augetur parum

parum intento animo, doctrinæque, atque experientiæ defectu; quum illi, qui critice factitant, accuratam styli, usus, & doctrinæ Patrum cujusvis sæculi cognitionem adepti quandoque non sint,

Absolutissima istarum omnium rerum non præhabita notione, difficile admodum quis errorem vitabit in restituenda exemplaribus prisca integritate. Maximi tamen momenti habendum id est, quippe quum sine ullo plerumque defectu fidem adhibeat quisque illis, qui castigatissimas editiones vulgare profitentur.

Eo nostra hac tempestate præstamus Antiquis, quod licet contentam in operibus Patrum puritatem affatim non assequamur, propter maximam tamen, quam sapientiores Critici quotidie adhibent, industriam, ad eam propius accedere liceat, adeo ut nullus amplius querendi locus sit adversus temporum injuriam, vel amanuensium negligentiam, qui turpiter ea corruerint. Quamobrem consentaneum magis est, tot doctissimorum Virorum laboribus tranquille frui, quam de quisquiliis vitilitigare, atque propter futilissimas nugas auctoritatem Patrum discrimini committere, quæ aliis omnino fundamentis nititur, quam Grammatices, & humanarum scientiarum, utpote quæ illi famulari quidem, nullatenus vero dominari debent.

Czterum, quæ de auctoritate Patrum hæc-  
nus uique differuimus, non eo animo dicta sunt,  
ut contentiones, & jurgia excitentur, sed ut  
illa majori in lumine collocetur, aperteque,  
ut par est, omnium oculis pateat, qui vete-  
rum Doctorum Scripta legere adgrediuntur,  
vel ad proprios mores instituendos, vel ut  
laborum suorum, ac vigiliarum fructus in-  
vulgus proferant.

F I N I S

PRIMÆ PARTIS.



DE

DE OPTIMA<sup>73</sup>  
LEGENDORUM ECCLESIAE PATRUM  
METHODO.

PARS SECUNDA

De rebus necessariis ad  
Ecclesiae Patres uti-  
liter legendos.

CAPUT I.

*Qua mente legendi sint Ecclesiae Patres;  
quæve res postulentur ad eorum  
intelligentiam asse-  
quendam,*



URE apud omnes receptum est,  
ut eadem, qua scripta sunt, mente  
Patrum opera omnino legantur.  
Quisquis ab optima, notissimaque  
hac regula discedit, genuinum rei  
sensum turbabit, eoque longius a forma veri-  
tatis aberit, quo confidentius erroribus depra-  
vata via progredietur.

Prudentem lectorem, qui de *Cedrorum me-* Exceß.  
C. 17.  
*dulla*, idest Ecclesiae Patrum doctrina cibum  
sumit

fumit, in legendis eorum Scriptis charitate in primis, humilitate, rectaque mente instructum esse oportet; quæ si desint, studia omnia, quanquam specie tenus sanctissima, profana prorsus evadunt, omnisque Religionis expertia. Neque vero hæc omnia, licet præstantissima, satis sunt, nisi res aliæ comitentur, tum naturæ beneficio, tum labore, studioque comparatæ.

Miranda quidem Deus efficere potest, efficitque nonnunquam; verum consueta agendi methodo ineptis scientiæ donum haudquaquam largitur. Quamvis enim Christus Servator, quo suam in Evangelii institutione omnipotentiam manifestam faceret, rudes, atque ignaros homines primos constituerit Ecclesiæ Doctores, progressu tamen temporis præstantissima ingenia, & sapientissimos totius orbis Viros elegit, qui populi sui curam gererent, Patrum partes, atque Pastorum implentes.

Atque istud, quæ supersunt eorum opera, satis testantur, in quibus, vel mediocri judicio quisque facile noscit una cum cœlestibus gratiæ beneficiis artem, & naturam feliciter conjunctas esse. Luderet ergo, qui omnis ingenii, & intelligentiæ experts, ad Ecclesiæ Patrum lectionem sese conferret; nam esto, dixerit Chrysostomus, multum differre Sanctorum opera a Scriptis Philosophorum, quæ nisi perspicacissimus, sapientissimusque assequi nemo valet, procul tamen dubio magna in primis ingenii amplitudine lector pollere debet, quæ  
notiones

notiones in Patrum operibus incredibili numero contentas complectatur; fortis insuper sit, atque magnanimus, ut ferendo eruditionis Ecclesiasticæ ponderi parem se præbeat; acer judicio, ne a proposito sibi fine aberret; leni, atque tractabili ingenio, ut auctoris sui mentem percipiat; solers, & industrius, ut omnes ejus gressus sequatur; rectus, & constans, ne ab ejus mente abludat; perspicax, & intelligens, ut res funditus introspiciat; acutus, ut ad finem usque pertingat; prudens, ne ab illo excedat; exquisitissimo judicio, ut negligenda prætereant, expendenda vero non omittat; laboris, ordinis, & consilii amans, nec prævia erroris opinione imbutus, ne contra res, vel contra Viros propriæ sententiæ pertinacem se præbeat,

Nihil præterea illorum ignoret, quæ ad auctores, quibus præcipuam operam navat, referri possunt: calleat linguas, critice, philosophiam, historiam, leges divinas, humanasque, ac persuasum habeat, ad dilucidandas scientias, omnium aptissimam, tutissimamque viam esse scientias alias adhibere.

Atque hæc regia illa est via, qua celeberrimi Scriptores eo laudis, & gloriæ pervenerunt, ut vetustos Auctores tenebris confepultos, & pulvere pristino splendori restituerint. Hæc semita est omnium rectissima, eademque tutissima, qua magnus Onuphrius Panvinus dignus sane, qui *parens historiæ* vocaretur, in altissimam sese insinuavit antiquitatem, atque  
includit.

inclytissimus Baronius annalium Ecclesiasticorum eruit fundamenta, ac plurimi demum doctissimi Interpretes antiquos Ecclesiæ Patres illustrarunt.

Scientiæ omnes arctissima secum invicem connexionem junguntur, mutuam sibi ferunt opem, & lucem, atque remotissimis sæpe rebus elucidantur proximæ, quæ funditus cæteroquin dignosci non possent. Sic Geometria Villalpandus ad Scripturarum Sanctarum explanationem commode ulius est; sic Valesius doctissimus Medicus Hispanus ex Physices elementis ea, quæ in Sacris literis ad rerum naturalium ordinem spectant, explicuit; sic Levinus Lemnius allegorias Scripturæ ab arborum, & plantarum natura depromptas ex scientia Botanices exposuit.

Ep. 3.  
De doct.  
Christ.  
lib. 2.  
Cap. 6.

Hieronymus, & Augustinus explanandis Sacris literis Mathematicam prodesse fatentur. Nonnulla sunt, quæ ex elementis Astronomiæ finit Ecclesia; quod liquido ostendunt Concilia, Nicænum (1), Constanliense, Basileense, & Decretum sæculo proxime superiori latum a Gregorio XIII. circa reformationem Calendarii Romani.

Eadem ratione notitia Geographiæ, & morum, qui apud varias vigent Nationes, altissimis, atque sanctissimis studiis lucem præbent ab accurato lectore non contemnendam. „Non-

Re-  
marq.  
sur le  
voyage  
de Dand.

„ nulli Theologi paullo fastidiosiores (ut ait  
„ præclare D. Simon ) quorum mos est, quid-  
quid

---

[ 1 ] In quæstione de tempore celebrandi Paschatis.



„ quid itineris nomen præfert, parvi pendere,  
 „ præclara inde duci posse subsidia attendere  
 „ deberent; atque itinera, præcipue vero  
 „ Orientalia ad superandas difficultates, quæ  
 „ in Veterum historiis, immo etiam in Scrip-  
 „ turis Sanctis occurrunt, plurimum conferre.

Recens quidam Scriptor (2) computatione  
 temporum ex rerum Sinensium narrationibus  
 sumpta, ad defendendam Græcorum septuaginta  
 contra Hebraicos Codices Chronologiam per-  
 opportune usus est. Multa quoque reperiuntur  
 in itineribus Olearii, Petri Vallenſis, & aliis  
 notatu digna, aptissimaque ad reconditiores  
 Sacræ Historiæ sinus aperiendos.

Cardinus Eques, Viator celeberrimus adfir-  
 mat, plurium Scripturæ locorum intelligentiam  
 ex Regionum Orientalium notitia pendere.

„ Quum enim in ea mundi parte totius Sacræ <sup>*Tours.*</sup>  
 „ Historiæ series perfecta fuerit, atque Divi- <sup>*des Vj-*</sup>  
 „ nus hic liber ad Orientalium morem con- <sup>*ſag. des*</sup>  
 „ scriptus, figurisque ornatus sæpe sit, probe <sup>*Ebrv.*</sup>  
 „ iccirco intelligi nequeunt, quæ narrantur, <sup>*Chard,*</sup>  
 „ nisi ante innotescant res, e quibus eæ figuræ <sup>*pref.*</sup>  
 „ petuntur; cujus generis sunt proprietates  
 „ naturales, ac consuetudines Regioni pecu-  
 liares.

[2] Nimirum Pezronius Ci-  
 sterciensis Monachus, q̃ i  
 etiamſi non ita opportunè  
 usus ſit ſupputatione tem-  
 porum, ex rerum Sinen-  
 ſium narrationibus ſumta,  
 ut ſuam contra Hæbraicam  
 computationem ſententiam

omnibus perſuaſerit; ſatis  
 tamen felici ſucceſſu id  
 præſtitit, ut magnam erū-  
 ditiſſimi Viri exiſtimatione  
 nem apud omnes ſibi com-  
 pararet. Eum vero vali-  
 diſſime reſutarunt P. Mar-  
 tinus, & P. Le-queux.

„ liares. Cognitionis istius defectu plerosque  
„ Scripturarum Interpretes asserit, iis uti lo-  
„ cutionibus, quæ, quum locis, in quibus  
„ res gestæ sunt, non congruant, Textum  
„ perturbant, ac sensum sæpe reddunt obscu-  
„ rum; eandemque ob causam, qui commen-  
„ tarios scribunt, in turpissimos errores labi,  
„ atque ita plerumque scribere, ut potius di-  
„ vinare, ac vadium tentare videantur.

Utinam inclytus iste Viator fidem liberasset  
suam, scilicet commentarios edidisset in Orien-  
talium consuetudines, quæ ad Scripturam re-  
ferri possunt. Ut enim præclare addit, „ non-  
„ eadem est in Asia, quæ in Europa, consue-  
„ tudo vestium, ædificiorum, hortorumque  
„ formam perpetuo mutandi. Orientis incolæ  
„ veterum Institutorum tenacissimi sunt; ea-  
„ dem ratione secantur hodie, quæ antiquitus  
„ vestimenta; quod fidem facere videtur, in  
„ ea mundi parte eandem vigere etiamnum  
„ externam rerum speciem, mores, & con-  
„ suetudines, quæ ante bis mille annos, si  
„ nonnulla ( numero sane pauca ) excipias,  
„ quæ mutavit religio.

Et si parum adfinitatis habere videantur id  
genus scientiæ cum Sacris Codicibus, sine  
illarum tamen præsidio nemo eos perfecte  
assequi valet. „ Non multa adjiciunt, sed æque  
„ non erit totum; cui vel parva deerunt „ Ita-  
„ que perfectam Patrum notitiam non acquirit, qui  
omnigena eruditione instructus non sit. Quam  
ob causam impense nos monent Institutores,

ut

ut exiguis etiam, minutisque studeamus; nam quo uberiori quisque cognitione præditus est, eo facilior ad scientiam aditus illi patet, quum nulla sit, vel parva scintilla, quæ maximam incendii lucem proferre non possit.

## C A P U T I I.

*De varietate Linguarum, earumque in optimis studiis usu.*

**A**Nteaquam Babelicæ Turris fastigium in Cælos efferre adgrederentur homines, universum genus humanum erat labii unius, & sermonum eorundem. Verum orta inter eos dis- *Gen. Cap. II.* fensione, communis lingua multiplices loquendi formas accepit, vel in tot, tamque varias dialectos divisa est, & literarum pronuntiationes adeo diversas, ut homines, velut externi, nulloque societatis vinculo conjuncti, sese invicem non intellexerint, & propterea divisi, in varias terræ partes abjerint.

Neque vero hic malorum finis fuit: nam ex illis primigeniis linguis incredibilis aliarum numerus ortus est, quas novæ exceperunt; quum minima, vel fere nulla varietas summas hæc in re mutationes, atque innumerās obscuritates adferre valeat, quarum rationem si quæseris, nunquam invenies; nisi (quod longe difficillimum est) plures invicem linguas, ne ipsis quidem rusticanis sermonibus exceptis,

exceptis, invicem conferre, ac singula illarum verba colligere, & adamussim expendere velis.

*August.  
de Civ.  
lib. 19.  
c. 17.*

Interea hæc linguarum diversitas, quæ tantopere viget in Orbe, omnium maxima calamitas est; quum civili, ad quam nati sumus, societati, infensa omnino sit, atque inimica; facilius enim homines belluarum convictu utuntur, quam hominum, quorum sermonem exploratum non habent. Verum, quum ita sint animo comparati, ut ubique gloriam captare studeant, omnem in eo collocant operam, ut maximam hanc turpitudinis notam in ostentationis argumentum convertant. Suam quæque Natio linguam vehementer deperit. Summo cultu prosequitur, omnesque industriæ nervos intendit, ut eam modis, numeris, suavissimisque veneribus exornet. Constitutæ dicendi leges apud plerosque tanta religione servantur, ut divinas, humanasque violare malint, quam illas vel leviter infringere, atque tyrannicus pro libito linguarum usus confictus est, quem cæco impetu sequi, invito etiam sano sensu, rectaque ratione quisque gloriatur.

Victores populi maximæ sibi laudi duxerunt victis, subactisque linguæ suæ usum, & communionem imperare, atque omnis Regio, sicuti quævis ætas, complures homines effudit, qui ad linguarum studium se totos contulerint, nec aliud plerumque emolumentum perceperint, quam magnam verborum scientiam, rerum autem fere nullam.

*Varia*

Varia isthæc verborum permixtio imbecillium oculos capit, atque delectat. Verum sapientes, ac bene cordati, quum probe intelligant, quantum humanæ societati, ac scientiarum acquisitioni adversetur linguarum varietas, communem iccirco totius Orbis Nationibus linguam, qua in unum cogi possent, exemplo primævæ institutionis esse stabilendam existimant.

Qua re motus Cartesius, linguæ universalis usum cogitavit, proposuitque, cujus aliquod specimen dedit Wrenus Auctor Anglus, parum prospero eventu. Aptissimus esse videretur latinus sermo in universa jam Europa receptus: verum, etsi Asiam inter, Africam, & Americam de eo conveniret (quod sane credibile non est) bene multæ reliquæ forent difficultates, quæ superari non possent; qua de causa æquo, vel iniquo animo veteri subeundum est iugo, & opportunis, qua fieri potest, rationibus leniendum potius, quam acriori intolerantia detrectandum (3).

Gravius quidem, ac difficile linguarum studium; attamen qui Christi religione ducuntur, plurimum inde promereri queunt; ad illud enim impellunt nos, acerrimeque movent seu pietas

[3] Mirum profecto est ulli mortalium in mentem venire potuisse huiusmodi consilium, quod adversatur omnino summæ Dei

providentiæ, contra quam non est sapientia, non est prudentia, non est consilium, Prov. 21. 30.

pietas, & cultus verbi Dei, quod absque huiusmodi præsidio nemo probe perspectum haberet; seu flagrans pœnitentiæ studium, sanctissimi cujusdam Viri (4) exemplo, qui Hebraicam linguam ediscebat, quo felicius domitas haberet libidines; seu dentum ( quod longe præstantissimum est ) charitas, atque voluntas de Ecclesia benemerendi.

Divus Paulus gratias agit, quod omnibus auditorum linguis loqueretur. Origenes annos natus triginta, ad Divinæ linguæ studium animum convertit. D. Hieronymus Occidentis Origenes, Græcum, Latinumque sermonem adprime doctus, quatuor usus est Magistris, a quibus Hebraicam, & quinto, a quo Chaldæam linguam compararet, non erubescens, ut ait ipsemet, in hac linguæ fieri auditor, quum in cæteris omnibus foret præceptor.

Augustinum rerum æstimatorem æquissimum, & probandæ quavis occasione veritatis studiosissimum, toto vitæ suæ cursu pœnituit, quod linguas Orientales non didicisset; quamvis enim existimaret utilius interpretari Scripturas, quam scire linguas, norat tamen optime unum sine altero consistere non posse, atque in Ecclesiæ Doctore linguarum, & interpretationis scientias conjunctas esse debere.

In suis etiam confessionibus idem Ecclesiæ Doctor peccati se insinuat, quod a primæ ætate Græcæ linguæ studium neglexerit. Et sane

---

[4] Nimirum D. Hieronymi.

fane in doctissimo Augustino desiderari peritia isthæc videbatur. Ad eam nilus est provectiori ætate; sed ita parum felici successu, ut fateatur ipse in libris *de Trinitate*, & *contra Petilianum*, nec loqui, nec scribere se Græce posse, atque, quod ejus linguæ norat minimum esse, ac fere nihil. „Ego quidem (inquit) „Græcæ linguæ perparum affecutus sum, & „prope nihil. „Tantum nihilominus in hoc studio profecerat Augustinus, ut Græcos legeret Auctores, siquidem testis est ipse in epistola ad Audacem 261. novæ editionis; „Psalterium a Sancto Hieronymo translatum „ex Hebræo non habeo; nos autem interpretati sumus, sed Codicum latinorum nonnullas mendositates ex Græcis exemplaribus emendavimus, unde fortassis fecerimus aliquid commodius, quam erat, non tamen, quale esse debebat; nam etiam nunc, quæ forte nos tunc præterierunt, si legentes moverint, collatis Codicibus emendamus.

D. Thomas Scholarum Angelus, Græcæ linguæ ignorance laboravit, quod tamen ejus incuriæ tribuendum non est, sed ignorantia, ac feritati sui temporis, quo Græcus sermo res omnium monstruosissima habebatur, a qua sibi omnes, veluti a scopulo cavere deberent; *Græcum est, non legitur.*

Neminem latet, quantum perturbationis attulerit præstantissimis Ecclesiæ Latinæ Doctoribus octingentorum, vel nongentorum, quibus vixit, annorum spatio Græci sermonis

ignoratio. Concilii Francofordiensis Patres, quum propriam, legitimamque vocum significationem non intelligerent, quas adhibuerant Græci ad exprimendum genus quoddam adorationis dictæ προσκύνησις, illius, quæ soli Deo exhibetur, omnino dissimilis, præpostero quodam studio definitionem secundi Concilii Nicæni de Sanctarum Imaginum cultu exploserunt.

Equidem Patres Francofordienses (5) Latino hujusce Concilii actuum exemplari decepti

[5] Patres Francofordienses errore facti laborarunt in hac questione [ut censent eruditissimi Viri Baronius, Bellarmius, Perronius, & alii] nec satis perspectam habuerunt Synodi septimæ sententiam: quod indicant verba secundi Canonis ab iis Patribus sanciti: „allata est (inquiunt) in medium questio de nova Græcorum Synodo, in qua scriptum habebatur, ut qui Imaginibus Sanctorum, ita ut Deificæ Trinitati, servitium, aut adorationem non impenderent, anathema judicaretur. „ Hic autem error facti inde ortum habuit, quod Patres Francofordienses magis animum adverterint ad Constantini Metropolitanum in Cypri Episcopi professionem, in Latina interpretatione cor-

ruptam, quam ad definitionem Concilii: Sejunxerat enim Constantinus adorationem, quæ soli Deo, ab illa, quæ Imaginibus exhibenda est; interpres autem utramque inconsiderate conjunxit, atque confudit.

Præterire tamen non possum, non eandem fuisse Patrum Francofordiensium, cunctorumque illius ævi Antistitum Gallicanorum sententiam cum Patribus Nicænis de cultu Sacris Imaginibus exhibendo. Etenim Patres Nicæni Sacras Imagines colendas esse decreverant; Francofordienses vero damnaabant quidem Iconomachos, qui eas comburebant, at colendas tamen non esse putabant, sed in Templis solummodo servandas, quod rudes, & ignari Fideles facilius



cepti sunt; at si Græcæ linguæ cognitione non caruissent, Latinum cum Autographo exemplari conferentes, erratum facilius potuissent emendare. Neque enim eos præterisset maximum discrimen, quod Constantinensis in Cypro Episcopus Constantinus, suam eidem Concilio professionem exhibens, apponit inter adorationem, quæ Imaginibus, & eam, quæ soli Deo debetur.

Nosset utique verbum προσκύνησιν a Patribus hujusce Concilii, quod est inter Oecumenica septimum, ad simplicem potius venerationem, quam ad veram adorationem exprimendam usurpatum, exemplo septuaginta Interpretum, qui in Hebraici Textus interpretatione discrimen illud satis ostendunt.

Vid.  
Simon.  
not. ad  
Apolog.  
Eccles.  
Orient.  
Gabr.  
Phila-  
delph.

Quod etiam Græcis Latini exprobrarunt, eos *Obolata* prius adoratione prosequi, quam consecrarent, statim ac nimirum in *Prothesi* afferuntur ad Altare Sacrificii, id nonnisi ex Græci sermonis imperitia fecerunt, ac propterea quod, quum Græcorum Ritualia legerent, percipere non possent, verba προσκύνησιν, & προσκύνησις latiori hoc in loco sensu sumi, quam ubi de adoratione ineffabili Trinitati exhibenda.

Uno verbo dicam, liquido constat altissimam ignorantiam, in qua primævi Scolastici, necnon

cilii instruerentur, & ad pietatem, atque virtutem excitarentur. Constant hæc tum ex eodem Conc. Fran-

cofordiensi, tum ex libris Carolinis, cum præcipue ex Concilio Parisiensi anno 825.

necnon Recentiorum nonnulli versati sunt de Græcorum ordinationibus, non aliunde, quam ex illorum linguæ ignoratione ortam fuisse.

### CAPUT III.

*De linguis ad perfectam Patrum intelligentiam assequendam necessariis,  
ac primo de Lingua  
Hebraica.*

Sac. lcc.  
Tom. 1. **D**Ivus Augustinus in eximio opere *de Doctrina Christiana*, quod „absolutissimam,, continet „Theologi institutionem,, linguarum Hebraicæ, Græcæ, & Latine studium, & scientiam magnopere commendat.

Omnes Ecclesiæ Patres Græce, vel Latine scripserunt, si excipias Sanctum Ephrem Diaconum Edessenum, Barcepham Episcopum Syrum, aliosque paucissimos, qui, quum Arabice, Syriace, vel Æthiopice scripserint, Græce redditæ sunt, nec ultra lingua apparuerunt primigenia (6), nisi in aliquot insignibus Bibliothecis, qualis extat Lugduni Batavorum, ubi hæc antiquitatis fragmenta servantur. Negari tamen

[6] Post Auctoris tempora Syriaco, Latinoque sermone editus est S. Ephrem opera, & studio eruditissimi D. *Asseman*, cui hæc

Provinciam demandavit Eminentissimus Cardinalis *Quirini*. Est autem illa omnibus numeris absoluta.

tamen nequit, Hebraicæ linguæ cognitionem, legendis Patribus esse necessariam propter Sacram Scripturam, cujus Textum antiqui Doctores verterunt, editiones emendarunt, ac litteram explanarunt.

Primævos hosce Criticos nemo, uti par est, intelliget, qui Hebraicis literis plusquam mediocriter eruditus non fuerit; immo etiam aliquam calleat ex illius linguæ dialectis, ut existimat eruditus quidam Scriptor, qui perfectam, absolutamque Græci Synagogæ sermonis, quem septuaginta Interpretes, & novi Testamenti Scriptores adhibuerunt, intelligentiam ab eo, qui Syriace nesciat, haberi non posse censet.

Græcus septuaginta Interpretum sermo, si verba solum spectes, Græcus quidem est; sin autem locutionem, ordinem, atque dispositionem, Hebraicus, vel Chaldaicus, ut doctissimi sentiunt æstimatores. Ludovicus Capellus animadvertit, Græcis vocibus barbaras etiam admixtas esse, & a septuaginta Interpretibus proprio Marte confutas: „ Quis nescit ( inquit )  
 „ verba quidem esse Græca, immo plurima  
 „ esse non Græca, sed barbara ab ipsis effi-  
 „ eta; alia Græca quidem, at non ejusdem,  
 „ quam apud Græcos, significationis? „ Non illa tamen laudatis Interpretibus ignaris exciderunt, sed ideo ab iis factum est, ut Ethnicorum ingenio, & stylo sese accommodarent, quos informare in animo habebant.

*Resp.  
ad dis-  
sert.  
art. 26.  
de Sept.  
Edit.*

Levissimis etiam rebus detinetur, qui linguas ignorat. In nonnullis, e. g. Divi Hieronymi operum editionibus Hebraici passim occurrunt characteres, atque, ut res aliter sese habeat in Autographo hujusce Patris exemplari, qui Latinis characteribus Hebraicum Bibliorum Textum exscribebat, ad eorum tamen, quæ leguntur, intelligentiam, etiamsi characteribus in margine apposis contentus sis, Hebraicarum literarum subsidium invocandum erit, alioquin Latinorum characterum ope verba quidem facilius legere, at nusquam intelligere poteris.

Antiquissimus mos est vulgaribus literis exscribendi, quæ primitus Hebraice, vel Græce scripta sunt. Novi Testamenti Scriptores, & Græci Patres Hebraica, vel Syriaca Scripturæ verba Græce descripserunt. In Hexaplis Origenis Codex Hebraicus non Hebraicis solum, verum etiam Græcis characteribus est exaratus; atque Makercus librum Psalmorum, Hymnorumque anno millesimo centesimo quinto Latinis literis scriptum se vidisse testatur. Quamobrem reprehendenda non est illorum ratio, qui in editionibus Patrum Hebraicis Latinos characteres adjiciunt, quum & Veterum nitatur exemplo, & plurimum adferat utilitatis.

Media literarum ætate linguarum Orientalium studia jacuerunt, atque experientia compertum est, non inutiliter labente penultimo sæculo Græci sermonis studia instaurata fuisse, Hebraici

Hebraici vero sæculo proxime sequenti; ac demum, labente hoc ævo, Arabici suscepta; qui, quum amplissimam habeat regionem, ad percipienda quædam eruditionis arcana, quæ ex sapientis Græciæ reliquiis Arabes collegerunt, plurimum confert.

Revera si quid est honorificum Galliæ, quove optima ingenia ad linguarum studia excitari debeant, illud profecto, quod scriptum reliquit *Colomiez* in opere *de Gallia Orientali*, in quo centum quinquaginta Gallorum exemplo ab *Arnalgandi Medicinæ Doctoris*, imperante *Philippo Bonæ*, temporibus, usque ad *Achillem de Arlay*, *de Sancy* Constantinopolim a *Ludovico XIII.* legatum perspicue probat, quantum laudis in hoc insigni studio inclyta nostra gens sibi valeat comparare.

Novatores quidem refflorescentium in Europa linguarum Auctores haberi vellent; verum fateantur oportet hac in re, si quid præclari sciunt, Catholicis Romanis acceptum referendum esse, qui eorum institutores fuerunt, atque uberrimi fontes, e quibus quidquid optimum habetur hodiernis temporibus, quidquid perutile in linguis Orientalibus, manavit, & fluxit.

Neque vero inficias ibo, *Revelinum*, quem plures credidere *Lutheri* sectatorem, unum e principibus postremi sæculi Viris fuisse, qui *Hebraicæ* linguæ scientiam cumulatissimam habuerint. Verum non unus fuit *Revelinus* in ea celebranda; plurimum etiam opis tulit *Picus Miran.*

*Sine.  
Rep. a  
quibus.  
Theol.  
de Hall.*

Mirandulanus, ut Hebræarum literarum cultus per totum Occidentem diffunderetur. Ante præstantissimos hosce Viros floruerunt identidem laboriosi homines, qui se ad hæc studia conferrent, sed ab simili prorsus ratione, qua postremis temporibus, quibus, quum persuasum esset Criticis totam Occidentis doctrinam ab Oriente repetendam, omni studio nisi sunt, ut ejus linguæ peritissimi evaderent, qua in doctrinæ cognitionem venirent, quæ nostræ basis est, ac fundamentum.

#### C A P U T I V.

##### *De necessitate Linguæ Græcæ ad Ecclesiæ Patrum intelligentiam.*

**Q**UI linguam Hebraicam negligunt, magno destituti sunt præsidio ad intelligendos Ecclesiæ Patres, qui in commentariis suis, atque disputationibus ad Hebraicum Codicem, & Judæorum eruditionem sæpe recurrunt, ut nodos e multiplici forma Linguæ Sanctæ, quæ locupletissima est, subortos solvant, expediantque.

Verum, quum non omnes amplissimo sint ingenio, ii, quibus Hebraicos adire fontes non licet, Græce saltem, Latineque sciant, oportet. Hæc linguas si tollas (ait Vossius) actum est de notitia antiquitatis, cuncta pereunt, ac scientiæ oblivione sepultæ jacebunt,

*15. Voss.  
ad ob-  
serv.  
super.  
Eris.  
Jacr.*

bunt; quidquid enim studio comparari potest, apud Græcos, Latinosque Scriptores continetur.

Eruditus quidam Scriptor nuperrime se ab altero non indocto accepisse adfirmat, intellectum non iri Patres Græcos ab eo, qui septuaginta, Homerum, ac Demosthenem autographa lingua non legerit. Hisce fortasse addendum Isocratem suadent Erasmi argumenta. Ast ( ut verum fatear ) inter profanos Scriptores ex Homero præ cæteris utilitatis, atque præsidii redundare plurimum potest, tum quod vel unus ipse voces omnes, atque dialectos contineat, tum quod „ Græcæ linguæ regula, & „ exemplar haberi debeat.

*Matth.  
Erad.  
Monast.*

*Matth.  
Grec.*

Græcorum Patrum Politiore exempla secuti sunt Græcorum Auctorum, qui ad Sacros Codices sese ipsi composuerant. Multa est, inquiunt Critici, Græcos inter Auctores, Sacrosque Scriptores styli similitudo; eadem apud Homerum, Herodotum, Hyppocratem in rerum narratione simplicitas; Solonis Elegiæ ad cohortationem Moyfis, ac Prophetarum plurimum accedunt. Eadem se prodit in tragicis Choris, & Pindaro, quæ in Canticis, vis, atque varietas. Græcorum elegantia, orationis ornamenta, omnis demum illorum eloquentia ab Hebræis desumpta est, quum illorum tempore Græci literarum imperiti adhuc forent, subagrestes, & barbari.

Græcus

Græcus antiquitus sermo valde communis fuit. Ab Alexandri Magni temporibus pervasit in omnes Orientis Provincias, quæ illius armis cesserunt, & Imperio subiectæ fuere. Ægyptii Græce loquebantur, ac præcipue in Alexandria, ubi eadem lingua utentes Judæi, *Hellenistæ* dicti sunt, ut ab Hebræis colentibus Palestinam, Syriace, vel Chaldaice loquentibus distinguerentur.

De Tl-  
lustr.  
Gram-  
mat.

Per universum Romanum Imperium Græcus sermo obtinuerat, atque Romani pueros suos Athenas mittebant, ut una cum Philosophia, cæterisque scientiis, Græcæ linguæ puritatem ediscerent. Semigræcos vocat Romanos Suetonius, additque „ Ciceronem ad Præturam „ usque Græce declamasse.

Breves-  
vros de  
la di-  
versité  
des lan-  
gues.

Idem mos convaluerat in Africa, & Galliis; sunt etiam, quibus placet & hodie in Morea *Neapolim* inter, ac *Monembasim* quatuordecim Civitates extare, quarum incolæ, vulgo dicti *Zacones*, veteri Græco sermone utantur, qui a Grammaticali plurimum distat, quin tamen impedimento hoc illis sit, ut Græce ad Grammaticæ regulas loquentes intelligant.

Primævi Romæ Episcopi Græce scripserunt. (7) Canones Apostolis adscripti, Constitutiones

[7] Sic Divi Clementis Epistolæ ad Corinthios Græco sermone scriptæ sunt; cæterum autem, si hunc Summum Pontificem origine Græcum excipias, difficile

admodum erit alia huius rei proferre exempla, longeque vero similis est, Romanos Pontifices Latine potius, quam Græce scripsisse.



tionēs Apostolicæ , ac quidquid demum in  
Romana Religione antiquius , & augustius ,  
Græcis literis consignatum est , quæ apud præ-  
stantissimos Viros magno semper fuerunt in  
honore.

Et sane singularis nitor , suavitas , atque  
politiores dicendi videres pulcherrimo huic ,  
locupletissimoque sermoni peculiares sunt . La-  
tinum arbitratus est Cicero uberiorem ; verum  
dissentiant Lucretius , & Quintilianus , necnon  
Gregorius Nazianzenus , qui , quod ad res Theo-  
logicas spectat , plures in Latina lingua desi-  
derari voces asserit , quibus Græcorum vis ,  
nervusque perfecte reddatur . Revera existi-  
mant eruditi Viri , verborum magis inopem  
esse Latinam , quam Græcam , atque ideo  
Latini eidem sæpe verbo plures notiones sub-  
jungere , atque etiam varia elocutione , vel ver-  
borum connexionione , quod novas difficultates  
parit , supplere coguntur .

## C A P U T V.

*De necessitate Linguae Latinæ ad intelli-  
gendos Ecclesiæ Patres .*

**A**D Latinum sermonem quod attinet ,  
quum quinque , vel sexcentum annis ,  
valde angustis Regionibus circumscriptus fue-  
rit , ope commercii , & Romani Populi , Co-  
loniis adjuvantibus longe , lateque diffusus est ,  
vel,

vel, si magis Divi Augustini conjectura placeat, illud Romanorum ambitione factum fuit, & summa cupiditate, cæterarum Nationum non modo fortunæ, sed & linguæ dominandi, eo vel maxime, quod leges omnes, quibus Imperii Provinciæ regebantur, exceptis municipalibus lingua indigena exaratis, Latine descriptæ forent.

Imperante Augusto, Hispani, Galli, Populique Pannoniæ loquebantur Latine; postea eidem linguæ affueverunt Angli, ac demum ejus usus in vectus est in Illyriam, pervasit Septentrionem, iterumque, trajectis maribus, ita invaluit in Africa, ut ab ipsis etiam incunabulis addisceretur „ Inter blandimenta nauticum, & joca arridentium, & lætitiæ aludentium „ ut inquit Augustinus in lib. *Confessionum*. In Græcia duntaxat, & Asia parum incrementi cepit.

Varias Latinæ linguæ ætates distinguit Vossius; puerili, sub ditione Regum Romanorum balbutire cœpisse; juvenili, sub Consulibus plus ubertatis, leporis, ac virium adeptam; firma vero ætate, sub imperio primorum Cæsarium ad summum perductam fuisse; sed temporis successu, iterum gradibus delapsam, plurimum elegantiae, atque sinceri candoris amisisse adfirmat.

Et sane ea est linguarum natura, ut primum in lucem prodeant, & formam qualemcunque subeant; deinceps post multas adhibitæ curas in clarissima luce versentur, ac demum fœda-

tz, permixtæque, novis linguis originem præbeant, quæ, quum nihil commune habeant cum fonte suo, nisi perobscuras ethymologias, atque radices implicatissimas, Criticorum, Grammaticorumque ingenia summopere torquent.

Ingenti fervorum multitudine, cæterarumque Nationum irruptione, ac prava pronuntiatione Latinus sermo paullatim corruptus intercudit. Ætate jam sua conqueri cœpit Cicero de Italorum pronuntiatione; Brevevoodus fœdissimo huic vitio imperfectarum, quæ Latinam consecutæ sunt, linguarum originem assignat. Revera ita linguarum naturæ conveniens est pronuntiatio, ut vel non accurate servata maximam, judicio saltem aurium, varietatem inducat.

Tanta olim sollicitudine hæc sermonis pars observabatur, ut qui in ea peccarent, barbari traducerentur. Atque hoc illud est, quod adfirmat Strabo, *barbaros* primum dictos, qui Lib. 16. balbutiebant, postea vero ad illos usque translatum id nominis, qui laberentur in pronuntiando, atque ob id a Græcis, qui scientia, & elegantia præstantissimi erant, *barbaros* vocatos alienigenas, qui Græce loquentes, propria vocis inflexione carebant.

Quum primum Latini Patres florere, Latinus sermo contaminari jam cœperat; qui enim inter eos lingua præstant, exeunte secundo sæculo scribere, qua ætate una cum imperio Latinus sermo vergebat in interitum.

Neque

Neque vero ab illis Patribus pura, & integra Latinitas derivanda est: at Lactantius tamen Ciceronis, & Severus Sulpitius Sallustii stylum proximè imitati sunt. Sidonius etiam Apollinaris Symmachum, & Plinium juniorem imitando expressit. Boetium laudat Valla, quod latine eleganter locutus sit, ut non inficere dixerit Scaliger; „ Valla docet „ Boetium Latine loqui, & Vallam Boetius „ bene sapere. „ Isidorus etiam Hispalensis Latinus est, licet parum elegans; atque non immerito illum pluris facit Salmasius, & Godofridus in sua Latinæ linguæ verborum collectione, Varroni, Festo, aliisque nonnullis parrem existimat.

Sanctorum Paulini, Eucherii Lugdunensis, atque Salviani Massiliensis stylus satis comprobatur, nonnihil veneris, & puritatis Romanæ in Gallias translatum fuisse. Salvianus nihilominus aliter sentire videtur: „ Ad hanc (inquit) se partem contulerunt Scriptores mundalium negotiorum, ut ea, quæ dicerent, aut comito, & blando carmine canerent, aut luculenta oratione narrarent. Omnes enim in Scriptis suis causas tantum egerunt suas, & propriis magis laudibus, quam aliorum utilitatibus consulentes non id facere adnisi sunt, ut salubres, & salutiferi, sed ut scholastici, ac disertii haberentur. Nos autem, qui rerum magis, quam verborum amatores, utilia potius, quam plausibilia sectamur, neque id quærimus, ut in nobis inania

*Prof.  
ad Sa-  
lem.*

„ inania sæculorum ornamenta , sed ut salu-  
 „ bria rerum emolumenta laudentur in Scrip-  
 „ tiunculis nostris, non lenocinia esse volumus,  
 „ sed remedia „. In quem locum notat do-  
 ctissimus Baluzius improbari a Salviano non  
 puritatem sermonis , quum eo stylo uteretur  
 ipsemet, qui *Scholasticus* , idest multo studio  
 comparatus vocabatur , sed corrupta illorum  
 ingenia , qui puritate linguæ ad morum impu-  
 ritatem utebantur: qua fere ratione Quintilia-  
 nus Poetam Afranium arguit, qui turpissimas  
 comœdias eleganter conscribebat; nosque Pe-  
 tronium , & alios fabellarum Artifices repre-  
 hendimus, quorum effusam, impudicissimam-  
 que libidinem ne ipsæ quidem chartæ ferre  
 possint.

Alii præterea in medium adferuntur Patres,  
 ac præsertim D. Hieronymus, qui Latini ser-  
 monis munditiem singulariter retinuerunt; ple-  
 rique tamen ætati suæ morem gerentes licen-  
 tius scripsere: neque enim linguæ serviebant,  
 sed ea ad populorum institutionem utebantur.  
 Grammatices regulas præceptis charitatis post-  
 habentes, non verebantur barbaris quandoque  
 vocabulis uti , vel etiam nova fingere, quum  
 ad exponenda Religionis mysteria propter alia-  
 rum vocum inopiam necessarium existimarent.

Quandoquidem diffuso per Imperii Provin-  
 cias Latino sermone, vulgaris tamen non ob-  
 soleverat, mirum non est in iis Provinciis La-  
 tinam linguam non eandem, ac Romæ, purita-  
 tem adeptam, ubi primorum præsertim Cæsa-

G

rum

rum temporibus nulli permixta vigeat. Qui florebat in Galliis, aliisque Provinciis Patres, nonnihil in paterni hujus vitii tenebris versati sunt. His adde bene multos, etiam illius consuetudinis jugo remoto, naturalem stylum reliquisse, se seque ad peculiarem proprio Marte confectum convertisse. Atque in eo fortasse Africani sermonis sistit varietas, & inconstantia: præter enim quam quod Græcis idiomatibus dialectus indigena refertissima est; plurimum etiam habet impetus, & vehementiæ illius Nationis ingenio peculiaris, quod sane asperum, & inæquale non esse non potest.

Accuratam lectorem hæc omnia nosse oportet; calleat etiam quidquid firmi, aut infirmi linguis inest, varias illarum dotes, & usus perscrutetur, suoque studio remotissimarum ætatum barbariem pervadat; verbis quippe non intellectis, res ipsæ percipi nullo modo possunt.

Justinianus Imperator, quum probe perspectum haberet, quanti interesset ea agendi ratio in usu legum, quæ de hominum vita, eorumque fortuna decernunt, peculiarem Digestis suis titulum inseruit *de verborum significatione*, quo Juris Civilis studia auspicari forte fortuna præstaret.

Nemo diligentius Jureconsultis verborum proprietatem servavit: quamobrem ad eorum laudem dictum est, Latinam linguam, si unquam deperdita fuisset, ex eorum monumentis perfecte instaurari posse. Non enim satis duxerunt notis, & commentariis leges illustrare,

strare, verum etiam verba, quin & verborum compendia singillatim explicuerunt; quod præstitum est ab Alciato, & Rebuffio, qui, quum optime agnoscerent, quantum in eo veteres Jurisperiti alioquin præstantissimi peccarint (8), amplissima Romani Juris vocabularia magno posterorum commodo ediderunt.

Hujusmodi consilium animo jam præconceperat Julius Cæsar, neque Ciceronem præterire potuerat; verum nonnisi postremis temporibus ab Oldenpordio, Hottomano, Barnaba Briffonio, & Johanne Calvino, Heidelbergensis Lycei Professore summo omnium plausu executioni mandatum est.

Apud Mathematicos, Medicos, Historicos, & Geographos extant hodiernis temporibus vocabularia, neque vero suis carent Theologi. Græcis Patribus intelligendis inservire potest *Thesaurus Ecclesiasticus* Gasparis Sviceri; atque utinam, quod ille in Græcos, idem alii facerent in Latinos Patres. Interea vero adhiberi potest *Lexicon Theologicum* Alstedii, & *Latinum du Cange* Glossarium, quod innumeras res complectitur, quæ ad Ecclesiasticorum mediæ, & infimæ Latinitatis Scriptorum intelligentiam conducunt.

Ridendus sane foret, qui nostri temporis imperitiæ parum consulens, ad hosce libros,

G 2

quibus

[8] Sic veterum Jurisperitorum nonnulli Græcam vocem *antichresis* pro anti-

*phona* sumentes, illius vocabuli occasione, de antiphonis plura dixerunt.

quibus linguarum ænigmata resolvuntur, recurrere detrectaret. Dionysius Godefridus, Jurisconsultorum celeberrimus agebat, eos, qui hoc subsidium negligant, omnium ludibrio se se exponere; quod testatur illorum exemplum, qui, ut narrat Marcellinus, inertes, & imperiti, quum veterum quorundam Auctorum nomina audissent, eos vel raros pisces, vel exquisitissimos cibos stulte, inepteque putarunt.

Ignaro turpe non est doctrinam querere, sed illud longe probrosum, quæ quisque proprio ingenio assequi non potest, ab aliis discere nolle. In difficilibus, & dubiis rebus maximi etiam Doctores vocabularia consulere non dedignantur. Omnia, quæ extabant temporibus suis, perlegit Photius, quin & ipse composuerat amplissimum, teste D. *Colomiés* in suis *Miscellaneis historicis*, vidi (inquit) in „Batavia amplissimum Lexicon manuscriptum, „atque Odes Photii in Collegio Claromontano, „quæ nunquam in lucem editæ fuerunt.

Scaligerum, & Casaubonum nulla fugiebant vocabularia, quæ non legerent, suisque annotationibus illustrarent. Eccur enim vero Eruditi rebus aliorum Sapientum labore collectis, æque compilatis uti negligant? Neminem dedecet hujusmodi exercitatio, multo minus præ cæteris Virum Theologum, quum Theologia, utur altissima, in signis simul, ac rebus sita sit, atque signis, idest verbis res ipsæ noscantur:



tur: „ doctrina ( inquit Augustinus ) vel rerum  
 „ est, vel signorum, sed res per signa discuntur. *De  
doctr.  
Christi.*

## CAPUT VI.

*Quanti intersit scire linguas, ut Patres  
 in fonte legantur.*

**Q**uidquid in laudem interpretationum dicatur, nullam tamen adeo præclaram invenies, nullam adeo perfectam, ut nihil ei desiderandum superfit. Minima, vel fere nulla varietas satis est, ut autographum deturpetur exemplar, atque etiamsi tota res integra maneret, vel uno elocutionis vitio omnia fœdantur, depravanturque. Istud vero quis cavere possit, quum eorum pleraque, ut ajunt linguarum Institutores, quæ in hac lingua laudem merentur, in altera veniam habere non possint, ac quæ in Græca voluptatem, fastidium in Latina pariant legenti?

Jam diu animadvertum est in Græcorum Auctorum collatione cum interpretationibus Latinis, quidquid illic erat roboris, ac venustatis, infirmum isthic, & insulsum evadere. Hujus rei exempla manifestissima sunt in ple-risque Latinis Sanctorum Basilii, & Chrysostomi interpretationibus; nam illi etiam ipsi, qui nonnisi Latine sciunt, quum adeo elumbes vident interpretationes, vel enervatam ab Interpretibus illorum Patrum eloquentiam,

vel eos Patres minus quam vulgo dicitur, disertos fuisse autumant (9).

Rem profecto perraram esse oportet eximiam interpretationem, quum ne certo quidem constet, qua in re sita sit, ac virtutum ornamenta postulentur ab Interprete, quæ difficillime una concurrant. Calleat Interpres necesse est Auctoris, quem interpretatur, linguam, & eam, qua interpretatur; illarum vires, elegantias, & lepores funditus agnoscat: ac demum in, adeptæ cognitionis experimento diu, multumque sese exercuerit, quæ venusta sunt, venuste reddens, quæ figuris ornata, ornate; ne quid insolitum, ne quid nimium, vel falsum in, ejus dictione videatur.

*Bill.  
Ohserv.  
Sacr.  
lib. 2.  
C. 1.*

Multum Joachimo Perionio laudis debemus, quod plura Græcorum Patrum opera, eleganti Latinitate donaverit; sed majorem etiam haberemus gratiam, si ampliori Græcæ linguæ scientia instructus, accuratior in suis interpretationibus fuisset, atque emendatior. Ab Auctoris mente deflectit sæpe numero, sive in usu vocum, quibus variæ subjectæ sunt notiones, sive in Græcis phrasibus, quarum alia est

[9] Quum Auctor hæc scriberet, nondum edita fuerant opera Basilii a P. Garnier, & D. Chrysostomi a P. de Mont-faucon; quæ si legisset hujus operis Auctor, de amissa, vel enervata illorum Patrum elo-

quentia forte fortuna tantopere non quereretur. Est enim non eadem omnino vis, idemque spiritus viget in interpretatione, qui in Græco exemplari, ad illum tamen proxime accedit.

est a Latinis significatio; vel etiam fallitur occasione quorundam verborum, quibus unius literæ vel additio, vel detractio alienum prorsus ab Auctoris mente sensum adfert.

Præter verborum noticiam penitus etiam Auctoris sui argumentum perspectum habeat Interpretes necessum est; in aliis quoque scientiis, quas ad operis sui ornamentum bona præsidia Auctor adhibuit, versatus sit. Qui ex Græco Latine reddidit Eusebium Musculus, satis Theologiæ sciebat, ut susceptum opus feliciter expleret: sed quia in re critica, & cognitione antiquitatis sat exercitatus non erat, in reddendis nominibus officii, & dignitatis falsus sæpe est, atque de priscis consuetudinibus parum apte locutus.

*Valef.  
not. ad  
Euseb.*

Doctissimus Pater *Lamy* in suo tractatu *de Paschate* existimat, recentem antiquitatum Judaicarum Interpretem Gallum, qui præclarissimo illo opere tantum laudis promeruit, in eruditione mere Judaica, quod ea satis excultus non esset, hære ut plurimum.

Eadem fere causa fuit, cur Ambrosius *Camaldoli*, qui librum Hierarchiæ D. Dionysio vulgo Arcopagitæ adscriptum summa cum laude convertit, parem non iniverit gratiam in sua Diogenis Laertii interpretatione, quæ singularem veterum Philosophorum doctrinæ noticiam postulabat; propterea quod ista cognitio Ambrosio ab hominum convictu remoto minus fortasse, quam scientia mystica innotuerat.

Bill.  
Objev.  
Sacr.  
lib. 2.  
Cap. 3.

Eodem gradu, modoque, quo Auctorem vertere pergit Interpres, ad fontes, e quibus ille suam hausit doctrinam, recurrat oportet. Ribitus, qui Antonii Melissæ sententias Græco transtulit in Latinum sermonem, quod præclaris judiciis de hoc compilatore latis a Gelnero paullo facilius steterit, nec quidquam operis infumserit in consulendis Sacris, & profanis Scriptoribus, e quibusea effata deprompta sunt, dignus sane fuit, qui ob tantam incuriam indiligentissimus Interpres haberetur.

Id. ibid.  
C. 2.

Neque vero hæc omnia satis esse arbitreris; accuratissime præterea inspicienda sunt exemplaris errata, quod nisi sedulo perficias, longius inoffenso pede non progredieris. Hervæus, vir ad antiquos Scriptores icite, feliciterque vertendos a natura compositus, in reddendis Theodoreti contra Hæreses Scriptis erravit nonnunquam, quod exemplaris sui menda non caverit.

Cæterum Interpres gravissimo sit, acerrimoque judicio necesse est, atque Auctoris sui personam adeo subtiliter induat, ut nonnisi unus, idemque in duobus, ut ita dicam, simillimis corporibus vivere spiritus videatur. Verum ecquis ille est, cui tot, tantaque simul prospere succedant? ecquis occurrentes in tam salebroso negotio discrepantias omnes conciliare valeat? qui susceptam interpretationem hilaritate, & suavissima luce conspergere laborat, fidus esse desinit; qui vero fidem scrupulose servat, obscurus fit, agrestis, & barbarus: at fides tamen religiose servanda,

præ-

præsertim in Auctorum Ecclesiasticorum interpretatione; nam in divinis rebus licentia, quæ in errorem abire posset, confidentius uti summum nefas est.

Parum constantis moderationis plerique Interpretes tenent, alii servitutem optant, alii justo liberiores sunt. Qui opera Sancti Irenæi olim convertit, fidissimus fuit Interpres, sed nimia scrupulositate in barbariem impegit, atque singulare quoddam dicendi genus adhibuit, quod, quum Græcum undique sit, a Latinorum stylo prorsus abhorret. Contra Hieronymus Eusebii Chronicon, aliaque nonnulla Patrum scripta transferens, ea libertate usus est, ut Ruffino justæ reprehensionis locum præbuerit. Ipse quoque Ruffinus Latinorum exempla secutus, qui quidquid sibi non probatur, temere sustollunt, omnia susdeque vertit in Origene, cujus principia transtulit ad tegendos potius, ut videtur, illius errores, quam exponendam doctrinam.

Innumera sunt, quæ hac in re adducuntur exempla; verum hisce paucis abunde perspectum sit, quanti intersit sedulam Orientalibus linguis operam navare, se seque ab Interpretum servitute vindicare, quos fidos duces non semper habemus, eo vel maxime, quod nihil tutius esse possit, quam ipsos adire fontes, præsertim, quum de rebus agitur proferendis in vulgus, cui nostra non satisfacit incuria.

Cardinalis Baronius cautus cæteroquin, & diligens, in hoc satis curæ non habuit, quum  
incon-

inconsultis exemplaribus Latinam Eusebii interpretationem, auctore Christophorsono, non omnium numerorum Interprete in suis annalibus secutus est. Omnibus ea in re fidere periculosum. Plures Erasmi celebritas nimium observata in errorem induxit. Abbas *de Billy* notat Erasmus in sua *Traëtatus de Spiritu Sancto* D. Basilii interpretatione, hujusce Patris sensa vel non exprimere, vel omnino subvertere; in interpretatione autem octo priorum Divi Chrysostomi Homiliarum, in *secundam ad Corinthios* ita indiligentem fuisse, ut quinquaginta, & amplius locis castigationem mereatur.

Hac sane de causa, qui primigenios Codices pervolvere nequeunt, vel incuria nolunt, in aliorum imprudenter errata descendunt, ac unius hominis vitium communis, & pene insanabilis morbus evadit.

Audiendæ hac in re Eruditorum querimoniz, quas & hodie fundunt de barbara agendi ratione, qua licentioribus interpretationibus suis Arabes, quinque, vel sexcentorum annorum spatio meliores antiquitatis Scriptores foedissime lacerarunt. Incredibile dictu est, inquit, quot errorum monstra, mediis barbarorum turpissimis interpretationibus in literarum rempublicam irrepsent. Quinimmo radices adeo altas egerunt, ut nonnisi immenso labore evelli, atque eradicari possint; interpretationes nimirum cum fidissimis exemplaribus conferendo, quæ tum ignorantia, tum

Ruer.  
de li.  
quor.  
Inter-  
pret.

rum cæca quadam, effrænique libidine deturparunt. Laudis, & gloriæ avidissimi, atque præstare cæteris appetentes, innumerabili veterum librorum copia, quos sibi adscripsere, vel pro arbitrio transulere, rati scientiarum una cum Græco Imperio perçuntium fragmenta colligere, ultimam iis perniciem attulerunt, eo graviolem, quo occultior est causa, ac plerisque Sapientibus minus nota.

Non ita tamen exemplaribus fidendum, ut ad interpretationes nusquam recurratur. Si enim Interpres aptissimus quamcunque operam conferat, ut fidem, accuratamque perficiat interpretationem, labitur tamen quandoque; quæ demum ratione lector sæpe parum exercitatus, Auctoris mentem, quæ lynceos Interpretis oculos fugit, perfecte se assëcutum gloriabitur & æquis non jure metuat, quum hodiernos Criticos inclyto Valesio ( cui parem Interpretem reperias neminem ) exprobrare audiat, quod Eusebii historiam non maxima semper fide transulerit, & in quarto hujus Historici libro circa successionem Episcoporum hallucinatus fuerit ?

Quidquid id est, a Viris prudentibus, etsi linguarum peritis, nunquam negligendæ sunt interpretationes, vel ut eas in dubiis consulant, vel ut aliorum exemplorum testimonio de autographi Codicis integritate fiant certiores. Atque hæc quodammodo media tenenda est semita inter illos, qui cæco quodam modo se se interpretationibus addicunt, atque alios, qui

qui eas indiscriminatim respuunt. Hinc enim, qui primigenios Codices non legunt, procul dubio in errorem impingent; inde vero, qui interpretationes sustollunt, magno in rebus difficillimis subsidio carebunt, ac demum omnis ad scientias via intercludetur, quibus, quod linguas nesciant, alius non patet ad eas aditus, quam interpretationum.

## C A P U T V I I.

### *De re critica, ejusque usu in lectione Patrum Ecclesiæ.*

*De doct.  
Christ.  
lib. 2.*

**Q**UUM Augustinus aliorum Ecclesiæ Patrum nomine dixerit, metuendas non esse Grammaticorum ferulas, sed omnem in eo collocandam industriam, ut veritatis cognitionem assequamur; supervacaneum videtur sermonem hoc loco de critica instituere, quæ præcipua Grammaticæ pars est. Si tamen expendantur, quæ de mendis inconsideratam rerum investigationem consequentibus alibi scribit idem Doctor, nemini abs re videbitur pauca a nobis differi de usu critices, quæ in lectione Patrum Ecclesiæ adprime necessaria est, quum ad eos nonnisi summa circumspectione accedere debeamus.

Critices vocabulum multis exosum est, sed immerito. Nam si criticæ artis naturam duntaxat consideremus, vitii culpa caret; tota quippe



quippe sistit in accurato iudicio, quod ex quibusdam regulis, experimento, optimaque ratione constitutis, de præclaris Eruditorum Scriptis ferre cuique licet. Quamobrem omni nominis ambiguitate sublata, eaque in antecessum adhibita cautione, ut critice non in Spiritus Sancti sensum, quo reguntur Ecclesiæ Patres traditioni testimonium perhibentes, sed in res feratur, quæ humanæ mentis facultatem non superant, non magis periculosum est Theologiæ Doctori operibus suis critices nomen indere, quam Medico dies criseos, quibus de morborum eventu iudicat, appellare *criticos*. Prævus quidem nonnullorum usus odium in ejus nomen concitavit, ea fere ratione, qua *Tyranni* nomen primitus perhonorificum, posteaquam Tyranni, qui supremi habebantur Nationum Principes, auctoritate sua abusi sunt ad violentiam, & crudelitatem, execrandum evasit.

Atque perspicacissimorum Virorum opinio est, germanum Critices usum, quæ vires omnes humanæ mentis iudicii continet, sitam esse in explanandis funditus Auctoribus, in efferendis illorum sætuum virtutibus, vel vitiis, in secernendis denique legitimis, & genuinis a falsis, suppositisque. Veteres Criticos, scribit Quintilianus, tanta severitate usos fuisse, ut non modo notarent calamo, quæ carpenda existimabant, (quod apud Eruditos pro maxima infamiæ nota habebatur) verum etiam in Auctores ipsosmet sævientes, ex Literatorum

*Instit.  
lib. 1.  
Cap. 48*

teratorum gradu eos deicerent, depellerentque velut indignos, qui in tam illustrem ordinem cooptarentur.

In Auctorum lectione omnia expendenda sunt, atque examinanda, caute tamen, prudenterque; periculosum enim est vitilitigatorum morem sequi, qui singulis rebus immorantes, nihil unquam probant; vel morosorum, & amentium, qui, quum in libris nihil, præter obscuriora scrutentur, ea, quæ longe clarissima sunt, videre detrectant. Morosa ejusmodi ingenia Cardinalis Perronius Versipellium instar habet, qui lucem fugiunt, *lucifugæ Scripturarum*, qui obscuritatem solum amant, atque caliginem.

*Tert.  
de ve-  
surrect.  
carnis.*

Est & aliud Criticorum genus, quorum immoderationem, ac deliramenta sedulo cavere debes. Ἀκροβόλοι (10) illi vocantur a veteribus Jureconsultis propter summam, quam in ferendo judicio consecretantur severitatem. Centena usque, & millena enumerant menda, quæ in celeberrimis Auctorebus, quos redarguunt, per fas, & nefas reperiri volunt. Sic Meziriacus in interpretatione Plutarchi, auctore Amiotto, quater mille recenset errata; sic Monachus quidam Benedictinus bis mille apud Baronium,

(10) Vox Græca Ἀκροβό-  
λοι σημαίνει summum  
jus ab ἀκροβίης, summum,  
& δίκην; quare eo no-

mine vocantur rigidiores  
censores, quasi summum  
jus in ferenda censura con-  
sectari velint.

ronium; alter vero Aristarchus (11) extramodum omnem ad sex ulque gravissimorum mendorum millia, quæ apud inclytum huncce annalium Parentem a se detecta gloriatus est, numerum incredibiliter auxit (12).

Duplex est Critice, utilis altera, & bona; vitiosa altera, & noxia. Hæc morbi genus est contagiosi, cujus pestiferum virus, postquam Critici judicium invasit, in aliorum nomen, & opera insanabili pernicie grassatur. Illa vero luminis instar luavissimi, quum mentem, ex qua sumit originem, perfecerit, & Vidorum ingenia, & res ipsas, quibus admoveretur, mirum in modum illustrat.

Non Criticæ libri, sed libris critice serviat oportet, sive non ea mente censura ferri debet, ut reprehendamus, (quod nonnisi abjecti animi est, improbique ingenii) sed quo major fiat ad scientias progressio, quo dispergantur nubes, quo viæ spinosæ, atque difficiles explanentur.

Quum obscuriora Auctoris loca, atque mysteria inspicimus, non aliorum acies intendenda nobis est, ne argumento relicto cæco quodam, atque fanatico impetu ducti, licenter, & effrænate vagemur. Nubes, & inaniæ captant quandoque Critici, ita ut ea non inquirentes,

(11) Nimirum Casaubonus.

(12) Qua in re satis animo non advertisse videtur, Baronium venia dignum fuisse, quod viam inierit igno-

tam, nemine duce, scilicet omnium primus historię Ecclesiasticę annales in unum corpus compegerit.

quirentes, quæ Auctor scripsit, sed quæ scribere potuisset, per ignotas regiones, vel saltem ab Auctore valde alienas discurrant.

Hoc vitio laborasse Salmasium putat Doduvellus; perraro enim contigit, ut conscribenda diu, multumque versaret animo. Istud *doctrinæ monstrum horribile* tenacissima memoria, felicissimoque ingenio præditum, vi mentis abripiiebatur sæpe; atque non omnia confectaria, quæ inde duci possent, prospiciebat. His adde illum libidine quadam in deliciis habuisse insolitas opiniones ab omnibus rejectas, nulloque fundamento innixas tueri mordicus, atque defendere.

Labuntur etiam sæpe Viri præstantissimi res inauditas dicendi studio, cujus rei exemplum apertissimum dedit eruditus alioquin Rigaltius, qui, ut majorem insolitæ eruditionis pompa sibi laudem compararet, in id omne studium suum convertit, ut quidquid specie tenus Romanæ, in qua vivebat, Ecclesiæ ritibus contrarium ei obviam veniret, diligentissime notaret: periculo religionem committere non veritus ob nimiam gloriolæ cupiditatem, quæ nec illis quidem, quibus favere videbatur, probata fuit.

Re-  
marq. sur  
la Bi-  
bliot. de  
Dupin  
T. 1.

Res etiam alex plena est justo subtilius judicare velle, quod notarunt Eruditi in eodem Rigaltio, qui in quintam decimam Sancti Cypriani epistolam fidenter adfirmat, ea solum mente antiquos Patres docuisse, decedentes in martyrio statim æternæ Beatitatis participes fieri,

fieri, ut Christianos ad martyrium fortius subeundum excitarent. Quæ quidem annotatio Ecclesiæ Patres gravissima afficit contumelia: quasi vero Politicorum regulas magis, quam prædicandæ veritatis normam secuti fuerint. Eodem æstu abreptus, ex loco Tertulliani ab ejus *Exhortatione ad castitatem* desumpto, temere aggressus est laicis in necessitate Eucharistiæ consecrandi jus adscribere; quod perniciosissimæ disputationi Catholicos Romanos inter, ac Novatores viam pandit, quin & ipsos invicem Novatores commisit.

Omnia non raro corrumpit, qui nihil accipit, nisi emendatum; atque, ut res serventur antiquæ scrupulosissima religione, præsentis periculi dispereunt. Optima in omnibus moderantia, Æquitas enim postulat, ut regulæ, quæ successu temporum obsoleverunt, immoderata vi non restituantur, atque humanæ infirmitati liberaliter nonnunquam detur venia.

Subtilius fastidiosum esse, ac in aliis reprehendendis modum non servare, culpa non vacat; puerile etiam est, ineptumque delecta errata, quamvis turpissima, quæ obiter notasse sufficiat, molestius, & ad ravim usque urgere. Ad rem facit, quod narrat Svetonius, Grammaticum Pomponium Marcellum, quum disputaret contra Cassium Severum, eum solacii, qui in æstu disputationis exciderat, merito, & jure reprehendisse. Verum bonum illum hominem ob id tantopere obstrepuisse, toties prolata censura, ut causam dederit ad-

H.

verliario

versario eum vicissim irridendi, tanquam hominem a proposito aberrantem, suæque causæ oblitum, ut rem nullius momenti prosequeretur redarguendo.

Ridendi denique sunt, qui menda excusatione digna notare audent, quum gravissima ipsi committant; quæ res contigit Salmasio in Solinum, ut notat Petavius, & Casaubonæ in suis contra Baronium annotationibus; omnium autem stultissimi, qui nodum in scirpo quærunt, atque ad cæcitatem usque temerarii, qui ea condemnant, quæ vitio carent, sive se sola res bona sit, sive ob adjuncta probari debeat.

Itaque, quum lector adeo insolitas offendit apud Patres loquendi rationes, ut earum novitate percellatur, iudicium cohibeat necesse est, donec constet, quo fine, quibusve de causis ii præstantissimi Viri ita se gesserint. Exempli gratia Græca *ὁμοούσις* vox, quam adhibuere Nicæni Concilii Patres ad exprimendam in mysterio Trinitatis *consubstantialitatem* Filii cum Deo Patre, si mihi fastidium pareret, antiquitatem ipsam adirem, atque intelligerem profecto, hanc vocem principio non a Nicænis Patribus inventam, sed ab Eusebio Nicomediæ, factione Ariano, qui, quum ea proprio Marte (13) usus fuisset in epistola  
ad

[13] Non proprio Marte eam vocem *ὁμοούσις* finxit, adhibuitque Eusebius; sed quod

bene nosset eam esse Sanctorum Præsulorum mentem, ut illa vox usurparetur ad finien-

ad hoc Concilium inscripta, Nicænis Patribus occasionem dedit eadem contra illos utendi, qui

Eniendam consubstantialitatem Filii cum Patre. Consuli potest hac de re epistola D. Arhanasii de Nicænæ Synodi decretis, ubi ait, Episcopos plura collegisse Scripturæ Sanctæ oracula, quibus Filius Dei vera potentia, imago Patris, similis Patri, inde-mutabilis per omnia, inconvertibilis, æternus, & indivisus in Patre subsistere dicitur. Ista quidem, inquit, ab Eusebianis accepta, ita tamen, ut deprehenderentur inter sese mutare, nutus conferre, oculisque sibi invicem applaudere, quasi illud, simile esse, & in eo esse, & ejus potentiam esse, communia Filio nobiscum essent. Tum vero Episcopos considerata illorum hypocrisis, & vafritie, coactos fuisse scribere Filium consubstantialem esse Patri, ut non solum similem similitudine, sed eundem ea voce, qua dicitur esse ex Patre, significarent. Non itaque Eusebius eam vocem invenit, sed inventam a Patribus adhibuit.

Neque vero D. Ambrosius auctorem facit illius vocis Eusebium. En ejus

verba l. 3. de Fide cap. 7.  
 „ Secundum impietatem  
 „ igitur suam positum sub-  
 „ stantiæ verbum recipiunt  
 „ Ariani: secundum pie-  
 „ tatem autem Fidelium  
 „ comprobaturum repudiant,  
 „ & refutant. Nam quid  
 „ est aliud, cur *ὁμοούσιον*  
 „ Patri nolunt Filium di-  
 „ ci, nisi quia nolunt ve-  
 „ rum Dei Filium confi-  
 „ teri; sicut auctor ipso-  
 „ rum Eusebius Nicome-  
 „ diensis epistola sua pro-  
 „ didit, dicens: Si verum  
 „ Dei Filium. & increatum  
 „ dicimus, *ὁμοούσιον* cum  
 „ Patre incipimus confiteri.  
 „ Hæc cum lecta esset epi-  
 „ stola in Concilio Nicæ-  
 „ no, hoc verbum in tra-  
 „ ctatu Fidei posuerunt  
 „ Patres, quod id viderunt  
 „ adversariis esse formidi-  
 „ ni, ut tanquam evagi-  
 „ nato, &c. „ Hæc autem  
 „ verba adhibitam solummo-  
 „ do probant, non vero in-  
 „ ventam ab Eusebio vocem  
*ὁμοούσιον*. Equidem in li-  
 „ bro de divinitate Filii il-  
 „ lius vocis inventor dicitur  
 „ Eusebius; verum liber de  
 „ divinitate Filii genuinus  
 „ non est Ambrosii factus,  
 „ sed suppositus, ut conve-  
 „ nit inter Eruditos.

*Am-  
brus.  
de fide  
lib. 3.  
cap. ult.*

qui eam præbuerant, ut tanquam evaginato ab ipsis gladio, ipsum nefandæ Caput hæresis, amputarent.

*Inft. 1.  
2. cap. 3.*

Præterea nihil interest, quod nova sint verba, dum antiquam, veramque doctrinam, nervose exprimant. Fatetur ipsemet Calvinus, iniquam fuisse Arianorum criminationem, qua Ecclesiam derelictæ Fidei antiquæ insimulabant, propterea quod ad explicandum Trinitatis mysterium novis vocibus uteretur, „quando temere non inventa sunt nomina, cavendum est, ne ea repudiando superbæ temeritatis arguamur, Itaque in dogmate Eucharistico non sine improba temeritate Novatores vocem *transubstantiationis* rejiciunt; quamvis enim non sit fortasse vetustissima, mysterii tamen, quod continet, Fides pervetusta est, perinde ac ipsa met Ecclesia.

Qui profanis assueti Scriptoribus ( inquit Hieronymus ) novitatis nos arguunt, nostramque dictionem abjectam irrident, meminerint, amabo, Ciceronem in suis quæstionibus academicis propter operis ordinem, atque, ut ea, quæ ex Græco in Latinum transferebat sermonem, facilius intelligerentur, verbis eatenus usque inauditis, ac Romanæ genti incognitis uti coactum fuisse.

*Quod.  
Hist. de  
1. Angli-  
ca.*

Hæc nisi caveat, qui legit Ecclesiæ Patres, pluribus se se implicabit difficultatibus, nec ullum a laboribus suis fructum percipiet. „ Grammatica ( inquit eleganter præstantissimus quidam Episcopus ) fines suos prætergredi



„ gredi non debet, neque Sacrarium adi-  
 „ divinarum Scripturarum, Auctorumque Ec-  
 „ clesiasticorum, ut supremam in eo dictitu-  
 „ ram exerceat, ut quidpiam pro libito addat,  
 „ vel detrahat, ut suas conjecturas, vel etiam  
 „ quandoque deliramenta fundat, tanquam  
 „ oracula, quæ ab omnibus sint excipienda.

Novatores etiam, quum illis Patrum op-  
 ponitur auctoritas, hanc adhibent artem, ni-  
 mirum ad vitiosam criticen, velut ad scœni-  
 cum quoddam numen confugiendi, ut ab iis,  
 in quas conjecti sunt, difficultatum nodis cal-  
 lide, fraudulenterque se se expediant. Re qui-  
 dem vera tantopere in suis controversiis ar-  
 tem Grammaticam religionis negotiis miscue-  
 runt, ut nisi maxima, eaque diuturna adhi-  
 beatur diligentia, in hisce tantis Grammati-  
 corum tricis verum a falso vix, ac ne vix  
 quidem secerni queat. Nullum non moverunt  
 lapidem Calvinistæ, ut verba Eucharistiæ pra-  
 vum in sensum pertraherent, suumque quo-  
 tidie torquent ingenium Sociniani, ut distin-  
 guant, quo relativa Sacri Codicis pronomina  
 referenda sint.

*Vid. Ios.  
Plac.  
dissus.  
advers.  
Socin.*

Duplicem ingredi possumus viam ad expen-  
 denda Auctorum Scripta, nimirum auctori-  
 tatis, & conjecturæ; tutior prima, præceptis  
 altera, & lubrica, quam fidenter sequi valde  
 periculosum est. „ Correctores ( inquit lepide  
 Justus Lipsius, vir doctissimus ) hoc difficilli-  
 „ mo rei literariæ tempore, utibiles, necessa-  
 „ riosque esse, non eos tamen promiscuos,

*capa  
Manip.*

„ non indoctos, Rupices, Petrones, sed qui  
 „ consilio, reque apte juvare Scriptores pri-  
 „ scos possint.

„ Ea re Senatui placere, uti lex *annaria*  
 „ servetur: neu quis minor viginti quinque  
 „ annis correcturam petere, gerere possit: qui-  
 „ que aliter petierit, gesserit, vitio creatum  
 „ videri, & correctiones ejus in acta non  
 „ mitti.

„ In senibus depontanis, quique majores  
 „ annis sexaginta sive septuaginta legem esse: utique  
 „ Censores M. Fabius Pomponius, Atticus  
 „ alter, ambove de doctrina, deque moribus  
 „ Peritorum cognoscant, statuunt, judicent,  
 „ quos hisce admiserint probos esse, quos re-  
 „ jecerint repullos, & reiculos.

„ Si quis e libris bonis, fideisque correxerit,  
 „ laudi semper esse; si quis e conjecturis no-  
 „ xæ, nisi eæ claræ, liquidæ, certæ sint.

„ Qui alitercumque divinationibus usus, in  
 „ eo leges veteres, & edicta de Mathemati-  
 „ cis valere: Porcias, Fabias, Sempronias le-  
 „ ges non valere.

„ Itemque, quoniam duplex morbus cor-  
 „ rectores pleros teneat, litigium, & prurigo:  
 „ utrique rei Senatum propectum, præcau-  
 „ tumque velle.

„ De litigatoribus uti quicumque post hunc  
 „ diem cum altero velitari, præliari verbis,  
 „ scriptisve ausus fuerit, eum, eosque in ludi  
 „ gladium damnari, uti proximo munere  
 „ colligati inter se pugnent sine missione.

De

„ De pruriginosis, quos manum, stylumque  
 „ abstinere a nullo loco audiant sano, sive  
 „ infano, uti Cornelius Celsus ædilis dispi-  
 „ ciat, qui ex iis sanari possint, quique non  
 „ possint.

„ Qui posse videbuntur, eos deponi in tem-  
 „ plo Æsculapii, quod in Insula est, ibique  
 „ ellebori bibere quantum satis erit; qui non  
 „ possint, eos in exilium ad Ommeros de-  
 „ portari, ubi lucem non videant, & libros  
 „ non legant; si quis ambiguz valetudinis  
 „ erit, eum ad tempus relegari in Atlantidem  
 „ insulam, ubi memorantur, somnia non  
 „ videri (14)

## CAPUT

[14] Auctor operis differens  
 hoc loco de re critica, in  
 Grammaticam solum criti-  
 cen incubuisse videtur,  
 quæ in emendandis manu-  
 scriptis versatur; ( quan-  
 quam in ejusmodi Criti-  
 corum exemplum non mo-  
 nito lectore adducit Ca-  
 saubonum, cujus critice  
 Grammatica dici non po-  
 test ) verum est & aliud  
 Critices genus, quæ non  
 verba, sed gesta, & opera  
 persequitur, eadenque ad  
 describendam historiam  
 utilissima. Cujus studiosi,  
 quum suis & ipsi mendis  
 non careant, rectosque li-  
 mites nonnunquam exce-  
 dant, abs re non fuerit de  
 illa perpauca adjicere.

Labuntur in ea utpluri-  
 mum Critici, quod falsis  
 præjudiciis sese abripi si-  
 nant. Sic Spanhemius fa-  
 bellam Johannæ Papiæ,  
 vel ab ipsis Novatoribus  
 rejectâ omni studio tuetur;  
 dum interim professionem  
 D. Petri Romæ omnium  
 Historicorum testimonio,  
 & nusquam interrupta tra-  
 ditione firmatam totis vi-  
 ribus pernegat. Sic, ubi  
 de genuinis operibus agi-  
 tur, non desunt, qui pro  
 variis præconceptis opinio-  
 nibus alterum quidem opus  
 vindicent, alterum vero ab-  
 judicent ab uno, vel plurib;  
 Scriptoribus, etiam si eæ-  
 dem utrinque militent ra-  
 tiones. Quæ critices menda

## CAPUT VIII.

*Ad intelligendos Ecclesiæ Patres Gentilium  
libri legendi sunt.*

**I**N dubium vocari non potest, Ecclesiam ab ipsis etiam primordiis Gentilium libros improbasse; quum enim Idolorum cultus adhuc vigeret, atque ex obscura ista caligine plerique Christianorum recentissime prodissent, alienum erat a recta ratione librorum usum permittere, quorum lectio nonnisi lapsus occasionem, offensionemque præbere poterat.

A secundo tamen, & tertio sæculo, qui defensionem Ecclesiæ susceperunt, Justinus martyr, alique Patres externis hisce armis instructi, in arenam descenderunt. Illorum exempla secutus est Origenes; verum, quum eo usque devenisset, ut in Scholis Christianis literas traderet profanas, apud illos, qui liberam hanc docendi rationem Christianæ Religionis puritati contrariam existimabant, sese purgare coactus fuit, ac propterea in veteri hoc Patre nonnulla eo in capite se prodit opinionum varietas, quum modo probet, modo condemnet

---

ut evites, illud imprimis  
caveto, ut mentem præ-  
judiciis omnibus vacuam  
ad ejusmodi studia appel-

las. Dein felici admodum  
successu adhibere poteris  
regulas, quæ infra Cap.  
xv. ponuntur.

met Gentilium libros, præcipue quarta in *Exodum* Homilia, ubi cum tertia *Ægypti* plaga confert hoc genus eruditionis.

Id unum hac in re affirmare ausim, Ecclesiæ Patres Ethnicorum libris contra eosdem Ethnicos uti potuisse. Æquissimum enim est salutem ab Adversariis nostris accipere, eosque propriis illorum armis oppugnare; vel maxime, quod Christianis moribus non obsit profanas in hisce libris scientias ediscere, dum id moderate fiat, honestoque fine. Origenes vult a Paganis id unum sumi, quod perducendis ad notitiam veritatis Fidelibus necessarium est; atque Augustinus censet, isthæc *Ægypti* spolia non in profanum usum convertenda, sed cultui, ac ornamento Sanctuarii tota dedicanda esse.

Opponunt nonnulli, extincta jam Gentilitate, frustra nunc recurri ad Gentilium libros, ut vana hæc simulacri species deleatur. Equidem non dissentio; verum habemus & Scripta Patrum; ac qui Gentilium doctrinam, & consuetudines probe perspectas non habeat, in hisce clarissimis antiquitatis Ecclesiasticæ monumentis plane cæcutiet; neque enim sine hoc adjumento Patres primævi, ac præsertim veteres Apologistæ intelligi perfecte, planeque possunt.

Libros, quibus in hanc cognitionem venire possimus, singillatim indicare opus non est. Id satis norunt, qui in optimis literarum studiis sese exercuerunt. Hoc unum notasse sufficiat,

ficiat, inter Philosophos, quorum studium præcipuum esse debet, primas tenere Platonem, cujus maxima est cum Patribus Ecclesiæ affinitas.

Primævi Fideles Platonis sectam sequebantur, ejusque signis sese omnes adjungebant; eundem in modum, quo posteriorum temporum Christiani, Aristotele duce gloriabantur; tum enim Plato Philosophorum omnium acutissimus erat, tum illius principia pugnare non videbantur cum Christianæ Religionis dogmatis, cujus præconceptam, ut ita dicam, notitiam habebat. Præterea, quum Philosophia Platonica ab Judæis aliqua sui parte fluxisset, ii, qui e Synagoga egrediebantur, Christiani ab ea amplectenda minus abhorrebant.

Plerisque persuasum erat, Platonem legisse libros Moyſis, vel saltem cum Sacerdotibus, ac Sapientibus Babylonis, Ægyptique Theologia Hebræorum instructis, studiorum consuetudinem habuisse.

Justinus martyr, Clemens Alexandrinus, & Eusebius Cæsareensis quidquid de ideis scripsit Plato, a Scripturis Sanctis habuisse putant. Nullum unquam finem futurum, ait doctissimus quidam Recentior, si omnia referrentur loca, in quibus Moſes cum Platone consentire videtur. In eandem abiit sententiam Marsilius Ficinus, qui totus est in hujusce Philosophi de notionibus, & ideis commendanda doctrina; atque, quum Italus iste Scriptor mysteria

*Roet.  
De mon.  
Strat.  
Evang.  
Prop. 4*

ria in rebus etiam evidentissimis indagare soleat, Divum Paulum in Platone totum videre sibi visus est; ejus enim impensissima voluntas in sapientem hunc Paganum eadem erat propemodum, quæ Justii Lyptii in Senecam, nimirum paulo fanatica.

Neque defuere, qui Platonem tanto in honore habuerunt, ut dicere non dubitarint, cum Jeremiæ Prophetæ consiliorum socium, atque participem: quod erratum temporum rationem turpissimum (15) Augustinus irridet: alii vero ineptius in animum inducere, Christum Servatorem Platonem pervolvisse, atque præclarioribus ejus sententiis Evangelium suum ornasse. Stultissimæ hujus opinionis redarguit Cellum Origenes. Revera plurimum juvat insanientium id genus hominum impetus cohibere, qui apud Platonem nihil, ne ipsa quidem excepta Apocalypsi, non invenire se inaniter fingunt.

Ejusmodi insanix reos nos agunt nonnulli Novatores, temere asserentes, plerasque Traditiones nostras a Græcis, idest Gentilibus derivatas fuisse. Verum, ut ait recens Auctor, si funditus inspiciantur Traditionum nostrarum Capita, atque cum illis, quæ apud Judæos videbant, conferantur, ab istis Traditiones nostras,

*Pelliss.  
3. V.  
des Re-  
st. Joy  
les dif-  
ser. de  
la Re-  
lig.*

15] Distant enim annis plus quam ducentis: etenim Jeremias obiit anno orbis conditi 3420., ante æram

vulgarem 584.; Plato autem 3656., ante æram vulgarem 348.

stras, non autem a Paganis opinionibus fluxisse nullo negotio noiscetur. Luculentissimum exemplum suppeditat dogma Purgatorii, quod, quum certum haberetur, atque etiamnum habeatur apud Judæos, absurdissime affirmat Juræus, alique Novatores, illud a Platone confictum fuisse; alias enim & Beatitatis æternæ, & Inferorum, de quibus vere, ac dilucide loquitur, Auctor haberi posset.

Hanc sibi laudem jure quodam vindicat Plato. In Philosophia erat ille, ut Paganus, perspicacissimus, doctissimusque; de divinis rebus divine loquitur, atque mirabili magnificentia, ac sublimitate Scripta sua exornat. Sermocinationis etiam ordo, quo utebatur, conjunctus cum linguæ venustate, honestique Viri ingenio ab Icholasticis altercationibus prorsus alieno, commendationis ei plurimum adfert.

Contra vero dici potest, ejus morem edendi dogmata mere Metaphysicum, quum Fidei lumine ductus non sit, facile in errorem inducere. Ex ejus Philosophia quodam modo prostante ingeniorum libidini, ortos Simonem, Valentinum, Marcionem, atque Manetem; Origenem, dum præruptum hunc callem sequeretur, ex pingui caligine in crassas tenebras delapsus, ac demum ex lutulento hoc fonte fluxisse Cabalæ fictorum deliria, atque insana illorum, qui nova systemata cudunt, paradoxa.

Illud



Illud etiam Platoni injuriam facere videtur, quod, quum careat ordine, ac distributione, ejus doctrinam ad suprema quædam Capita referre difficillimum est. Recentior tamen Philosophus in opere, cujus nonnisi fragmentum superat, totam Platonis Philosophiam ad sex generatim tractationes pro numero rerum, quibus universus orbis constat, scilicet divinarum, intelligentium, animæ, naturalium, corporearum, atque humanarum reduci posse ostendit. Antequam formam hanc proponeret D. de la Chambre, Johannes de Serres Gallica sua historia notissimus, quum Platonis opera nova interpretatione donaret, ejus Philosophiam Scholasticæ methodo accommodare cogitavit; scilicet, ut acute notat *Fleury*, „il-  
 „lud facere proposuerat, quod Plato, ut majo-  
 „rem sibi gratiam compararet, ex industria  
 „non fecit,,. Quamotrem omnium expeditissima res fuerit Platonem ipsum adire, neque sibi sollicitudinem struere de redigendis ad certum quendam ordinem ejus scriptis, quem nec habent, nec habere possunt.

Ad alios quod spectat, Philosophos, quæ fuerit illorum doctrina dignosci potest; Veterum quidem, ex Diogene Laertio; Recentiorum autem, ex Eunapio, vel etiam utrorumque ex compendio Hesychii. Atque hæc fere satis sunt ad percipienda Patrum Ecclesiæ loca, quæ Paganæ Philosophiæ dogmatis asperserunt. In rem nostram maxime cederet veterum Orientis Philosophorum historia, quibus omnia sua  
 debent

*Traité  
des  
E.*

debent Græci; verum illius nihil reliquum est, quod saltem indubitatam fidem facere possit.

Dolendum sane; quod pleraque Varronis Romanorum sapientissimi monumenta perierint; magnum inde lumen duci posset ad percipiendum Augustinum, aliosque Patres, qui de Gentilium religione scripserunt. His deperditis, libri Ciceronis *de natura Deorum* legi possunt; Ovidii etiam *Fasta*, quæ plus continent eruditionis Paganæ, quam alijs quivis liber antiquitatis profanæ; ac demum ad mythologias, quæ id genus argumenta pertractant, recurri potest.

Plutarchi lectio, Diodori Siculi, Herodoti, ac Titi Livii, quod in operibus suis Theologiam cum Politica, ac Religionem cum historia studiose conjungere soleant, multum prodesse potest.

Hiscæ Auctoribus nonnullos Poetas Græcos adjicies, ut Hesiodum, & Homerum, qui se habent instar Theologorum Gentilitatis. Cæteri vero plerique propter obscæna, quibus fabulas suas deturpant, repudiandi sunt. Cavendum ab iis monet Divus Paulinus, tanquam ab ingruenti naufragii periculo, atque ob eam præcipue causam Clerus Constantinopolitanus facultatem petiit, impetravitque ab Imperatoribus Christianis Græcos Vates Lyricos in ignem projiciendi, quibus suffecit poemata Gregorii Nazianzeni, quæ tamen elegantis styli exemplaria habenda non erant: qua

qua in re plus studii ad morum castimoniam, quam rationis ostenderunt ad politio-rem literature servandam.

Gentilium vero Scriptorum lectionem, quorum eruditio versatur in humanarum elementis Scientiarum, commendat D. Gregorius Nazianzenus, eosque stultitiæ redarguit, qui illam de medio tollere vellent, quum uno tantum oculo utatur, qui eos ignorat.

Origenes in *Philocalia* familiarem suum Gregorium hortatur, ut notiones, quæ Christianæ Religionis præludium esse debent, colligat ex Philosophia Græcorum, affirmatque, artium liberalium notitiam iis, qui Sacras Scripturas cognitione assequi cupiunt, necessariam esse; quum illarum ope exemplaria illustrentur obscura, voces explicentur ambiguae, corrigantur interpunctiones, atque ad rectum revo-centur sensum, quæ ab illo declinare videbantur.

Divus Johannes Damascenus hæreseos arguit Gnosimachos, idest ætatis suæ fanaticos, qui scientias damnabant. Divus quidem Augustinus literas profanas piis de causis, quas in suis refert epistolis, liberales appellandas non esse censet; in suis tamen *de Doctrina Christiana* libris fatetur, eas divinis explanandis Scripturis prodesse quamplurimum.

Enimvero permulta sunt in Sacris Codicibus, ac præcipue apud Prophetas, quæ ad historiam profanam qui non recurrat, ad fabulas etiam, atque ad consuetudines Veterum, assequi

*Epist.  
131.  
antiq.  
Edit.*

assequi nemo valet. Optimi Interpretes nostri, media antiquitatis Paganæ cognitione, innumera Scripturæ loca illustrarunt. *Thammuz*, nomen, quo vocatur apud Ezechielem Idolum, in *Adonidis* nomen transtulit Divus Hieronymus; quam interpretationem ob argumenta e fabulis petita, probat Theodoretus (16).

1. 1. a. 2.  
Tom. 1.  
15. 18.

Divus Cyrillus hujus Isaïæ loci: *qui mittit in mare legatos, & in vasis papyri super aquas*, explanationem promit ex historia Adonidis, cujus solemnia sua adhuc ætate Cives Alexandrini (17) celebrabant. Cives, inquit, Alexandrini scriptam ad mulieres Biblos epistolam, quæ repertum Adonidis numen nuntiaret, inque

[16] Dux autem præcipue movent rationes, ut *Thammuz* unum, idemque cum *Adonide* credatur Gentilium numen. Præmo, eadem utriusque colendi ratio: & ecce ibi mulieres sedebant plangentes *Thammuz* in Hebr. Cod. Ezech. 8. v. 14., quæ religio in Adonidis etiam cultu servabatur. Secundo, eadem tempestate, nimirum autumnali, eiusmodi cultus *Thammuz*, & *Adonidi* exhibebatur.

[17] Quum septuaginta Interpretes hæc habeant: *qui mittit in mare legatos, & epistolas papyrinas super aquas*: ea propter D. Cyrillus existimavit, Isaïam me-

minisse solemnis ritus, quæ referente Luciano observabant Ægyptii in Festo Adonidis, quum missa per mare ad Phœniciam incolas epistola inventum Adonidis numen illis nuntiarent. Verum, quum res aliter se habeat in Hebraicis Codicibus, eruditissimi Interpretes alii censent, hoc loco Prophetam verbum facere de Nuntiis ad Regem Ægypti missis ab Ezechia, quum se a Sennacheribo vehementer pressum videret. Quidquid sit, negati certe non potest, ad Scripturæ Sanctæ explanationem plurimum conducere profanæ antiquitatis notitiam.

inque fictili vase repositam mari permittebant, rati, vas illud, nemine juvante, statutis anni diebus Biblos perventurum, ubi a mulieribus Veneri Sacris exciperetur, quæ semel reperitis literis cessabant a lacrymis, quasi carissimum Venus reperisset Adonidem.

## CAPUT IX.

*Quid conferre possit Theologia Scholastica  
ad lectionem Patrum Ecclesiæ.*

**T**heologiæ Scholasticæ nomine intelligendum non est hoc loco subtile quoddam de unaquaque re disputandi genus, molestum, & odiosum, non secus ac exile, aridumque; sed vera, sinceraque Theologia ratiocinationis robore fulta, & in eum ordinem digesta, qui veritati perinde consonet, ac ipsamet principia, quibus innititur.

Neque vero versatur illa, ut effutiunt Hæretici, in subtili Fidei dogmatum compositione cum sophismatis Aristotelis; sed in continuata doctrinæ Christianæ capitum serie, quæ, quum rationi congruat, ex Aristotele demonstrari optime potest; utpote cujus doctrinæ ordine minimum quidem illi adversatur. Nunquam enim ea fuit Scholasticorum mens, ut Aristotelem in Scholas Christianas introducerent singulari illius amore, & observantia;

(18) sed uno tantum veritatis studio, sine qua vilissimus omnium haberetur, tanquam consilii, & rectæ rationis expertus. Tum illud non ideo factum est, quod ejus ratiocinandi methodo subtilitas inesse videatur; qui enim unius veritatis studio ducuntur, parvi pendunt subtilitatem; nisi forte hoc nomine veniat vividum, acutumque acerrimi ingenii lumen, quod propositum finem recta attingens, cavillatorum, atque sophistarum technas solertissime vitat.

Nonnullos, eosque non paucos esse Pseudo-scholasticos ingenue fatendum; verum sunt & complures germani, summaque laude digni, quibus detrahere non sine maxima rationis injuria poteris, uti liquido constabit, si prima rerum expendatur origo.

Fuere quovis tempore in Ecclesia Scholæ, quibus Sacra Literæ traderentur, indeque *Scholastici* cognomentum ad nos manavit, quo veteres Theologi altissimo gradu insigniti sunt. Fortunatus in tertio de Sancti Dionysii miraculis libro vocatur *Latinorum Scholasticissimus*, atque Sedulius in veteri chronica, quam profert *du Cange*, ad maximam laudem *Vir Scholasticissimus* appellatur.

Jam

[18] Hinc bene multi non inimicæ notæ Theologi postremis hæc temporibus, quibus plures, sique præstantissimi Viri novos in rebus philosophicis pro-

gressus fecere, vale dicentes Aristoteli, seu potius Aristotelis sectatoribus, recentiores Philosophos ad Theologiæ subsidium non infelici eventu accersunt.

Jam vero, etsi ineuntis ætatis Scholastici in Platonem magis, quam Aristotelem propensi videantur, non ideo tamen putandi sunt, certam, accuratamque ratiocinationem dereliquisse, præcipue quum Sectarios adgrederentur.

In veterum Patrum Scriptis scholastica quædam elucet, seu, ut melius dicam, ratiocinandi methodus, quæ cum recentiori scholastica, sive argumentandi ratione haudquam pugnat. Extant hujus rei non pressa, leviter, sed fixa vestigia apud Athanasium, Basilium, Gregorium utrumque, Nazianzenum, atque Nyssenum. Logices rudimenta exaraverat Divus Augustinus; neque inficiari ullo modo possumus, post tertium sæculum pleròsque Patres Dialecticos fuisse, ex illorum tamen numero, qui, quum prudenti, sinceroque judicio sint, quidquid abjectam cavillationem, & fallacem subtilitatem sapit, constantissime repellunt.

Nihilo tamen secius, vel invehendæ novitatis amore ducti, vel inventis rebus nonnihil addendi cupidi alterius ætatis Scholastici, quum animadverterent, multa in antiquis Patribus confusa, neque, ut par erat, distincta, quo illa in aptum adducerent ordinem, cogitarunt Theologiam per articulos variis sub titulis distributam, ad suprema quædam capita revocare, ut multa illa, & lauta divitiarum supellex, quæ incomposita nullius ferme utilitatis erat, prodesset omnibus in ordinem

digesta; quum ordo cognitionum omnium; atque scientiarum fons sit, & origo.

Sæculo septimo Tayonus Episcopus Cæsar-Augustinus Summam Theologiæ ex operibus Sanctorum Gregorii Papæ, & Augustini collectam elucubravit. Consequenti sæculo Johannes Damascenus, qui & majori ornatus erat ingenio, & multa lectione instructus, opus confecit, uno volumine comprehensum, sub titulo *de Fide Orthodoxa*, eruditione, atque doctrina cumulatius; illud autem in quatuor libros tribuit, quorum primus differit *de Deo*, ejusque *essentia*, atque *attributis*; alter *de creatione mundi*, & *de prædestinatione*; tertius autem, & quartus *de Mysteriis Trinitatis*, & *Incarnationis*, paucis *de Resurrectione mortuorum* adjectis.

Novum istud inventum illustres fecit aditus recentiori Scholasticæ, quæ tamen apud Latinos undecimo solum sæculo exeunte lucem aspexit, auctore Divo Anselmo, qui de dogmatis Fidei scribere suscepit. Quod enim nonnullis placet, ejus originem petendam a Lantfranco Anselmi magistro, omni veri specie caret; siquidem ex operibus ejusdem Lantfranci, quæ supersunt, judicandum sit. Opera vero Divi Anselmi eo, quo disposuit ordine Pater Gerberon Congregationis Divi Mauri, amplissimum Theologiæ corpus constituunt, quo hodiernis etiam temporibus sapientissimi Scholastici, tanquam fundamento uti non dubitant.



Sæculo autem proxime inferiori Petrus Lombardus Parisiensis Antistes, Ecclesiæ suæ Pastor, unaque Doctor Theologus ( quales omnes esse deceret Episcopos, si antiquitatis jura servarentur ) in quatuor libros, secundum Petri Abaelardi methodum, Theologiam ex Scripturis Sanctis, & Patribus, ac præsertim Augustino desumptam edidit, quod magnum illi, præclarissimumque *Magistri sententiarum* nomen comparavit. Non ea erat Petro mens, ut veterem eliminaret Scholasticam, quum illa veluti fundamento operis sui uteretur; neque ut novam ab ea prorsus alienam induceret; sed hoc unum sibi proposuit, quod & perfecit, nimirum aptiorem veteri Theologiæ formam præbere, & studiosorum ingenia certo quodam ordine moderari, cui inhærentes non aberrarent in scientia dogmatum, quæ apud antiquos Patres obscura erat, atque involuta.

Paullo ante Petrum Lombardum Hugo Victorinus idem opus conficiendum susceperat; verum Hugone, atque Abaelardo sapientior Petrus, vel felicior, communi omnium consensu palmam retulit; plerique enim Scholastici ejus *Sententias* vel sequi, vel commentari magna contentione aggressi sunt; adeo ut, Sacris exceptis Bibliis, nullus sit fere liber majori, quam opera Lombardi, Commentariorum numero illustratus. Ea ratione Scholastica disciplina, quæ primo in quarundam sententiarum, ex Scripturis, & Patribus selectarum compositione sita erat, brevi Theo-

logorum annotationibus magnopere excrevit, junctaque Dialectica, & Metaphysica Aristotelis, novam omnino formam induit.

Opus absolvit Divus Thomas, Alberti Magni discipulus, atque, quod alii tremula veluti manu adumbrarant, fortiter ipse, strenueque perfecit. Post multas disputationes, annotationes, & scripta, doctissimus iste Scholasticus *Summam* elucubrare cœpit, quæ omnium ejus Scriptorum epitome, opus omnium perfectissimum est, & mira ingenii vel elaboratum, supra quam post inventum in Scholas Aristotelem, visum unquam fuerit.

Verum, quum ea sit infelicissima rerum omnium conditio, ut vix ad summum perductæ, statim relabantur, Scholastica, principio tam laudabilis, in turpissimam cavillationem, Scholarum Christianarum majestate prorsus indignam, turpiter abiit. „ Quamobrem ( inquit doctissimus quidam Episcopus Gallus ) Scholasticos recentiores subtilitati rerum magis, „ quam firmitati studentes, Divum Thomam „ superandi cupidos, veritatem, quam illustrare susceperant, omnino turbasse ; Scripturarum, Patrum, ac Conciliorum studia „ fusdeque vertisse, depravasse ingenia, suaque explicandarum rerum exilitate pietatis „ spiritum in animis Fidelium paulatim extinxisse. (19).

Melchior

God.  
Hist. de  
l'Égl.

---

[19] Animum intendit D. | verba 1. ad Thes. Cap. 2.  
Godeau ad illa Apostoli | Spiritum nolite extinguere.

Melchior Canus in opere *de Locis Theologicis* hocce infortunium miro prorsus modo conqueritur. Neque vero dubitat dicere, Cacodæmonis arte factum esse, ut Scholastici Sacræ Scripturæ, & Sanctis Patribus valedicentes, nec nisi vanas, futesque subtilitates ex disputandi prurigne subortas inepte contestantes, contra Hæreticos in arenam descenderint, non ancipiti gladio; quem tantopere commendat Apollolus, sed puerilibus arundinum armis instructi. Laudabile quidem esse fatetur ad Theologiæ expositionem uti Philosophia; verum illud religiose cavendum monet, ne Theologia undique Peripatetica, humanæ tantum ratiocinationi subnixa in Scholas intrudatur.

Nihilo tamen minus, quemadmodum præcipuæ Imperii leges contemnendæ iccirco non sunt, quod in illud abusus irrepsent; ita neque ob Scholarum cavillationes repudianda Scholastica, cujus ignoratio litigiosa est, nequaquam vero scientia, ut inquit Cicero, loquens de Jure Civili. Et sane Scholastica, si se sola spectetur, nihil non habet laudabile, prætertim eo, quo reperitur ordine apud Divum Thomam. Quamobrem ejus *Summam* diligenter evoluisse non inutile fuerit, ut inde Patrum lectioni penitus quisquam incumbat. Nam licet alia sæpe, quam Scholæ via ineunda sit, ut veteres illi Doctores intelligantur; methodus tamen Divi Thomæ, ut accurato; quo carent in primis fontibus, ordine collo-

centur, juvare plurimum potest. Quum enim probe nosset *Angelus* iste *Scholarum*, extare apud Patres ordinem divinitus inditum, quamvis occultior ille sit, assiduis meditationibus indagare nunquam cessavit, donec inventum, apertumque in clarissimam lucem proferret.

Supervacaneum non fuerit addere in eorum gratiam, qui scholasticam facultatem positivè jungere vellent, duplici ratione perlegi posse Divum Thomam. Primam illi sequuntur, qui ejus *Summam* obiter, & inconsiderate læstitant, eo fere modo, quo scripta in Scholis tradi solita, pravo nimirum, atque perniciosissimo. Quæstionis illi titulum seligunt, articulos percurrunt, ac velut ab improbo debitore, in lucro deputant, quantulumcunque acceperint. Quod si forte fortuna res bene succedat, adeo ut difficultatem Logicam percipiant, aut unum, vel alterum, *distinguo*, enodent, vel ad Dialectices regulas syllogismum conficiant, epinicium canunt, jamque se in præstantissimorum Theologorum numerum referendos arbitrantur.

Altera minus crebra, minusve facilis, multumque judicii, acuminis, atque attentionis postulans eo tendit, ut Divi Thomæ doctrinam funditus assequatur, ejus originem, & fontes in Sacris Codicibus, & Sanctis Patribus scrutetur, inspiciatque, quo pacto in proprium transfulerit usum, ut suo systemati vim omnem, qua pollet, conciliaret. Causam quoque investigat, quæ insignem hunc Theologum

gum impulit , ut Aristotelem in scholasticis disputationibus adiutorem sibi conjungeret ; demum expendit , num recta ubique sit Divi Thomæ ratiocinatio , atque ex præjactis principiis legitima consecutione deducta .

*D. Verjus* Doctor Sorbonicus , ajebat , Divum Thomam , quum nervosam in omnibus ratiocinationem instituere nitatur , ita quandoque Metaphysicum evadere , ut e conspectu evolet , atque perraro revertens , eodem in loco consistat , unde digressus est . Qualiacumque tamen ea sint , si eo , quem descripsimus , modo legeretur Divus Thomas , innumeris fortasse difficultatibus intercluderetur aditus , quæ inaniter ingenia torquent ; leditiosæ quoque factiones comprimerentur , finem haberent inutilia commentaria , atque incredibilis altercationum numerus componeretur , a quibus Angelicus Doctor perinde alienus est , ac Sol a litigiosis Philosophorum disputationibus de quibuldam effectibus , quos ipse nullo modo producit .

Quum vehementia inflammantur ingenia , scintillas nonnunquam emittunt , quæ mediocribus insolita lumina videntur ; & quoniam , posteaquam vires ipsi suas superarunt , recipere sese , nostroque loquendi modo , quamvis rudi , & imperfecto se accommodare , vel novum excogitare coguntur , ob exiguam , quæ interest inter illorum cogitationes , & verba similitudinem , offunduntur tenebræ , quæ licet nullius reapse momenti , innumeris tamen  
diffi.

difficultatibus, atque dilceptionibus originem præbent. Hinc jure, meritoque optabat Galenus, ut sine verborum subsidio scientiæ iradi possent; quum enim verba inchoatam, duntaxat, obscuramque cogitationum nostrarum speciem referant, homines ignari, atque imprudentes de verbis solum disputant, de rebus autem nusquam conveniunt.

## C A P U T X.

*Quam necessaria sit ad intelligendos  
Ecclesiæ Patres Sacræ Scrip-  
turæ lectio.*

**Q**uisquis Patrum Ecclesiæ fidissimum se præstare laborat discipulum, attentissime Divinas Scripturas pervolvat oportet, nec eas unquam e manibus dimittat. Diuturna exercitatio laborem minuit, facilioremque parat intelligentiam, ac mira demum suavitate, atque delectatione perfunditur animus, cum occurrentia Patrum loca statim, nulloque fere negotio, quem in sensum referantur, percipere valet.

Ne autem error obrepāt, videndum inprimis, ex quo Scripturæ libro testimonium, quod sub oculos cadit, desumptum fuerit; & num. liber iste, vel ejus locus in Judæorum, vel Christianorum Canonem relatus. Multum. quippe differunt auctoritate liber Canonicus;  
Apo-

Apocryphus, & Ecclesiasticus, qui, cum abesset a Canone, legebatur antiquitus in Ecclesia, ut documenta pietatis, vel alia quædam emolumenta ducerentur ad populorum institutionem, atque salutem.

Apocryphi Codices, quos hæreseos, vel mali exempli causa rejiciebat Ecclesia, nullius erant ponderis, nulliusque auctoritatis. Eos quidem protulere nonnunquam Ecclesiæ Patres; ast ea duntaxat ratione, ut illa deligerent, quæ recta videbantur, atque fere semper, ut Hæreticos eorundem, quos accipiebant, librorum auctoritate refellerent.

Inspiciendum secundo, quinam libri, qui expenditur, Auctor, vel Scriptor, cur, quo, modo, quando, & quicum loquatur, Si enim ignorentur causæ, quibus ad scribendum moti fuere Sacri Scriptores, si illorum ingenium lateat, ac consuetudo loquendi, a genuino sensu longius recedes, quo propius eum attigisse putabis.

Tertio loco diligenter considerari debet prolati testimonii positio; videnda, quæ antecedunt, & consequuntur. Inquirendum insuper, num plura Scripturæ loca in illud referri possint, num eodem sensu; mores ne, an dogmata spectet; integrum ne, & de verbo ad verbum descriptum sit, an non mancum, mutilum, nec propriis, sed æqualibus verbis redditum: quod quidem Patribus admodum familiare fuit, qui Scripturæ loca memoriter proferebant, de verbis parum solliciti, dum  
rem.

rem ipsam fartam, tectam, integramque servarent.

Divus Basilius in *Asceticis*, quæ nullius libri subsidio perſcripſit, fidenter, & libere eorum more, qui memoriam teſtem adhibere coguntur, Scripturam adducit. Juſtinus martyr, Cyprianus (20), aliiſque illorum temporum Patres Scripturæ loca commemorant, prout in mentem veniunt, & nonnunquam a LXX. omnino diſſentiunt.

Hujusce rei cauſa peti poſſet vel ab exemplarium, quibus utebantur, varietate, vel ab Amanuenſium audacia, qui Gloſſam in margine poſitam textui inferuerint, vel demum ab iſſdem Patribus, qui nullo habito delectu interpretationum, quibus utebantur Eccleſiæ, Scripturæ loca, quæ adducere libebat, ex Græco tranſtulerint. Probabiliter hæc omnia affirmari poſſunt; veri tamen ſimillimum eſt, ut notavimus,

[20] Memoria tantillum lapsus videtur hoc loco Auctor operis, quum D. Cyprianum ab editione LXX. Interpretum quandoque diſſentire pronuntiat; quaſi vero Græcis exemplaribus uteretur D. Cyprianus. Latine ſcripſit Carthaginienſis Antiſtes, atque non Græcam, ſed ejuſdem Græcæ latinam interpretationem adhibebat. Jamvero latinæ ejuſmodi interpreta-

tiones plures erant numero, atque a ſe omnino diverſæ, teſte Hieronymo, *Prefatione in Joſue*, ubi ait: „Apud Latinos tot „ ſunt exemplaria, quot „ Codices, & unusquiſque „ que pro arbitrio ſuo „ vel addidit, vel ſubtraxit, quod ei viſum eſt.“ Quid ergo mirum, quod D. Cyprianus ab interpretatione Græcorum omnino diſſentiat?



vimus, sollemne fuisse Ecclesiæ Patribus Scripturæ loca memoriter proferre.

Expendendum quarto loco, num vitiatæ sint, atque corrupta exemplaria, quibus utuntur; quum enim tot sæculorum decursu in omnium manus venerint, haud difficulter potuit irrepere mendum; quandoquidem ex supputatione Lucæ Audomarensis Decani in postremis vulgatæ editionibus, quantacunque fuerit duorum Summorum Pontificum cura, quatuor, & amplius mille reperta sunt loca emendatione digna, quod Bellarminus, & Johannes Baptista *Bandini*, qui susceptæ jussu Clementis VIII. editioni præfuere, inficiari ausi non sunt.

Notandum denique, ex quam editione sumtus fuerit locus in controversiam adductus: num ex Hebraica, an ex Græca LXX.; num ex Vulgata, an alia qualibet. Illud autem hac in re principio ponendum, tot inter antiquas editiones, nullam generatim apud Patres magis in usu fuisse, quam Græcam LXX.. Tum enim a Christo Servatore (21), & ab Apostolis usurpata fuerat; tum etiam ab Ecclesia, ut certissimæ fidei habebatur: in conventu Fidelium vulgo legi solebat, ac demum a Judæis

---

[21] Non video sane, quo fundamento nixus affirmet Auctor operis usurpatam a Christo Domino Græcam LXX. interpretationem. Etenim Christus Servator eodem cum Judæis sermo-

ne utebatur, eandemque cum illis adhibuit Scripturam Sacram, scilicet Hebraicam, quibuscumque demum characteribus ætate exarata foret,

Judæis etiam, licet nonnihil in ea reprehensione dignum arbitrarentur, excipiebatur tanquam legitima: Quapropter Origenes, quum interpretationem LXX. adhiberet in suis ad Fideles cohortationibus; disputans contra Judæos; editiones Aquilæ, Symmachi, & Theodotionis adducebat, ut occuparet omnia nequissimorum hominum argumenta, qui criminari solebant interpretationem LXX., multis in locis ab Autographo, sive ab Hebræo Codice dissentire (22):

Alia quoque ratio Patres impellebat, ut LXX. Interpretes sequerentur; scilicet persuasum illis erat, Hebraicum Codicem corruptum fuisse (23); Græcam vero LXX. interpretationem

[22]. Parum omnino sibi constare videtur Auctor operis hoc loco. Quum enim paulo antè dixerit Græcam LXX. interpretationem a Judæis tanquam legitimam acceptam fuisse, nunc ait Origenem contra Judæos disputantem relicta LXX. interpretatione, protulisse editiones Aquilæ, Symmachi, & Theodotionis. Verum hæc conciliari optime possunt, si distinxeris Judæos Hellenistas ab iis, qui Jerosolymam, vicinasque Provincias colebant. Apud Hellenistas, utpote per universas Alexandri successorum Regiones dispersos, atque Hebraicæ linguæ pe-

ne oblitos, maximo in honore habebatur Græca LXX. interpretatio, quam Judæi Jerosolymam colentes parvi omnino pendebant. Itaque Origenes non contra Hellenistas, sed contra Judæos Jerosolymorum incolas utebatur interpretationibus Aquilæ, Symmachi, & Theodotionis.

[23]. Nunquam persuasum fuisse videtur Ecclesiæ Patribus Hebraicum Codicem a Judæis corruptum. Equidem Justinus, Irenæus, & Origenes editas narrant ab Hebræis interpretationes a genuino Sacrorum Codicum sensu alienas; at vitiatum tamen ab illis

exem-

nem unam esse tot inter, quæ extabant, editiones primigenio Codici consentaneam, paucis exceptis, quæ demta, vel addita, vel obliquius expressa fuerant, ne offenderetur Ptolemæus, alique Gentiles, quorum in gratiam LXX. interpretationem hanc elaborarant.

Revera existimabant, Patres illius interpretationis auctores divinitus inspiratos, adeoque ab omni erroris suspitione immunes fuisse. Hoc semel posito, agebat Rufinus, interpretationem LXX. Ecclesiis, tanquam Fidei regulam ab Apostolis relictam fuisse, ac Divus Hieronymus Amanuensium ignorationi, vel incuriæ assignat menda, quæ in hac interpretatione notantur; immo pro certo habet, non secus ac Augustinus, ea, quæ textui addidere LXX. a Spiritu Sancto auctoritatem habere.

*Advers.  
Hier.*

*Præf. in  
2. Pa-  
ralip.*

*De Civ.  
l. 18. c. 41.*

Deinde disputantibus contra Gentiles, qui Hebræam linguam ignorabant, plurimum proderat Græcam interpretationem proferre. Tum enim Verbum Dei, Græco sermone illis consueto, explicatum lubentius excipiebant; tum etiam ad eos proprie spectabat hæc interpretatio, in quorum gratiam fuerat exarata. Itaque Divus Chrysostomus dicere non dubitat, supremo Dei consilio factum, ut Gentiles ejus  
Filium

exemplar Hebraicum nemo unus affirmat. Immo singulari Dei O. M. providentia factum fuisse videtur, ut intactas, & integras religiosissime servarent Scripturas Sanctas,

vel iis etiam in locis, quæ illorum deliriis magis adversabantur. Hinc Divus Augustinus eos *Capsarios, & Librarios nostros* appellat in Ps. 40., & 56.

Filiū agnoscerent media Græcorum LXX. interpretatione, quæ instar viæ, & januæ sit, qua ad eum itur.

Præterea, quum frequens esset Patribus occasio disceptandi cum Ariānis, Macedonianis, & Nestorianis, qui veterem hanc interpretationem cæteris omnibus anteponebant, necesse omnino erat, ut eandem & ipsi adhiberent.

Notatu tamen dignum, Ecclesiæ Patres, licet ea interpretatione, quam Sanctam habebant, Divinam, atque Canonicam, vulgo uterentur, ubi tamen veritatis elucidatio postularet, ad autographum Codicem provocasse. Qua in re secuti sunt exemplā novi Testamenti Scriptorum, qui relictis Græcis Interpretibus, ad Hebræos se convertebant, quum eorum Codices Spiritus Sancti mentem nervosius exprimerent.

*De Civ.  
l. 18. c.  
49.*

Divus Augustinus, qui editionem LXX. omnibus aliis anteponendam existimat, id tamen vult fieri, salva, quæ debetur Hebræo exemplari, honoris reverentia; neque enim antiqui Patres editionem LXX. unam esse putabant authenticam.

Extabant & aliæ editiones Scripturæ, ex quarum usu Patres aliquid emolumenti capiebant. Ejus generis sunt editiones Hesychii, Luciani martyris, & Origenis, quæ non tam novæ editiones, quam Veterum correctiones, ab antiquis hisce Criticis suarum Ecclesiarum commodo factæ, dicendæ sunt.

**Judæi**

Judæi vero videntes quantum subsidii peterent Christiani ex LXX. Græcorum interpretatione, novas Bibliorum editiones Hebraicis illorum temporum (24) Codicibus magis consonas, adeoque a Religione Christiana magis alienas, vulgare aggressi sunt.

Judæus Aquila, Theodotio, ac Symmachus interpretationes suas ediderunt. Prior se totum vocabulis serviliter addixit; alter verborum minus sollicitus, ad Græcos LXX. magnopere accessit; posterior summa cum libertate, nulla vocum habita ratione, solum Scripturæ sensum reddere fatis habuit.

Eodem sæculo sub Imperium Caracallæ nova Bibliorum Græca interpretatio in lucem prodiit. Temporibus autem Alexandri filii Mammeæ in Urbe Nicopolis alia visa est (25): ac demum septima, quæ solum erat Psalmodum Davidis.

Denique cum Græca LXX. interpretatio varias ab Amanuensibus corruptiones passa foret, Origenes in ea restituenda, mediis optimis exemplaribus, quæ sedulo exquisivit, operam

---

[24] Editiones susceperunt Judæi non tam Hebraicis illorum temporum Codicibus consonas, (quippe, ut nuper dicebamus, vitiatæ non fuere Hebraica exemplaria) sed potius deliramentis suis magis faventes.

[25] Hæc duæ interpretatio-

nes, quinta nimirum, & sexta detectæ quidem, reperiunturque temporibus Caracallæ, & Alexandri; sed jampridem perfectæ fuerant. Prima, referente Origene apud Eusebium, in Urbe Jericho; altera in Urbe Nicopolis reperta fuit.

operam suam collocavit. Cautum imprimis habuit, ne quidquam adderet de suo; omnes enim additiones ex Theodotione excerpsit, ac veterum Grammaticorum *Obelis*, & *Asteriscis* distinxit.

Hæc omnia diligenter animadvertenda sunt, quum loca Scripturæ ab antiquis Patribus prolata exquiruntur. Quamobrem, ut sanum de illis iudicium proferas, abs re non erit partem aliquam temporis infumere in variarum Sacri Codicis lectionum investigatione. Quod quidem summam diligentiam postulat, atque attentionem, ne diversitas esse videatur, ubi nulla prorsus occurrit. Consuli potest ea de re Ludovicus Capellus, qui varias Scripturæ lectiones ita collegit, ut nec illarum numerum nimis auxerit, nec earum laudes nimis celebrarit. Ex mille, & amplius lectionibus ( ut notat recentior Criticus ) quæ centum fere, & mille Evangelii Sancti Matthæi versiculis subsunt, vix quinquaginta sensus varietatem inducunt; quinimmo illa diversitas in iis rebus sistit, quæ Religionem, & pietatem haudquam lædunt.

Varietas lectionum apud Ecclesiæ Patres originem principio ducit ex variis Scripturæ interpretationibus. Verum inde etiam oriri potuit, vel quod Patres quorundam Auctorum, qui nobis ignoti sunt, emendationibus confiderint, vel quod suas ipsi correptiones secuti sint. Tunc enim Bibliorum exemplaria liberior quique corrigebat, sive quod librariorum

errata

errata notaret; sive quod linguæ ubertas, cum varios sensus offerret, pluribus locum daret interpretationibus, quarum aliæ ab aliis quâdoque diffidebant.

Quemadmodum Græci Patres Græca LXX. interpretatione utebantur; ita Latini veterem Vulgatam adhibuere, quæ Latina erat illius Græcæ editionis interpretatio.

Aliæ præterea habebantur innumeræ. Quamobrem Hieronymus, & Augustinus scripserunt, innumerabilem esse illarum copiam, quum omnes fere, modo Latino, Græcove sermone vel levissime instructi forent, novas interpretationes cedere aggredirentur.

Verisimile admodum est editionem *Italiam*, qua usus est Augustinus, eandem esse, quæ a Hieronymo appellatur *Vulgata*. Attamen Divus Hieronymus, cui Veterum lucubrationes probatæ non erant, non modo priscam Latinam LXX. interpretationem emendandam, verum etiam novam Hebræi Codicis Latinam interpretationem suscepit. Quæ quidem multorum excitavit querelas, nec ab Ecclesia probari cœpit ante Divi Gregorii Papæ tempora (26), qui *Præfatione in Jobum* testatur, Sedem Apostolicam

*Præf.  
in Ios. 3.  
& in  
Evang.  
De Do-  
ctrinâ  
Christi.  
lib. 2.  
c. 11.*

[26] Sermo est hoc loco de universali istius interpretationis approbatione, ita ut Sedes Apostolica utraque Latina uteretur. Quod enim attinet ad peculiare aliquot Ecclesiæ, ante D.

K a

Gregorii tempora procul dubio probari cœpta est, quinto nimirum sæculo in Galliis, ut constat exemplo Salviani ejusdem ævi Scriptoris; in Hispaniis etiam, agente in primis Lucinio,

stolicam utraque uti interpretatione, ac semet-  
ipsum utraque indiscriminatim Vulgata, veteri,  
& nova usum fuisse.

Nihilo tamen minus nescio, qua de causa  
postrema isthæc interpretatio honoratiorem  
locum occupavit: antiquæ vero nihil reliquum  
est, præter pauca apud Patres Latinos fragmenta,  
ex quibus Nobilius Flaminius, quo melius potuit  
modo, eam compilare nisus est, quæ deside-  
rabantur, Marte proprio supplens haud infelici  
successu. Quanquam hæc editio sit restituta,  
non eadem certe est, quæ ante Divum Hie-  
ronymum; satis tamen inde dignosci potest,  
quænam foret antiquitus, atque iis, qui dili-  
gentiorem Latinis Patribus operam navant,  
inutilis plane non fuerit.

Græca LXX. interpretatio primigenia lin-  
gua, ex vetustissimo manuscripto, integro fere  
ex Vaticana Bibliotheca deprompto, Typis im-  
pressa fuit Romæ jussu Sixti V. anno 1587..  
Anno autem 1628. Morinus Oratorii Pres-  
byter novam eorundem Interpretum editionem  
aggressus, junxit una duos Textus, Græcum,  
& Latinum, eamque Flaminii Scholiis locu-  
pletavit, distinctis etiam ad modum Vulgatæ  
versiculis.

---

cinio, & in Africa, testan-  
te D. Augustino, qui epi-  
stola 71. narrat, ab Africano  
quodam Antistite lectam in  
Ecclesia Prophetiam Jonæ,

a D. Hieronymo latine  
redditam. Ipsemet etiam  
Augustinus eam sæpe pro-  
fert in librum Jobi.

## CAPUT



## CAPUT XI.

*Historiæ cognitio ad intelligentiam Patrum  
Ecclesiæ adprime necessaria est.*

**Q**uemadmodum inconsultis Patribus completam, absolutamque Historiæ Ecclesiasticæ notitiam assequi nemo potest; ita sine Ecclesiasticæ Historiæ præsidio Patres perfecte, planeque intelligi nequeunt. Quis, exempli causa, Arianorum, Pelagianorum, & Donatistarum historiam probe sciat, qui Sanctorum Aſchanasii, Augustini, & Optati contra hosce Hæreticos monumenta non legerit? & vicissim quis doctrinam istorum Patrum studiose percipiat, qui Hæreticorum, contra quos pugnarunt, historiam ignoraverit?

Hæc animadversio sanæ mentis homines, atque in lectione Patrum proficiendi cupidos movere debet, ut ad Historiam Ecclesiæ sedulo incumbant. Neque vim ullam facit, quod opponunt, duobus hisce studiis una junctis nimium distrahi mentem. Cum enim arduissima est istorum conjunctio, tum etiam major; quam vulgo creditur, humanæ mentis amplitudo; adeo ut variis rebus nullo negotio vacare possit; immo tantum abest, ut hac varietate laboret, quin potius reficiatur, atque relaxetur. Valde quippe molestius est, ac difficilius

cilius uni rei operam dare, quam in multis se se exercere.

Lud.  
Nonn.  
de re ci-  
lii. lib.  
3. C. 2.

Eadem fere est in homine conditio mentis, ac corporis, ad cuius integram valetudinem, moderatam adhibere præstat ciborum varietatem, quam unico affatim satiari; quo pericula cruditas oriretur. Exemplo sunt apes, quæ non ex uno florum genere, sed ex innumeris floribus, specie, naturaque omnino diversis, suavissimum mel effingunt.

Arist.  
lib. 8.  
Hist. 3.  
animal.  
C. 24.

Historia nihil in se continet, quod magno pere jucundum, ac perutile non sit; atque id sibi laudis jure quodam vindicat, quod conditionem non sequitur illarum scientiarum, quæ magnum in sui cultorum delectu discrimen adhibent, quæque in illis excipiendis paullo sunt fastidiosiores. Subditis illa perinde, ac Principibus communis est scientia; medicis juxta, ac præstantissimis ingenis exercitationem præbet. Cicero in libro secundo de Oratore hæc habet: „Erat enim historia „nihil aliud, nisi annalium confectio: cujus „rei, memoriæque publicæ retinendæ causa, „ab initio rerum humanarum usque ad P. „Mucium, Pontificem Maximum, res omnes „singulorum annorum mandabat literis Pontifex Maximus, efferebatque in Album, & „proponebat tabulam domi, potestas ut esset „populo cognoscendi, qui etiam nunc annales maximi vocantur.

Apud Orientales alebantur Scribæ, ut acta colligerent, quibus gentis suæ universa historia

ria

ria contineretur. Eadem vigeat apud Ægyptios consuetudo; penes Hebræos etiam huic officio destinabantur Scribæ, qui publicis actis ea consignarent, quæ sub Judicibus, & sub Regibus gesta forent (27). Quam Josue profligasset Amalecitas, mandavit Deus Moyfi, ut eam victoriam scriberet *ab monumentum in libro*. Auctor Chronices Alexandrinæ censet, libros *Paralipomenon* nihil aliud, quam summam actorum complecti, in quibus gesta Regum scripta fuerant; illud extra omnem dubitationis aleam situm est, Judæos post captivitatem collegisse quidquid actorum publicorum invenerunt, suisque in Archivis diligenter servasse.

Liquido hæc ostendunt, quanto fuerit in honore quovis tempore historia, quippe omnium cognitionum amplissima; ita ut nulla ferme scientia pendere ab illa quodammodo non

[27] Apud Hebræos extitisse viros nonnullos, qui potiora Regum, & Populi gesta literis mandarint, inficias non ibo: ast illos ab Hebræis ad ejusmodi officium destinatos, justo facilius affirmare videtur Auctor operis. Hæc autem sumit, ni fallor, a Richardo Simone Oratorii Presbytero, qui, ut Pentateuchum a Moyse abjudicaret, totiusque veteris Testamenti au-

thoritatem immineret, ejusmodi Scribas effinxit, quorum scripta temporis successu in exiguum volumen redacta, ad nos transmissa putat sub nomine Sacrorum librorum. Verum, utut a Viris eruditis premeretur, nullo unquam satis certo argumento opinionem suam firmare potuit. Vide inf. 4. part. not. 8.

non videatur. Religioni clarissimam lucem adfert historia; & Traditio, cui innitimur, pars est historiæ Ecclesiasticæ. Historia duce omnes fere veteris Testamenti Prophetiæ explicantur.

*M. de Meaux.  
Explic.  
de l' A-  
pocalyp.*

Nec sine illius adjumento *Apocalypsis* liber undique mysticus, ac cœlitus immissa revelatio intelligi potest; nimirum absque eorum notitia, quæ in Ecclesia, & Imperio statim post hanc revelationem evenire cœperunt.

*Lamy  
Entret.  
sur les  
Scien.*

„ Uno verbo tota Sacra Scriptura, universaque  
„ Theologia nihil aliud ambitu suo comprehen-  
„ dunt, quam illorum, quæ Deus revelavit ho-  
„ minibus, quæque Ecclesia quovis tempore  
„ credidit, historiam.

Cum Ecclesiasticos Annales conficere infinito labore sibi proposuit Baronius, hoc unum in mente habuit, Theologiæ doctrinam factis potius, quam ratiocinationibus tradere, eoque modo Theologiam Ecclesiæ Catholicæ opponere Theologiæ Hæreticorum; quemadmodum Moyses Theologiam Hebræorum contra Theologiam Ægyptiorum, & Chaldæorum statuebat, qui chimerica, ac fabulosa antiquitate gloriabantur.

*Hist.  
Angl.*

Guillelmus Candenus, licet ex Novatorum grege, contendit, historiam Ecclesiæ pro luculentissimo, certissimoque Christianæ Religionis monumento habendam esse. Henricus Valesius in suis ad Eusebium annotationibus hanc scientiam asserit omnium aptissimam ad revincendos Hæreticos, qui, quum ob intolerabilem superbiam adversariorum argumentis cedere

cedere nolint, secreto historiæ testimonio revincuntur; quippe in ea propriam cum priscis Hæreticis eorum decessoribus damnationem legunt.

*D. De-Flavigny* Doctor Sorbonicus accepisse se a Casaubono affirmat, quum legeret Bellarminum, de omnibus dubitare consuevisse; quum vero Baronium adiret, de Christianæ Religionis veritate persuasum esse. Gaspar Scioppius in literarum republica ob censuræ severitatem celeberrimus, accepto lumine ab Annalium Ecclesiasticorum parente, ab erroris via gradum revocavit, Lutheranorum Sectam deseruit, & Catholicam Fidem amplexus est.

Virum Theologum, inquit Melchior Canus, *Lat.  
Theol.* cui Ecclesiasticæ historiæ cognitio desit, ex communi Eruditorum consensu, omnino contemnendum, ea præcipue ratione, quod illius scientiæ cognitione careat, sine cujus ornameto inops quisque censetur, & nudus, quibuscumque demum aliis cognitionibus instructus sit, atque exornatus.

Profecto, qui ignorant historiam, compluribus erratis obnoxii sunt, atque haud immerito magna eorum pars, in quæ nostri Ecclesiastici Scriptores lapsi sunt, nimis hujusce studii negligentia adscribitur (28).

Tur-

---

[28] Exemplo est Vasquezius, vir cæteroquin eximius, & in re Theologica peritissimus, qui in recen-

dis Monothelismi fautoribus, Sergio, Pyrrho, & Paulo adjunxit Typum, quasi eo nomine quidam Mono-

Turpissima est Canonici Juris Peritis ignorantio antiquitatis. Yvo Carnotensis, quanquam multa laude dignus, majorem sibi fidem comparasset, si re historica magis instructus fuisset. Quam ob causam incomparabilis Cujacius, vir Canonico, ac Civili Jure eruditissimus, probe noscens, quam necessaria sit Canonici Juris Perito historiae scientia, omnes industriae nervos intendit, ut eam perfecte consequeretur.

*D. Godeau* scribit „complures Scholasticos, „ quod doctrinae historiam ignorarent, in erro- „ rem lapsos fuisse, e quibus adversarii eos „ ignorantiae, vel malae fidei infimulandi occa- „ sionem arripuerunt. Quum enim praesentibus toti „ occuparentur, ac dogmatum substantiam, quae „ eadem semper fuit, a mutationibus vel expla- „ nando, vel finiendo consecutis non distingue- „ rent, recentioris Scholae regulis ea, quae pro „ temporum ratione diversissima sunt, accom- „ modare studuerunt.

Mirum sane, quod tanta sit utilissimis in rebus hominum incuria, tamque prava, & indiligens in iis meditatio. Nullius enim momenti est longam annorum seriem, saeculorum, olympiadum, lustrorum, epocharum memoria tenere; innumerabilia etiam Imperatorum,

---

Monothelitarum patronus  
vocaretur, quum *Typus*  
nomen sit edicti ab Impe-  
ratore Constante lati, quo

sententiis contrariis de  
una, vel duabus in Christo  
voluntatibus indicit si-  
lentium.

ratorum, Regum, Pontificum, Conciliorum, Hæreticorum, Hæreseon, & Schismatum nomina, nisi ab externa hac historię specie interius ad eam penetremus; atque matura, prudentique consideratione, occulta detegantur machinamenta, quibus moti homines, tam varias in-universi orbis theatro gessere personas.

Summa opus est mentis contentione, qua Principum, ac Populorum indoles, & ratio perspiciantur, qua verum secernatur a falso; verisimile ab eo, quod omni veri specie caret; qua distinguantur eventus casu, ingenio, vel cupiditate profecti, ab iis, quos recta agendi ratio, quos Religionis, ac pietatis studium produxit. Firmum ab infirmo sejungendum; præxis a Theorefi; ac demum, quæ divinando solum, ac conjectando dicta sunt, ab iis, quæ auctoritate, ac fidissimis, authenticisque monumentis nituntur,



## CAPUT XII.

*Digressio ad Historiam Ecclesiasticam, quæ  
Patres Ecclesiæ spectat.*

**Q**uanquam nobis animus non est in præsentiarum præcepta tradere, & quasi vias indicare, quæ ad Ecclesiasticam Historiam conducunt; obiter tamen dixisse juvat, optimam eam esse rationem, qua viatores imitemur, qui longissimas, vastissimasque regiones peragraturi, eas primum in angustam tabulam contractas ediscunt; tum ab itinere reversi, injectis iterum in tabulam oculis, terras, & maria multis, diuturnisque laboribus perlustrata, brevi tempore percurrunt.

Quod ut recte fiat, prudenterque, principio seliges optimum Ecclesiasticæ historiæ compendium, quale Spondanus concinnavit; attente pluries, si opus sit, perleges, antequam ipsos historiarum fontes adeas, qui compilationibus materiam præbent (29).

Ubi

---

[29] Quum bene multa historiæ Ecclesiasticæ capita post ætatem Spondani, qui pleraque Baronii mendas compendio suo inseruit, diligentius tractata fuerint, atque illustrata; aptius iccirco, & opportunius adhiberi posse videtur ali-

quod aliud summarium posterius evulgarum. Eiusmodi præ cæteris est historia Ecclesiastica P. *Graveison*, quæ universam rerum Ecclesiasticarum seriem compendio, summaque accurate ob oculos ponit.



Ubi prima isthæc historiæ cognitio, atque sufficiens rerum forma altius in animo confederit, legi poterunt pro temporum ordine, inter Græcos quidem Eusebius, Socrates, Sozomenus, Theodoretus, Theodorus Lector, Philostorgius, Evagrius, Theophanes, & Auctores Bizantinæ: inter Latinos autem Gregorius Turonensis, Beda, Annales Sancti Bertini, Divus Eulogius Cordubensis, Flodoardus, Luitprandus, Ditmarus, Lambertus Scaphnaburgensis, Hugo Flaviniacensis, Sigebertus, Odericus Vitalis, Guillelmus Malbesburiensis, Matthæus Parisius, & alii.

Hac præmissa lectione, Baronius, ejusque Continuatores pervolvi jam poterunt, cujus Annales totum Ecclesiasticæ Historiæ corpus comprehendunt. Qui viam hanc inire studuerit, notas duntaxat percurrens regiones, minus laboris, & operæ infumet; cumque tabulas præ manibus habeat, rectam, absolutamque de innumeris difficultatibus, quæ tam amplum, & arduum opus comitari solent, ferre poterit sententiam. Quum vero Annalium Scriptores gestis quibusdam referendis, præjudicatas nonnunquam, quibus imbuti sunt, opiniones sequantur, & in lubrico versentur, doctissimorum Criticorum opera utendum est, qui in illis castigandis diligentiam omnem posuere.

Post hæc ad compendia, si placet, facillime gradus reduci poterit, ut rerum simpliciorum, contractionumque præsentia aliarum, quæ compositæ

positæ sunt, & amplissimæ, cognitio ad memoriam revocetur.

Qui primigenios evolvit Historicos, illorum singillatim ingenium scrutabitur, facultatem, religionem, mores, atque negotia; quam in partem rerum Ecclesiasticarum hic, vel ille vocatus fuerit; quo sæculo, qua ratione, quove fine scripserit; num viris, & rebus, de quibus agit, cœvus; privatus ne, an publicæ rei administer; vere ne Auctor, an plagiarius, aliorumque compiler; num peculiare opinionum, an pervulgatas duntaxat tueatur; num sit in honore apud homines; probatus ne, an ab Ecclesia damnatus?

Quem enim exempli causa latet Eusebium Cæsareensem maxima in Origenem voluntatis inclinatione propensum, atque ætate ubique pene Ariana vixisse, immo etiam de Hæresi Ariana suspectum; versatili fuisse ingenio, calido, atque in animos hominum facile labenti, sed gloriæ cupidum, atque ad omnia suscipienda idoneum, ut finem suum assequeretur; quem, inquam, lateant hæc omnia, difficile insidias vitabit, quas posteris instruxit fallaci scribendi modo, ad fucum faciendum. eo aptiori, quo simplicior videtur, atque amplissima antiquitatis, rerumque Ecclesiasticarum cognitione cumulator.

Pari quoque ratione, cui nota non sit summa Theodoretæ cum Nestorio necessitudinis conjunctio, fidem iis fortasse habebit, quæ scribit in laudem Theodori Mopiuesteni contra D. Cyrillum.

Item,

Item, qui Socratis, & Sozomeni errores ignoret, damnabit una cum iis Præsules adprime Catholicos, atque e contrario Cœlitibus adnumerabit Episcopos, quorum fides vitiata est, atque corrupta.

Re quidem vera Socrates nedum commendat Novatianos, quorum partes tutabatur; verum etiam in illorum gratiam mirificos ex industria confingit eventus pessimo assentatorum more; iisque adscribit miracula nullo satis Lib. 2.  
C. 9. firmo innixa fundamento. Catholicis non Lib. 7.  
C. 17. aliam fuisse causam bellum indicendi Novato Lib. 4.  
C. 21. pronunciat impudentissime, quam ut oppositum effusæ illorum libidini ab hoc præstantissimo Viro aggerem diruerent: calumniatur, inquinat, laceratque Divum Chrysostomum, iniquo ferens animo abductas e Novatianorum manibus Sanctissimi Præsulis studio nonnullas Ecclesias; eum impudentiæ infimulat, effusionis, atque superbiæ; addit, Deo iubente, in scelerum mulctam e propria Sede pulsum fuisse.

Eodem impetu Supremos Pontifices Innocentium, & Zozimum insectatur; neque Sanctum Cyrillum Alexandrinum minus asper tractat, quum Atticum Divi Chrysostomi Successorem laudibus in Cœlum efferat, ut Divum Cyrillum Attici, qui Novatianis favebat, comparatione magis deprimat.

Quamobrem maxima circumspeditione veteres Ecclesiæ Historici pervolvendi sunt, qui Hæreseos labe contaminati fuere, vel in illius suspi-

suspicionem venerunt: quin etiam ne Catholicis quidem Historicis temere fidendum, præcipue quum ea, quæ in medium adducunt, satis non expendisse videntur. Divus Johannes Damascenus in probandis historiis iusto facilius est; Divus autem Hieronymus in iis referendis non ubique accuratus.

Denique Lector, cui Græcorum ingenium, effusæque illorum mentiendi libido comperta non sit, fabellas plerumque pro certissimis factis, ac Metaphrastes, sive Scriptores, quires, non ut revera sunt, sed ut comminisci lubet, enarrant, pro sinceris, fidissimisque Historicis habebit: ex altera vero parte, qui Latinorum in credendo levitatem, facilitatemque ignoraverit, errabit facillime, ac multorum sequetur exemplum, qui vulgi rumoribus, frivolisque narrationibus Ecclesiasticam Historiam referferunt.

Quanquam vero postulet æqua ratio, ut graviores Historici inferioribus anteponantur; hi tamen contentnendi non sunt, cum æquari nonnunquam illis primi ordinis, conferrique possint. Enimvero perspicacissimum Virum decet, non modo meliores expendere, atque deligere Scriptores, verum etiam apud mediocres secernere legitima, atque ex illorum penu depromere, quæ ad illustrandam veritatem conducere possunt. Celeberrimum quippe est in re historica axioma; etsi non omnibus fides adhibenda, legenda tamen omnia, utcunque indigesta, & agrestia.

Ergone

Ergone propter styli barbariem ea , quæ penes Historicos sub horridulo hoc cortice bona sunt , nequaquam colligentur ? Quot numerare possemus viros , qui de optimis rebus pessimè scripserunt ; quorum fructus omnis amitteretur , si ob neglectam sermonis puritatem statim respuerentur ? Quorsum evaderent Gregorius Turonensis , ac plerique mediæ ætatis Historici , si ab iis antiquorum latinitas , & elegantia desideraretur ?

Neque vero patitur æquitas , ut Historicum aspernemur , propterea quod vel contractior sit , vel in supervacaneas narrationes justo effusior . Quæ enim hodie coarctata videntur , prope diem explicabuntur , vel illustrandis Historiæ Ecclesiasticæ capitibus proderunt , quæ apud meliores Scriptores satis elucidata non sunt ; quum nihil in universa occurrat Historia , ne ipsi quidem exceptis iterationibus , quod utilitatem aliquam adferre non possit .

Historici etiam Plagiarii , Eclogarii , & Compilatores sua laude non carent . Enimvero contingere potest , ut a Plagiario exemplar emendatum fuerit , vel illustratum ; & Compilator Auctores , quos collegit , quibusdam in rebus conciliarit ; vel compendium sit exemplari perfectius , atque illius locum teneat , quod vel amissum est , vel mutilum , vel aliqua sui parte vitiatum . Ita Eusebius Cæsarensis exemplaris instar habetur vetustissimorum , quos collegit , Auctorum , quorumque fragmenta Historiæ Ecclesiasticæ inserens , ab oblivione servavit .

L

Ju-

Iusto quoque rigidior esset, qui damnaverit Historicum, propterea quod scripserit nonnulla ab Auctoribus coævis silentio præterita, vel ab aliis dissentiat, vel in errore deprehendatur. Cum enim vel sapientissimus quisque suis in conjecturis quandoque fallitur, tum etiam peritinaxiæ non semper adscribenda est alterius ab altero discrepantia. Melius fortasse causa peti potest ex majore unius acumine, judicio, ac diligentia, vel ex Commentariorum diversitate, vel alia quavis occulta, abditaque ratione. Cui Josephus, exempli gratia, nonnunquam ab aliis in scribendo dissidere videatur, in causa fuerit officiosa in Paganos indulgentia, vel quod alia in manus ejus forte venerint acta, quam vulgata, & omnibus nota.

Cæterum non valde nimis diffidendum est Historicis, qui, quum proprio judicio metantur omnia, de rerum eventu quandoque decernunt; fieri quippe potest, ut vera divinent. Non semper etiam de Aulicis Scriptoribus perperam judicandum: nam sinceri, bonæque fidei esse possunt, quales fuere Ville-hardouin, & Join-villeus, quorum opera illustrandis suorum temporum Sacris expeditionibus plurimum prosunt. Immo verò illorum Testimonium majoris est ponderis, quum in rerum, de quibus agunt, partem vocati, multis, iisque magnis instructi sint præidiis, quibus plerumque carent, qui ea nonnisi alienis oculis cernunt.

## CAPUT

## CAPUT XIII.

*De subsidiis , quæ ad intelligendos Ec-  
clesiæ Patres ex historia profana  
peti possunt .*

**I**N Ecclesiasticæ historiæ studiis parum admo-  
dum proficere , atque valere possumus sine  
historiæ profanæ præsidio . Mutuam sibi lucem  
conferunt , ac si profana ignoretur , plerisque  
historiæ Ecclesiasticæ difficultatibus solvendis  
nulla superest via : Quæ superas colit sedes Ec-  
clesia , humanis Testibus opus non habet ; quæ  
autem in terris degit , hominum , immo infen-  
sissimorum etiam Hostium testimonio indiget .

Quid , quod plura in Sacris literis rerum  
apud Ethnicos gestarum monumentis firmata  
sunt , certissimeque probata ? Ea nimirum ratio-  
ne vindicata est nuperrime veritas historiæ Ju-  
dith , quam nonnulli critici tamquam parabola-  
m , & figmentum traducebant . Non enim  
Sacri duntaxat Historici , verum etiam optimi  
rerum Assyriacarum , Medorumque Scriptores in  
ea perfecte concordant .

Ecclesiæ Patrum testimonia profanæ historiæ  
auctoritate persæpe nituntur . Divus Gregorius  
Nazianzenus in describendis Juliani Apostatæ  
moribus , eum levi , & mobili animo fuisse  
scribens , Ammiani Marcellini , eandem om-  
nino rem affirmantis , auctoritate fulcitur . Equi-

dem legebatur antiquitus in Ammiano *lenitatem* pro *levitatem*, quod alium omnino sensum adfert. Verum doctissimus Abbas *de Billy* hunc locum in *Sacris* suis *observationibus* apposite restituit.

Non est cur moneamus Chronologiam, & Geographiam esse duo historiae lumina, sine quibus apud Veteres perinde, ac apud recentes Scriptores nihil prorsus percipi potest. Plures in errorem lapsos notat Augustinus, quod in Chronologia probe versati non essent. In eadem verlatur sententia Melchior Canus, atque experientia satis liquet, antiquos in supputatione temporum fallos, perturbationem ubique, nec non densissimas tenebras offudisse.

*Ios. Scalig.  
li. 8. de  
emend.  
temp.  
l. 1.*

Ante Olympiades nihil in re chronologica certum reperitur apud Græcos; apud Romanos autem, qui ad hæc studia sero admodum se contulere, fabulis omnia referta sunt usque ad Consulatum Bruti, cujus etiam tempus incertum est, quæcunque fuerit in illo detegendo Varronis industria. Atque eam ob rem Historici quum nihil certi affirmare possent, totum illud spatium, quod Augustum præcessit, tria in tempora tribuerunt; obscurum scilicet, quod ignoracione, altissimisque tenebris sepultum est; fabulosum, quod fictionibus, atque allegoriis scatet; & historicum, quod revocatis ad quasdam epochas gestis, paulatim explicatur.

Græcos, qui Sacras Scripturas non legerant, univertali historia levissime eruditos fuisse



fuisse scribit Iosephus . Idem affirmat Orosius , hisque Populis ignota prorsus subdit ea , quæ in universo terrarum Orbe ter mille , & amplius annorum spatio contigerunt . Et sane nihil est in universa antiquitate , præter Sacros Codices , unde vera Chronologiæ principia derivari possint . Quin etiam inde petita temporum ratio dubia omnino est , & incerta , defectu epocharum , quibus figantur supputationes , varizque eruditorum lites dirimantur . Reticeantur quandoque in narrationibus Sacræ Scripturæ partes annorum , vel sumuntur pro integris annis ; atque , quod longe implicatissimum est , una recensentur Filiorum regnantium anni , cum posterioribus annis Patrum , qui eos in regni societatem vocaverant .

Codex Hebraicus , & Græca LXX. interpretatio discrepant in computatione annorum ab Orbe condito usque ad Christum natum ; ac mirari profecto subit , quod apud nostros Auctores plusquam 50. extent variorum Chronologiæ Scriptorum computationes , quæ ne minimum quidem inter se conveniant .

De hoc amplissimo argumento affirmat Baronius , acerrimas fuisse in Ecclesia disputationes , & diversas quavis ætate opiniones . Quum autem maxima illa dubitatione in re tanti negotii turbarentur eorum ingenia , qui primis Ecclesiæ sæculis Patrum opera legebant , ut sedaret Fratrum animos Julius Hilario

genus quoddam Chronices conscribere coactus fuit, quam omnes postmodum in eadem re tractanda secuti fuere.

Neque vero recentiores Chronologi hoc eruditionis genere veteres multo superarunt. Quum tot sint numero, vix duos reperies in unam, eandemque rem consentientes. Neminem latet, quot, & quam inutiles circa plerasque Sacrae, & Profanae Historiae maximas Aeras motae sint quaestiones. Quis Interpretum certo novit verum tempus egressionis Israelitarum ab Egypto; hebdomadam Danielis; annum, mensem, & diem mortis Christi?

Dionysius exiguus sexto saeculo Auctor vulgaris Epochae Incarnationis Christi Domini, quod ejus ortum repetat ab anno 45. a reformatione Calendarii Julii Caesaris, a Doctoribus Chronologis derelictus fuit. In eo deferendo consentiunt omnes; dissentiunt vero a se invicem. Onuphrius uno anno; Baronius, & Scaliger duobus; Keplerius autem quinque ante annis natum fuisse censent.

Neceffe tamen est cuilibet viro literato, ut Tabulas Chronologicas praee oculis habeat; immo etiam consentaneum foret, ut universales, ac peculiare Auctorum Tabulas, quorum historiam perdiscere vellet, ad suum quisque usum conficeret. Hanc tutissimam viam complures tenuerunt eruditissimi viri, ut videre est in Oxoniensi Divi Cypriani Editione, Annal. Cypri. ubi peropportuna extat ad hujusce Patris Ecclesiae intelligentiam Chronologia. Istud inven-

ventum genus quoddam dici potest memoriæ factitiæ, qua in cognitionibus nostris non mediocriter confirmamur, quod illius ope ad certum quendam ordinem revocentur, finè quo permixta sunt omnia, atque confusa.

Idem menti, & memoriæ præstat Geographia, Sapientes antiquitatis, referente Strabone, Geographiæ cultui se totos dare consueverunt. Eam Moyfes omnium, quos novimus, Scriptorum vetustissimus, suis in descriptionibus, quâ majori potuit, accuratione servavit. Quum illius Elementa ignorarent Lætantius, & Augustinus, non esse Antipodas post Heraclitum, & Leucippum falso putarunt: quo in errore versantur etiamnum Cinentes, qui Orbem terrarum instar disci planum existimant.

Bonifacius Moguntinus Archipræsul Hæreticum declaravit Vigilium Salisburgensem Episcopum, quod crederet esse antipodas. Ejus sententiam firmavit Summus Pontifex Zacharias illius ætatis Cosmographorum opinione ductus, qui Zonam torridam imperviam esse credebant; qua re posita, si qui ultra eam viverent homines, non ab Adamo, sed ex terra nati dicendi fuissent; quod Zacharias, & Bonifacius manifestissimæ Hæreseos condemnabant.

Quot extant quotidie viri, qui ob ignorantem Geographiæ totum terrarum Orbem invertunt? Quot invenies etiam inter hujusce scientiæ peritissimos, qui falsis conjecturis Regna, Provincias, & Urbes permiscant; Montes in Fluvios convertunt; situm locorum mu-

tant, & nova, quæ nunquam exitere supponunt? Quidni igitur timeant qui Geographiam vel negligunt omnino, vel primoribus solum labiis attigerunt?

Vel una in tanto negotio difficultas innumeras parit disceptationes. Rufinus, quod in Historia Ecclesiastica Canoni Nicæno 6. hæc voculas *Regionum suburbicarum* adjecerit, ut exponeret, quas in Ecclesias, præ Patriarcha Alexandrino, Romanus Pontifex jus dicere posset, excitavit imprudenter incendium, quod inter utriusque communionis Doctores circa Provinciarum Sæcularium, atque Ecclesiasticarum distributionem etiamnum viget. Variæ sunt hoc in capite Catholicorum Sententiæ; totidemque Novatorum.

De Eccl.  
Brit.Pr.

Hinc ansam arripuit Jacobus Usserius Armachanus Archiepiscopus sentiendi, Ecclesiam Anglicanam a Romano Patriarchatu non pendere; quia cum ex ejus mente Anglia inter suburbicarias Provincias recensenda non sit, diversa erat antiquitus Diocæsis.

Hæc exempla ostendunt, quanti referat Geographiam veterem, & novam funditus nosse, ut Sacri, Profanique Scriptores exponantur, atque innumeræ explanentur difficultates, quæ a semidoctis superari nullo modo possunt.

Ad veterem Geographiam adhiberi possunt Strabo, Mela, Plinius, Ptolemæus, Dionysius Africanus, & Stephanus Bizantinus. Ad recentem vero Ortelius, qui hanc scientiam plurimum illustravit, Mercator, & Cluverius, qui

qui eam ordine quodam donarunt; Ferrarius, Samson, Duval, Robe, Baudran, & Lubin, qui eam numeris omnibus absolverunt. (30)

Hæc autem scientia magnopere perfici potest cognitione historiæ. Geographia quippe, & historia mutuam sibi opem præbent, ita ut qui peccat in una, in altera facillime labatur. Notant apposite Critici, Divum Hieronymum, quod in vertenda voce *No-ammon* apud Ezechielem non consuluerit historiam, oppido errasse; non enim convertit in nomen *Thebes*, aut *Diospoleos*, ut LXX., sed *Alexandriæ*, quæ quatercentum, & amplius annis ab impleto hoc vaticinio constructa fuit. (31) Cap. 30.

Magno etiam subsidio esse possunt hac in re *Imperii Romani notitia* cum annotationibus Panciroli, aliæque notiones Civiles, & Ecclesiasticæ. Atque ob id, inquit Valesius loquens de *notitia Imperii*, adolescentibus in optimis studiis proficiendi cupidis pernecessarium esse hoc opus præ manibus semper habere, quo quisquis careat, difficillime percipiet Auctores, quippe quorum intelligentia, & explanatio Hadr. Vales.

[30] His addi potest Carolus a S. Paulo, cujus Geographia Ecclesiastica Holstenii annotationibus locupletata, omnium perfectissima, cunctisque numeris absolutissima ab eruditis existimatur.

[31] Impleta enim est hæc Prophetia Imperante Na-

buchodonosore, qui Ægyptum, vicinasque Provincias devastavit; Urbs autem Alexandriæ ab Alexandro M. constructa fuit. Qui duo Principes, si non quater, saltem ter centum, & aliquot annis distant.

natio pendeat omnino a notitia regiminis ; quo Romanum Imperium utebatur ; nominum etiam , quo varii Magistratus vocabantur ; item numeri , & distributionis Provinciarum , aliorumque ejusmodi texcentum , quæ alioqui in Romanæ historiæ studio Lectorem sæpissime detinerent .

## CAPUT XIV.

*Permagni interest Scriptores Ecclesiasticos prius nosse , quam illorum opera legantur .*

**E**TIAMSI Ecclesiasticorum Scriptorum notitia in universali Ecclesiæ historia contineatur , permagni tamen interest peculiarem illis operam dare ; hac enim optima cognitione qui caret , in doctissimorum hominum numerum referri profecto non potest . „ Op-  
*Marf. Ep. Philolog.* „ time novi , eum certe doctum appellari non  
 „ posse , qui postquam græcis , ac latinis li-  
 „ teris imbutus fuerit , in cognoscendis Aucto-  
 „ ribus , & in evolvenda antiquitate non mul-  
 „ tum versatus sit .

Qui hæc ignorant , Scriptores invicem sæpissime permiscet , Veteres Recentibus , Hæreticos Catholicis , & vicissim . Opera Dionysii vulgo Areopagitæ , quum a Severianis prolata fuerint , Heterodoxi Auctoris fœtus aliquandiu habita sunt . *Librum de Corpore , & San-*

*Sanguine Domini* a Ratramno Corbejensi Monacho perscriptum, atque a Sæctariis Germanis, velut sæctæ suæ faventem, Typis editum, plerique Catholici defectu Critices, prudentisque judicii, tanquam hæreticum explosorunt.

Quam ob causam illud semper cautum fuit, ut celebriorum Auctorum nomen, & opera perspicue nota fierent. Diogenes Laertius in eximio, quem edidit libro *de Ingeniorum Hi-* *Menag.*  
*storia*, Græcorum Philosophorum vitam enarrat; atque quot sint, & quales illorum fœtus, accurate recenset. Plutarchus Cathalogum inscripsit Rhetorum illustrium, eorumque confecit historiam. Dio Chrysostomus de Poetis græcis, eorumque poematis satis ample differit; demum apud Suidam, Athenæum, atque Stobæum extant plerorumque græcorum, eorumque operum nomenclationes.

Inter Latinos scripsere de celebrioribus Oratoribus Cicero, de Poetis Varro, de Grammaticis, atque Rhetoribus Svetonius; Divus autem Hieronymus meminit etiam Santræ, Nepotis, & Hygini, eosque hac in re plurimum laudis meritos fuisse affirmat.

Incredibilis extat hodiernis temporibus copia Cathalogorum, Nomenclationum, & Bibliothecarum universalium, ac particularium pro quovis artium, & scientiarum genere. Immo vero in re Theologica affirmari certo potest, nihil fere, quod magni  
saltem

saltem momenti sit , & pretii desiderandum  
supereffe .

Quamquam Eusebius Cæsareensis , cujus  
acumen in distinguendis Auctoribus summope-  
re commendatur , de Scriptoribus Ecclesiasti-  
cis in sua historia verba fecerit ; attamen  
unus præ cæteris eminet Divus Hieronymus ,  
qui omnium primus Græcorum , Latinorum-  
que exemplar imitatus , absolutum hoc in  
genere opus edidit . Quoniam vero singuli  
dies Auctorum , & Librorum copiam face-  
rent , inceptum Divi Hieronymi opus , quod  
quarti seculi finibus continebatur , temporis  
successu magnopere excrevit Auctoribus Isido-  
ro Hispalensi , Ildefonso Toletano , Hono-  
rio Augustodunensi , aliisque compluribus Scrip-  
torum Ecclesiasticorum Collectoribus , quos  
eruditissimus juxta ac laboriosissimus vir Al-  
bertus Mirzus in unum Corpus redegit , no-  
visque commentariis ad præsens usque sæcu-  
lum productis illustravit .

Istiusmodi Scriptorum Cathalogi , præcipue  
quibus optimæ accedunt animadversiones , per-  
magni sunt emolumenti . Quod si vero perle-  
ctis omnibus , vel saltem plerisque , aliquos  
deligere placeat , tanquam fideissimos Duces ,  
anteponendi videntur , qui de quaque scientia  
dixerunt iis , qui quum omnia simul pro-  
miscue amplectantur , exiliter prorsus , ac per-  
functorie describunt .

Postulat etiam æqua ratio , ut inter illo-  
rum



rum Auctores antiquis recentes, quique Autographos textus legerunt, iis præferantur, qui publico solum rumore, & aliena fide scripserunt. Inprimis enim recentiorum Cathalogi veterum indicibus perfectiores sunt; deinde tutius illis adhibetur fides, qui legendis libris tempus infumunt, quam qui in aliorum duntaxat titulis exscribendis operam omnem suam collocarunt.

Plurimum sibi vindicant laudis ea, quæ scripsit Bellarminus *de Scriptoribus Ecclesiasticis*; ut enim ipse testatur, opus est 40. annorum lectione comparatum. In eo quoque præstat, quod stylum, & ordinem brevem adinvenit, rei, quam tractat, longe accommodatissimum. Præterea etiam ingenuus est, nullo modo pertinax, atque ita submissus, ut quum verum non novit, haudquaquam erubescat proferre *ſc̃i nescio*, quod plerique tantopere fastidiunt, atque ab antiquo quodam vocabatur *verbum ingenui pudoris*, sive verbum, quo optime exprimitur, pudere viros probos ex iis, quæ ignorant, inanem gloriolam captare.

Multa quidem post Bellarminum inventa fuere, ac nova in dies inveniuntur. At quid vetat, ne prioribus postremæ jungantur cognitiones, ut factum est a Labbæo, qui eas plurimis locupletavit, iisque eximiis additionibus depromtis, ut ajunt, ex amplissima Sirmundi, & Petavii hæreditate, quam adierat  
ab

ab intestato ; quin iis ulla fiat meriti , vel  
pretii detractio : (32)

## C A P U T X V.

*Quodnam emolumentum adferre possint  
veterum Scriptorum Collectores  
intelligendis Ecclesiæ  
Patribus .*

**M** Aximas Scriptoribus gratias & agere ,  
& habere debemus , qui colligendis ,  
evulgandisque Auctoribus , & Libris , strenuam  
operam navant : Sine præclaro hoc adjumen-  
to varii , ac pene innumerabiles ingenii hu-  
mani fœtus ; qui sobolescunt in dies magis ,  
atque procreantur , omni prorsus carerent or-  
dine in angusto mentis nostræ spatio , & ma-  
xima temporis pars in iis perquirendis , quæ  
uno velut ictu oculi reperiuntur in copiosis-  
simis Indicibus , infumenda foret . Sublato  
hoc-

[32] Quum Auctor operis sen-  
tiat, recentes Cathalogorum  
Auctores vetustioribus an-  
teponendos, consentaneum  
ducimus prolatis in hoc ope-  
re recentiores nonnullos  
Cathalogorum Auctores ad-  
jungere, qui magna cum  
laude scripserunt. Ejusmo-  
di est inter Novatores Guil-  
lelmus Cave: inter Catho-

licos autem Dupin, ac re-  
centissime Remigius Cellier.  
Monachus Benedictinus ;  
omnium procul dubio ac-  
curatissimus; qui suscepti  
ab aliquot annis amplissi-  
mi operis sub titulo *d' his-  
toire generale des Auteurs  
Sacrés, & Ecclesiastiques* ,  
unum fere volumen quot-  
annis in lucem edit.

hocce præsidio confusa jacerent omnia, nec nisi difficillime apud Scriptores Ecclesiasticos opera genuina a falsis, suppositisque, quæ maximo numero sunt, distingui possent.

Auctor Constitutionum, quæ Divo Clementi Papæ dudum adscriptæ fuerunt, vehementer conqueritur, ab Ecclesiæ primordio perniciosissimos Libros, ac veritati repugnantes sub Moyſis, Enóchi, aliorumque veteris Legis Patriarcharum nomine prodiisse. Quosdam meminit Divus Epiphanius suæ ætatis Hæreticos turpissimis hujusmodi fraudibus celeberrimos. Divus etiam Hieronymus *contra Vigilantium*, & Augustinus *de Civitate Dei* graviter, dolenterque conqueruntur de falsis ejusmodi, atque impiissimis suppositionibus.

Notat apposite *D. Simon*, primis Ecclesiæ temporibus pietate, vel alia quavis ratione duetos Scriptores Ecclesiasticos, vel Apostolorum generatim, vel alicujus singillatim nomen operibus suis præficere consuevisse. Hinc Basilides, & Valentinus, qui sese Apostolorum Discipulos jactitabant, falsa, suppositaque monumenta vulgandi ansam arripuere.

Idem contigit Patribus Ecclesiæ, sub quorum, præcipue illustriorum nomine latet ut plurimum aliquis occultus Hæreticus. Divo Cypriano adscripta fuere sæculo 4. Scripta Novatiani; consequentibus autem sæculis plures Nestoriani Eutherii Sermones Divo Athanasio; ipsiusmet etiam Nestorii Sermo Divo Chrysostomo, ac

*Coma*

*Crit. de  
N. Te-  
stam.  
chap. 12*

*Commentaria Pelagii in Divum Paulum Sancto Hieronymo.*

Etiamsi occulta hæc mali labes quavis ætate grassata fuerit; nunquam tamen ita convalluit, uti posterioribus sæculis, quibus Hæretici sub vestimentis ovium, non modo ab omnibus Scriptoribus, si quid sibi adversum videbatur, obliterarunt, verum etiam proprios fœtus Patribus, atque Auctoribus adprime Catholicis supposuerunt.

Scribit Sixtus Senensis, vulgatos fuisse a Novatoribus Calvinii Libros sub nomine inclyti Alcuini; Librum Berengarii *contra Ecclesiam visibilem* sub nomine Sancti Athanasii; atque opus Bucceri *contra merita bonorum operum* sub nomine piissimi Cardinalis Johannis Ficher. Neminem etiam fugit, Socinum eo audaciæ progressum, ut suum *de Sacre Scripturæ auctoritate* Tractatum imposuerit Dominico Lopez Jesuitæ, quem *Alegambes* in censum refert clarissimorum Societatis suæ Scriptorum.

Non soli tamen Hæretici suppositorum Patribus operum Auctores habendi sunt. Nonnulla enim Catholicis ipsis lucem, & originem debent; sive optimo fine id fecerint, sive imbecillitate quadam, sive immoderato laudis amore, ut contigit olim Theodisco Hispalensi Episcopo, & Hispaniæ Primati, qui inanis gloriolæ cupidus nonnullas lucubrations suas Ilidoro ejusdem Urbis Episcopo imposuit; quum Sancti hujusce Præsulis opera in Arabicam linguam converteret. Verum gravissimas impro-  
bz

*Genchr.  
ad ann.  
655.*

bæ temeritatis pœnas luit: etenim Episcopi provinciales in Synodo Theodiscum ab Ecclesiâ sua ejecerunt, atque ad æternam probri memoriam sedem metropolitanam ab Hispalensi ad Toletanam urbem, in qua & hodie sita manet, transtulere. Isthæc Hispanorum Antistitum severitas modum excessisse videretur, nisi compertum foret, nullam ab Ecclesiâ fraudem tolerari; eamque ob causam depositum a Divo Johanne Evangelista Presbyterum Asiaticum, qui opera quædam Sancto Paulo Apostolo impudentissime supposuerat.

*Hier.  
vir.  
Illustr.  
c. 17.*

Errore quandoque factum est, ut scripta nonnulla Patribus immerito assignarentur; ut plurimum tamen in causa fuit præpropæra festinatio, ac parum omnino accurata inquisitio. Quum enim primo ars Typographiæ inventa est, optima sibi quisque esse putans exemplaria, in lucem incunctanter edebat, non alio consulto Judice, quam immodico laudis amore. Hinc millena errata, quæ Typographorum, ac Criticorum ingenia longissimo temporis spatio torquebunt.

Novæ in dies deteguntur, depellunturque id genus fraudes; neque eadem obtinet hisce temporibus, quæ superioribus sæculis credulitas, quibus quidquid typis mandatum erat, pro certo habebatur, & rato. Et sane experientia docet, non librorum titulis, aliisque notis externis legitima a spuriiis operibus certo distingui, sed accurata cujusque singillatim Auctoris, ætatis, doctrinæ, styli, & ingenii perquisitione.

M

Ope-

Operis suppositio ex tempore, quo exaratum fuit; tempus autem ex virorum illustrium nominibus, qui operis decursu laudantur, dignosci optime potest. Ita abs vero non abludet, qui animadvertens in tractatu *de Revelatione Capituli Sancti Johannis* Divo Cypriano vulgo adscripto, sermonem fieri de Theodosio, Marcelino, & Pepino, illum ab hoc Ecclesiæ Patre, iis Principibus longe antiquiore, abjudicet.

Manifeste quoque se prodit libri suppositio, quum profert Auctores eo tempore, quo perscriptus fuit, recentiores. Ita merito, & jure suppositos censet Sixtus Senensis quosdam tractatus, qui quum Sanctis Ambrosio, Hieronymo, & Eucherio Lugdunensi adscribantur, fragmenta continent, ex libris moralibus Sancti Gregorii Papæ integro sæculo recentioris, desumptum.

Ejusdem rei argumentum facit injecta rituum mentio, consuetudinum, & cæremoniarum, quæ Auctoris, cujus nomen liber præfert, ætate ignotæ omnino erant. Hanc ob causam indubitatum est, librum *Hierarchiæ Ecclesiasticæ* perperam Dionysio Areopagitæ adscriptum fuisse: meminit quippe consuetudinum, quæ multo post primum Ecclesiæ sæculum, quo vir iste eximius florebat, inventæ sunt.

Genuinum nequaquam est Auctoris opus, quod quæstiones auctore recentiores, vel peculiarem continet verborum usum, qui multo post Auctoris tempora adhiberi cæpit. Secundum æquissimam hanc regulam, *Responsa ad inter-*

*rogationes Orthodoxorum* sub Divi Iustini nomine falso circumferri, affirmare certo possumus. Cum enim ibi multa proponuntur, quæ Sanctissimi Martyris ætate tractari non solebant, quibus illius ævi fideles haudquaquam detinebantur; tum etiam differit Auctor de Trinitate; & Incarnatione accuratissimis verbis, iisque ante Arium, Nestorium, & Eutychetem, qui horum mysteriorum fidem convellendam susceperere, prorsus inusitatis.

Legitimus etiam Auctoris fœtus judicandus non est, qui contraria illius doctrinæ dogmata profert. Quo circa *Tractatus in Leviticum* Divo Cyrillo Alexandrino attribui nullo jure potuerunt; quam errores Origenis contineant, quos alibi totis viribus refellit idem Cyrillus. Ejus generis sunt existentia animarum ante Mundi creationem, illarum in corporibus inclusio in pœnam criminum, quæ patrarunt in Cœlo, salus Dæmonum, aliaque id genus deliramenta.

Scribendarum etiam rerum ordo plurimum juvat, ut vera a suppositis opera secernantur. Petraro quippe tanta est inter varios Scriptores styli similitudo, ut nullum prorsus notari possit discrimen; quamvis ab erudito Scriptore stylum immutari posse, vel alienum exprimi non inficiemur.

Divus Augustinus epistolas de baptismo Hæreticorum legitimum esse fœtum Sancti Cypriani cognovit ex proprio ipsius stylo, quo & cæteris Scriptoribus nullo negotio distingui-

tur. Contra Divus Hieronymus eodem utens lydiæ lapide, complura monumenta antiquis Patribus falso adscripta fuisse, probavit.

Omnium autem simplicissima ratio genuinos Patrum fœtus a spuriiis segregandi illorum est, qui ad indices operum ab ipsismet Auctoribus inscriptos recurrunt, vel ad eos saltem, quos ediderunt emunctioris naris critici, præcipue qui eorundem Auctorum ætate vivebant. Hac porro ratione Divo Ignatio suppositæ probantur quinque græcæ epistolæ, [33] quæ quum in ceteras ejus epistolas referantur, in cathalogis tamen Eusebii, & Hieronymi non recententur; si enim eo Auctore fuissent conscriptæ, fieri non posset, ut ad Hieronymi, & Eusebii notitiam non pervenissent. E contrario *Epistola ad Philippenses* merito Polycarpi nomen præ se ferre creditur, quum Divus Irenæus, Eusebius, Hieronymus, & Photius illud testatum faciant. Quod enim opponi posset, hanc epistolam a Nicephoro rejectam, parvi omnino pendimus; recentior quippe est, ac levioris existimationis Nicephorus, quam ut cum inclytissimis iis Scriptoribus comparetur.

Librum alicujus esse Scriptoris, ipsiusmet declaratio indubitatum facit argumentum; verum

ex

(33) Imo octo, nimirum *ad D. Johannem Evangelistam* duæ; *ad Beatissimam Virginem* Desperam una; quarta *ad Mariam Casso-*

*boliten*; quinta *ad Tharsenses*; sexta *ad Heronem*; septima *ad Antiochenos*; octava *ad Philippenses*.



ex ejus silentio ab illo abjudicandum esse ; ostendi non potest. Ita quæ in *Retractionibus* sibi adscribit opera Divus Augustinus , ab eo exarata fuisse nemo dubitat ; falleretur tamen , qui reliqua omnia , quorum non meminit , ab eo lucubrata fuisse negaret.

Eadem adhibenda est regula ad indicem operum hujusce Doctoris ab ejusdem Auditore Possidio vulgatum . Etenim dignosci quidem potest ex hujusce Discipuli testimonio , hosce , vel illos libros Divi Augustini sætus habendos esse ; at cæteros a Possidio silentio præteritos , Divo Augustino assignandos esse , nemo jure negaverit ; præcipue si suppetant aliunde argumenta , quibus eidem vindicari possint .

Alia etiam teneri potest via , ut secernantur legitima a spuris Patrum operibus , scilicet antiqui cujusdam Scriptoris auctoritas , qui luculentum veritati perhibeat testimonium . Sic detecto aliquot ab hinc annis Mario Mercatore , An.  
1666. cognitum fuit , atque perspectum , opera nonnullis Patribus adscripta antiquitus alios prorsus habuisse Auctores , quorum ne suspicio quidem in mentem venerat .

Ac revera illius ope nobis innotescit , sermonem vulgo Divi Chrysostomi in hæc Evangelii verba : *si filius Dei es , mitte te deorsum* a Nestorio elaboratum ; commentarios in *Divum Paulum* tributos Sancto Hieronymo , a Pelagio scriptos ; ac sermones in *varias hæreses* , ab Eutherio Nestoriano lucubratos fuisse .

Denique assidua Scriptorum lectione , eo-

rumque ingenii investigatione optime distinguere, secernique hæc omnia poterunt, quæ plus diligentia postulant, & æquitatis, quam subtilitatis, & acuminis. Plurimum juvat hac in re exercitatio una cum Doctissimorum Criticorum consilio, ac vetustiorum, & melioris notæ exemplarium perquisitione, quibus fidere multo magis consentaneum est, quam cæteris quibuslibet, vel nullo nixis fundamento conjecturis. Propterea prudentissimo iudicio usi sunt, qui hæreseon indicem, in nonnullis Tertulliani editionibus ad calcem ejus tractatus *de Præscriptionibus* appositum, ab eo minime factum notarunt; non enim invenitur in veteri Tertulliani operum manuscripto Agobardi omnium perfectissimo, neque etiam in alio authentico, quod Rhenanus in primis hujusce Auctoris Editione adhibuit.

## CAPUT XVI.

*De Editionibus Patrum, ac primo  
de Manuscriptis.*

UT faciliorem librorum intelligentiam assequamur, ex communi eruditorum consensu, eorundem lectio in primis plana, & facilis reddi debet; quod ut fiat, deligendi sunt accurate conscripti, vel optimis literis impressi; ne mens Lectoris fatigata oculorum acie præcipuo studio distrahatur, præsertim quum agitur de operibus Patrum Ecclesiæ, quæ omnium

nium virium intentionem postulant.

Neminem latet, libros scribendo primum vulgari cœpisse; utque sanum de libris editis iudicium fiat, ad manuscripta persæpe recurrendum. Neque tamen omnibus fides indiscriminatim adhiberi debet; ut enim aliqua indubitata, ita non desunt quæ dubiæ, immo nullius fidei sunt. Galenus scribit, Reges Ægyptios innumerabilem Manuscriptorum copiam colligendi avidos, fraudulentis hominibus locum dedisse vilissimorum exemplarium pretia augendi, vepundatis etiam, tanquam meliorum Auctorum monumentis, quibusdam operibus, quæ ne legi quidem merebantur.

Tria præcipue postulantur in codice manuscripto; primo ut verus sit, atque autographi saltem codicis ævo proximus. Auctoritas quippe manuscripti ab antiquitate plerunque pendet; hæc autem antiquitas ex forma, & notis characterum dignosci potest.

Optimis præterea literis sit exaratus, ac demum mendis omnibus expurgatus. Ut enim optime reposuit Cardinalis Toletus docto, studiosoque Fulvio Ursino, qui veterem Terentium mendis undique scatentem ad usque sydera tollebat; mallem vel unum volumen absque ullo mendo typis impressum, quam decem exemplaria corrupta, licet perantiqua, atque Sybillarum manibus descripta forent. Idemque prorsus agebat Divus Hieronymus, eos irridens, qui ornamenta potius, quam fidem, & accuratorem in Manuscriptis considerant;

*Pref.  
in Job.*

„ habeant, qui volunt, veteres libros, vel in  
 „ membranis purpureis auro, argentoque de-  
 „ scriptos, vel uncialibus, ut vulgo ajunt,  
 „ literis, onera magis exarata, quam codices:  
 „ dummodo mihi, meisque permittant paupe-  
 „ res habere schedulas, & non tam pulchros  
 „ codices, quam emendatos.

Narrat Trithemius, in cœnobiis, in quibus  
 vigeat ars scribendi, plurimum circumspe-  
 ctionis adhiberi consuevisse; Monachorum præ-  
 positos unicuique pro viribus, & facultate pe-  
 culiarem commississe provinciam; Theologis  
 quidem, atque Doctoribus præstantiora; minus  
 Doctis vero minoris momenti Opera; viros  
 præterea exercitatos recognoscendis manu-  
 scriptis addictos: optime quippe norant, ca-  
 vendum in primis, ne vulgo fucus fieret; ac  
 bonæ fidei, qua sibi oblata excipere solet, con-  
 sulendum esse. Ut enim plurimam ineunt gra-  
 tiam, qui perhibendo veritati testimonio ope-  
 ram navant; ita, qui accurate scripta mendose  
 exscribentes contra eandem veritatem testimo-  
 nium dicunt, acerrimam merentur reprehensionem.

*Castigat.  
in M. 1.  
Cicer. lo-  
cos quos  
plurimum  
Pseudo-  
cicer.*

Levissima hac in re varietas plurimum pa-  
 rit confusionis. Qui oculos vel obiter injiciat  
 in opusculum Henrici Stephani *de Origine Men-  
 dorum*, aliave similia ejusdem Auctoris, per-  
 spicue intelliget, quot modis autographum  
 exemplar Amanuensium ignoratione, vel in-  
 curia vitari queat. Id enim fit vel una litera  
 initiali omissa, ut si scribatur *error* pro *terror*;

*vatio* pro *oratio* ; vel duabus, tribusve literis abjectis post primam syllabam, vel in medio vocis: quemadmodum scriptum fuit *notio* pro *notatio*, *includere* pro *intercludere* ; vel unius literæ detractiōe, ut *ingratis* pro *ingratis*; vel additione unius literæ in principio dictiōis, ut *placatissima* pro *pacatissima* ; vel integra etiam syllaba in medio adjecta, ut *æquabiliter* pro *æqualiter* ; vel unius literæ accessiōe in fine dictiōis, ut *civitates* pro *civitate* ; vel unius in aliam vocem mutatione, ut *ædes* pro *sedes*.

Literæ vocales miscentur facillime, multi- que Amanuensium aliquando sumserunt *i* pro *e*, *dimittere* pro *demittere*, *diligere* pro *deligere*; *e* pro *i*, *affectum* pro *effictum*; *u* pro *a*, *trahuntur* pro *trabantur*; *u* pro *i*, *duxit* pro *dixit*; *a* pro *o*, *etefias* pro *etefios*; *o* pro *a*, *multos* pro *multas*; *i* pro *o*, *primo* pro *promo*.

Syllabarum etiam inversio in literis pluraturbavit; ut quum scriptum fuit *suscipere* pro *susplicere*, *examinare* pro *exanimare* ; quod in monosyllabis plerunque contingit; sæpius enim inconsiderate scribitur *ut* pro *tu*, *jus* pro *vis* &c.

Omnia etiam confusa fuere junctione literarum, quæ sejungi debuissent; scribendo e. g. *reprobavit* pro *re probavit*, etiam pro *et jam*, *infirma* pro *in firma*, & contra *in firma* pro *infirma*, et *jam* pro *etiam*, *re probavit* pro *reprobavit* &c.

Denique innumera irreperunt errata in exemplaria, modo dictantium vitio, qui vo-  
ces

ces distincte, explanateque non proferebant; modo scribebant, qui satis attentas dictantibus aures non præbebant. Ea de causa nonnumquam scriptum reperimus antiquam pro anti-  
cam, sed Diis pro sed iis, me ore pro more &c.

Atque quum ignari quandoque viri supplendis maioribus literis se se immiscuerint, quas Amanuenses consulto omittebant, ut eas alibi venustius, ac majori cum otio pingerent, nonnullas literas mutarunt depravato Auctoris sensu, ut videre est in *Vita Constantini M.* ab Eusebio conscripta.

Vales.  
not. in  
l. 4. de  
vit. imp.  
Constant.  
cap. 22.

Quid autem de iis dicendum, qui sæpius in exscribendis libris dictiones, immo integras etiam periodos omittunt, mutant, addunt, vel invertunt; vel qui nullo adhibito discrimine interpunctionem omnem abjiciunt, paucis, ut iis libet, exceptis? Quanquam enim punctum levissima res sit, ac parum necessaria, quum in remotissima antiquitate non adhiberetur, ex illius tamen omissione, vel prava collocatione, vel aliam in formam mutatione, falsissima confectaria colligi possunt. Exemplo pluries fuerunt Hæretici, eoque sane subsidio usi sunt Sociniani, & recentiores Præadamitæ ad defendenda systematum suorum deliramenta, quum nonnulla Sanctorum Johannis, & Pauli testimonia exponerent, quæ proprio loco spectata, iis nullo modo favere poterant.

Silentio prætereo varias lectiones, vel inconsultas emendationes ab Amanuensibus cusas, & annotationes, quæ in margine apponebantur

bantur, insolita temeritate in textum illatas. Argumento evidentissimo hæc omnia sunt, non leviter fidendum esse Amanuensibus, atque haud immerito delectum antiquitus a Pilstrato Aristarchum, inter totius Græciæ Criticos acutissimum, sapientissimumque, ut accuratum Homeri carminum exemplar haberet.

Iniquos illos Scriptores vehementer infecta est universa antiquitas. Anastasius Sinaïta acrius illis exprobrat, quod blasphemias Sanctorum Patrum opera referferint. Divus Gaudentius ejusmodi corruptores in totius orbis judicium vocat. Divus Irenæus per viscera Salvatoris eos adjurat, ut libris suis parcant; ac Divus Hieronymus, quanquam obsecrandis hostibus parum assuetus, eos tamen enixe rogat, ut Eusebii Chronicæ interpretationem, nequaquam dilacerent, atque deturpent.

Hinc orta veterum consuetudo ad calcem librorum adjiciendi genus quoddam imprecationis, ut Amanuensium temeritatem comprimerent. Refert Aristæus, post absolutam græcam LXX. interpretationem, Demetrium persuasisse Judæis, ut adderent imprecationem adversus eos, qui divino huic operi quidquam mutare, detrahere, vel addere nefarie audent. Ad quæ notat Grotius Marcionis, aliorumque quorundam hæreticorum perfidiam, qui novi testamenti exemplaria vitiabant, liquido monstrasse, non sine causa id genus imprecationum adhibitum fuisse.

Hujus rei authenticum habetur exemplum

in Apocalypsi Divi Johannis; quamvis enim sentiat *Lively* solum esse adjurationem exscriptoris, non secus, ac illam, quæ reperitur in nonnullis Divi Irenæi exemplaribus; ( in quo nullam meretur fidem ), perspicue tamen ostendit, quanta foret Antiquorum sollicitudo, ut integrum, incorruptumque in exemplaribus autographis textum servarent.

## C A P U T XVII.

*Quid opus sit, ut sanum, rectumque de veteribus Manuscriptis judicium feratur.*

Quemadmodum intentos, fidissimosque Amanuenses, sic etiam Lectores sapientes, acutosque esse oportet. Quamobrem perdiscenda multiplex veterum Scripturarum forma. Tradit Smetius, ante Cæsarum Imperium apud Romanos literas valde simplices, ac fere consimiles in usu fuisse; ab Augusto usque ad sæculum Antoninorum adhibitos characteres quadratos aptissimæ partium compositionis; verum cunctis rebus una cum Imperio labentibus, deperditam concinnam hanc characterum Romanorum formam, obliquos primum, dein oblongos evasisse, ac demum impolitos, & rusticos paullatim effectos, in Gothicos tandem conversos fuisse.

Literæ solum majores primitus in usu erant,  
ut



ut videre est in vetustissimis inscriptionibus; breviores vero posterius multo in Amanuensium commodum inventæ fuere. Hennius recens Auctor consuetudinem exscribendi græcum sermonem exiguis characteribus ab Ægypti Monachis, qui a Coptis acceperant, inductum existimat. Addit minutos characteres latinos a Longobardis repertos, atque ab occidentalibus Monachis adhibitos, propterea quod illis multum se brevi tempore progredi posse animadverterunt. Si qua fides eidem Auctori, Rabbanus Maurus Fuldenfis Abbas, dein Moguntinus Episcopus, tempore Caroli Magni, Germaniæ populis characteres dedit, quibus scribendo utuntur, ab iis, quos adhibent Typographi, longe diversos.

Socrates in *Historia Ecclesiastica*, Ulphilæ <sup>L. 4. c. 27.</sup> Gothorum Episcopo quarto sæculo literarum Gothicarum inventum tribuit. Præter hos characteres alii extant antiquissimi *Cyrilliani*, & *Hieronymiani*, vulgo dicti. Communis opinio est, posteriorum, qui cum græcis characteribus valde conveniunt, Auctorem esse Divum Hieronymum, qui eos Dalmatis dederit, una cum bibliis in eorum linguam translatis: aliorum vero Divum Cyrillum, qui eos ad usum Illyricorum excogitavit.

Si quis diversos variarum orbis nationum characteres nosse cupit, consulat Postellum *de Duodecim Linguis*, Duret *de Linguis*, & *Characteribus omnium linguarum*, *Tabulas Alphabeticas Variorum Characterum* editas Francofurti anno

1596.,

1596., & 70. literarum elementa Romæ anno 1616.

Ad eos vero generatim spectatos quod attinget, est apud Sigonium, Justum Lipsium, Vigenarium, Continuatores Bollandi, & Patrem Mabillonium, quo in re tam utili omnium studio satisfiat. Mabillonius præsertim plurimi faciendus est ob altissimam, qua pollet, eruditionem, ac diuturnam experientiam. Quamvis enim (ut ipse fatetur) valde dissent characteres instrumentorum, de quibus maxime agit, ab Auctorum manuscriptorum characteribus, mutuam tamen sibi lucem præbent.

*Lancelotus meth.*

„ Abs re quoque non fuerit inquirere quod-  
 „ nam sit literarum genus, quæve illarum in-  
 „ vicem convenientia: perutile enim illud est  
 „ ad analogiam, & originem verborum in-  
 „ vestigandam; quarum quidem rerum co-  
 „ gnitio ad veterum loca magis vitiata intel-  
 „ ligenda, eaque ad veram significationem:  
 „ revocanda plurimum conducit.

Hujus consilii Auctor Lancelotus tabulas Orthographiæ descripsit, extricandis veteribus monumentis aptissima. Eadem de re plura scripsit Cassiodorus; quum enim sibi animo proposuisset exemplaria biblicorum incorrupta servare, veterum Auctorum, qui de Orthographia disseruerunt, collectionem perfecit. Daufiquius, Vossius, Scioppius, ac P. Sirmundus de *Columna Rostrata* istud argumentum perspicue, copioseque tractarunt.

Augustus Imperator Pater Patriæ, cultio-  
 rum-

rumque literarum, ad hanc singillatim grammaticæ partem se se contulit. Easdem scribendo, quas loquendo orthographiæ regulas sequi studebat; cavebatque imprimis, ne verba in lineæ sine secaret, ac media ad sequentem lineam remitteret.

Jurisconsulti, gravissimis licet negotiis occupentur, Orthographiæ studere non erubescunt; alii quoque, qui exiguis rebus immorari non sistent, vigiliis tamen suis exercitationem hanc nequaquam indignam existimant.

Eandem ob causam perdisci debent compendia scribendi, sive *notæ vulgares*, ut eas vocat Divus Isidorus, qui illarum originem petit ab Ennio. Hisce notis refertissimi sunt Jurisconsulti. Petrus Diaconus factam illarum collectionem dicavit Imperatori Conrado. Justus Lipsius, & Vigenarius omnes fere, quæ ab antiquis adhibebantur, exposuerunt. Omnibus autem præstant, circa vulgares Romanorum notas, Sertorii Ursati Patavini Jurisperiti commentaria, a quinque circiter, & viginti annis in eadem urbe typis impressa.

In supplemento Thesauri Gruterii inter notas, quæ Ciceronis liberto, & Senecæ adscribuntur, extant notæ Ecclesiasticæ, quas Divo Cypriano assignat Trithemius. Verosimilius tamen videtur, ab hoc Ecclesiæ Patre auctum duntaxat illarum numerum, additis quæ apud Christianos suæ ætatis in usu erant.

Hanc per compendia scribendi Artem, quam  
Divus.

Divus Hieronymus vocat *verborum furtum*, primi exercuere in foro Actuarii, dum Judicum sententias scriberent. Rhetores autem sumto a Cicerone exemplo, liberos suos ad hoc exercitationis genus applicuerunt: atque verosimile est, Tertullum, de quo sæpe loquitur Sanctus Cyprianus, quendam fuisse inter liberos, quibus Sanctissimus ille Antistes ad scribenda Martyrum acta utebatur.

Aliæ etiam erant *notæ arcanae dictæ*, quarum ope Christiani sua sibi mutuo sensa confidentius, atque securius communicabant. Hisce notis distinguebantur Literæ Canonicae in Ecclesia notissimæ, quibus addebantur tesseræ ad indicandum genus, & religionem Christianorum, ut ab una in aliam migrantes Ecclesiam hisce honoris insignibus ab iis exciperentur, apud quos hospitii jure potiebantur.

L. 1.  
C. 4.

Pacichelius in tractatu *de Jure hospitalitatis universo*, de hisce tesseris, ut vocant *hospitalitatis*, erudite differit; unde originem ducunt ea verba apud Latinos Auctores frequentia, *tesseram hospitalitatis confringere*, sive jus hospitalitatis alicui familiæ renuntiare.

Rerum etiam antiquarum cognitio, necnon numismatum, atque nummorum ad varios veterum characteres noscendos, atque Chronologiæ, & Historiæ nodos solvendo conferre potest; quum memoranda Magnorum Principum gesta, urbium, rerumque publicarum Epochæ in averfa numismatum facie ut plurimum incisæ fuerint, ut fidem faciunt collectiones

Etiones P. Noris, D. Vaillant, Gaudentii Roberti, aliorumque antiquitatis studiosorum.

Denique magno esse potest adjumento veterum inscriptionum cognitio, quas veluti fontes historię dixeris, ac prima rudimenta. Dionysius Halicarnassæus magnam Historię suę partem antiquis inscriptionibus acceptam refert. Ex iis hausit Pausanias, quę de primis Græcorum temporibus narrat. Eisdem usus Titus Livius ad Romanam conscribendam Historiam, indeque desumpsit Manethos, quę de Regum Ægyptiorum Historia scripsit. Univerſa Ægyptiorum Historia marmoribus olim insculpta erat, atque e vetustissimis columnis Phœnicum Historiam exscripsit Sanchoniaton. Eximia, quę sibi contigerant gesta, in silice sculpta reliquerunt Seth, Jacob, Absalom; atque vetustissimis lapidibus hodierna etiam ætate incisa leguntur decreta, leges, pactionesque Græcorum Principum, & Populorum.

Haudquaquam tamen necesse fuerit a Theologiæ Doctore omne studium, omnemque curam in harum rerum investigatione collocari, quarum usu immoderato meliora etiam ingenia vitari possent. Obiter delibasse sufficiat, ac recreandi potius animi causa, quam novis studiis obruendi. Hęc qui desiderat, inveniet apposite apud Reinesium, Gruterium, Lipsium, Scaligerum, Seldenum, aliosque, qui ejusmodi collectiones optimis annotationibus illustrarunt.

N

CAPUT

*Præfatus  
aut ad  
maximam  
Oxoniam*

## CAPUT XVIII.

De recentioribus Ecclesiæ Patrum  
Editionibus.

**Q**Uod spectat Editiones Patrum a ducentum annis, sive post inventam Typographiam confectas, principio sciendum est, a Typographis in Germania, & Gallia literas Gothicas, in Italia vero rotundas adhibitasse.

An.  
1491.

Conradus *Svaneheim*, & Arnoldus *Pannartz* natione Germani, Romæ in Æde Petri de *Maximis* opus Divi Augustini de *Civitate Dei* rotundis edidere characteribus; ac paullo post iisdem usi sunt in Editione epistolarum Divi Hieronymi. Hosce characteres Jodocus Badius anno millesimo quingentesimo Lutetiam Parisiorum attulit; ubi suum instituit Typographæum sub nomine *Praeli Ascensiani* notissimum.

Si de characterum varietate dignoscere velis, oculos circumferre satis fuerit: sin autem optimas a pravis, vel mediocribus Editiones fecernere, multo plura desiderantur. Illud autem inprimis expetendum in Editionibus Patrum, ut eas Viri docti, prudentes, accurati, nulloque modo Ecclesiæ suspecti elucubrarent. De Hæreticorum, qui hæc aggrediuntur, fide, aliquis suspicioni locus semper est; quanquam  
non.

nonnulli, ut Savilius in D. Chrysoſtomi, & Hoëſcheliuſ in plurium Græcorum Patrum Editionibus omnem diligentiam, omnemque, quam poterant fidem, adhibuerint.

Advertendum etiam, cujus præli ſit Editio: eſto enim Typographi plerumque minimum in perficiendis editionibus Patrum locum habeant, pro majori tamen, vel minori ingenio, candore, & religione magis, vel minus opera ſua Reipublicæ prodeſſe poſſunt. Genebrardus in præſatione Latinæ Origenis Editionis ait, Typographos Gebennenes ſuis temporibus in tantam corruptelam abiſſe, ut fidei, virtutiſque omnis obliti, ſuæ, noſtræque Religionis libros adulterarint.

Poſſevinus, Stapleton, Medina, alique quidam Critici detegendis fraudibus hoc in genere adhibitis fauſto admodum ſucceſſu adlaborarunt. Ingenium ſuum exercuerunt, & quotidie exercent, non ſine multo fructu, ſummaque laude, celeberrima Athenza, & religioſæ Societates, ut antiquos Patres priſtino candori reſtituant, & puritati, quæ in omnibus fere priſcis editionibus temerata fuerat.

Poſtremo denique ſæculo, quum primum magna illa rerum confuſio, atque perturbatio deprehendi cœpit, remedia illico quaſita fuerunt. Doctiſſimi iccirco accerſiti Typographi, eximii characteres fuſi, nullaque omiſſa diligens cura, quæ ad tantum opus feliciter perficiendum conferre poterat. Pius IV. tunc tem-

poris Ecclesiæ caput manum operi admovit; atque in Vaticano præclarissimum Typographum instituit, cui Paulum Manutium, Aldi filium, singulari eruditione, non secus a Patre suo commendatissimum præfecit. Etenim præsci Typographi & linguarum Orientalium scientia, & omnigena eruditione instructi erant. Exempla vel emendabant ipsimet, vel emendanda peritissimis duntaxat Viris committebant, qui ad publicam utilitatem ultro suam præbebant operam. Campanus in Typographia Uldarici, Johannes Andreas Episcopus Aleria in Typographia *Surveynheim*, ac *Pannartz* Romæ instituta, Federicus Sylburgus apud *Chrestien*, & Andream *Vvechels*; Ludovicus Saurius Lugduni apud *Frelons*; & Sigismondus Gelenius in Germania apud *Frobens*, correctorum officio fungi dedignati non sunt, quod nostra tempestate vilissimum habetur.

Neque vero illorum temporum Typographi vulgaribus de trivio hominibus accentebantur. *Daniel Bombergue*, a quo edita fuit Venetiis Polyglotta, a nonnullis *Editio Rabinica* dicta, Hebraicæ linguæ peritissimus erat, ejusque rudimenta magna cum laude tradabat. Jodocus Badius docebat Parisiis Græcum sermonem, quem Ferratiæ a Baptista *Guarini* didicerat; omnes etiam Grammaticæ partes callebat, ac optima dedit hac in re specimina, illius scientiæ cultoribus longe utilissima. Tandem, qui ex Colinæ, Moreli, Turnelii, Stephani familiis floruerunt, alique permulti, nedum



nedom corrigentes, edentesque optimis characteribus libros, verum etiam eos perscribentes, maximam nomini suo laudem, & existimationem compararunt.

Atque hanc ob causam olim Librarii *Clericorum* sibi nomen adscribebant, sive, ut ait *Nicod*, Virorum omnibus disciplinis instructissimorum. Quatuor & viginti præstantiores ab Athenæi Parisiensis Rectore admittebantur, qui jurejurando coram eodem Rectore ( unde & *Librarii jurati* dicti sunt ) se se adstringebant ad servandas sanctiones latas de vendendis libris, commodandisque mediocri pretio, nulloque vitio affectis.

Verum ipsplendidissimus hic nitor quam citissime obscuratus evanuit. Medio ultimo sæculo Conradus Gesnerius de Typographorum incuria, eorumque, scilicet præcellentium, paucitate conqueri cœpit. Eodem fere tempore Henricus Stephanus gravissimas fudit querelas in Satyra, quam soluta scripsit oratione, ubi tristem inducit Typographiam cum luctu, gemituque, illatæ a pravis Typograhis injuriæ, atque violentiæ pœnas a Superis petentem.

Quid porro diceret Vir iste, qui elegantiam, & gloriam artis suæ tanto studio prosequeretur, si nostri temporis Librarius videret ab antiqua nobilitate degeneres, in politioribus literis rudes omnino, & ignaros; ac negotiationi, & quæstui unice inhiantes? Atque hæc quidem depravatio musis maxime

*Bibliot.  
univers.*

*Art.  
Typogr.  
Quæ-  
rim.*

exitialis est; nam Correctores mercenarii, æ pretio conducti nunquam tanto ferri possunt amore, quanto Typographus in ea, quæ edit opera; quum enim ipsius quodammodo factus sint, proprium una cum Auctoris nomine servare, & vindicare tenetur.

Atque si Correctores nec ignari sint, nec inconsiderati, magno esse possunt emolumento; si vero inepti, si præcipites, qui demant, lacerent, addant, transferant, omniaque invertant pro libito, tales profecto viros horrendos, execrandosque averlantur Auctores. „Oh fas!

*Just.  
Linc.  
Sax.  
Münch.*

„oh fides! hæc fieri bonis bono semine natis.

Non minus acriter, acerbique Leo Allatius in *secunda de Græcorum Ritualibus dissertatione*, pravos Correctores infectatur; neque mitius eos habet Henricus Stephanus, pulcherrimam, ditissimamque suam Typographiam describens, ubi veterum Auctorum deflet infortunium, qui tam barbaras in manus miserrime incidunt.

Eam ob rem doctissimus Goltzius hujusce scopuli metu, propriis sumptibus Typographiam suis in ædibus instituit, ut ea, qua Pater amantissimus uti solet in filios, quos ab omni vitii labe incolumes servat, accuratione, & diligentia emendaret ipsemet collecta Imperatorum numismata ab Julio Cæsare ad Quintum Carolum usque, quo imperante florebat.

Præter Typographia, e quibus prodeunt Editiones Patrum, ad exemplaria quoque animus

mus

mus convertendus est, quibuscum editiones collatæ, & emendatæ fuerunt.

Percrebuerat olim fama, indubitatæ fidei manuscriptos Codices Romæ servari. Quarto jam sæculo Divus Athanasius, & Antistites Ægyptii ad Summum Pontificem Marcum recurrerunt, ut Canonum Nicænorum, qui nullibi ea integritate servati fuerant, exemplar haberent (34). Sexto autem sæculo Divus Gregorius Papa ad Anastasium Antiochenum, exemplar Ephesinæ Synodi emendatissimum, misit, cujus Canones ab Hæreticis magna ex parte adulterati fuerant (35).

Si

[34] Quæ scribit Auctor de Canonum Nicænorum exemplari a Summo Pontifice Marco ad Athanasium missi, desumit ex epistola ejus nomine inscripta ad Athanasium, & universos Ægypti Episcopos, quæ ab Eruditis tanquam supposititia exploditur. Tum enim Consulum nomina in ea falso notantur, tum etiam ponit Ægyptios diram ab Arianis persecutionem passos, quod ætate Marci Summi Pontificis, anno scilicet 336., imperante adhuc Constantino, profecto non contigit. His addes Athanasium eo anno jam exulem in Galliis, scribere non potuisse ab Urbe Ale-

xandria ad Marcum Romanum Pontificem; ac deum in supposita Marci epistola 70, recenseri Canones Nicænos, quum Codex Alexandrinus a D. Cyrillo missus ad Africanos Antistites, viginti solummodo contineat,

[35] Exemplar etiam Ephesinæ Synodi missum ad Anastasium, quo fundamento affirmet, plane non video. Porro id certum est apud omnes Patriarchales Ecclesias servari consuevisse accuratissima Conciliorum Exemplaria, atque ad ea in diffi illimis questionibus Episcopos recurrere consuevisse,

Joan.  
Laun.  
Elog.

Si qua fides inscriptioni, quæ legitur in Bibliotheca Vaticana, antiquissima illic assertari manuscripta indubium est; monet enim inscriptio, libros, quibus prodigiosa isthæc Bibliotheca constat, a primis Ecclesiæ temporibus ad hodiernam usque ætatem collectos fuisse. Launojus tamen se accepisse refert ab inclyto *Holstein* Bibliothecæ Vaticanæ Præfecto, in illa amplissima librorum collectione nihil esse perantiquum, Romæ tunc fuisse anti-  
„qua nulla, media dubia, nova tota; Quod tamen nullam meretur fidem, præsertim quum ejusmodi Bibliotheca ex optimarum Europæ Bibliothecarum reliquiis, ac immensa manuscriptorum undique collectorum copia, a longissimo jam tempore augeatur, atque amplifietur.

Qualiacunque tamen ea sint, Hilarius Papa, teste Anastasio, ex more illustrium Ecclesiarum, quibus propriæ erant Bibliothecæ, ad servanda una cum Sanctis Bibliis Conciliorum acta, duas in Fonte Baptismali Sancti Johannis Lateranensis Bibliothecas construxerat.  
„Ecclesiarum Bibliothecis frui, inquit D. Hieronymus. Hinc *Sacræ* dictæ sunt istiusmodi Bibliothecæ in actis Concilii Nicæni secundi, quæ Imperator Constantinus, ejusque Mater Irene ad Adrianum Papam misere.

Postea quam Ecclesiæ Romanæ libri ex Laterano, ubi dudum mansere, in Vaticanum translati sunt, eorum numerus industria, ac munificentia Summorum Pontificum Nicolai

V., & Sixti IV., magnopere excrevit. Sequenti sæculo Sixtus V. extruxit, sacravitque amplissimæ hujus Bibliothecæ ædificium, cui præclarissimam junxit Typographiam, ut recentes, & accuratiores Scripturæ Sanctæ, & Ecclesiæ Patrum Editiones perficerentur. Verum magnificentissimus iste apparatus parum omnino profuit, quum pleræque editiones Romanæ non omnium, quæ hodie extant, pulcherrimæ sint, & emendatissimæ,

*D. Le Fevre* in epistola ad Frontonem Ducem, loquens de Romana Divi Ambrosii editione, affirmat, si omnia ejus menda notare vellet, infamiam ei potius, quam laudem illatum iri. „ Quamobrem ( inquit ) hac in re „ stylum compressi.

Prudentem etiam Virum decet ex Editionibus Patrum eas potius deligere, quæ cum emendatissimæ, tum etiam Scholiis, atque annotationibus aptis, eruditisque illustratæ sunt; præterquam quod enim ejusmodi annotationes lucem præbent extricandis compluribus nodis, quibus insueti, ac parum exercitati Lectores diutius detineri possent, amplissimam præterea omnigenæ eruditionis messem nullo colligendam labore exhibent, qua suaviter ad hæc studia, difficillima cæteroquin, spinosaque alliciunt, & summa cum voluptate perducunt. Caute tamen, consulteque deligendi sunt annotationum Scriptores; tam enim acutis, tamque fastidiosis sunt naribus hoc in capite

capite hodierni literarum Cultores, ut nec illos quidem, qui ingenio, & eruditione plurimum possunt, ad solvenda dubia idoneos existiment, quod statutos prudenti iudicio limites plerumque excedant.

Nihil tamen metuendum iis, qui generatim probata apud omnes virtutis Scriptoribus fidunt. Hujus generis sunt *Billy*, *Sirmundus*, *Peta-vius*, *Garnerius*, *Menardus*, *Dacherius*, *Ma-billonius*, *Baluzius*, *Guffanville*, &c., qui illustrandis Ecclesiæ Patribus naviter, feliciterque adlaborarunt.

Novatores quoque optimis annotationibus ( si errores excipias, ac prævias opiniones ) Græcos, Latinoque Patres locupletarunt: iis prudentes Viri, & pii ad veritatis investigationem uti possunt; veritas quippe non a tuis duntaxat defensoribus, verum etiam ab infensissimis hostibus splendorem accipit, Deo sic jubente, ut quod hinc afferunt detrimentum, inde quodammodo sarciant, ac demum veritas parva victoria triumphum agat.

Sanum hisce de rebus iudicium docebunt tempus, & usus; in utriusque autem locum, sufficere possumus historiæ literariæ lectionem, selectissimarum etiam Bibliothecarum, atque doctissimorum Hominum iis præfectorum consuetudinem, qui illarum veluti spiritus, parati semper esse debent, ut exposcentibus rationem reddant. Neque iis satis est Fruditorum linguas scire, omnigenam eruditionem callere, suisque

fulsque vigiliis innumeros nosse Auctores, & libros; verum etiam in alios eruditionem, quam ex Antiquis tenent, velut publici fontes munifice effundant oportet.

Codex Theodosianus, qui Præfectorum Bibliothecæ munia aptissime exhibet, principio ponit, ut cum Viris eruditis consuetudinem habeant, iisque consilia sua, & peculiaria inventa communicent. *D. Dupuy*, qui Regiam tractabat Bibliothecam, ætatis suæ nemini secundus, hac laude præcipue donatus fuit, ipsius domum cunctis literarum studiosis patuisse, iis solummodo exceptis, quorum puerile ingenium, corruptique mores scientiæ dignitati non respondebant. Etenim illud in primis cavendum, ut musas religio, bonique mores comitentur.

Apud cultiores Nationes Bibliothecæ Præfectura piissimis, præstantissimisque Viris quavis ætate commissa fuit. Apud Hebræos hoc officio fungebantur Sacerdotes. Idem munus obivit Alexandriæ inclytissimus Demetrius Phalereus LXX. Græcorum temporibus. Romæ, antequam publicæ haberentur Bibliothecæ, Ædiles archivaria curabant: ac Julius Cæsar Varroni Romanorum sapientissimo, piissimoque mandavit, ut Codices manuscriptos colligeret, qui multarum Imperii Bibliothecarum prima fuerunt initia.

Qui Vaticanæ Bibliothecæ præerat, Cancellarii nomine olim insigniebatur. In celeberrimis

*Lex. 2.  
de stud.  
liberal.  
Urb.  
Rom.*

*Henr.  
Vales.  
Elog.  
Petr.  
Pur.*

*Dan.  
Georg.  
Morkhof.  
Poly-  
hist.*

*Remar.  
de Acad.  
Paris.  
Cap. 6.*

ribus Ecclesiis hoc officium primis Capitulorum gradibus commendari solebat. In Parisiensi autem Ecclesia Cancellarius Scholarum, atque librorum Præfectus erat; quum enim hæc duo arctissime sibi cohæreant, consentaneum videbatur, ut eodem in loco, atque sub unius Viri regimine collocarentur.

Nam si primam Scholarum, atque Academiæ originem indagare velimus, ex Bibliothecis repetendam esse comperiemus; quum in eas nempe convenirent studii causa literarum cultores, de iis, quæ occurrebant difficultatibus, inter se colloqui cœperunt. Qui autem cæteris doctrina præstabant, audientiam sibi facientes, aliis quam citissime prælectiones tradiderunt, & normam. Quum vero temporis successu Auditorum numerus augetur, Gymnasia ad Bibliothecarum levamen constructa fuere. Ægyptiorum Reges Bibliothecis suis junxerunt Academias, in quibus sapientes Viros alerent, qui tanquam juvenum parentes haberentur, atque Imperii luminaria.

Utinam quot sunt hodierna ætate ad scientias omnes, atque artes liberales perdiscendas Academiæ, tot essent in Galliis ad cujuslibet facultatis commodum Bibliothecæ. Nam cuncta scientiarum volumina in unum locum congregare amplum nimis est, arduum, ac veridifficile: atque incepta ejusmodi nunquam fere perficiuntur; libri etiam diu permixti, confusique



Ætque jacent, propterea quod Bibliorum  
Præfeti omnes Auctores satis persectos ha-  
bere nequeant, ut in eum ordinem adducant,  
quò studiosi Lectores allicere, atque juvare  
possint.

**F I N I S**  
**SECUNDÆ PARTIS.**



**DE**

DE OPTIMA  
LEGENDORUM ECCLESIAE PATRUM  
METHODO.

PARS TERTIA

De ordine, ac methodo, qua  
Patres Ecclesiae magno  
cum fructu legi  
possunt.

CAPUT I.

*De ordine in lectione Patrum  
servando.*



Maximam, eamque fere communem  
tam modici in lectione Patrum  
progressus causam esse crediderim  
legendium incuriam, qui eorum  
opera, ut in manus veniunt, nullo  
rerum ordine servato, nulloque habito delectu  
pervolvunt. Num enim Pater Theologum  
agat, an Philosophum; disciplinæ, an scrip-  
turæ caput exponat; auditor ne sit, an ma-  
gister; num accuset, an defendat; Cathecume-  
nos ne instruat, an Hæreticos urgeat; hoc flo-  
ruerit,

fuerit, an illo sæculo, parvi omnino pendunt: Ecclesiæ Pater dixit, satis esse creditur.

Quantum reprehensione digna hæc incuria sit, nemo non videt; veruntamen ad eam plerique inconsulto labuntur, adeo ut omne vitæ curriculum conficiant progressionis suæ originem, ac terminum, quove impetu ferantur, omnino ignorantes. Equidem colligere se se, atque in viam redire potest, qui diu, multumque erravit; verum perraro illud contingit, præsertim quum ea ætate fieri deberet, quæ mutationes huiusmodi ægre admodum patitur, sive quod prava consuetudo altas egerit radices, sive quod fallacissima eruditionis opinio plerumque senum iudicia corumpat, omnemque relapsiendi aditum intercludat.

Hinc liquido patet, quanto ad id studio incumbendum sit, ut mature subeamus necessario huic oneri certum in studiis ordinem tenendi, quo facilior ad scientiarum assentionem, & planior via reddatur. „ Illud a me  
„ accipiatis volo ( inquit Augustinus ) si quis  
„ temere, ac sine ordine disciplinarum, in  
„ rerum cognitionem audet irruere, pro studio illum curiosum, pro docto credulum,  
„ pro cauto incredulum fieri.

Qui uberem variarum cognitionum copiam, nullo digestam ordine comparavit, ubi primum eas proferendi se præbeat occasio, quum illæ certatim erumpere nitantur, aliæ alias com-  
primunt,

*De ord.  
lib. 2.  
Cap. 11.*

primunt, detinentque; vel aperto perinde ac torrentes itinere, loquentem per omnium ora traducunt, eo turpius, quo evidentius ostendunt in ejus potestate non esse, quæ memoriæ mandavit.

Præstat longe perpauca scire, eaque optimo delectu, & ordine, quæ nobis in promptu sint, quam plura incomposita, quæ popularis instar turbæ seditiosæ, ac tumultuantis sine capite, omnique jugo solutæ, menti nostræ infideant. „ Omnia ( inquit Augustinus ) quanto magis „ moderata, & speciola ordinata sunt, tanto „ magis utique bona sunt „. Neque enim in rerum multitudine, sed in ordine, & methodo, qua positæ sunt, earum præstantiam collocat Augustinus.

Plerique Ecclesiæ Patres, qui in edenda doctrina nullum fere ordinem servant, res ut eis in mentem veniunt, literis tradunt. Atque etiamnum Græci veterum consuetudinum præcæteris tenacissimi in rebus Theologicis valde confusi videntur, & obscuri, quia verborum delectui, accuratæque ratiocinationi, ut in Scholis fieri solet, nequaquam adhibent operam.

Nullum in libris *Stromatum* modum tenet Divus Clemens Alexandrinus. Origenes quidem in *Periarchon* Theologiam ad suprema quædam capita revocare conatur, atque Tertulliani liber *de Præscriptionibus* proprio non caret ordine; plerunque tamen Ecclesiæ Patres, fluviorum adinstar; quibus certus non est

est alveus, proclivia quælibet loca inundant, alluuntque.

Divus Augustinus, quum præ cæteris quamdam adhibuerit methodum, non lento tamen, & æquo gradu ubique incedit; quam ob causam, inquit celeberrimus quidam Scriptor, ab „ illo cordis potius, sive charitatis, quam men-  
„ tis ordinem servatum; quippe non tam insti-  
„ tuendis, quam inflammandis auditoribus stu-  
„ debat; qui rerum ordo in eo præcipue versa-  
„ tur, ut ad ea omnia sermonem convertat,  
„ quæ ad finem referri possunt, ut eundem per-  
„ petuo indicet, atque commonstret.

Præterea Patrum opera tot numero sunt, ut sine gravi, diuturnaue lectione progressus in illis fieri omnino nequeat. Quare quendam necessario adhibendum esse ordinem, magis, magisque monstratur; quippe qui unanimi prudentum, sapientumque Virorum judicio legendis libris via est omnium brevissima. „ Omnia enim breviora reddit ordo, & ra-  
„ tio, & modus, „ ait in suis *Institutionibus* Quintilianus.

Duplex distinguendus est ordo: universalis unus, singularis alter. Prior in legendis Auctori- bus ætatem, vel dignitatem; posterior, pro variis argumentis, varios Auctoris Tractatus persequitur; sæpe in uno, eodemque Patre majorem fortasse, quam in pluribus diversitatem comperies, nec sane quinque, aut sex spissa volumina sine intermissione versari debent, propterea quod unius sint, ejusdemque Aucto-

ris opus, si de multis rebus omnino diffitis verba faciat.

Eandem ubique vim, & efficaciam habet Augustinus; quia tamen pro variis, quicum agebat, hominum conditionibus, tot formas commutare coactus fuit, atque nunc Theologum egit, nunc Philosophum; modo Oratorem, modo Grammaticum; hic Interpreterem, illic elementorum Fidei, vel controversiarum Doctorem; eam ob rem, qui nulla adhibita distinctione (uti mos erat, antequam Monachi Benedictini opera Divi Augustini vulgarent) illius monumenta legere vellet, operam profecto perdere censeretur. Eruditissimi illi Monachi, quum animadverterent id moris invaluisse, ut nullo habito delectu Patrum opera ab initio ad finem usque legerentur, in suis Divi Augustini Editionibus viam hanc explanarunt, quæ aspera, & difficillima erat, multisque, ut ita dicam, transversis divisa.

*Biblioth.  
lib. 4.*

Qua in re hujusce Patris mentem unice secuti sunt. Vult enim ille, teste Sixto Senensi, ut in suorum operum lectione argumentorum varietatis, ac ordinis temporum, quibus scripta fuere, ratio servetur: „ Neque  
„ illud (inquit Senensis) hoc loco prætermittendum arbitror, quod ipse Augustinus in  
„ lectione Opusculorum suorum voluit a lectoribus observari, nempe varietatem, & ordinem quadruplicem temporum, quibus ea  
„ scribi contigit.

Utinam

Utinam illustriores Scriptores opera sua legendi methodum tradidissent ipsimet, vel sapientissimi saltem Critici eam suppeditassent; quo fere modo Galenus suos disposuit libros, vel Jurisconsulti Codicem, & Digesta, operum Paragraphorum, quibus & lectionem juvant, & ordinem, ac rerum connexionem altius menti infigunt.

*Galen. de libr. propr. liber.*

*Id. de ordine libr. suor. ad Eusebianum.*

Consueverant etiam Antiqui vel initio, vel ad calcem operum suorum notas apponere, ac qualia essent, & quot numero indicare; quæ res Lectorem ordinis amantem summo opere delectat: „ est enim hæc quoque studii, dios non injucunda cognitio „ inquit Plinius junior in Epistola, in qua petenti Amico de Plinii senioris Avunculi sui operibus rationem reddit.

*David Hoe/ch. ad hist. Bizant.*

Constantinus Porphyrogenetes, qui immensam librorum copiam coegerat, cavit in primis, ut Auctores in classes tribueret, quo lector præclarissima illa ordinatione, rerum intelligentiam maturius acquirere posset.



## CAPUT II.

*Varia legendorum Ecclesiæ Patrum  
methodi proponuntur.*

*Pet. de  
fur.  
Poet.*

**Q**Uædam reperire est lectissima, præstantissimaque ingenia, quæ rebus inventis facile non egeant, ut vel scientiarum lumine mentem illustrent, vel eam longa exercitatione confirmant. Ejusmodi ingenia Plato vi quadam divina concitata vocat, quæ res portentosas sine arte, ac sine meditatione concipiunt, producuntque. Videntur id genus homines in lucem prodiiſſe omnibus perfectè rebus, nemine docente, instructi, quum oraculis, sive magistris opus non habeant, ut sapientes evadant.

Galenus vir sane dignus, qui in eorum censum referatur, se solo omnia inventa sua excogitasse testatur: quod quidem incredibile non est, si a vero non abludit quorundam Philosophorum opinio, qui omnes cognitiones nostras nonnisi reminiscencias esse putant, atque scientias, & artes nihil aliud censent, quam rerum a spiritibus memoriæ inditarum species, & imagines, quibus eadem res ab hominibus perditendæ vivide exhibentur, ac sedula meditatione reapse discuntur.

Hac de re non convenit Aristoteles, e contrario scientias non cum hominibus natas, sed

uno



uno studio comparatas existimans. Consuetam saltem hanc esse viam negari nequit ; non enim omnibus sufficit ad consequendam veritatem, coercitis cupiditatibus, universalem rationem consulere, quam cuncta sequuntur ingenia, & a qua rationis usum accipiunt.

Theologum sola non facit meditatio, etiamsi plurimum juvet, atque præstanti, sublimique opus sit ingenio, ut ad Divinitatis contemplationem se se erigere valeat. Hanc ob causam, ait Plato, ad divinas multo majora, quam ad cæteras scientias ingenia postulari, quod in illis se ipse homo superare debeat.

In Theologia Christiana meditationi Verbi Dei necessario jungenda est lectio Patrum Ecclesiæ. Quum enim magistri sint, vel, ut ait Augustinus, fidissimi *Æternæ Sapientiæ monitores*, Religionis capita illustrarunt, eorumque conspectoria pro nascentium difficultatum, vel grassantium Hæreseon occasione planissime explicuerunt.

Ast, ut verum fatear, veterum horumce Doctorem lumina parum omnino proderunt, nisi illorum doctrina in ordinem menti accommodum adducatur ; præcipue quum res singillatim, accurateque expendendæ sunt. Quamobrem dubitare non licet, an aliquis in lectione Patrum, sed quis servandus sit ordo, ac in quo sistat.

Nonnulli sæculorum, ac temporum, quibus floruerunt, ordinem præferunt, quod methodum hanc ad colligendas accurate, & pro tem-

porum serie Traditiones Ecclesiæ, aptissimam existiment.

Alii censent, nulla temporum habita ratione, primum Græcos Patres legendos, dein Latinos, quia illorum sermonis veneres, ac eloquentia ad istorum lectionem, qui magis quidem docte, sed minus ornate scribunt, sensim sine sensu præparant. Alii contra petendum a Latinis Patribus initium ducunt, ac ponendum in Græcis finem; quod experientia teste, qui Græco lepori assueverant, ad Latinorum Patrum, a quibus tamen multo plura discere potuissent, simplicitatem reverti nunquam potuere.

Quamobrem nonnullis magis probatur diurni temporis partitio Latinos inter, & Græcos; quo utrorumque amor seruetur, atque in ambabus linguis utilissima fiat exercitatio.

Qui versantur in hac sententia, haudquam necesse affirmant, ut omnes Græci, Latinique Patres volvantur, sed satis esse, ut præstantiores ex iis deliganur; ita tamen, ut ad alios, ubi se præbeat occasio, recurratur. Quum hæc via omnibus sit fere frequentior, recta ratio postulat, ut antequam amplior alia proponatur, aptiorem, qui in ea teneri potest, procedendi modum in medium afferamus.

Principio ponendum, eandem fere esse librorum, quam amicorum rationem, maximam scilicet in illorum delectu adhibendam diligentiam, ne ullus deinceps pœnitentiæ locus sublit.

subsit. Qui enim cæco quodam impetu fertur, ubi vel levissima se offerat difficultas, pergravi hærebit fastidio, vel maxime quod in suis conjecturis errasse pudebit. Quod sane multorum exemplo docemur, qui, quum ad legendos Patres ardenti studio, inconsideratoque se se contulissent, eadem paullo post, quæcœperant, levitate ab opere cessarunt, atque ad contentissimos quosdam Scriptores se converterunt, e quibus ad explendam errantis ingenii libidinem inania peterent argumenta.

Deinde quemadmodum a lectione librorum, qui vires nostras superant, abstinere debemus, ne pœnitendi causam postmodum habeamus: ita cavendum a magnificis, ut ita dicam, seu potius fucatis lectionibus, quæ ingenii nostri facultati, atque amplitudini non satisfaciunt. Methodum hanc acerbe carpit Augustinus: „ non valde curo (inquit) superborum, im-  
„ peritorumque judicia, qui similiter in le-  
„ gendos libros, atque in salutandos homines  
„ irruunt: non enim cogitant quales ipsi, sed  
„ qualibus induti vestibus sint, & quantæ  
„ pompa rerum, fortunæque præfulgeant.

Eam ob rem in delectu Patrum accurate fecernentur, qui operum suorum amplitudine, magnitudineque altissima studia juvare possunt, ab iis, qui, quum ejusdem conditionis non sint, parem afferre nequeunt utilitatem. Pluris faciendi sunt Patres primæ ætatis; nemo tamen unus est inter eos Scriptor tam longo

annorum decursu, qui Virum paullo laboriosum totum detinere queat; nam neque Divus Clemens, nec Divus Ignatius, nec Polycarpus, nec Divus Justinus, nec Sanctus Irenæus, nec Sanctus Clemens Alexandrinus, nec Origenes, ut est hodiernis temporibus (1), nec Tertullianus, nec Divus Cyprianus quisque solo sufficit, ut amplum diuturnæ, validæque meditationi præbeat argumentum. Legi possunt, si lubet, vel, ut melius dicam, legi debent omnes, sed reapse hi Patres aliis majoris subsellii, licet posterioribus, comites adhibendi potius sunt in via, quam duces, & capita.

Multi Tertulliano, ac Divo Cypriano se totos addicunt, neque eos e manibus sibi eripi paterentur. Consulant ipsi sibi, parvi refert. Procul tamen dubio quisquis tam arctis limitibus se se circumscribit, in doctrina Patrum Ecclesiæ amplissima parum omnino proficiet. Non deest Tertulliano doctrina, immo etiam, Morum, ac Jurisprudentiæ, quibus Periti commode uti possunt, præceptis abundat. Cyprianus eleganter, atque etiam ingeniose, acuteque scribit: at quum in disciplinam magis Ecclesiasticam hi Doctores, quam in altiore

incu-

[1] Post Scriptoris nostri ætatem, aliam omnino induit formam Origenes, opera, & studio Benedictinorum, qui eum nuperrime ediderunt. Nihilo tamen minus

ob crebros Origenis errores, nimiumque frequentes allegorias, res alæ plena foret præcipuum illius lectioni locum præbere.

Incubuerint Theologiam, de illis tantum, non vero de aliis rebus, non secus ac cæteri ejusdem primæ ætatis Scriptores consulendi sunt.

Enimvero quarto duntaxat Ecclesiæ sæculo aperiri cœperunt uberrimi Theologiæ fontes, e quibus quidquid luminis habent, & eruditionis, haurire posteriorum temporum Doctores.

Divus Athanasius omnium facile princeps, de altissima Theologia apposite, eruditissimeque differens, exemplum cæteris dedit, qui post eum ineffabilis Trinitatis mysterium pro viribus explicare studuerunt.

Eodem sæculo Sancti Basilus, Gregorius Nyssenus, Gregorius Nazianzenus cæteris omnibus præstiterunt. Basilii doctrina recondita est, ac prorsus divina. Gregorius Nyssenus una simul Oratoris, Philosophi, atque Theologi munere fungitur. Gregorius Nazianzenus, quum summo polleat, præstantissimoque ingenio in exponendis Fidei mysteriis, dicendi venter, atque lepores unacum argumenti firmitate, & excellentia aptissime conjungit.

Eodem labente sæculo in Morum disciplina excelluit Divus Chrysostomus, ac licet altiores Theologiæ quæstiones pertractare aggressus non sit, ubi tamen se præbet occasio, eruditorum more difficultatem expedit, acuteque potius præterit, quam persequatur molestius. Eodem ævo Cyrillus Alexandrinus Metaphysicam scientiam adprime doctus, cum iis, qui subtilitatem amant, subtilius disputat. Theodoretus

doretus multa scripsit utilius; cum enim locupletiori instructus erat eruditione, tum etiam majori in scribendo perspicuitate, aptiorique ordine, & methodo utebatur.

Quod ad Patres Latinos attinet, si uberiores solummodo fontes recentere velimus, præstat in omnibus Divus Hieronymus, sive Traditionem Ecclesiæ quæras, sive Scripturæ Sanctæ explanationem, quæ duo habentur maxima totius Christianæ Religionis fundamenta.

Ejusdem sæculi Doctor Ambrosius pressis, acutisque sententiis redundat. Prophetarum more subobscurè dislerit, ac fere omnia summa rerum Capita stabilis, quæ ab Augustino fuscè tractata reperies.

Divus Augustinus Ambrosium proxime consecutus, amplissimo est, ac mirum in modum acuto ingenio. Ejus feracitas finem non habet; rationibus, & argumentis plurimum valet, in disputando accerrimus, in Christianæ Religionis dogmatis versatissimus, ac mirabili in omnibus, quæ tractat, gratia ornatissimus: uno verbo, Augustinus Theologorum in Occidente parens est, atque magister, cunctorumque, qui eum sequuntur, columnen, decus, & ornamentum.

Sexto se prodit sæculo Divus Gregorius Papa, sapientis instar Pastoris, qui doctrinam Decessorum, ex qua optimos fructus percepit, ovibus suis probe digestam apponit. Ejus scientia summam pietatem continet, absque nimia sublimitate; atque, quod ad mores spectat,

spectat, dignus profecto censeri debet, qui cæteris plerisque Ecclesiæ Doctoribus anteponatur.

Ubi maximos hosce Theologos inspexeris, expenderisque, quænam tibi cum præstantissimis illis Viris esse possit comparatio in eruditionis, ac ingenii facultate, unius, duorum, vel plurium, pro modulo tuæ ad studium, atque laborem propensionis, delectum facere poteris.

Neminem latet, eos, qui Ecclesiæ utiliter inservire conati sunt, Chrysostomum inter Græcos, Augustinum inter Latinos unice delegisse. Habent enim inter se maximam, si non in omnibus doctrinæ capitibus, in vulgi saltem existimatione similitudinem, quum Chrysostomus Græcorum Augustinus, & Augustinus Latinorum Chrysostomus semper habitus fuerit.

„ Deus Optimus Maximus ( ut recens ait <sup>Herm.</sup> <sup>vic de</sup> <sup>S. Chry-</sup> <sup>sostr.</sup>   
„ Historicus ) duo maxima luminaria, quæ   
„ ab Apostolorum temporibus Occidentem,   
„ atque Orientem illustrarunt, Chrysostomum,   
„ & Augustinum eodem fere tempore excitavit.   
„ Illuxerant jam in Oriente Athanasius,   
„ Basilus, Gregorius Nazianzenus; in Occidente autem Cyprianus, Hilarius, & Ambrosius, sed arctioribus terminis, sive nominis sui fama, sive librorum copia, sive sectatorum numero circumscripti erant. Contra vero voluisse videtur totum Theologiæ   
„ Thesaurum, atque clariorem, perfectiorem-   
„ que Sacrarum Scripturarum intelligentiam   
unacum

„ unacum moralibus cohortationibus, iisque  
„ disertissimis, vehementibus, aptissimisque  
„ ad perstringendos animos ad puritatem di-  
„ sciplinæ, ac morum reformationem in am-  
„ plissimis Divi Chrysostomi voluminibus :  
„ Latinæ vero, Apostolicæque Theologiæ di-  
„ vitias omnes, unaque Romanam, & Eccle-  
„ siasticam eloquentiam in multis, sublimi-  
„ busque Divi Augustini operibus contineri,  
„ mirumque prorsus in modum exponi. Atque,  
„ ut manifestum fieret, divino magis consilio,  
„ altioribusque multo de causis, quam ob il-  
„ lorum operum multitudinē, atque præstan-  
„ tiam hæc contigisse, tantam duobus hisce  
„ præstantissimis Ecclesiæ Doctoribus existi-  
„ mationem comparavit, ut inter Græcos,  
„ qui post Chrysostomum floruerunt, Isidorus  
„ Pelusiota, Divus Nilus, Theodoretus, Jo-  
„ hannes Damascenus illius discipuli fuerint,  
„ & sectatores; quemadmodum inter Lati-  
„ nos, Patres omnes, Maximique Romani  
„ Pontifices summæ semper laudi duxerunt  
„ Augustinum ducem habere, atque ma-  
„ gistrum.

Fatendum tamen cum istius comparationis  
Auctore plura esse apud Augustinum princi-  
pia, magisque connexa argumenta, quam apud  
Divum Chrysostomum; Divum autem Chry-  
sostomum in exponenda Morum doctrina,  
atque Christianis veritatibus Augustino præ-  
stare.



Si duobus hisce Græcæ, & Latinæ Ecclesiæ Patribus addatur Hieronymus, satis erit fortasse, quo ex Veterum mente idoneus informetur Theologus.

### C A P U T I I I.

*Omnes Patrum Tractatus ad quatuor suprema Capita referri possunt, nempe*  
*Scripturam Sacram, Dogmata*  
*Fidei, Christianam Morum*  
*Doctrinam, atque Discipli-*  
*nam Ecclesiæ.*

**L**Audatur summo opere illorum sobrietas, qui paucis Ecclesiæ Patribus se se addicunt; non enim fastidio quodam, sed recta ratione sobrii esse putantur, atque, ut ingenio eo plus valeant, quo arctioribus, suæque mentis facultati magis accommodatis limitibus concluduntur.

Unius, ut ajunt, *libri Vir* magnam semper habuit existimationem, auctoritatemque. Et sane, quum humanum ingenium non valde late pateat, multo aptius erit ad inspiciendas res, easque comprehendendas, si certos intra fines contineatur, quam si per immensa spatia licenter vagetur. Utcunque vero juvet uni hærere Auctori, nunquam tamen, si ea ratione scripserit, qua *c. g.* Augustinus, omni sui parte

parte probe intelligi poterit, nisi absolutam Sanctorum Patrum, qui præcessere, & consecuti sunt, notitiam habeamus; sola quippe Augustini collatione cum aliorum doctrina per maxima Theologiæ Capita, singularis ejus facultas in altissimis argumentis funditus pertractandis dignoscetur.

Quæ de Augustino, eadem potiori jure de tota generatim Ecclesiastica scientia intelligenda veniunt; quum enim in plurimos Scriptores ramos diffundat, plerique saltem consulantur oportet; paucissima quippe ab uno dicta sunt, quæ non alii dixerint, alio saltem modo, quæve illustrandis aliorum operibus non profint.

Immo vero quorundam Patrum intelligentia ab iis, qui præcesserunt, quodammodo pendet: Tertullianum antea legerit oportet, qui Cypriani sensa perquirat; hic enim Tertullianus emendatus quodammodo dici potest; eademque tenenda methodus ad illos, quos Decessorum suorum doctrina usos fuisse compertum est.

Divus Chrysostomus, & Divus Hieronymus Origeni perinde, ac Sanctus Isidorus, Sanctus Nilus, & Theodoretus Divo Chrysostomo plurimum debent. Augustinus a Tertulliano, a Sanctis Cypriano, Hieronymo, Ambrosio; quemadmodum Sancti Gregorius Papa, Prosper, Fulgentius, Anselmus, atque Bernardus a Divo Augustino plurimum acceperunt.

Verum

Verum he ulla in tanta Patrum multitudi-  
ne, qui tam variis modis scripserunt, oriatur  
confusio, illorum opera ad quandam unitatis  
speciem referenda sunt, cunctaque simul æque  
habenda, ac si unum corpus varias in partes  
tributum componerent: vel potius æque ac  
unum opus, cujus diversi tractatus ad quatuor  
Capita reduci possunt, nempe Interpretationem  
Scripturarum, Dogmata Fidei, Christianam Mo-  
rum Doctrinam, ac Disciplinam Ecclesiæ.

Eo cæteris præstat ordo istiusmodi, quod  
non in unius tantum Patris, verum etiam  
in multorum lectione servari potest: quum  
nullus ferme sit, saltem inter præstantiores,  
qui de omnibus fere numeratis Capitibus non  
differuerit.

Difficillimum fortasse quispiam crediderit  
res, quæ apud Patres tantopere confusæ vi-  
dentur, ex ordine collocare. Verum non illud  
proponimus, ut singula scrupulosissime exami-  
nentur, minimaque etiam Patrum de quaque  
re testimonia expendantur; sed solum, ut ad  
insigniores de rebus majoris momenti tracta-  
tus ex ordine recurratur, ita ut lectori in-  
cumbat cura notandi ea, quæ animadversione  
digna deprehendit, dum præcipuos studiorum  
suorum Auctores pervolvit. Sic enim quotidie  
usu venit, ut, qui libros Physiologiæ, Morum,  
& Historiæ legit, aliarum sæpe disciplinarum  
quæstiones ex industria non quæsitæ offendar,  
quibus obiter uti potest; qua fere ratione  
studiosus viator in perficiendo itinere, quæ  
hinc-

hinc inde in campis notatu digna sunt, observat, quin a recto unquam tramite deflectat.

Parum accommoda fortasse videbitur hæc methodus, quod certo non figat unum ex quatuor hisce Capitibus, unde Patrum lectio inchoari debeat. Verum hac in re videat quisque quanta sit ingenii sui vis, & cujus rei opus habeat; ac demum inutile non erit, eundem, quem hic tenemus, ordinem sequi, quin tamen illo, tanquam communi lege quispiam adstrictus censeatur.

Rectæ rationi consentaneum est ab interpretatione Scripturæ ordiri; in ea quippe versantur studia Ecclesiastica: inde ad Dogmata progredi, quæ Scripturæ, ac Traditionibus Patrum auctoritate firmatis nituntur. Ad doctrinam Morum quod attinet, certo collocari ordine nequit, nullo enim non tempore ad eam incumbendum. Non abs re tamen fuerit, si Dogmatum studia consequatur, quorum pars quædam merito, & jure dici potest. Disciplinæ autem Ecclesiasticæ studium cæteris omnibus postponendum est; quum nempe eam intelligentiam jam sibi Lector paraverit, quæ se solo innumeras difficultates, quibus istud eruditionis genus plusquam satis abundat, superare valeat.

## CAPUT IV.

*De lectione Patrum Ecclesiæ in Sacram  
Scripturam.*

UNANIMIS Patrum sententia est , errorem ab eo vitari non posse , qui propriam rationem ducem sequitur , in Sacræ prætertim Scripturæ interpretatione . „ Memini ( inquit „ Abbas Josephus apud Cassianum ) quum me „ adhuc adhærere consortio fratrum ætas ju- „ nior hortaretur , hujusmodi nobis intelli- „ gentiam vel in moralibus disciplinis , vel „ in Scripturis Sacris frequenter insertam , ut „ nihil ea verius , nihilque rationabilius cre- „ deremus . Sed quum in unum convenientes „ sententias nostras promere cœpissimus , quæ- „ dam communi examinatione discussa , pri- „ mum ab altero falsa , ac noxia notabantur , „ mox deinde ut perniciofa communi pronun- „ ciata judicio damnabantur .

Quamobrem nefas est ita sibi fidere , ut aliorum deferatur , vel negligatur consilium . Ecquis enim vero hanc sibi licentiam impune usurpare queat , quum Divus Paulus , qui & vas electionis , & magnus ille Apostolus , in quo Servator ipsemet loquebatur , Jerusalem se venisse fateatur hac solum mente , ut cum aliis seorsim Apostolis conferret Evangelium , quod prædicabat in gentibus , quodque a Deo

P

iplo

ipso per revelationem Jesu Christi acceperat?

Divus Clemens Romanus Pontifex in exponendis Scripturis, Patrum mentem sequendam esse docet. Divus Irenæus inquit, Sacras Literas ab Episcopis, atque Presbyteris, quos erudierunt Apostoli, perdiscendas. Tertullianus in *Scorpiaco* aperte pronuntiat, in Ecclesia solum Christi, atque ab illius Discipulis genuinum Scripturæ Sacræ sensum hauriri posse. Denique Augustinus eadem ratione, qua ab Ecclesiæ Patribus, explanandas a nobis Scripturas Sanctas affirmat.

Serm.  
de Verb.  
Dom.

Basilii, & Gregorius Nazianzenus, teste Ruffino, Sanctarum Scripturarum intelligentiam non ex propriæ mentis penu, sed ex Veterum Traditione promebant. Damasus Papa, quum nodis quibusdam in explanandis Scripturis detineretur, Divum Hieronymum consulere non erubescibat; Divus autem Hieronymus, quum nec ipse sibi fideret, eum sæpe mittebat ad veterum Doctorem Commentaria. Neminem latet, Divum Paulinum ad S. Augustinum confugere solitum, ac Divum Bernardum Scripturæ textui addictum, Patres tamen Ecclesiæ consulere nunquam destitisse.

Manifestum hac in re turpissimæ hallucinationis exemplum dederunt Hæretici, se ipsos prædicantes Verbi Dei Interpretes contra probatum, & constantem totius Ecclesiæ sensum: quum Patribus omni ætate spectatissimis mulierculas sufficiant, infantes, ac homines de trivio, & compitis, quorum facultas, & intelli-

telligentia in vaticino quodam furore, & pertinaci deliramento tota sistit. Utut enim effutiant, Scripturam se sola exponi, atque quod isthic obscurum est, alibi illustrari; clarum tamen ab obscuro secernere vulgus non valet. Itaque sibi ipsi relictus incertus, & dubius fluctuabit in omnibus: ubi enim nullum præsidium, neque consilium, ibi nulla firmitas, ac certitudo haberi potest.

Atque propterea, nec inter ipsos convenit sectarios de modo exponendi Scripturam. Alii ab Hebraicis, Græcisve fontibus repetendam censent; alii vero oculis, sensuque communi contenti sunt; nonnullis placet, sumenda solum in Scripturis perspicua, atque clario-  
ra, aliis e contrario frequentes hujus Libri difficultates ad Philosophiam, atque rationem revocantibus. Sunt etiam, qui non aliam ad Sacrarum Literarum expositionem, quam ad rerum naturæ explicationem, methodum probant; alii vero humanum Spiritum unum esse putant Judicem, qui verax sit verbum Dei interius, & spiritale; non autem Scripturam, *Literam*, ut ajunt, *mortuam*, infantibus, non vero adultis conscriptam.

Catholici autem Romani studiosissimi veritatis cultores, aliam prorsus ab elatis hujusmodi, & ad superbiam accommodatis hominum inventis ineunt viam in explanandis Scripturis, nimirum traditionem adeunt, atque unanimem Ecclesiæ consensum. Hac ratione ea solum amplectentes, vel respuentes, quæ

amplectitur , vel respuit Ecclesia , ab omni erroris periculo longissime abtunt : nisi dicere quispiam malit, nullum esse Fidei in religione Christiana certum principium , nullamque agendi normam , quod omni veri specie caret.

Quum de Patrum consensu agitur, unanimis , & constans illorum sententia intelligitur , qua sublata erroris immunes dici non debent . Quum omnes , vel plerique saltem uno ore , unaque voce loquuntur , tunc illis refragari summum nefas esset . (2) Quum vero , ut privati Doctores ex penu suo depromtas opiniones proferunt , iis acquiescere nemo tenetur ; immo etiam illos sequi aliquando non licet , sive humana erraverint imbecillitate , sive illorum opera Hæreticorum protervia corrupta fuerint , ut conqueruntur Pamphilus Martyr , Didymus , & Ruffinus de Origenis , ac Sancti Clementis Alexandrini operibus .

Eam ob causam antequam Patres Ecclesiæ legantur, consuli debet Auctor aliquis, qui hac de re scripserit , ut liber quintus , & sextus

*Bi-*

---

[2] Intellige nimirum, quum Sancti Patres exponunt Scripturas „ in rebus Fidei „ dei , & morum ad edificationem Doctrinæ pertinentium „ ut loquuntur Patres Tridentini sess. 4. Quod enim ad rem criticam attinet , ac erudi-

tionem, nefas profecto non esset recentiores Scripturæ Interpretes illis quandoque præponere ; quippe quum potiore præ antiquis in hac scientia operam , & studium collocariat . Vide caput V.



*Bibliotheca Sixti Senensis*, ubi scite, prudenterque notantur complures falsæ, vel perperam intellectæ Scripturarum Interpretationes in Patrum Scholiis, & Commentariis. Quod tamen doctissimus iste Criticus non eo animo fecit, ut antiquis Interpretibus notam, vel suspensionem inureret; sed ut auxiliarem manum studiosis præberet, qui quum ingenio, & intelligentia satis non valeant, in hisce rebus legendis vel errare possent ipsimet, vel aliis occasionem erroris præbere, ea, quæ legerunt, bona fide, & inconsiderate proferentes.

## CAPUT V.

*De Methodo, quam tenuere Patres in Sacrarum Scripturarum Interpretatione.*

**D**uplicem tenuere modum Ecclesiæ Patres in exponendis Scripturis, Historicum unum, Mysticum alterum. Primo modo litteralem, altero spiritalem explicant sensum. Spiritalis autem sensus pro varietate temporum, præteriti videlicet, præsentis, & futuri, in Allegoricum tribuitur, Tropologicum, & Anagogicum. Allegoricus enim figuras, & prædictiones spectat veteris Testamenti; Tropologicus Historiam, ac Scripturæ verba præsentium morum institutioni accommodat; Anagogicus

ad cœlestem, æternamque Beatitudinem, quæ post hanc vitam nos manet, mentem extollit.

Stylum allegoricum magni semper fecerunt, & faciunt etiamnum Orientales. LXX. Græcorum ætate, & sæculis consequentibus Judæi ad rituum Legis, Traditionum, atque allegoriarum investigationem omnem operam suam conferebant. Philo Judæus Interpres mere allegoricus, Hæsenos omnium primos fuisse existimat, qui allegoriis ad Sacrarum Scripturarum explanationem usi fuerint. Porphyrius auctorem facit Origenem: Christiani vero a Christo Servatore, & a Divo Paulo illarum usum repetunt.

Plura adducuntur exempla ex Novo Testamento petita, præsertim vero ubi Christus Dominus differens de Johanne Baptista, ut in eo Præcursoris Sanctissimi officium indicet, ait, Eliam venturum esse, immo jam advenisse. Illud etiam afferri solet Divi Pauli, qui in *Epistola ad Galatas* ea, quæ in Libro *Genesis* de duobus Abraham Filiis dicta sunt, duobus Testamentis Veteri, & Novo accommodat.

Tropologicum etiam a Servatore adhibitum fuisse asseverant, quum Ninivitarum Historiam, ac exemplum Reginæ Saba adduxit; quo Judæorum mores castigaret, eorumque incredulitatem redargueret; quemadmodum Divus Paulus ad emendandos Corinthiorum

mo-

mores exemplo utitur Hebræorum, qui perierunt in Deserto.

Denique sensum Anagogicum eorundem exemplo innixum ostendunt, Christi Domini in pluribus Evangelii locis, Divi autem Pauli, quum in *Epistola ad Hebræos*, quæ dicta sunt de Terra promissionis, cum futura, & cœlesti Patria confert, quam Sanctissimi Patriarchæ vehementer expetere nunquam cessarunt, & solícite expectabant, ut veram sui mansionem, æternæque tranquillitatis, & requietis sedem.

Cæterum nullus est Scripturæ locus, qui vel literali, vel alterutro ex mysticis sensu explanari non possit: neque desunt, quæ duobus, vel tribus, immo quandoque omnibus pateant sensibus. Exemplo sunt aquæ de quibus in Genesi: in primis enim ad literam, *Genes. x.* ut notat Eucherius, earum nomine aquæ naturales intelligi possunt; deinde tropologice aquæ afflictionum, & æumnatum; tertio allegorice aquæ Baptismatis; demum anagogice *Ezech. 36. Jerem. 2. Psal. 48.* Angeli, sive cœlestis Beatitudo.

Non convenit omnino hac de re Augustinum inter, & Eucherium; ab utroque etiam dissentire videtur Hieronymus. Verum reapse una est horum Doctorum mens, neque discrepant nisi in numerandis methodi partibus, quam tamen omnes perinde servant, quum D. Eucherius in quatuor, Divus autem Hieronymus in tria partiatur membra, quæ Divus Augustinus ad duo solum revocavit.

Divus Hieronymus Historici solum, Allegorici, & Anagogici meminit; Divus Augustinus Historici duntaxat, & Allegorici, quem rursus tribuit in Allegoricum proprium, in Tropologicum, & Anagogicum, quod ad eandem cum Hieronymo, & Eucherio licet alio modo expressam Sententiam conducit.

Quamvis Ecclesiæ Patres Sacræ Scripturæ Literam non neglexerint, spiritum tamen sæpius secuti sunt: tum enim excitandis Auditorum animis præcipue studebant, tum etiam consentaneum non erat iis temporibus Populos Critices, atque Grammatices quæstionibus detinere, quibus nec meliores, nec sapientiores fieri potuissent, quum plerique huic eruditionis generi parum apti viderentur.

In Scholis duntaxat, atque disputationibus hæc studia adhibebant, vel quum ostendendum foret, literam Allegorici sensus basim esse, ac fundamentum.

Hinc tria nobis operum genera in Sacram Scripturam reliquere Sancti Patres, scilicet Scholia, sive notas Sapientibus perutiles; Commentaria in eorum gratiam, qui rebus cælestibus, ac divinis magis addicti erant; ac demum Homilias, vel Sermones inconditis Populi auribus accommodatos.

Homiliæ dicebantur plerunque post Sacri Codicis lectionem, quem Episcopus, vel ejus jussu Presbyter per singulos versiculos explanabat, ut videre est apud Augustinum in *Evangelium Sancti Johannis*, & apud Divum Chry-

*Chrysoſtomum in Evangelium Sancti Matthæi,  
& Epistolæ Divi Pauli.*

Hilce vero Sermonibus aderant non modo Cathecumeni, Fideles, ac Pœnitentes; verum etiam Pagani, Judæi, & Hæretici, quos libenter excipiebant Pastores: experientia, quippe norant, complures eorum Concionibus motos ad veram fidem se se recepisse.

Atque hanc præcipue ob causam tanta deprehenditur in Homiliis Patrum diversitas: in omne enim latus circumagebant se se, ut variis Auditorum ingeniis, & conditionibus se accommodarent. Nunc altissimam petebant Theologiam, ac reconditissima Myſteria explicabant; modo præteribant silentio, vel subobscurè tantum perstringebant; plerunque tamen de morum doctrina, utpote communi cibo, atque necessario longius differebant.

Et sane præcipua Religionis Capita, antiqui Patres non nisi in explanationibus Scripturarum exponunt, ut ejusmodi operibus pacato, & vacuo animo lucubratæ eos aptius erudirent, qui Christianam veritatem perfecte consequi cupiebant.

Ad ætatem usque Diodori Tharsensis Episcopi, ejusque Auditoris Divi Chrysoſtomi, qui primum literali solum sensui incubuisse videntur, Patres Ecclesiæ, vel Christi Domini, & Apostolorum exemplo ducti, vel ingenii sui vi, sæque ætati morem gerentes, nihil sere proferebant, quod mysticis coloribus, atque significationibus non exornarent.

Quum

Quum enim alloquerentur Ethnicos, qui mysticis Poetarum fabellis assueverant, Hellenistas Platoniorum ideis imbutos, Christianos in Fide parum adhuc exercitatos, atque nutantes, ne vilesceret illorum oculis Christiana Religio, spiritali sensu Scripturam exponere cogeabantur. Quippe litera durior est se folia, atque spinosior, quam ut ejus ope in illorum animos se se insinuarent, atque apud eos Fidem nostram in existimationem adducerent.

Suam obtinet unaquæque consuetudo ætatem, & Imperium: ac quemadmodum iniquus foret, qui Recentioribus exprobraret, eos allegoricum stylum veteribus sacrum deseruisse; sic injuria, & immerito reprehenderentur Veteres, quod Religionem allegorice exposuerint, ut iis temporibus mos erat communi auctoritate firmatus.

Quoniam vero, ut æquum de antiquitate ex ejusdem antiquitatis monumentis judicium fiat, plus ei tribuendum non est, quam res, & veritas ipsa concedat, inficiari non possumus, in exponenda funditus Scripturæ Litera nonnihil necessariæ eruditionis antiquis Patribus desiderari. Ut enim Augustini exemplo utamur, indubitatum est, quantacunque polleter ingenii vi, plura ad tantum opus ei defuisse; indeque literalem Geneseos Interpretationem aggressus, propria se imperitia contrahi sensit. Quamobrem Divus Hieronymus hac in re æstimator æquissimus agebat, Mysticam præ  
li-

literali Divinæ Scripturæ explicationem, ludum esse puerilem.

Præter hæc varias exponendæ Scripturæ Methodos, extat alia, quæ Theologica dici potest, quod Scripturam ad Theologiæ formam, & Ecclesiæ Fidei sensum explanat. Elucet hic sensus Theologicus præsertim in Polemicis Patrum operibus, ac præ cæteris in Augustino contra Hæreticos disputante, & Fidei Ecclesiæ rationem reddente.

Iccirco ante Pelagianorum Hæresim veriti Patres, ne Populi salutem indiligenter consulerent, nisi satis aptas vires in humana libertate tuerentur; ea præsertim ætate Gentilibus proxima, ac recenter sædata Gnosticorum, & Manetis erroribus, qui fato cuncta tribuebant; eam, inquam, ob causam Scripturam, quotiescunque duplicem sensum habere posset, eo exponebant, qui ad firmandam contra ejusmodi errores libertatem magis conducere.

E contrario post exortam Pelagii Hæresim, quæ liberi arbitrii vires plus æquo augebat, easdem Scripturas, quibus ad refellendos Gnosticos, atque Manichæos aptiori sensu usi fuerant, alio sensu perinde legitimo exposuerunt, qui liberum hominis arbitrium justis limitibus concludens, aggerem, ut ita dicam, de medio tollebat, aperiebatque spatiosum fluenti Servatoris Gratiæ cursum, ut illius ævi postulabat occasio, quo Gratiæ Salvatoris triumphus inprimis necessarius erat, ut Pelagianorum superbia deprimeretur.

Bi-

Bina hæc ratio, quæ prima facie improbanda videtur, absurda non est, si animadvertamus, Ecclesiæ Patres rem habentes, cum infirmis, atque imbecillibus viris, eorum conditionibus, quæ pro varietate temporum variæ fuerunt, obsecundare debuisse; neque enim nefas est in arduis eventis, tandiu lancem in hanc, vel alteram partem, quum id postulat æquitas, deprimere, donec paribus libretur ponderibus, quo cuncta demum vota contendunt.

Turpiter itaque aberrant, qui duplex in Theologia Patrum Traditionis genus agnoscunt: alterum Ecclesiæ Græcæ, quod faveat Pelagio, ut ipse effutiebat; alterum Latinæ, quod Græcis Patribus adversetur; nec sine maxima injuria affirmari potest, modo sublatam a Patribus Gratiam, ut liberum extollerent arbitrium; modo everfam libertatem, ut Gratiæ necessitatem commendarent. Nunquam enim eorum mens fuit hinc Fidem pessundare, ut eam inde tuerentur, atque firmarent. Fatendum potius, pervigiles istos Pastores eo se majori studio contulisse, quo periculi gravioris occasio suberat, interea ad id semper paratos, quod minus eo tempore periculolum, & lubricum videbatur.

Alia est quibusdam in locis Græcorum a Latinis Patribus loquendi ratio; eadem tamen quovis tempore fuit Fides, atque Doctrina: adeout certo credendum sit, Græcos, Latinosve Patres, si in unum tandem omnes

Con-



Concilium convenissent ; unam , eandemque accepturos fuisse in rebus Fidei Sententiam , atque in intricatioribus quæstionibus consensuros certa quadam via , modoque , qui licet propter hominum fortasse proterviam etiamnum lateat , optari tamen , & expectari debet ex summa Dei clementia , qui hominum mentes , & corda pro lubito flectit , & movet . (3)

In eorum tamen laudem affirmari debet , si omnes una sumantur , præstantissimum nobis in Scripturas Sacras Commentarium exhibere ; quum unusquisque quidquid habebat ingenii , & virium ad tantum opus contulerit . Neque vero inficiandum , recentiores prospero successu ad Scripturæ Literam incubuisse , ac Deo opitulante in posteriorum temporum sterilitate , & inopia novis eam inventis illustrasse . Verum omnibus rite perpensis nihil forte fortuna invenietur , quod non ab antiquis fontibus vel palam , vel secreto manarit . Immo veri admodum simile est , si innumera pene Veterum Patrum Commentaria , Scholia , atque Annotationes superessent , quæ temporum injuria perire , nullum fore invidis quibusdam homi-

---

[3] Typis impressum fuit anno 1739. Opus , cui titulus : *Concordance des SS. Peres de l'Eglise ; Grecs , & Latins* , auctore D. Bernardo Marechal Monacho Benedictino ; quod , quum

trum specie tenus diversas conciliet , liquido commendat , unam esse , eandemque Sanctorum Patrum Doctrinam de Fide , & Moribus : quidquid effutiunt Sæctarii immo etiam nonnulli Catholici .

minibus locum recentiores Interpretes antepponendi priscis illis Doctoribus, qui rerum semina posteritati mandarunt, quarum fructus nonnulli hac tempestate intolerabili superbia, ac parum omnino grato animo sibi arrogant.

## C A P U T V I.

*De iis, quæ necessaria sunt ad Ecclesiæ Patres in Sacram Scripturam cum fructu legendos.*

Sixtus Senensis, Possevinus, Bellarminus, & Crovæus Anglus Cathalogos ediderunt Auctorum, qui in Sacra Biblia scripserunt, quorum tam ingens est multitudo, ut nunquam omnes legi posse videantur; cum enim labor incredibilis foret, tum etiam inutilis, præsertim in pluribus, qui omnem operam suam in aliis vel exscribendis, vel colligendis collocarunt. Immo quidam inter eos nullum omnino locum merentur, nullamque commendationem, nisi forte peculiaris aliqua illorum expositio obiter, & raptim quærat. (4) In-

[4] P. Le Long. Oratorii Presb. hujus generis Cathalogum edidit sub nomine *Bibliotheca Sacra*, qui, quum sit nu-

meris omnibus absolutus, cæteris prætermisissis, consuli, & evolvi potest.

Inter vetustos itaque Interpretes iis duntaxat immorandum est, qui vel in Sacra generatim Biblia, vel in aliquam singillatim illorum partem accuratius præ cæteris scripsisse existimantur.

Antea vero nonnihil incumbendum criticis Patrum operibus, quæ ad Sacrarum Literarum intelligentiam viam sternunt. Magnum profecto adferret subsidium, qui omnia fragmenta huc, illucque apud antiquos Interpretes dispersa colligeret, atque in unum Volumen redacta præberet; quæ res quum desideretur, potest quisque se solo tam varias partes, non inani studio ad quandam ordinis formam revocare, pro ut ad propositum librum, caput, vel versiculum Scripturæ referri possunt.

Quatuor inveniuntur apud Patres Critices genera. Primum ad generalem totius Bibliæ lectionem præparat; alterum in unumquenque singillatim librum quasdam veluti præfationes exhibet; tertium difficiliora Sacri Codicis vocabula exponit; postremum varias Theologiæ, Philosophiæ, & Chronologiæ, quas nosse oportet, quæstiones dilucidat.

Prima in classe recensentur *Philocalia* Origenis, in qua viginti septem capitibus de auctoritate, stylo, ac interpretatione Scripturæ differtur, & quatuor libri de *Doctrina Christiana* editi ab Augustino, præcipue secundus, & tertius, qui maximo esse possunt emolumento.

In Libro primo Divus Augustinus Theolo-

logo, quem instituit, linguarum Orientalium studia commendat; eum summopere hortatur, ut diversas Bibliæ Interpretationes consulat; res naturales, quæ comparationibus, atque figuris Sacri Codicis materiem præbuerunt, solerter indagare studeat, & scientias, atque artes calleat, quæ ad Scripturæ Sacræ cognitionem conducunt.

In altero dubia quædam enodat ex punctis, ac virgulis nascentia, quorum variæ positio totum Scripturæ sensum nonnunquam invertit. Ubi hæc dubitatio occurrat, ad Fidei regulam recurrendum censet, atque ex duobus, qui eidem loco subesse possunt sensibus, eum, qui evidenter falsus est, atque Hæreticus, rejiciendum; quod si uterque sensus sit Orthodoxus, illum anteponendum docet, qui cum textu magis cohæret; si demum uterque cohæreat, perinde Lectori, quem maluerit, eligendum relinquit.

Regulas etiam exhibet, ut figuratus a proprio, vel etiam a figurato secernatur: quippe nonnunquam eadem figurata locutio duas diversas res, immo & contrarias significat.

Modum quoque tradit, quo loca obscura clarioribus explanentur, quæve ad nonnullas difficultates enucleandas institui debeat ratiocinatio.

Hisce positis legi poterit *Synopsis* Divi Athanasii, quæ totius veluti Scripturæ summarium continet, in qua de nomine, & titulo cujusque Scripturæ Libri rationem reddit,

dit, atque diversos Sacrocrum Scriptorum characteres designat.

Veteris Testamenti Libros secundum Hebræorum Canonem enumerat, meminit etiam libri *de Doctrina Apostolorum*, libri *Pastoris*, aliorumque, qui quum Canonici non sint, legebantur nihilominus Catechumenis, quod iis non mediocriter prodesse possent.

Quæ scribit ille de græcis Veteris Testamenti interpretationibus, Lectoris attentionem merentur; atque abs re non erit in ejusdem Cathalogum Scripturæ Sanctæ Librorum, qui perierunt, oculos injicere.

Dubitant quidam eruditi, num postrema hujusce *Synopsis* pars alium habeat ab Athanasio Auctorem: multa quippe in eo sunt annotatione digna. Præ cæteris loquitur Auctor de Historia Mulieris adulteræ, quam plerique Græci Patres silentio prætermiserunt: atque Canticum Salomonis appellari affirmat *Canticum Canticorum*, quod ex aliis compluribus ejusdem Auctoris Canticis delectum sit, ut vel ipse titulus indicare videtur. (5)

*Synopsi* hujusce Doctoris addendus Gelasii  
Q
Papæ

[5] *Dubitant quidam eruditi, nec solum dubitant, verum etiam negant, & iure quidem, meritoque hanc Synopsim ab Athanasio conscriptam. Tum enim eam non profert Hieronymus*

Athanasii opera recensens, tum etiam contraria continet Paschali ejusdem Athanasii Epistolæ in recensendis Sacris, vel dubiis Scripturis.

Papæ *Tractatus* [6], una cum ejus Decreto de Libris Canonicis, & Apocryphis, ne quidquam in tanto negotio desiderandum superlit.

Quod ad criticen secundæ classis spectat, quæ in Divinas Scripturas quasdam veluti præfationes exhibet, in prompta est primo loco præstantissima Divi Hieronymi *ad Paulinum Epistola*, in qua Libros Sacros dinumerat, atque quam difficile sit illorum spiritum, ac sensum genuinum deprehendere, paucis ostendit; de omnibus speciatim Libris fusc differit, eorumque Auctores graphice, atque ad vivum omnino depingit.

Scripsit etiam Epistolam instar præfationis ad Pentateuchi interpretationem, quam suscepit, ut græcam LXX., quæ valde vitiosa ei videbatur, quodammodo emendaret; habentur præterea undeviginti in tertio hujus Doctoris volumine Epistolæ, quæ totidem sunt, veluti præfationes in Libros *Josue*, *Regum*, *Paralypomenon*, *Esdræ*, *Nehemiæ*, *Tobie*, *Judithe*, *Estheris*, *Jobi*, *Proverborum*, *Ecclesiastis*, *Cantici Canticorum*, *Isaiæ*, *Hieremiæ*, *Ezechielis*, *Danielis*, duodecim Prophetarum minorum, ac quatuor Evangelistarum.

Ex-

[6] Non video sane quid intelligat Auctor operis nomine *Tractatus* Gelasii Papæ; nullus enim extat hac de re Gelasii *Tractatus*,

sed Index solummodo, & Decretum, ab eo, ut vulgo creditur, latum in Concilio Romano, cui aderant 70. Episcopi anno 494.

Extant pariter Præfationes Theodoretī in universam Scripturam, Tractatus Divi Gregorii Nysseni, atque *Epistola* Divi Athanasii ad *Marcellinum* de inscriptionibus Psalmorum. Ostendit eo loci Athanasius, quæ comparatio Psalmorum Davidis cum prisca fœderis Historia, quove pacto omnia, quæ Christum Jesum spectant vaticinia contineant. Quilibet Psalmus sub proprio sibi titulo dispositus est sive ad Historiam, ac Prophetiam; sive ad informationem morum, pietatem, atque orationem referatur.

De Novo autem Testamento Eusebius Cæsareensis Literam scripsit ad *Carpianum*, una cum Canonibus, qui decem columnis quatuor Evangelistarum concordiam exhibent. Huic vulgandæ occasionem dedit Concordia Ammonii, cujus ramen ordini, ut testatur Theodoretus ibidem, se noluit addicere.

Præ cæteris vero legenda *Evangelistarum Concordia* Auctore Divo Augustino: mirum enim quantum adferat subsidii ad plures, easque gravissimas difficultates solvendas, quibus percellitur, ac perturbatur quisquis eo ingenio, & eruditione præditus non est, ut tot, ac tantas specie tenus Antilogias conciliet; quum Evangelistæ ad suum quisque modum verba, & gesta Christi Jesu descripserint.

Hiscæ addes Tractatum de *Catechizandis Rudibus*, quo perfecte docemur, qua ratione ad intelligentiam Novi Testamenti Verus adhiberi possit. Tractatum etiam de *Religione*, & de

*Moribus Ecclesiæ*, nec non de *Sermone Domini*, ubi Augustinus quamplurima notat de difficultatibus, quæ ex Sacri Codicis obscuritate nascuntur.

Ad tertiam quod attinet classẽ, quæ in exponendis difficilioribus verbis verlatur, legenda inprimis, quæ ea de re scripsit Hieronymus: scilicet *Epistola* 130. ad *Marcellam*, in qua exponit quid sint *Ephod*, & *Theraphim*; *Epistola* 137. de notione vocum *Alleluja*, & *Amen*; 138. de voce Hebraica *Sela*, a Græcis reddita *Diapsalmos*, & 142., 143., & 145. ubi *Oziæ Historiam* explanat, agitque de vocabulis *Sanctus*, & *Osanna*. Hicce accedent *Tractatus* ejusdem Doctoris, in quibus Alphabetum Hebraicum explicat: nomina etiam propria Virorum, Provinciarum, ac Urbium, quas memorat Scriptura: neque omittenda Hebraicarum Traditionum collectio, vel quæ discrepantias Hebraicum inter Codicem, & Græcum LXX. recenset.

In eandem classẽ referri debent, quæ scripsit Epiphanius de *Nummis*, *Ponderibus*, *Mensuris*, & *Notis*, quas adhibebant suæ ætatis grammatici in Græcorum Bibliorum Editionibus.

Etiamsi non adeo feliciter successerit Epiphanio *Physiologiæ* *Tractatus*, ubi animalium, quæ commemorat Scriptura, proprietates recenset, ejusque *Tractatus de Duodecim Lapidibus Pretiosis Pectoralis Summi Pontificis* non omnibus numeris absolutus sit, prudentibus tamen Viris,



Viris, qui veterum hac in re cognitiones ab eruditione recentiorum secernere norunt, ejusmodi operum lectio nunquam obesse poterit.

Huc etiam advocanda, quæ Divus Augustinus de modo loquendi in septem prioribus Scripturæ libris, totidem libris perscripsit. Addi possent *Formulae Spiritales* Divi Eucherii *ad Veranum*, sed minoris ponderis videntur, præcipue in ejus mysticis considerationibus in varias Sacri Codicis loquendi rationes.

Idem ferme judicium sit de illius *Institutionibus*, quæ plurimum etiam juvare possent, si quædam Populorum nomina, Urbium, Fluviorumque, quorum involuta ad nos pervenit, notitia: item quæ de Festis, de Idolis, de Vestibus Judæorum, de Ponderibus, eorumve Mensuris cum iis Græcorum, Latinorumve comparatis paullo accuratius dixisset.

Inter postremæ classis Criticos, qui scripturæ quæstiones dilucidant, eminet etiam Divus Hieronymus, qui bene multas perspicue, & erudite definivit. Optima hoc in genere sunt ejus responsa ad quæstiones Damasi Papæ de quinque difficultatibus in Genesim: item *ad Evagrium*, ubi quærit quis esset Melchisedech: aliud etiam responsum, in quo de annis Salomonis, ac Regis Achazi: necnon quinque, vel sex ipsius Epistolæ, præsertim vero duæ, quas *ad Hedibiam* scripsit, & *Algasiam*, ubi plures Antiqui Testamenti nodos resolvit.

Alia extant nonnulla apud antiquos Patres

critices opera, quibus Lector in tam præclaro studio tanquam ducibus, uti potest, unum cum singulis Scripturæ Libris Patrum operam jungens, quæ ad eos referri queunt. Ita Prophetarum lectionem antecedent duo Sancti Johannis Chrysostomi Sermones, in quibus de obscurioribus Scripturæ vaticiniis rationem reddit, & qui Acta Apostolica legere cupit, eundem Doctorem consulat, qui ad hujus Libri undique divini intelligentiam maximam lucem præbet, & sic de cæteris.

## C A P U T V I I.

### *De Patrum Ecclesiæ delectu, qui Scripturam Sacram exposuere.*

**Q**UUM partem aliquam temporis in studio critices Patrum, qui Scripturas Sanctas explanarunt, contriverit Lector, convertet se ad ea, quæ superant Scholia, & Commentaria piissimorum, sapientissimorumque Interpretum.

Ut autem recto procedatur ordine, ex cor-  
dationum hominum mente Novi Testamenti intelligentiam persequetur, antequam Veteris, cujus finis Christus est. Verum ad Vetus gradum reducens non prætermittet Novum, maxime vero in lectione Prophetarum, quibus historici libri conjungi debent, quum sacrorum Vatum intelligentia ex cognitione Historiz,

riæ, cujus maxima pars sunt, multoties pendeat.

Hiscæ principio positis inquiret sedulo, quoniam inter Patres præstiterit cæteris in exponendo tum literalis, tum mystico, sive spiritali Scripturæ Sacræ sensu.

Unicuique copia sit, quem libuerit magis diligendi: verum ad scientiam literæ quod attinet, plurimi faciendus Hieronymus, qui eam perspicue, eruditeque exponit; sensus vero mysticus, & spiritalis ab Origene repetendus. Quamvis enim Origenes in allegoriis modum paullisper excesserit, dignus tamen est, qui ab initio ad finem usque legatur: uberrimos quippe continet fontes, unde Ambrosius, ac posteriores Interpretes hausuerunt ea mentis inventa, quibus priorum Ecclesiæ sæculorum auctores tantopere delectabantur.

Origeni adde, si placet, doctissimum Philonem, qui licet Judæus genere, exemplum tamen iis omnibus dedit, qui prisca ætate per allegorias scripserunt. Omnium vetustissimus hic Scripturæ Interpres gravibus cogitationibus affluit, atque eloquentia, & doctrina ad Platonem magnopere accedit, qua in re (ut putat Photius) cum Judæis non semper convenit.

De Tropologico sensu, seu morali adeat Lector Chrysostomum, Augustinum, & Gregorium Papam, qui omnes illius copias, omnesque divitias uberrime continent.

Jam vero Latinis ne Græci, an Græcis Latini in hoc delectu anteponendi sint, differere non immoramur. Præterire tamen non possumus eruditorum aliquot Criticorum sententiam, qui de libris Novi Testamenti græce primitus exaratis consulendos putant Græcos præ Latinis, in eorum sermone leviter admodum exercitatis: verum reponi potest, Divum Hieronymum, qui ut Latinus græce tamen perinde sciebat, ac Græci indigenæ, quos pene exscripsit, Latinorum partes implevisse, qui ad Evangelicæ literæ expositionem minus quam Græci incubuerunt.

Quin ergo diutius hoc Latinorum, Græcorumve Patrum discrimine detineamur, ubicunque uberior sese offeret seges, messem colligemus.

Novum inprimis Testamentum excurramus, cujus initium facit D. Matthæus. De Literali hujus sensu locupletissimas habemus Homilias Chrysostomi: de Morali vero, atque Genealogia Hilarium Pictaviensem: de grammatica demum eruditione Hieronymi annotationes.

In Divum Lucam Commentaria scripsit Ambrosius: in Divum Johannem ad sensum Mysticum, & Spiritalem adhiberi possunt Homiliæ Origenis: ad Moralem Chrysostomus: ad Doctrinam autem Hilarius, & Augustinus.

Quod attinet ad D. Marcum, quem Patres molli admodum brachio, leviterque tractarunt, Græcorum Catenas nimirum sumere fas erit, vel Theophilum Antiochenum, atque

que Theophilaetum, Chrysostomi Eclogarium, eo fere modo, quo D. Marcus S. Matthæum in epitomen coegit.

In Acta Apostolorum præsto sunt Homiliæ Chrysostomi: in Epistolas Divi Pauli informandis moribus apta scripsit idem Chrysostomus. Addi potest Theophilaetus, in quem totius Ecclesiæ Græcæ vox convenit, quum Doctoris gentium sensa explicanda sunt, atque proferenda. Literam exploravit Theodoretus; Doctrinam autem expressit Augustinus Commentariis in *Epistolam ad Romanos*, & *ad Galatas*, Sermonibus *de Verbis Apostoli*, pluribusque contra Pelagianos libris, quos nonnulli eruditi totidem fere de Gratia Commentarios existimant.

Ad Epistolas Canonicas quod spectat, quibus antiqui Patres exiguam, vel fere nullam operam dederunt, uti poterit lector Commentariis Didymi, Homiliis Augustini in *primam S. Johannis*, necnon compilationibus *Ecumenii*, & Venerabilis Bedæ.

In Apocalypsim reliqua sunt Commentaria Victorini, Andreæ Cæsareensis, Primasii, atque illud, quod vulgo adscribitur Augustino, & Donatistæ Tyconio, quod aliud revera non est, quam Primasii, Victorini, & Venerabilis Bedæ collectio, Homiliarum stylo donata.

Ad Vetus secundo loco Testamentum quod spectat, in Mysticum, & Spiritalem Pentateuchi sensum legi potest Origenes una cum Glaphyris

phyrus Cyrilli Alexandrini, in *Moralem* vero Chrysostomus omnium hoc in capite Princeps.

In *Hexaameron* singillatim Ambrosius, vel Basilus; sufficit autem alteruter, quippe Ambrosius Divum Basilium, quem velut Magistrum colebat, exscripsit.

De *Libris Josue*, & *Judicum* consulendæ *Questiones* Augustini, atque nonnullæ, quæ supersunt Origenis Homiliæ.

In *Libros Regum* scripsit Gregorius Papa, vel potius ejus collector, forte fortuna Eucherius Lugdunensis Episcopus.

Ejusdem Gregorii *Moralia in Job* fere sufficiunt, nisi quis forte Græcorum Catenas ea de re pericriptas malit adire.

In *Psalms Davidicos* eruditionem secutus est Hilarius, morum doctrinam Augustinus, utramque Theodoretus, vel Cassiodorus, qui Augustinum, aliosque Patres in summam redegit; nec præmittendæ duæ, & viginti Basilii in totidem electos *Psalms* Homiliæ.

Ecclesiasticis sensa moralia exposuit suis in *Paraphrasibus* Gregorius Thaumaturgus. Accedunt octo Gregorii Nysseni Homiliæ, in quibus summa pietas una cum amplissima eruditione conjuncta est.

Plures quoque laudatus Doctor omnino allegoricas in *Canticum Canticorum* Homilias elaboravit: exposuit etiam divinum hoc opus Divus Gregorius Papa, & Apponius, qui legi poterunt, una cum Divi Bernardi in tria priora capita *Sermonibus*.

Isaiam

Isaiam Basilium, ac Cyrillum Alexandrinum, Hieremiam Origenes, Ezechielem Gregorium Papam, omnes demum majores, & præcipue minores Prophetas summa cum laude Hieronymus, explanarunt.

Ubi vero alicujus Scripturæ voluminis Commentaria desint, evolvendæ Quæstiones Theodoretæ, Hieronymi, & Augustini, Epistolæ Isidori Pelusiotæ, necnon Collectiones Venerabilis Bedæ, & Rabbani Mauri, qui ex veterum animadversionibus plurimum fructus perceperunt.

Quanquam alia multa sunt Patrum opera in Scripturam, ea, quæ hætenus laudavimus, plusquam satis esse possunt; ita tamen ut in rebus dubiis, quæ ab iis vel silentio præteritæ, vel satis explanatæ non fuere, consulantur cæteri: immo nec omnes, quos laudavimus, legere necesse fuerit, unus, vel alter in singulos Scripturæ Libros cujuslibet studio satisfacere poterit, prout hujuscemodi lectione magis, minusve delectabitur.

Verum nulla iis lex statui potest, qui supra vulgus se attollentes Sacrarum Literarum studio se totos addicunt: cuncta ab iis evolvenda sunt Commentaria, Homiliæ, Scholia, Annotationes, Epistolæ, Præfationes, atque assiduo, & nunquam intermisso labore conferendi Auctores Auctoribus, vocibus voces, res denique rebus, ne quid eorum diligentiam offugiat.

## CAPUT VIII.

*De Lectione Patrum Ecclesiæ, qui  
Dogmata Fidei exponunt.*

**S**ECTarii, quorum mos est nobis continuo illudere, Theologiam Patrum, qua tantopere gloriamur, nihil præter ætatem, rugasque seniles singularis habere, eosque ludicrum aliquid facere dicunt (ipsismet Patribus asseverantibus) qui in rebus Fidei aliud docere conantur, quam quod Deus in Scripturis Sanctis Ecclesiæ suæ revelavit.

Verum facile est respondere, Basilium, atque Dyonisium Areopagitam similia scribentes id unum docere voluisse, in rebus Fidei nihil proprio Marte cudendum; quemadmodum Sectarii consuevere, qui Dogmata pro libito fingunt, nequaquam explorato germano Scripturæ sensu, a Patribus secundum antiquissimas, atque in universa Ecclesia probatissimas Traditiones exposito; noster enim antiquitatis amor optimam esse, quam tuemur, doctrinam invictissime demonstrat, vel ob id solum, quod eadem quovis tempore fuerit. Et sane, ut olim aiebat Epiphanius Eunomianis, qui Catholicos irrisuionis causa appellabant *Antiquarios*: eo major est Fidei nostræ certitudo, quo altior ipsius antiquitas: una semper, eademque fuit, & erit quacunque ætate Fides nostra: neque enim



enim a tempore pendet, sed mediis Sancto-  
rum operibus, quorum alii acceperunt ab aliis,  
veluti totidem vehiculis, ad nos usque inte-  
gra, incorruptaque devenit.

Labente temporum cursu, eadem omnino  
ratione, qua in lucem prodierunt, interibunt,  
& concident hæretici. Quonam abjere veteres  
Sectarii recentiorum parentes, atque Magistri?  
Floruerunt olim, ut florent nostris tempori-  
bus illorum successores, horumque memoria  
non secus ac illorum evanescet, si quando  
maluerit Deus O. M., in scelerum mulctam,  
alias ab Ecclesia pœnas repetere. Quid enim  
aliud profecto hæresis est, nisi præteriens no-  
vitas, quæ torrentis adinstar magno fragore  
ruentis, pluribus hinc inde rebus everfis, de-  
vastatisque, miserrime perit?

Tertullianus cum bona, sanaque mente vi-  
geret adhuc [ neque enim certum adeo est,  
atque peripicuum, ut opinantur nonnulli, Li-  
brum *de Præscriptionibus* post defectionem a  
Fide conscriptum fuisse ] (7) Tertullianus,  
inquam, hoc argumento tanquam omnium  
validissimo contra Hæreticos utebatur, oppo-  
nens

[7] Immo vero gravissimæ  
subsunt rationes, quibus  
invicte demonstratur, Li-  
brum *de Præscriptionibus*,  
a Tertulliano exaratum,  
antequam deiceret a Fide.  
In primis enim ne mini-  
mum quidem Montani hæ-  
reseos vestigium in eo re-

peritur. 2. Communem  
in eo sibi fidem esse affir-  
mat cum omnibus Eccle-  
siis Apostolicis. 3. Dñum  
sanissima Fidei Catholicæ  
principia in illo opere ex-  
ponit, quibus hæresis quæ-  
cunque, vel schisma fun-  
ditus convellitur.

nens scilicet eorum doctrinæ novitati, Fidei nostræ, quam ab ipso fonte Christo Salvatore petit, antiquitatem.

Vincentius Lirinensis perspicue demonstrat, non aliam fuisse hæreseon originem, quam contemptum antiquitatis, cujus limites impudenter excedunt Sectarii, ut inane novitatis phantasma confectentur. At mirari profecto subit, Novatores, qui tantopere nobis succensent, priorum nihilominus, quinque, vel sex sæculorum Patres, eorumque auctoritatem admittere, immo etiam ad posteriores nonnunquam, recurrere, e quibus aliquod causæ suæ subsidium expectant.

Quid, quod errorum suorum a Catholicis Doctoribus originem inquirere, eorumque auctoritate ad cæteros Sectarios sibi adversantes refellendos, uti non erubescant? Tertulliano nititur Servetus, statuitque contra Calvinum; Calvinus vicissim huic hæretico opponit Justinum Martyrem, quanquam eum fortasse non lateret, *Expositionem Fidei*, quam profert, Justino vulgo adscriptam, genuinum illius opus non esse, sed a Recentiore Scriptore ad refutandos Arianos elucubratam.

Anglicani vulgo Episcopales repetitam toties exprobrationem natæ illorum Ecclesiæ ex schismate Henrici VIII. iniquo animo ferentes, illius semina apud Patres trium, quatuorve priorum sæculorum reperire se gloriantur.

*Dissert.  
CXXI.*

Eam ob rem Dodvellus Veterum horumce Doctorum sapientiam, & ministerium tanto-  
pere

pere extollit, ut illud Spiritus Sancti donum appeller, decanterque cum Apostolica dignitate, atque miraculorum, & prophetiæ dono comparandum: quemadmodum ait Apostolus, Jesum Christum dedisse Ecclesiæ suæ Apostolos, Prophetas, Evangelistas, & Doctores. Præstantissimam hanc Doctoris dignitatem, quam ex Synagoga translatam putat in Ecclesiam, ad ætatem usque Cypriani integram, illibatamque mansisse contendit, scilicet ad tertium usque sæculum jam proVectum, tum vero una cum cæteris donis periisse communi prædicatione confusam, permixtamque.

Nos quidem seposita Dodvelli opinione, qui Doctores, ac Fidei Christianæ Expositores fatetur quatuor fere sæculorum spatio divinitus afflatus, omnium ætatum Patres accipimus, quum universali Ecclesiæ Fidei consentiunt; quanquam enim omnes generatim Patres veneremur, nemini tamen singillatim tantum auctoritatis, quantum omnibus simul tribuere audemus, neque singulas illorum sententias totidem habenda esse putamus oracula, quibus necessario adhibenda sit fides.

Hisce Doctoribus pro rei veritate Traditioni, atque Ecclesiæ Fidei testimonium red-  
dentibus refragari summa temeritas foret: proprias autem opiniones, ac singulares conjecturas exhibentibus assensum cohibere, donec rationis, vel auctoritatis pondere de Orthodoxa eorum, quæ proferunt, veritate constet, nulla sit injuria. Non enim ob id eorum sententiis

assentimur, quod ipsi dixerint, sed quia cum Ecclesiæ sensu præclare cohærent, nec respui possunt, quin summa Veritas, Deus ipse nimirum optimus maximus respuatur.

Nicetas Bizantinus in Apologetico Synodi Chalcedonensis inquit, Patres quibusdam uti loquendi modis metaphoricis, ambiguis, & sæpe numero contrariis, qui eos in erroris suspicionem adducere possent, nisi nota foret Veterum indiligentia in dictionibus, atque verborum delectu.

Theodoretus in Dialogis contra Hæreticos advertit, Ecclesiæ Patres nonnunquam excessisse, suisque locutionibus accuratam Dogmatum Fidem prætergressos, sive nimio id fecerint studio, sive quod humana mens, dum in sublime fertur, satis otii sibi nonumat, ut ad diligentius examen oportet; ac qui adversarium ad incitæ redigere tentat, nonnihil periculo exponit, ut plenam, absolutamque victoriam reportet.

Augustinus cum Ario disputans, parcit Sabellio; quum vero adoritur Sabellium, fœdus iniisse cum Ario videtur. Quum Pelagianos insequitur, ad Manichæos illum accedere velle dices. Sic Theodoretus vindicans se contra Cyrillum, Nestorianorum hæresi minus diffidit, quod metueret errorem ab Eutychete paullo post inventum: contra Cyrillus fortiter obistens Nestorio, ab imperito Lectore Apollinarii sectator fortassis habebitur.

Multa sunt exempla Patrum, qui arborem  
in

inflexam in latus oppositum inclinant, quæcam recerrigant, atque rectam ad lineam reducant: quod quidem prudentissimi Pastores non ita fecere, ut in unum impegerint scopulum, quo alium vitarent, sed eo quod experientia duce nossent, id genus æquipondia adhiberi posse, ut e præcipitio homines alioquin æternum mansuri retraherentur. [ 8 ]

Deinde neminem latet, quædam fuisse tempora, quibus cuique liberum erat multis de rebus pro arbitrio sentire, quæ quum ab Ecclesia finitæ non essent, hominum iudicio, ac disputationi relinquebantur. Eapropter in lectione Patrum, ut habet regula juris, videndum quot numero, & quales sint, qui loquuntur, quæ rerum, de quibus agitur, natura, quo tempore in controversiam venerint, quæ demum verba ad illas significandas adhibita sint.

Præterea prudentis Lectoris munus est ea, quæ Patres proprio Marte, ab iis secernere, quæ post alios præsertim dubiæ Fidei Auctores

R

res

[8] Quæ scribit hoc loco Auctor Operis de immoderato Patrum æstu in defendendis quibusdam Fidei Dogmatibus, parumper castiganda videntur: nihil enim aliud continent, quam querimonias ab invidis obtrectatoribus Patrum fundi solitas; quæ quidem iniquæ prorsus comperientur, si Patrum

doctrina paullo intimius pervadatur, ut egregie ostendit de D. Augustino Eminentissimus De Noris in *Vindiciis Augustinianis*, & Bullus Anglicanus in *Defensione Patrum Antepiscoporum*, quos malevoli quidam Critici Arianis fuisse autumabant. Vide notam 19. primæ Partis,

res scripserunt. Exempli loco sit Divus Hieronymus; etsi enim affirmet contra Rufinum, diligenter se in Commentariis secrevisse suas ab opinionibus Origenis, aliorumque, qui in hæreleos suspicionem venerant, non ita tamen accurate id præstitit, ut nihil omnino superfluit difficultatis, ac confusionis.

Maximum Lectori fastidium parit, haud certo nosse quis loquatur, & cui præbeat aurem. Ad id satis studii non attulerunt Antiqui, atque, faciente Hieronymo, difficultas, quæ in intelligendis Prophetis occurrit, inde passim oritur, quod illos fere non distinguat Scriptura, quos suis in dialogis colloquentes inducit. Humanius forsitan acceptus fuisset Liber Ecclesiastis, si distinxisset Salomon, quæ dicit ipsemet, ab iis, quæ in hoc opere dicentes inducit homines nequam [9]. Facilius etiam fortasse perciperentur Psalmi Davidis, si Cantorum, qui alternis quandoque canunt, nomina recenserentur: multoque magis delectaret *Canticum Canticorum*, si Actores omnes notati fuissent.

Hinc

[9] Præcipue vero contra immortalitatem Animæ cap. 3. V. 19., & cap. 6. V. 1. quæ tamen nonnisi impiorum nomine profert; quum cap. 12. V. 7. eandem animæ immortalitatem statuat evidentissime, inquiens, & revertatur pulvis in terram suam unde erat, & spiritus redeat ad Deum, qui fecit illum.

Nihilo tamen minus propter priora loca, Librum Ecclesiastis Sæctarii bene multi rejecerunt, & complures Rabbinæ perniciosum traduxerunt. Nonnulli autem scelestissimi homines iisdem locis impie abusi sunt ad immortalitatem Animæ de medio tollendam.

Hinc Psellus divinum hoc epithalamium explicare aggressus, de Actoribus primum disserit, ut ejus sensus perfectior, ac facilior fiat intelligentia.

## CAPUT IX.

### *De præcipuis Patrum operibus ad Dogmata Fidei deligendis.*

QUamvis innumera Patrum opera vel injuria temporum, vel immani hostium Ecclesiæ protervia interierint, qui non hominibus modo, sed & libris bellum indixerunt; attamen quæ ab exitiosa illa pernicië evaserunt, laboriosissimis etiam Viris exercendis, altissimisque studiis promovendis abunde sufficiunt; Immo pauci omnino sunt adeo laboris amantes, ut omnia, quæ ad nos pervenerunt, de Fidei Dogmatis Patrum monumenta valeant accurate pervolvere.

Plerique sæculi sui moribus servire satis habent, eas nimirum quæstiones, quæ agitari solent ætate sua, in Patrum scriptis scrutantur; quum enim primum nova quædam in Ecclesiâ excitatur contentio, ubi major apparet animorum vis, & maximus perstrepat tumultus, eo quisque contendit, tantoque fertur impetu, ut cæteras quæstiones, quanquam majorem sæpe utilitatem adferant, facillima oblivione prætereat. Quicumque tamen in-

Ecclesiastica scientia progredi cupit, aliam ineat viam, oportet, ac certis quibusdam Patrum operibus per singula præcipua capita seie addicat, eaque ex proposito sibi ordine in classes distribuatur.

Patres, quibus merito, & jure persuasum erat, Supremi Numinis consilium primum non fuisse, ut ejus veritas ope librorum innotesceret, & universum terrarum orbem pervaderet, de Mysteriis Fidei tunc solum scribere, quum insolita exorti cujusdam in Ecclesia tumultus occasio postularet, eoque potissimum fine, ut populo ab eis Fidei defensionem expolcenti indulgerent,

*Fleury.  
Hist. de  
l'Égl.  
l. 2.*

„ Apostoli, eorumque Discipuli [ inquit  
„ *D. Fleury* ] nunquam ad scribendum manum  
„ admove, nisi quum occasio subesset, ac  
„ summa necessitas. Arbitrantur nonnulli, ea  
„ solum mente conscriptum a D. Luca Evan-  
„ gelium, ut Christianorum animos ab Evan-  
„ geliiis, quæ illius ætate supponebantur, ab-  
„ duceret, ac Pseudo Apostolos Divo Paulo  
„ adversantes comprimeret. Postremis vitæ  
„ suæ annis Evangelium scripsit D. Johannes;  
„ ad illam usque ætatem viva voce docuerat,  
„ nec nisi a plerisque Episcopis Asiæ roga-  
„ tus, atque a pluribus Ecclesiis huic rei ge-  
„ rendæ præfectus ad scribendum adduci po-  
„ tuit. Antequam vero illud ordiretur, publi-  
„ cum jejunium, & orationem fratribus suis  
„ indixit; in animo quippe habebat Sectarios,  
„ qui Christi Domini divinitatem sustollebant,  
„ refellere.

Quo



Quo primum tempore nova errorum monstra prodibant, Divina Providentia recentes excitavit Doctores, ad Ecclesiæ defensionem comparatos, atque non tantum impenso tuendæ veritatis amore, verum etiam ingenii acumine, summaque eruditione cæteris omnibus longe præstantes. In nostro autem studiorum curriculo illi, quos in pertractandis Theologiæ quæstionibus plurimis præsiidiis instructos deprehendimus, cæteris antepone debemus, qui ejusmodi adjumento destituti, easdem res obiter duntaxat, atque jejune attigerunt.

Præclarissimus iste ordo, sicut in Patrum delectu, ita in variis etiam ejusdem Patris operibus deligendis teneri debet. Nam ratione duce consentaneum magis est ea loca consulere, quibus Auctor dedita opera, & diligenter, quam ubi generatim, ac sine penitiori investigatione argumentum aliquod tractat: sic Augustinus in Epistolis, & Tractatibus, quibus respondet absolutiorem rerum cognitionem petentibus, accuratius disserit, atque attentius, quam in Sermonibus, ubi nonnulla duntaxat profert pro arbitrio, quæque ad rem primo propositam solummodo referuntur.

Pleraque Patrum opera de Fidei Dogmatis, vel Catecheses sunt, vel Homiliæ, vel Sermones, vel Epistolæ ad modum tractatum, vel Tractatus ad modum epistolarum, quum Patres hos indiscriminatim titulos lucubrationibus suis præfigerent.

Divus Epiphanius Tractatui de *Anchorata*

R 3

Epi

Epistolæ nomen dedit; revera enim Clero, & Magistratui Suedriæ in Pamphylia responsum ferebat, a quibus rogatus fuerat, ut Doctrinam Mysterii Trinitatis dilucide exponeret. Tractatum *de Lapsis* a D. Cypriano conscriptum, epistolam vocat Pacianus, eodemque nomine donat Augustinus ejusdem Cypriani Tractatum *de Unitate*, quem Cyprianus ipsemet librum appellat. Divus Hieronymus Sancti hujus Martyris Epistolas, unaque suas commemorans, nunc libros, nunc epistolas nominat. Syncellus autem in distributione operum Divi Cypriani, Sanctissimi hujus Africani Antistitis Epistolas a Tractatibus secernit; quod argumento est, Patres Ecclesiæ hac in re liberrime se gessisse, ut mos erat profanis Auctoribus, qui literæ, vel epistolæ nomen operibus alterius plerunque generis sine discrimine imponebant, Afranio teste, qui comædiam sub epistolæ nomine vulgavit, perinde ac si literam scripsisset ad vulgus cum delectatione erudientum.

*Just.  
Lios.  
Epistolica  
Instit.  
C. 1.*

Fieri etiam potest, ut exterior illius ætatis Epistolarum forma, quæ multis paginis tantquam libelli constabant, occasionem dederit Librum, vel Tractatum appellandi epistolas, quæ paullo longiores viderentur: vel etiam (quod vero similius est) quum de rebus Theologicis nonnisi rogati plerunque scriberent Patres, epistolarum nomine donabant responsa, quæ copiosas cæteroquin eruditionis Ecclesiæ tractationes complectebantur.

Quid.

Quidquid id est, innumerabiles extant Patrum Epistolæ, qui hujusmodi scribendi genus præ cæteris secuti sunt, utpote Pastoribus convenientius, qui de constanti Ecclesiæ Fide omnibus hominibus, Clericis, Laïcis, Catechumenis, Fidelibus, Infidelibus, Judæis, & Hæreticis respondere tenentur.

Omnia ferè Divi Athanasii opera ad modum epistolarum scripta sunt. Divus Basilus universam pene Theologiæ suæ doctrinam literis comprehendit, ac Divi Augustini Epistolæ omnium ejus librorum, ejusque doctrinæ summam exhibent, atque compendium [10]. Quidquid demum apud Patres exquisitissimum occurrit, in eorum Literis continetur, adeoque præ cæteris eorum monumentis versari debent, sed certo quodam ordine, eaque methodo, qua in nova Augustini Editione dispositæ fuerunt, ubi Fidei Dogmata ab Historia, & Morum, ac Disciplinæ Doctrina sejuncta inveniuntur.

Catecheses autem Patrum duplici sunt in classe: aliæ ad Catechumenos in Paschate bap-

R 4

ti-

[10] Multum quidem sibi vindicant laudis, plurimumque adferre possunt utilitatis Epistolæ D. Augustini, in quibus e. g. agit de Gratia, ut *Epistola ad Vitalem &c.* non est tamen, cur tantopere commendentur, adeo ut præ cæteris omnibus Augustini

monumentis versari debeant. Qui enim in questionibus de Gratia, & de Ecclesiâ, inconsultis reliquis Augustini Tractatibus, solis ipsius Literis hæreat, is profecto non nisi jejune, exiliterque tractabit difficillimas ejusmodi quæstiones.

tizandos per aliquot dies habebantur, aliæ diætæ *Myſtagogicæ* ad recens baptizatos per ſollemnis hujulce Feſti Oſtavam.

In Catecheſibus, quum Patres nihil augeant, immo Fidem e contrario aperte, ſimpliciſſimeque proponere ſtuderent, tota veteris Eccleſiæ forma perſpicio exhibetur.

Pauciſſimæ ſuperlunt Catecheſes apud Cyrellum Jeruſolymitanum, Gregorium Nyſſenum, & Gaudantium Brixie Antiſtitem. Earum paucitatis præcipua cauſa eſt, quod tribus prioribus ſæculis plerique Patres ex tempore loquentes, Sermones ſuos exſcribi non ſinerent; & ſane ſequioribus ſolum temporibus conceſſere Catechumenis Baptiſma petentibus, ut quæ ex publicis eorum Sermonibus memoria tenere poterant, literis mandarent.

Duplicis etiam generis ſunt Homiliæ Patrum: aliæ ad Fideles ſolummodo, aliæ vero ad Infideles etiam habebantur. In illis Patres de Myſteriis Religionis aperte, in iſtis vero ſubobſcure, ſummaque moderatione, ac circumſpectiõne dicebant.

Tractatus vero Patrum vel mere ſunt Theologi, vel Polemici. In prioribus veteres iſti Doctores ludimagiſtrorum inſtar, ſemotâ diſputatione docentium, Religionis Dogmata explanant; in poſterioribus autem tanquam ſpirituales Athletæ, veritates Fidei tuentur acerrime contra inſenſiſſimos Eccleſiæ hoſtes, qui eas pervicaciter impetunt.

Hujulce generis Tractatus majora poſtulant  
in-

ingenia, amplioremque facultatem in Ecclesiæ Doctrina, quam quæ tyronibus inesse solet: si quid enim difficile, & arduum, spinosumque apud Patres, illud profecto dici debet, quod contra hæreses scripsere. Hoc in capite Principes fuerunt Ignatius contra Simonem, Menandrum, & Ebbionem (11); Irenæus contra Valentinum, & universam Gnosticorum sobolem; Tertullianus contra Marcionem; Cyprianus, ac Pacianus Barcinonensis in Novatianos; Athanasius, Hilarius Pictaviensis, Ambrosius, & Augustinus contra Arianos; Basilius Magnus, atque Gregorius Nazianzenus in Eunomianos; Optatus, & Augustinus contra Donatistas; Theophilus Alexandrinus in Origenem; Hieronymus contra Jovinianum, Helvidium, Vigilantium, & Pelagium; Titus Bostrensis, & Augustinus contra Manichæos; idem Augustinus contra Joviniani, & Pelagii sectarios; Cyrillus Alexandrinus contra Nestorium; Leo Papa adversus eundem Nestorium, Eutychetem, & Priscillianistas; Sophronius Jerosolymitanus, & Divus Maximus contra Monothelitas; Johannes Damascenus,

&

[11] Animum intendit Auctor operis ad Epistolam D. Ignatii *ad Smyrnenſes*, in qua Sanctissimus Martyr veram Incarnationis Fidem stabilit. Paucæ etiam hæc de re scripsit in Epistolis *ad Ephesos*, & *ad*

*Trallenses*. Quæ quidem a Sanctissimo Martyre scripta sunt contra Simonem, Menandrum, & Ebbionem, primos illius Catholici Dogmatis hostes intensissimos.

& Theodorus Studita contra Iconomachos; Divus Anselmus contra Græcos; ac Divus Bernardus contra suæ ætatis Hæreticos.

## C A P U T X.

### *De Ordine servando in lectione Patrum de Fidei Dogmatis disserentium.*

**R**ationi admodum consentaneum videtur, in lectione Patrum de Fidei Dogmatis initium ducere ab eorum contra Paganos operibus; a quibus ad præcipua Fidei Capita illustranda maximum peti potest subsidium. Hoc scribendi genere excelluerunt Justinus Martyr, Origenes, Tertullianus, Minutius Félix, Arnobius, Augustinus, & alii: apud eos mixtum est utile dulci; & quamvis (excepto Augustino) plus revera apud hosce Apologistas niteat eruditionis, & eloquentiæ, quam altioris Theologiæ, in eorum tamen scriptis non desunt luculenta veterum Traditionum testimonia, quæ colligere, atque servare plurimum refert. [12]

Hiscæ

---

[12] Rem, ut arbitror, non inutilem fecisset operis Auctor, si inter antiqua monumenta contra Judæos, & Paganos, *Præparationem*, & *Demonstrationem Evangelicam* Eusebii Cæsareensis retulisset. Immo vero il-

lud magnopere miror, omissum ab eo hoc loco tanti ponderis monumentum, quod testibus æquifimis rerum æstimatoribus, solum pene sufficeret ad demonstrandam contra Paganos

Hiscæ Apologiis addi poterunt ejusdem argumenti tractatus, quos reliquere Clemens Alexandrinus, Cyprianus, Lactantius, Julius Firmicus Maternus, Athanasius, Gregorius Nazianzenus, Chrysostomus, Cyrillus Alexandrinus, & Theodoretus contra Gentiles.

Post hæc gradus fiet ad Tractatus Patrum contra Judæos; hujusmodi sunt *Dialogus* Divi Justinii *contra Tryphonem*, Tractatus Tertulliani *adversus Judæos*, *Liber primus de Testimoniis* Divi Cypriani *ad Quirinum*, Sermones Divi Chrysostomi, Tractatus, & Epistolæ Divi Augustini de eodem argumento.

Hujusmodi contra Judæos, atque Paganos operum læctione eo uberior comparabitur Polemicæ Sanctorum Patrum Doctrinæ intelligentia, quo plerique Sectariorum a veteribus hisce Doctoribus refutati Semipagani sunt, vel Semijudæi, qui doctrinæ suæ dogmata, ne dicam deliramenta, ex Gentilium, ac Judæorum cœno hausserunt, indeque odiosam, ac plane ridiculam farraginem conflarunt.

His positis, inquireret Lector apud Patres præcipua Theologiæ capita ex ordine Magistri Sententiarum, Divi Thomæ, vel alterius Scholastici, nisi forte peculiarem quisque methodum sibi proponere malit. Ita-

---

gnos Fidei nostræ veritatem. Continet autem imprimis universam Theologiam Ethnicorum, deinde omnia Christianæ Fidei veritatis argumenta. Equidem paullo infra illius;

tanquam præludii, aut prælationis læctionem commendat; sed potiore locum mereri videtur; neque enim præparare solummodo valet, verum etiam perficere Lectorem.

Itaque ne quis ulli scrupuloser ordini se addicat, Sermones evolvere poterit D. Chrysostomi *de Incomprehensibili Natura Dei*, Tractatum *de Divinis Nominibus* adscriptum Dionysio Areopagitæ, librum *de Monomachia* auctore Justino, Tractatus Theodoretæ, ac Divi Chrysostomi *de Providentia*, una cum iis, quæ supersunt Lactantii *de Creatione*, & *Excellentia Hominis*.

Tum ad Mysteria Fidei propius accedens, assumet Tractatus D. Athanasii *de Trinitate*, ejusdem Homilias in hæc Evangelii verba: *omnia dedit mihi Pater*; ejus *ad Serapionem*, *ad Adelphicum*, & *ad Maximum* Epistolas: pervolveth etiam Sanctorum Hilarii, & Augustini opera de eodem Mysterio, Ambrosium *de Fide* contra Arianos, *Thesaurum* Cyrilli Alexandrini, Libros Vigilii Tapsensis, Homilias, & Epistolas D. Basilii *de Ineffabili Trinitate*, atque ejusdem Patris opera *contra Eunomium*.

Omnibus hisce Tractatibus addere juvat Sermones D. Gregorii Nazianzeni, & Tractatum D. Gregorii Nysseni *de Divinitate Filii*, & *Spiritus Sancti*, Librum Didymi *de Spiritu Sancto*, opus Basilii *ad Amphilosium*, Sermonem D. Chrysostomi *de Consubstantialitate*, ac duas Hieronymi ad Damasum Epistolas *de Hypostasis*.

De Mysterio Incarnationis adeat, quæ supersunt Athanasii scripta, præcipue Epistolam *ad Epictetum*, duos Gregorii Nysseni contra Apollinarem Tractatus, ejusque Sermonem *de*

*Nat.*



*Nativitate*, pleraque Cyrilli Alexandrini monumenta, plurium Orientis Antistitum Epistolas in collectione Lupi, Epistolam D. Leonis *ad Flavianum*, una cum reliquis ejusdem de hoc argumento Epistolis, Augustini etiam *ad Volusianum*, ejusque Tractatum *de Dono Perseverantiæ*, ubi quæ ad Prædestinationem Christi Jesu referuntur, exponit, Epistolam D. Bernardi ad Innocentium II. contra Petrum Abaelardum *de Satisfactione Salvatoris, & Redemptione humana*, Tractatum denique Tertulliani *de Carne Christi*.

De Prædestinatione vero, Gratia, & Libero Arbitrio præsto est Augustinus tomo 7. postremæ ejus operum Editionis; Divus Prosper *in Collatorem*, ejusdem responsa ad argumenta Vincentii; Fulgentius, & Bernardus, ubi de rebus istis altissimis, intricatisque scite, eruditeque differunt.

Abs re fortasse non erit hisce omnibus anteponeere Tractatus D. Gregorii Nysseni, & Sancti Augustini *de Beatitudine, Immortalitate, & Quantitate Animæ*; alterum *de Natura Hominis* auctore Nemefio Episcopo, atque Paulini opera *de Lapsu Hominis, & Meritis Jesu Christi*.

*De Resurrectione Mortuorum* Gregorius Nyssenus, & Johannes Chrysostomus, Tertullianus etiam, & Athenagoras in suis *de Resurrectione* Tractatibus legi possunt.

Quod spectat Sacramenta Ecclesiæ, septem Augustini Libros consulat Lector *de Baptismo contra Donatistas*, cæteros etiam editos

contra *Parmenianam*, duos *Basilii de Baptismate*, *Tractatum Divi Ambrosii de Initiandis*, *Homiliam Divi Chrysostomi octogesimam tertiam in Matthæum*, *Epistolas Paciani*, atque *Tractatus de Baptismate*, *Sermones Divi Gaudentii*, *Epistolam Divi Fulgentii ad Ferrandum de baptismo Æthyopis morientis*, *Tractatum Tertulliani de Pœnitentia*, *Fulgentium de Remissione Peccatorum*, & *Catecheses Cyrilli Jerosolymitani de Eucharistia*.

Ad Ecclesiam vero quod attinet, *Cyprianum* adeat *de Unitate Ecclesiæ*, omnes penè *Ejusdem Patris Epistolas*, & quidquid reliquum est *Augustini*, *Optati*, aliorumque *Patrum* contra *Donatistas*, & *Græcos*, una cum *Irenæi*, *Tertulliani*, & *Vincentii Lirinensis* operibus ad defendendas *Traditiones*.

Præter hosce *Patrum Tractatus* alii plures extant adinstar præludii, & præfationis universi *Theologiæ* curriculo, cujus specimen, quoddam hætenus exhibuimus.

Eorum in numero sunt *Libri de Preparatione*, & *Demonstratione Evangelica* auctore *Eusebio Cæsareensi*, quibus addendi *Tractatus D. Augustini de Vera Religione*, *de Moribus Ecclesiæ*, *de Catechizandis Rudibus*, *de Fide Rerum Invisibilium*, *de Fide*, & *bonis Operibus*, *de Utilitate credendi*, *Enchyridion ad Laurentium*, ac *Liber D. Fulgentii de Fide ad Petrum*, qui quatuor continet regulas permagni hæc in re momenti.

Purissimi sunt hi, atque genuini *Theologiæ* fons.

fontes, quibus accedent veterum Symbolorum expositiones, quas Ecclesiæ Patres, ac præsertim Augustinus, & Rufinus Aquilejensis perfecerunt.

Non inutile fuerit eodem ordine legere Africanorum Præfulum Fidei professiones, Gregorii etiam Thaumaturgi, & quotquot extant in Conciliorum Collectionibus; haberi enim debent veluti totidem amplificationes, sive expositiones Symboli ab universi orbis Ecclesiis accepti.

Ut tamen contrariis contraria luceant, legendæ quoque sunt Confessiones Fidei veterum Hæreticorum collectæ a Doctissimo *Garnier* Societatis Scriptore in suis ad Marium Mercatorum, quas amplissima eruditione locupletavit, Annotationibus.

Hiscæ Fidei Confessionibus Hæreticorum accedent eorum Retractationes, præ cæteris illa, quam exhibuit Monachus Leporius, quæ extat in Sirmundi operibus. Utinam integram id genus operum collectionem haberemus; aptissima quippe sunt ad detegendam Hæreticorum indolem, eosque ex proprio ore judicandos, & malæ fidei revincendos.

Magnum quoque nobis afferrent subsidium contra perveraces Sæctarios cætera eorum scripta, si præ manibus haberentur, ad bene multas enucleandas difficultates apud Patres, quæ ut certius finiantur, omni ex parte sunt inspicandæ. Verum a Sæctariis tantopere abhorruit quavis ætate Ecclesia, ut propterea  
nulla

nulla fere eorum scripta reliqua sint. Ex innumeris Origenis operibus si pauca excipias, quæ Latini servarunt, nihil pene ad nos pervenit integrum, absolutumque: etenim Græci despicientes quidquid hæreseos suspicione laborabat, Codices autographos vel suppresserunt, vel neglexerunt omnino.

Quo abierunt opera Gnosticorum, Manichæorum, Arianorum, Nestorianorum, Euty-chianorum, & Pelagianorum, qui sese universi orbis Doctores jactitabant? Ea omnia [exceptis aliquot Homiliis Nestorii, antiquos inter Hæreticos præcipui, quæ in Catholicorum Scriptorum monumenta irrepsērunt] ea, inquam, omnia quasi evanuerunt, & a Fidelibus contempta, quod iis persuasum esset a vera Scientia deficere, quisquis a Fide deflectit, atque Hæreticorum Scripta pro rudium, stultorumque hominum lucubrationibus habendas esse. Hoc significare voluisse videtur Irenæus, quum libris suis contra Hæreses nomen dedit *Detectionis, & Eversionis falso cognominatæ Agnitionis*: indigitans hoc titulo aptiorem Pseudo Doctorum notam, quos refellendos suscipiebat.

Neque verò satis est legenti Patrem ejus adversariorum scripta evolvere; consulendi sunt præterea ad unumquemque Tractatum cæteri ejusdem Tractatus, immo aliorum etiam Patrum opera, quibus propositum Dogma, atque vocabula ad illud pertinentia explicantur. Ita si Athanasium, vel alium quemvis Græcum Patrem de ineffabili Trinitatis My-  
sterio

Rerio legere velim, Gregorium adibo. Nyssenum, qui de significatione agit, & vi verborum, quibus Græci usi sunt ad enodandam, ut fieri potest, Ecclesiæ de tanto, tamque augusto Mysterio Doctrinam.

Verum qui religionis Dogmata addiscit, a Patribus Historiam inprimis Hæreseon iis Dogmatis adversantium perquirat, oportet. Quæ de re fusc differunt Irenæus, Epiphanius, Theodoretus, & Augustinus. Circumspectione nonnunquam utendum erga illos, ac potissimum erga Epiphanium, qui sane non omnino est accuratus; ac demum præsto sunt Recentiores, qui res historicas perfectius distinxerunt; qui enim perfecte non cognito quæstionis statu, controversiis se se immiscet, post multos labores paucissimos faciet progressus.

## C A P U T X I.

*De regulis Critices servandis in lectione  
Patrum, Fidei Dogmata  
exponentium.*

**Q**ui Ecclesiæ Patris Tractatum de aliquo Fidei Dogmate legere aggreditur, exploret inprimis oportet, num ab eo conscriptum esse certa fide constet, ne forte fortuna unum pro altero sumens Auctorem, falsam illi nullo jure doctrinam adscribat, vel etiam

Catholicam , quæ illius ætate nondum finita foret.

Hoc fere modo dignosci facile potest , Symbolum sub Damasi nomine circumferri solitum , ejus opus haudquaquam esse , quum in eo legatur , Spiritum Sanctum a Patre , Filioque procedere , quæ res licet verissima sit , attamen Damasi temporibus : nondum communibus Fidei Confessionibus inferi consueverat. (13)

Eadem ratione conjiciunt eruditi , *Opus Imperfectum in D. Matthæum* Johanni Chrysostomo diu falso adscriptum fuisse , ne dicere fas sit , Chrysostomum , una cum Arianis docuisse Spiritum Sanctum Ministrum Filii Dei , atque Doctrinam de Consubstantialitate Hæreticam esse , quod veritati vehementer repugnat. (14)

Profecto nisi adhibeatur critice in lectione Patrum , plura eis opera immerito adscriben-

[13] Illud Symbolum editum fuit inter opera Divi Gregorii Nazianzeni ; nonnihil etiam invenitur apud Augustinum Serm. 234. , quod argumento est , illud Symbolum ex variis SS. Patrum operibus conflatum fuisse post tempora Damasi.

[14] Hanc quidem rationem adducunt Viri eruditi , ut *Opus Imperfectum in Deum Matthæum* Chrysostomo falso adscriptum ostendant .

Quia tamen Sixtus Senensis , Savilius , & alii eam eludunt , reponentes id genus sententias a Sæctariis intrusas fuisse , malimalias adducere rationes ; puta , quod Auctor illius operis Vulgata interpretatione latina utatur ; quod Libros apocryphos proferat , ut Librum *Seth* , *Ezechie* , *Itinerarium Clementis* &c. ; quæ quidem ab usu Chrysostomi quam longissime distant .

bentur , quanquam illis fortasse non indigna , vel etiam supponentur alia non sine summo eorum dedecore , atque infamia . Tractatus ex: gr. *de Spectaculis* , *de Pudicitia* , ac *de Singularitate Clericorum* vetustissima sunt , atque utilissima monumenta , quæ ( si excipias sty- lum ) Divo Cypriano sine injuria assignare possis : secus vero , si Tractatum *de Monte Sion* , & *Sina* , Tractatum *de Cræna* , alioque nonnullos , qui nihil continent tanti Patris ingenio dignum , ipsi adscribere velis .

Neque vero satis esse putandum in lectio- ne Patrum expendere , num hæc , vel illa opera eorum scetus jure dicantur ; observan- dum insuper , num singularibus quibusdam præ- clare gestis in Ecclesia sint commendandi . Quan- tumvis enim *Patris* nomine antiqui generatim Ecclesiastici Scriptores donentur , non omnes tamen æquales , & pari laude digni censendi ; sed quemadmodum in Cœlis Stella differt a Stella in magnitudine , & claritate , ita præ- stantissimi illi Viri differunt sæpe numero in- ter se se .

Ubi difficilius aliquod antiquitatis caput in- genium Lectoris torqueat , æquum est , ut antiqui recentioribus testibus anteponantur , atque a sæculo ad sæculum , ab ætate ad æta- tem conicendamus , usque dum rei quæsitæ fons , & origo aperiatur . Itaque si lubeat ex- plorare , quænam fuerit quavis ætate Eccle- siæ Fides de Baptismate Hæreticorum , consi- stendum non erit in Cypriano , licet perantiquo ,

sed altius res repetenda; & exquirendum præcedentibus sæculis, num in Ecclesiis Africana antiquioribus, cujusmodi eæ sunt, quæ in Græcia ab Apostolis, vel Viris Apostolicis institutæ fuerunt, num, inquam, Traditio, quam Cyprianus obtendit, altior non sit, atque vetustior pro contraria sententia. (15)

Præterea quum aliqua Doctrinæ quæstio funditus investigari debet, recta ratione ducuntur Patres, qui Theologos magis, quam Oratores agunt, vel Philosophos, præ cæteris sunt consulendi. Quamobrem in altioris Theologiæ concertationibus adprime cavendum, ne Arnobius, Lactantius, Clemens Alexandrinus, aliique Augustino præferantur, neve ejusdem Augustini Sermones, in quibus leviter solummodo perstringit quæstiones, anteponantur Tractatibus Polemicis, ubi acute, sapienterque res dubias solvit, & difficultates enodat.

Consentaneum etiam fuerit illos deligere, qui toto vitæ suæ tempore in Ecclesiæ Fide strenue, constanterque steterunt; præ aliis, qui vel nutarunt quandoque, vel in turpissimos demum

---

[15] Ad defendendam opinionem suam Cyprianus, non tam Traditione, quam Scripturis Sanctis, & ratione nitebatur. Optime enim morat, Traditionem Stephano magis, quam sibi favere; non enim altius, quam ab Agrippino sententiæ suæ Traditionem repe-

tebat Cyprianus; quum D. Stephanus universam profferret antiquitatem. Quamobrem Cyprianus ad alia confugiebat præsidia, reponens interim Divo Stephano de antiqua illa Traditione: „ consuetudo si-  
ne veritate vetustas et  
toris est.



num errores abierunt. Idcirco quamvis multa laude digni habeantur Tertullianus, & Origenes; quoniam tamen paullatim fracti turpiter defecerunt, indeque in bonis etiam, & laudabilibus rebus auctoritatem labefecerunt suam, non injuria quis Patres illis anteponet, qui licet claritate nominis minus celebres, in Fide tamen toto vitæ spatio constantes perseveraverunt. (16)

Quum in controversias incidit Lector, quæstionis inprimis statum ab origine expendat, oportet, ac omnes ejus partes, & adjuncta exploret; accurate insuper inquireat, quæ fuerint disputantium momenta, quibus caulis ad disputandum impulsus, quibusve præjudiciis imbuti fuerint. Denique singulis eorum vestigiis insistant, neque illos e conspectu abire sinat in conficiendo itinere, ubi maximum subest errandi periculum. Qui enim *Anathematismos* Cyrilli Alexandrini, & Responsa Theodoretæ inconsiderate legeret, utranque partem committeret facillime, præsertim quum magna utrinque subtili-

S 3

lita-

[16] Quæ scribit hoc loco Auctor operis, non adeo certa sunt, ut nullus omnino superfit dubitandi locus. Quis enim neget, auctoritatem v. g. Tertulliani, ad ostendendam Fidem Ecclesiæ secundi sæculi, plurimum conducere? Immo vero nulla melius ratione, quam illius etiam ad Montanistas lapsu au-

thoritate confirmari posse videtur quorundam Fidei Dogmatum veritas; neque enim reponere possunt Sæctarii, eum defendendæ opinionis suæ studio obcæcatum. Cæterum in præponenda quorundam Patrum auctoritate tot, ac tanta sunt expendenda, ut ea in re universalem regulam statuere difficillimum sit.

litate res pertractentur : tum etiam Theodore-  
tus a præjudiciis sane non vacuus, sincere, ac  
bona fide, simul ac erudite, acriterque discep-  
taret.

Nihil fere magis de duobus controversiarum  
Scriptoribus judicium impedire solet, quam  
quum illi ad eandem veritatis affectionem  
contententes, iisdemque principiis nitentes,  
acriorem de abstractis quibudam ideis, atque  
loquendi formulis metaphysicis disceptationem  
instituant. Etenim par utrinque subtilitatum  
genus adhibentes, ægre admodum, difficillime-  
que inter se conciliari possunt. (17)

Intuendum qua ætate proposita quæstio pri-  
mum excitata sit. Fuerunt enim tempora, qui-  
bus Doctores de nonnullis Religionis Myste-  
riis obscure prorsus, imperfecteque dixerunt,  
quod sane illustrioribus ævis æquo animo ferri  
non posset. Equidem una semper fuit, eademque  
Fides, sed non eadem semper vi, & claritate  
expressa, præsertim vero tribus primis Eccle-  
siæ sæculis.

Justinus Martyr, Athenagoras, Tatianus,  
Theophilus, Irenæus, Clemens Papa, Clemens  
Alexandrinus, Dionysius item Alexandrinus,  
Origenes, Gregorius Thaumaturgus, Metho-  
dius,

[17] Exemplo est acerrima  
controversia inter Occiden-  
tales, quorum Princeps  
Damasus Summus Ponti-  
fex, & Basilium una cum  
Orientalibus Episcopis, de

usu vocis *Hypothaseos*; quum  
enim de re utrique conve-  
nirent, propter variam ta-  
men illius vocis intelligen-  
tiam, acerrimam pugnam  
commisere.

dus , Lucianus , Tertullianus , atque Lactantius , etsi Trinitatis Myſterium probe crederent , de eo tamen imperfecte admodum ſcripſere .

Tunc temporis *Naturam* inter , & *Personam* in hujus Theologiæ expositione parum omnino discriminis in loquendi modo ponebant , adeoque non attenta proprietate verborum , utrunque promiscue uſurpabant : hanc ob cauſam redarguitur Clemens Alexandrinus , quaſi crediderit , naturam Filii a natura Patris diſſerre .

Hinc Facundus , quum defenderet Eustachium Antiochenum , cujus loquendi uſus Neſtoriano errori favere videbatur , inquit appoſite , hujus Antiftitis Doctrinam condemnandam non eſſe propter ejus verborum vitium , quod benigne potius prætereire debemus ; quum enim Eustachius iis temporibus ſcriberet , quibus Neſtorii Hæreſis nondum nata erat , ab illius ſophiſmatis ſibi non præcavendum exiſtimabat .

Non modo temporum ratio haberi debet , verum etiam locorum , in quibus quæſtiones agitatae fuerunt . Altercationes olim habitæ Ægyptiacas inter , ac Orientales Eccleſias , ex diverſis , quos Ægyptii , & Orientales uſurpabant , loquendi modis originem duxerunt : hi enim , ut erudite notat in ſua Bibliotheca Dupinus , ad ſtabiliendam potius duplicis in Chriſto naturæ diſtinctionem , quam intimam

carum unionem : Ægyptii vero ad unionem potius , quam distinctionem incubuere .

Denique sedulo inquirendum quibus Philosophiæ principiis uterentur ad exponenda Fidei Dogmata . Trium priorum sæculorum Patres ex Platonis Sententia , & vocabulis , de rebus divinis plerunque differebant „ unde „ nonnulli Novatores improba temeritate ansam arripuere dicendi , priorum sæculorum „ Ecclesiam Fidem coluisse æqualitati , distinctioni , & coæternitati personarum contrariam ; addentes impudentissime , antiquos Patres in ea Sententia versatos , qua Verbum Divinum ad Creationem usque Mundi perfectum non fuisse , crederent : scilicet tunc solum temporis effusam in eum Sapientiam , quæ perfecte existit , antea vero sicut in semine germen latuisse in sinu Patris .

*Defens.  
de la  
Perpet.  
de la  
Foy L.  
7. C. 4.*

„ Verum , (ut alia occasione scribit doctissimus quidam Theologus) hisce cavillationibus id unum ostenditur , duplex adhibuisse Patres Ecclesiæ loquendi genus , aliud Philosophorum , aliud Theologorum ; quum „ agerent Theologos , Philosophiæ parum sollicitos , quod in Mysterio ordinem naturæ superiorem contemplarentur ; quum vero „ Philosophos , parumper supersedisse a Mysteriis , quod probe nossent , Philosophicos ejusmodi sermones solo naturæ ordine contineri . Philosophiam , & Theologiam spectant , veluti duas diversas classes , quibus „ nihil commune foret , atque adeo tanta in lo.

„ loquendo circumspectione opus non esse ;  
„ putarunt , nihil veriti , ea , quæ tanquam  
„ Philosophi proferebant , Theologicis opponi  
„ posse Mysteriis .

Equidem si solis quorundam veterum Patrum verbis de Trinitatis Mysterio stare libeat , suspicari quis posset , eos Platoniorum Sectam in Theologiam Christianam invehere voluisse , ac quæ a nobis Mysteria vocantur , aliud non esse , quam Platonicas subtilitates aliquibus Religionis Christianæ principiis innixas . Immo jure quodam dici posse videretur , Judæos Hellenistas , Platonica Philosophia imbutos ejus semina primorum Fidelium mentibus injecisse , quæ Patres deinde collegerint , excoluerintque . Verum si animo advertas , quo ex fonte Doctrinam suam utat imperfectam hauserit Plato , nimirum aliqua saltem parte ex Theologia Moyfis , qua ab Ægypti Sapientibus nonnihil eruditus fuerat , etiamsi eam funditus non percipisset , non secus ac Institutores sui , deponentur facillime præconceptæ opiniones fallaci hac ratione suffultæ .

Quum itaque Patres in exponendis Mysteriis Platonis vocibus usi sunt , haudquaquam in animo habuere novam Doctrinam immittere , levi , adeoque parum firmo fundamento innixam ; sed quum Philosophia Platonica apud Gentiles ad Christum conversos in usu foret , convenientissimum videbatur illius vocabula adhibere ad exponendum Neophytis Trinitatis Mysterium ,  
cujus rudem , & informem speciem ex corrup-  
tis

tis Gentilium traditionibus efformarant Philosophi.

Revera Plato, ejusque Discipuli aliquam sibi Trinitatis Imaginem effinxerant: etenim unum Deum esse putabant, summum, spiritalem, & invisibilem, quod *Ens* appellabant; post illud inferius *Ens* statuebant, dictum *Rationem*, præsentium, ac futurorum ducem, & universi Creatorem; tertium denique, quod *Spiritum*, seu Animam Mundi vocabant.

Et si quædam veritatis umbra doctrinam hanc sequi videatur, ita tamen a vera luce distat, ut aptiori nomine appellari non mereatur, quam omnium, quæ contra Sanctissimæ Trinitatis Mysterium exortæ sunt, Hæreseon fontis, & originis.

Non itaque de veterum Patrum Doctrina judicium dare oportet ex nonnullis vocibus a Platonicorum Philosophia depromptis, verum ex Traditione Ecclesiæ definiente verborum sensum, quæ licentiores homines in pravum contorquere possent, putantes ea a Patribus hoc solum fine adhibita, ut ingenii acumen ostenderent, amplioremque opinamenti suis auctoritatem compararent; quum e contrario Patres Ecclesiæ de Fidei Christianæ Mysteriis secundum Platonicorum methodum, & verba loquentes, hac solum mente id fecerint, ut Gentilium animos sibi conciliarent, eisque majori, qua poterant, perspicuitate proponerent; quæ cæteroquin benevolis auribus excipere detrectassent.

CAPUT

## CAPUT XII.

*Quomodo variorum hominum moribus,  
& ingenio se se accommodarent  
Ecclesiæ Patres in per-  
tractandis Fidei  
Dogmatis .*

**E**cclesiæ Patres quovis tempore , ac dili-  
genter discernere consueverunt Fidei ca-  
pita , quæ indiscriminatim Fidelibus , Judæis ,  
& Gentilibus , ab iis , quæ solis Fidelibus pro-  
poni poterant . „ Priora cum pane communi <sup>Methodi  
dei Patres</sup>  
„ omnium cibo conferebant , posteriora vero  
„ cum panibus propositionis Sacerdotibus dun-  
„ taxat destinatis . Appellabant illa lac puero-  
„ rum , elementa Fidei , exteriorem Evange-  
„ lii Doctrinam , ista vero cibum hominum  
„ perfectorum , Doctrinam interiorem , altio-  
„ ra , divinaque Mysteria , Evangelii decus ,  
„ & gloriam .

Hac porro ratione coram omnibus de uni-  
tate Dei , summaque potestate differebant , de  
Creatione Mundi , de temporali Christi Jesu  
Nativitate , de illius Miraculis , Præceptis ,  
Passione , Morte , Sepultura , de Resurrectio-  
ne , Ascensu , & Gloria ad dexteram Pa-  
tris .

Palam quoque , ac publice loquebantur de  
Eccle-

Ecclesia, de Remissione Peccatorum, Resurrectione Carnis, extremo Judicio, & Vita Æterna; quibus adde distinctionem proborum ab improbis Angelis, quo significarent Gentilibus, illorum Numina ex improbis Angelis, sive Dæmonibus constare, qui falsis eos Oraculis captos, suisque præstigiis circumventos ab adoratione, & cultu veri Dei avertabant.

Ea fere sunt, quæ Patres palam, & coram omnibus edicere solebant, recondita vero, sive arcana Religionis occultabant profanis hominibus; neminem iccirco eorum videre est, qui Mysteria Trinitatis, Incarnationis, Eucharistiæ, aliorumque Sacramentorum Paganis aperuerit. Altissimo hæc omnia premebant silentio, nec alius fortasse præter unum Justinum coram Paganis de Baptismate, & Eucharistia loquendi facultatem sibi adscivit; quod nonnisi necessitate compulsus fecit, ad repellendas videlicet accusationes, & calumnias a Christianæ Religionis hostibus confectas, qui perperam interpretabantur ea, quæ percipere, intelligereque non poterant.

Ritus etiam, & Cæremonias, quibus in administrandis Sacramentis utitur Ecclesia, aliosque pietatis, & Religionis actus, quos domi exercere Christiani consueverant, Patres Ecclesiæ Gentilibus omnino ignotos servabant, secundum Apostolorum consuetudinem, qui, ut notat *Schelfstrate* contra *Ernest Tentzel*, quum ad Synagogas, & Tempia convenirent, ut plurimum tamen privatas se in-

ædes



ædes ad fractionem panis se recipiebant . Quanquam enim Apostoli de Sacramento Eucharistiæ multâ simpliciter , aperteque dixerint , illud tamen adprimè animadvertendum , solis Fidelibus inscripta fuisse illorum opera .

Tanta circumspectione utebantur Patres , ut Catechumenos Orationem Dominicam non edocerent , nisi paucis ante Baptisma diebus , ac nusquam eis scripto traderent Apostolorum Symbolum , vel aliud quodlibet in Ecclesiâ pervulgatum (18) . Sozomenus celeberrimus <sup>Hist. L. 1. Ch. 20.</sup> quinti sæculi Historicus refert , quum animo proposuisset Historiæ suæ Symbolum Nicænum inserere , a piis Viris dissuasum fuisse ; hanc præcipue ob causam , quod ista Catholi- cæ Fidei expositio a solis Sacerdotibus , atque Fidelibus legenda foret .

Itcirco Religionis nostræ Mysteria perquirenda non sunt in Patrum libris adversus Ethnicos , licet in illis arrepta occasione illustrant nonnunquam cætera Christianæ Fidei capita , multa ex Philosophia , & profanis Literis congerentes , ut ea Gentilibus ex indultia opponerent , qui se talibus Doctrinis exultos profitebantur .

Vc.

(18) Hieronymus , & Augustinus , quorum ætate eadem vigebat adhuc consuetudo non tradendi scripto Catechumenis Symbolum Apostolorum , aliam tradunt ejusmodi consuetudinis causam ; quod vide-

licet non in charta , aut atramento , sed in tabulis cordis carnalibus scribendum foret . Lege Hieron. Epist. 38. ad Pammachium , & Aug. Serm. 212. de Trad. Symb.

Verum contra Judæos disputantes, profanam hanc Scientiam minus adhibebant, utpote quod illam Judæi parvi omnino penderent, Apostolo teste *prima ad Corinthios*: *Judæi signa petunt, & Greci Sapientiam querunt*. Quamobrem, inquit Divus Maximus, Deum pro variis utriusque Populi moribus dedisse Gentilium Apostolo Clavem Scientiæ, Judæorum autem Apostolo Clavem Potentiæ. „Ambo Claves a Domino perceperunt, Scientiæ „iste, ille Potentiæ.

Judæos vaticiniis præsertim, & Scripturarum promissionibus urgebant, ut evidenter ostenderent, totam Veterem Legem, & cuncta majorum suorum gesta totidem fuisse figuras, ac præagitationes, quæ Christi Jesu adventum, ipsiusque Ecclesiam significarent.

Divus Justinus *contra Tryphonem* innumeris Scripturæ Sanctæ Oraculis Christum Dominum verum esse Messiam, demonstrat, sive Verbum Dei, quod apparuit Patriarchis, humanamque statuto tempore naturam assumpsit, ac demum ad Humani Generis salutem natum est ex Virgine.

Tertullianus manifestissime probat, Legem Mosaicam, atque legales Cæremonias ad tempus solummodo institutas, & usque ad Christi Jesu adventum, qui vere Messias est a Judæis expectatus secundum Prophetarum vaticinia, quem tamen Judæi non cognoverunt, inepte miscentes, quæ dicit Scriptura de ejus Gloria in extremo adventu, cum iis, quæ in  
pri.

primo abjecta, & contemnenda videntur.

Eadem methodo utitur contra Judæos Cyprianus in suis *ad Quirinum Testimoniis*. Aper-  
tissime illis ostendit ex Scripturis, præsertim  
ex Veteri Testamento, eorum Legem ad certum  
duntaxat tempus latam fuisse, neque semper  
mansuram, atque Judæos olim repellendos adve-  
niente Christo, novum Templum extruendum,  
nova Sacrificia, novum Sacerdotium, novam-  
que Ecclesiam a Christo Salvatore, qui est Sa-  
pientia, & Verbum Dei Humana Carne in-  
dutum, ad Genus Humanum a servitute pecca-  
ti, æternaque morte redimendum. Hunc Re-  
demptorem diu, multumque promissum, ex-  
pectatumque ex Davidica Stirpe Bethleemi  
nasciturum, primum ejus adventum humilem  
futurum, obicurumque, a Judæis Cruci affi-  
gendum, tertia die resurrecturum, venturum  
denique in fine Mundi cum Majestate, & Glo-  
ria ad judicandum vivos, & mortuos.

Quum autem Patres erudirent Catechume-  
nos, multa inprimis circumspeditione uteban-  
tur, ac moderatione, tum ob Sanctitatem My-  
steriorum, ne Gentilibus violanda exhiberen-  
tur, tum quia minus æquum videbatur Au-  
ditores infirmos tanto Doctrinæ, quæ illorum  
Fidei modum excedebat, pondere premere.

Pro vario Catechumenorum gradu præcep-  
ta illis, atque institutiones tradebantur. Ori-  
genes *contra Celsum* duos solum videtur agno-  
scere gradus. Recentiores vero quidam eru-  
diti tres numerant: primo tempus illud, quo

Ca-

Catechumenos adcenſeri cupidos probabant Paſtores , atque illorum animos , & corda ſcrutabantur , ut ait Auguſtinus , ac demum ea , quæ percipiendis Chriſtianæ Fidei veritatibus obefſe poterant , impedimenta removebant .

In ſecundo Catechumenorum gradu ii cenſebantur , qui quum Religione inſtitui cœpiſſent , nondum exceperant Symbolum , ut purificarentur , ſive ut baptizarentur .

Tertium denique gradum illi tenebant , qui quum omnibus Evangelii Præceptis obſequi ſtatuiffent , ab optimis propoſitis nunquam dimotum iri credebantur .

In hoc , ut ita dicam , tyrocinio duos , treſve annos impendere ſolebant , Chriſtianæ interim Morum diſciplinæ , ac Fidei rudimentis imbuiebantur , quin Myſteriorum tamen expoſitionem audirent . Hæc enim iis duntaxat fiebat , qui ex numero competentium erant , ſeu , qui proximis Quadrageſimæ diebus nomen dabant , ut Sacro Baptiſmate diebus Paſchatis abluerentur : tunc enim primum exponebantur iis Myſteria , ac Cæremoniæ Baptiſmatis .

Ad hæc in promptu erant Ritualia , quæ legenda traderentur , quæque ut altiori mente reponerent , exſcribebant : de hiſce ritibus loquitur Cyrillus Jeruſolymitanus in ſuis Catecheſibus , ubi græcis vocibus *συμβολα* , & *αἱρετικαὶ* notat , Catechumenos nunc ad Orientem , nunc ad Occidentem ſe convertiſſe .

Primis diebus ſermonem habebant ad competentes de gratia Baptiſmatis , & Pœnitentiæ ,  
dein

dein de præcipuis Fidei Dogmatis, postmodum de unoquoque singillatim Christianæ Fidei Capite, ac consecrariis, quæ ad defendenda Trinitatis, & Incarnationis Mysteria colligi poterant ex Symbolo: denique, quum, ut mos erat illis temporibus, proxime ad tria Sacramenta Baptismatis, Confirmationis, & Eucharistiæ accedere deberent, Doctrina Sacramentorum, ac virtutibus necessariis ad illa digne, utiliterque suscipienda funditus imbuebantur.

Qui præerant illis erudiendis, de hisce omnibus perspicue differebant; cunctas ad apicem <sup>Mark. des Pe- res 4.</sup> Sacri Codicis metaphoras enucleabant, definiabantque, quo sensu hæ figuræ sumendæ forent. Quum nihil verbis augerent, simpliciores adhibebant voces, aptioresque ad enodanda Mysteria, missis subtilibus curiosorum cavillationibus, eas solummodo tractabant quæstiones, quæ ex penu, ut ita dicam, & natura rerum, de quibus agitur, sponte nascuntur.

Labente Octava Paschatis Neophytos, sive recens Baptizatos instruere pergebant. Divus Cyrillus Jerosolymitanus in suis *Catechesibus Mystagogicis* magnopere inculcat votum renuntiandi Diabolo, Mundo, & Pompis ejus, quod in Baptismate nuncuparunt, eiisque præstantiam, & consecraria commendat: memorat etiam, quæ jam dixerat de Sacramentis, illorum Doctrinam, & mysticas rationes majori, quam ante perspicuitate, & verborum copia explanat.

Quum Christianos informabant Ecclesiæ Pa-

T

tres

tres, etiamſi præcipua Religionis Capita explicare curarent, ac Fidei veritates per partes accuratius, quam hodie fiat, expendere, certos tamen ſibi fines ſtatuebant, quos nunquam fere prætergrederentur, neque immorabantur improborum hominum argumentis, quæ obtruderent ad illudendum potius, quam ad diſcendam, percipiendamque Chriſtianam Religionem.

Epi.  
305.  
Nov.  
Edit.

Altercationes ex humanæ mentis ſubtilitate profectas longius non perſequebantur; Divus Auguſtinus reſpondens Conſentio de præſenti Corporis Chriſti ſtatu in Cælo: „ Non ergo „ ( inquit ) & nos addamus inquirere, quod „ ille non addidit dicere, & de compendio, „ ſi placet, finita ſit quæſtio. Fortaſſis enim „ accepta occasione Sanguinis, urgebit hos „ moleſtior perſcrutator.

Quum Sancti Patres de controverſiis plerunque non agerent, niſi ad confutandas Hæreſes ſua ætate graſſantes, omiſſis, quæ ante prodierant, vel prodire deinceps potuiſſent, accirco ferendum non eſt de tota illorum Doctrina iudicium ex Homiliis, quanquam inter illas extant nonnullæ, in quibus de altioribus Myſteriis, atque difficillimis quæſtionibus Dogmatice diſſeruerunt.

Gregorius Nyſſenus in Homiliis *de Nativitate, & Baptiſmate Chriſti*, Sanctus Leo Papa in Sermonibus contra Eutychetem, & Auguſtinus *de Verbis Apoſtoli* uberrimam ſcientiæ copiam produnt, plerunque tamen ſolam Mo-  
rum

tum Doctrinam consecretantur; si vero quid amplius dicunt, formulas adhibent, quibus tantum velamentis reconditiores Mysteriorum sinus profanis Gentilium oculis subducunt: hinc crebro in illorum Sermonibus hæc verba reperies: *alloquimur fideles, capiunt initiati quæ dicimus*, aliaque similia, quibus notant arcanum, quod suspectis auditoribus aperire nonlebant.

Illud etiam animadvertendum, Patres in instituendis Fidelibus simplicissime doctrinam exponere, neque multis argumentis firmare, consuevisse, secundum communem sententiam, qua veritatibus ab Ecclesia propositis absque ulla ratiocinatione fidem ab imperitorum vulgo adhibendam existimatur, utpote qui Mysteria scrutari amplius non valeant.

Origenes, & Hilarius Christianum Populum, <sup>In Cels. L. 1. de Trin. L. 2.</sup> quod Trinitatis Doctrinam spectat, solis contentam esse debere Evangelii verbis affirmant; in hoc Mysterio de loquendi formulis cavilandum non esse docet Athanasius, neque curiosius investiganda, quæ scrutari non licet; adeo ut insulse putemus, humanæ mentis ambitu comprehendi posse, quod vim omnem superat, & rationem humanam; atque hanc præcipue ob causam, ut ait recentior Philosophus, „ Christus Dominus, & Apostoli manifeste nobis non tradiderunt argumenta, „ rationis, quibus veritates Fidei firmare, „ solent Theologi, quia probe noscerent, ea  
Viris

„ Viris perspicacibus nota , simplicibus vera  
 „ inutilia esse futura .

Denique Patres cum Hæreticis disputantes vela dabant , ac de Mysteriis aperte loquebantur , cuncta proferre opportunius existimantes , ut veritatem ab errore , & calumnia sartam , testamque servarent : eo vel maxime , quod persuatum illis foret , hoc solum fine permitti Divina Providentia Hæreses , ut explicatis Dogmatis , homines infirmi , atque nutantes in Fide roborentur cælestis luminis ope , quo Spiritus Dei suam illustrat Ecclesiam .

Quantuscunque tamen fuerit Patrum conatus , non temere credendum est , ab iis de unaquaque re controversa vel omnia dicta fuisse , quæ dici potuissent , vel ita perspicue , ut verbis suis nihil addendum reliquerint , vel ita acuto fuisse ingenio , ut omnia , quæ temporis successu colligi poterant consuetudina , præviderint ; quis enim inficietur , multa iis , in æstu præsertim disputationis excidisse , quæ paulo accuratius exprimi potuissent ; in delictu quoque argumentorum relictis sæpe numero firmiter adhibuisse subtiliora , uti mos erat veterum Philosophorum , qui ad defendendas opiniones suas non probabilibus duntaxat , verum etiam sophisticis utebantur argumentis ?

2. 7.  
6. 2.

Defensor operis *de Perpetuitate Fidei* de secunda Nicæna Synodo verba faciens , inquit apposite : etiam si Patres hujus Concilii , qui doctrinam de cultu Imaginum multis , firmisque rationibus munierunt , alias quasdam  
 minus



minus accuratas non sustulerint, id tamen nequaquam obesse cæterarum firmitati, quæ ad stabiliendam Traditionem, quam Canonibus ipsi suis firmarunt, abunde sufficiunt.

„ Deinde ( ut addit idem Auctor ) omnia,  
 „ qualiacunque sint, argumenta indigent bona  
 „ fide, quum nullum vel purum, clarissimum-  
 „ que sit lumen, quod mala improborum ho-  
 „ minum fide obscurari, delerique non possit;  
 „ propterea quomodocunque nectantur con-  
 „ lectaria, ad suprema quædam principia, quæ  
 „ & probatione non egeant, & neminem ha-  
 „ beant dissentientem, omnia semper sunt re-  
 „ vocanda. Itaque in explicandis antiquis  
 „ Auctoribus nihil magis alienum est a recta  
 „ ratione, quam singula illorum argumenta  
 „ adamussim expendere velle.

Nonnulli denique nodi, qui apud Patres occurrunt, nec ex ratiocinationis imbecillitate, nec ex vocum obscuritate, sed ex rei, quam tractant, altitudine proficiscuntur, quod optime ostendit Augustinus in suis *contra Julianum* operibus. Et sane luderet ille, qui veteres Doctores ob ejusmodi difficultates molestius urgere vellet, & adversus eos argumenta delumeret ex sublimitate Doctrinæ, quæ major est, quam ut communibus modis percipiatur.

Immo plures etiam quæstiones data opera Patres prætermisere, ne alicujus sententiæ patrioni ab Hæreticis haberentur, atque sponso-

res, in quas nec ipsi quidem Doctores Catholicici conveniebant, sed eas solummodo vindicabant, & tuebantur, quæ generatim acceptæ, & ab universâ Ecclesiâ probatæ erant; quam quidem optimam regulam, & normam in suis etiam Definitionibus Sacra Concilia quavis ætate servarunt.

## CAPUT XIII

*De loquendi modis, de vocibus, atque figuris, quas Ecclesiæ Patres adhibent in exponendis Fidei Dogmatibus.*

**I**N lætione Patrum Ecclesiæ summa opus est, æquissimaque ratione; quum enim, apud eos nonnulla occurrunt loca perspicua, alia vero subobscura, non ex obscuris clara, sed ex claris obscura sunt exponenda. Quin, immo etiamsi unum solummodo perspicuum haberetur testimonium, ex illo cætera omnia explicanda forent, præcipue si Auctoris sui doctrinæ basis esset, ac fundamentum.

Quam potiori igitur ratione cavendum, ne plura evidentia ex uno obscuro, involutoque explanentur? Eapropter gravissime conqueritur Rufinus, se ab adversariis immerito erroris accusatum, quod transferens *Principia* Origenis, locum incaute reliquisset, ubi verus iste Theologus negare videbatur Patrem videri

videri a Filio Dei, quum alibi sexcentis in locis erratum illud aperte, constantissimeque refellat.

Jam dudum scriptum reliquit Tertullianus: *De Pudicis. Cap. 16.*  
,, hoc sollemne perversis, & idiotis, & Hæ-  
,, reticis alicujus Capituli ancipitis occasione  
,, adversus exercitum sententiarum instrumenti  
,, totius armari.

Gregorio Nysseno, qui sæpe legerat Origenem, nonnulla in Sermonibus quandoque exciderunt, quæ prisci illius Scriptoris erroribus conspersa videntur: non sine maxima tamen injuria Antistiti Catholico errores tribuerentur Scriptoris, quem ille labentem solertissime vitavit, deseruitque.

Divus Augustinus irridet Julianum, qui defensore gloriabatur Chrysostomo, ea ratione fretus, quod satis alicubi non expressisset, quæ tamen alias adeo perspicue exposuerat, ut Julianum prorsus obrueret. „ Quid te adju- *Lib. 2. contr. Jul.*  
,, vit ( inquit ) quod Johannis Constantino-  
,, poli, tanquam tibi suffragetur, testimonium  
,, posuisti? An ut unum verbum quasi ab eo  
,, prætermisum, velut acuta calliditate cap-  
,, tares, & tot verborum ejus, quibus obrue-  
,, ris, tam ingentem tibi aggerem commo-  
,, veres?

Recta etiam ratio vetat, ne ex variis huc, illucque per Patrum opera dispersis locis de illorum mente feratur sententia; alioquin, idem Pater secum ipse interdum pugnaret, quum eadem res diversis sæpe modis pro va-

riis rerum, ac temporum circumstantiis proponi possit. Præterea nulla lege sancitum est, ut una semper, eademque servetur accuratio, extraneis præsertim locis, alienisque prorsus a natura Fidei, quæ alibi certis rationibus munita est, atque firmata.

Expendendum proprio loco unumquodque testimonium, ac punctum, ut ita dicam, ad quod omnes lineæ diriguntur, attentius est inspiciendum; hæc qui non caveat, totam forte Auctoris mentem, doctrinamque turbabit, ejusque verborum, ac sententiarum ordinem miscebit, quo fere pacto nominis alicujus literæ mutantur, ut aliud quidquid libuerit; significant.

Adnotandum præterea, Ecclesiæ Patres, quum de rebus agunt jam explicitis, certissimisque, non eadem uti diligentia, qua solent in dubiis, atque controversis. Posteaquam in Concilio Nicæno perculsa, & prostrata fuit Arianorum Hæresis, quum non metuerent amplius, ne verba in quæstionibus mox finitis adhibita pravum detorquerentur in sensum, Patres Græci loquentes de Filio Dei vocabula *Mediatoris*, *Ministri*, & *Instrumenti* libere usurparunt, quæ antequam Ecclesiæ Decreto Catholicum transferrentur in sensum, asperanimis, & ambigua attentissimis Christi gregis Pastoribus visa fuissent.

Non Doctrina ex Patrum verbis aliquando imperfectis, sed verba potius ex Doctrina illorum temporibus generatim accepta expendenda

denda sunt. Qui vocem *Hyposthaseos* sumeret pro *Persona*, non modo Antenicænorum, verum etiam, qui Nicenæ Synodo interfuerunt, Ecclesiæ Patrum Fidem everteret, quum non ad *Personam*, sed ad *Substantiam* exprimendam *Hyposthaseos* nomen usurparint, ut bene notat tomo secundo Dogmatum Theologicorum Petavius. „ Vox *Hyposthasis* ( inquit ) non modo ante Concilium Nicænum, sed ab ipsis quidem Nicænis Patribus aliter fere accepta est, quam pro *Ousia*, & *Substantia*, minime vero pro *Persona*, & proprietate διακριτικῇ, ac numerum faciente.

In nonnullis vocibus usurpandis minus quandoque Patres ad propriam, communemque significationem, quam ad notionem ab adversariis subjunctam, cum quibus disputant, animum intendunt. Hinc ortum habuit maxima, quæ in disputationibus præsertim Cyrilli Alexandrini contra Nestorium, ejusque sectatores offusa est obscuritas, atque caligo.

Neque vero ad obscura duntaxat loca, verum etiam clariora illustranda rei expressæ cognitio in auxilium vocari debet: fieri quippe nequit, ut disertissimi etiam Viri tanta vi, tantaque perspicuitate animi sui sensus exprimant, quanta opus est ad illos perfecte, cumulateque percipiendos.

Quotiescunque una, eademque vox duplicem habet significationem, generalem unam, singularem alteram, tum facta in primis cum Auctoris mente comparatione, illam procul dubio

dubio amplecti debemus, quæ cum præcipuo ejus fine cohæret.

Lib. 7.  
Cap. 2.

Notat Defensor operis *de Perpetuitate Fidei*,  
 „ quum eidem vocabulo duplex subjecta est  
 „ notio, quarum altera conveniat, altera  
 „ pugnet cum aliquo Dogmate, fieri posse, ut  
 „ altera ex illis significationibus obsolescat,  
 „ si nimirum id, quod in hoc Dogmate præ-  
 „ cipuum est, satis non indicet, eique quod  
 „ propria non sit, & unica, aliarum notio-  
 „ num subsidio suppleri possit: sic data Ca-  
 „ tholicorum hypothese de Eucharistiæ My-  
 „ sterio, vox *Imaginis*, quum opponatur præ-  
 „ sentię reali, eamque excludat, ac eidem,  
 „ altera significatione conveniat, fieri potest,  
 „ & consentaneum adprime erat, ut ejusmodi  
 „ vox paulatim antiquaretur, quum de Eu-  
 „ charistia differendum esset, eo nimirum sen-  
 „ su, qui cum præsentia reali non convenit;  
 „ ita ut Eucharistia signum, vel imago non  
 „ diceretur amplius, iisque vocibus ad ean-  
 „ dem rem exprimendam aliæ sufficerentur,  
 „ quæ pravo sensui obnoxie nequaquam  
 „ forent.

„ Quum vero vocabulum simpliciter, ac  
 „ secundum naturam exprimit Mysterii veri-  
 „ tatem: adeo ut omnibus quæcunque adhi-  
 „ beantur metaphoricæ locutiones sit subin-  
 „ telligendum: neque aliud par, tamque ad  
 „ significandum accommodatum in tota Lingua  
 „ reperitur, fieri haudquaquam potest, ut ob-  
 „ solescat. Ita vox *Deus*, quum ita proprie,  
 „ &

„ & secundum naturam conveniat Christo Ser-  
 „ vatori, ut sublata hac voce, quid vere sit  
 „ Christus Jesus intelligi nequeat, nullo un-  
 „ quam tempore dici poterit, Christum Jesum  
 „ non esse Deum, nisi eliminetur una Dog-  
 „ ma de ejus Divinitate, quod nunquam  
 „ continget.

Quum Patrum verba proprio sensu, & ob-  
 vio Catholica, in pravum tamen Hæretico-  
 rum contorqueri possunt, tunc in malam par-  
 tem accipi non debent, sed ea potius signifi-  
 catione, quæ prior menti nostræ se offert,  
 exponi.

Similiter quum figuratis vocibus utuntur,  
 ex simplici figuratus sermo, non autem sim-  
 plex ex figurato est interpretandus; præse-  
 ritim, quum figuratus a consuetis, & natura-  
 libus loquendi modis recedens, nisi ad com-  
 munem formam revocetur, deprehendi non  
 possit: „ ex communi hominum consuetudine <sup>Id. ibid.</sup>  
 „ locutioni quidem figuratæ simplex supponi, <sup>C. 1.</sup>

„ locutioni quidem figuratæ simplex supponi,  
 „ simplici autem figurata sine injuria non  
 „ potest; exemplo est *Petra Deserti*, quæ, quum  
 „ significaret Christum Jesum, non est tamen  
 „ Christus Jesus, nec nisi mentecaptus dicere  
 „ contra posset, Petra est Christus Jesus, at  
 „ Christum Jesum non significat.

„ Hoc differunt simplices, & metaphoricæ  
 „ locutiones, quod simplices unam compre- <sup>Id. ibid.</sup>  
 „ hendant ideam, metaphoricæ autem duas, <sup>L. 6. C.</sup>  
 „ totidemque menti repræsentant. Objiciunt  
 „ enim menti & rem, ad quam significan-  
 „ dam

„dam adhibentur, & imaginem uno, eodem-  
 „que tempore, qua res significatur: ex hisce  
 „ideis altera rei naturalis est, & aliena vo-  
 „cabulo, altera naturalis vocabulo, & aliena  
 „rei significatæ.

„Consuetudine loquendi metaphoricè  
 „ita quandoque obicuratur hæc duplex  
 „idea, ut nihil amplius menti, quam  
 „rei significatæ, cognitæque obversetur ima-  
 „go: at tunc non metaphorica dici debet;  
 „quum omni careat metaphoræ vi, & ve-  
 „ritate, sed potius ambigua; varias notio-  
 „nes habens pro varia occasione. Perraro ta-  
 „men contingit, talem esse, tamque repetitam  
 „alicujus vocis metaphoram, ut vox ipsa  
 „obvium sensum non amplius objiciat, ac  
 „propriæ velut vocis locum teneat; maxime  
 „vero, si ejus generis sit metaphora, quæ  
 „non in uno solum, sed pluribus verbis,  
 „multisque, & continuatis allegoriis con-  
 „sistat.

Patres Ecclesiæ exemplo Christi Domini,  
 ejusque Apostolorum usurpant sæpe allegorias;  
 & parabolas, sive figuras, quæ rerum imagi-  
 nem ita ob oculos ponunt, ut veritas, quam  
 continent, non percepta imagine intelligi nullo  
 modo possit. Etenim allegoria nihil proprie  
 est, nisi metaphoræ continuatio; atque sicuti  
 vox metaphorica dicitur, quæ ad aliud signi-  
 ficandum adhibetur, quam quod suapte natura  
 significat; ita allegoricus sermo vocatur, in  
 quo multæ res exprimuntur vocibus, quæ ad  
 illas



Illas significandas proprie adhiberi non solent;  
 „ adeo ut allegoriæ ( quemadmodum inquit eruditus  
 „ quidam Auctor ) obſcuriores multo *Method.  
des Patres  
10. C.*  
 „ eſſe debeant, quam metaphoriæ: ſi enim vel  
 „ una vox ad alienam notionem translata  
 „ obſcuritatem parit, quanto major erit obſ-  
 „ ſcuritas, quum integra oratio verbis com-  
 „ ponitur, aliud omnino ſignificantibus, quam,  
 „ quod ex primæva hominum inſtitutione  
 „ ſignificare deberent.

„ *Synecdoches* etiam antiquis Eccleſiæ Pa-  
 „ tribus admodum familiaris eſt: hæc figura *Id. ibid.*  
 „ non rem ab altera denominat, ut metapho-  
 „ ra, ſed totam rem ab alterutra, ac ſæpe  
 „ minima ejus parte: at quemadmodum par-  
 „ tem adhibet quandoque nobiliorem, duobus  
 „ iccirco modis, iisque omnino diverſis ſu-  
 „ mitur; quum enim nobiliorem partem uſur-  
 „ pat, perſpicuum eſt, rem totam ea deprimi:  
 „ hinc Clemens Alexandrinus explicans qui-  
 „ bus modis occultari poſſent Myſteria, aiebat,  
 „ nullum eſſe tutiorem, quam uſum *Synecdo-*  
 „ *ches*; ſi enim, inquit, qui ea ignorat, fal-  
 „ litur, qui novit, certe non fallitur.

„ Ad aſſequendam Scripturæ intelligentiam *Id. ibid.*  
 „ Sancti Patres principio ponendum admo-  
 „ nent, *Synecdoches* nunc ad perſtringenda,  
 „ nunc ad occulenda Myſteria adhiberi: atque  
 „ ii Patres, qui Scripturam imitati ſunt, hanc  
 „ figuram toties uſurparunt, ut mirum pro-  
 „ ſecto ſit, poſt tot apertiffimas eorum decla-  
 „ rationes non deeſſe homines adeo pertina-

„ces, ut eorum loca, in quibus de myste-  
 „riis funditus, & fufe tractarunt, ex aliis  
 „explicare velint; in quibus ad perstringen-  
 „das, vel occultendas Paganis, & Catechu-  
 „menis veritates, quas illorum mens, & co-  
 „gitatio capere non posset, de iisdem myste-  
 „riis per hanc figuram differuerunt.

Occurrit etiam apud Patres multis in locis transpositio quædam verborum *Hyperbaten* dicta; immo etiam integræ orationes, quarum series adeo interrupta est, ut nulla prorsus esse videatur, quod dicitur *Anacoluthæ*; parum attentis hisce figuris in lectione Patrum Sectarii eorum testimoniis involutis, figuratisque abusi sæpe sunt.

*Hyperbates*, & *Anacoluthes* usus præsertim apud Patres Antenicænos, qua ætate plurimæ celanda erant Mysteria, creberrimus est, adeo ut nulla in eorum Sermonibus structura, nulla inesse ratiocinationibus ordinis, & collationis cura videatur. Scitaberis fortasse, inquit D. Clemens Alexandrinus, cur Commentarios nullo ordine servato scripserim? Nimirum veræ Philosophiæ arcana iis vulgare, qui omnia audacter, & temere convellenda suscipiunt, res est periculo plena.

Strom.  
 x., c. 6.

Quod comparationes attinet Ecclesiæ Patri-  
 bus valde sollemnes, quum non omnes omni  
 ex parte adequatæ fieri possint, iniquus certe  
 foret, qui ea solum parte, qua vitiosæ sunt,  
 sumere vellet, ut contra ipsosmet Patres in-  
 torqueret; eo quippe sine institutæ sunt com-  
 paratio-

parationes, ut res obscuræ innotescant per clari-  
iores, non autem, ut omnibus sui partibus  
doctrinam, cui explicandæ inserviunt, susti-  
neant, atque suffulciant.

„ Videtur nonnullis ( inquit apposite Au-  
„ ctor *Defensionis de Perpetuitate Fidei* ) duarum  
„ simul rerum comparisonem fieri non posse,  
„ nisi omnino pares sint, similesque: nulla  
„ tamen fere extat hujus generis comparatio,  
„ quum enim omnia, quæ in hac rerum uni-  
„ versitate continentur, similis sint, atque  
„ dissimilis naturæ, institutæ comparationes,  
„ peculiari, qua fiunt, ratione finitæ, ac cir-  
„ cumscriptæ sint oportet. „ Quum Theodo-  
rus Abucara Episcopus Cariz, Saracenum Au-  
gustissimo Eucharistiæ Sacramento instituens,  
inquit, Spiritum Sanctum in dona descendere,  
suoque Divinitatis afflatu Panem, & Vinum  
in Corpus, & Sanguinem Christi convertere,  
eadem ratione, qua stomachi ardore cibus in  
proprium cujusque corpus convertitur, quum,  
inquam, hæc loquitur, procul dubio ejus  
comparatio manca censeretur, mutilaque:  
satis est nihilominus ad persuadendum, ut fieri  
poterat, huic Saraceno, quod explicandum  
susceperat.

„ Auctor operis *de Perpetuitate Fidei* merito, <sup>Id. ibid. L. 9. C. 9.</sup>  
& jure addit „ Patres hæreseos facillime con-  
„ victum iri, si omnes illorum comparatio-  
„ nes ita perfectæ, absolutæque crederentur  
„ ubique, ut res collatæ una simul extare  
„ deberent, atque deficere.

Qui

Qui ejusmodi annotationes ad intelligendos Ecclesiæ Patres adprime necessarias nosse cupiunt, eundem consulant Auctorem, qui de his tam erudite, venusteque differuit, ut iste pulcherrimus omnium, præstantissimusque egregii illius operis locus dici possit.

Petavius etiam in opere *de Theologicis Dogmatibus* optimas tradit regulas, sine quibus Patrum doctrina investigari, ac nodi, quibus implicantur, præcipue in Trinitatis Mysterio solvi difficillime possent: nimis longa res foret, atque etiam intricata, quæ eruditissimus iste Doctor Societatis hac de re scripsit, concinne transferre, propter voces Theologicas, quæ in nostri sermonis usu non sunt: satis itaque fuerit monere Lectorem inter Petavii regulas eas, quæ Gratiæ spectant, exponi capite quarto libri noni, tomo primo; cæteras, quæ Trinitatis Mysterium, capite octavo libri octavi, tomo secundo; demum, quæ ad operationes Jesu Christi attinent, duodecim regulas ex antiquis Patribus *de Idiomatum Communionem* depromtas extare Capite sexto decimo libri quarti, Tractatu *de Incarnatione*; novemque alias Capite undecimo, & duodecimo libri octavi ejusdem Tractatus.

Cæterum, qui Scholastico pulveri assueverunt, caveant diligenter, ne de vocabulis antiquorum Patrum judicent ex vi, & amplitudine significationis, quam Schola vocibus ad ulum suum excogitatis affinxit; atque istud est, quod probe notat Petavius loquens  
de

de notionibus, quas Græci Patres appellant *ἐπινοίας*, vel *διηκίας*, vel *ἐπιδιωρυμέναις ἐννοίαις*, vel *νοήμασι*, vel *ἐπιβολαίς*, quibus Latina vox *notio* respondere videtur, immo respondet certissime si non ex Scholasticorum, sed ex Patrum usu, quorum exempla refert Petavius, ejus significatio expendatur.

Præterea, qui singularem quæstionis disquisitionem aggreditur, ut accurate id faciat, nihil definiat oportet, quod antea probe, matureque expensum non fuerit, nec plura pronunciet, quam propositæ inquisitionis postulat amplitudo, in nullo doctrinæ capite plus quam par est, dubitationem afferat, injiciatque, quæstiones ne tenuiter nimium, exiliterque pertractet, judicium suum cohibeat, animumque occupari non sinat, Auctorum mentem probe dignoscat, nec alienum quidquam supponat, rem, de qua agitur, in tot distribuat partes, quot opportunas crediderit, non minutatim tamen, & perexigue, ordinem servet, a clarioribus, simplicioribusque ad obscuriora, & minus simplicia gradum faciens, de rebus justo subtilius, atque nasutius non dijudicet, neque ab implicatis ratiocinationibus illarum explicationem rerum nimis anxie repetat, quæ communi judicio dignosci possunt, & intelligi; qui enim in sublime tollitur, præcipiti lapsu sæpe ruit, disperitque, ac ea, quæ hominibus Philosophia minus utentibus nullum facessunt negotium, ab iis, qui

qui præter modum philosophantur, superari quandoque non possunt.

Quemadmodum in errore versantur, qui censent, absque subsidio Dialectices nihil percipi posse, sic hallucinantur, qui putant, omnia se assequi posse nullo præsidio instructi, ac sola mentis attentione, quo fere modo primæ notiones, & quædam Metaphysices axiomata innotescunt: ac sicuti multa utpote evidentiâ demonstratione non egent, adeoque obvio, quo primum se se offerunt, sensu sumenda sunt, ne infinitis cavillationibus via aperiatur, ita veritatibus etiam, licet subobscuris, modo satis demonstratæ, probatæque sint, tum jure, tum facto acquiescendum est: uno verbo, postulat bona, rectaque fides, ut nihil rejiciatur tanquam *ἀδύνατον*, etsi illius quandoque modus non detegatur, neque de verbis pervicaciter disputetur, ubi nulla superest de rebus dissensio.



## CAPUT XIV.

*De lectione Patrum Christianam Morum  
Doctrinam exponentium.*

Quum de Religionis Dogmatis ut plurimum sermonem non instituerint Ecclesiæ Patres, nisi data occasione, de Morum tamen Doctrina semper, & ubique disse-  
ruerunt, atque incredibili labore monere, arguere, orare, obsecrare, comminari, atque docere nunquam cessarunt: quæ quidem agendi ratio Christi Domini exemplo consona, prorsus est, qui nedum altiora Theologiæ documenta Discipulis suis traderet, de iis non nisi summa circumspeditione loquebatur plerunque, atque ad institutionem præcipue, & regimen morum incumberebat. Hinc totum Evangelium aliud ferme non est, quam congeries, atque collectio axiomatum, quæ divina continent instituta ad maiorem vitæ, morumque sanctitatem, & castimoniam coram Deo, & hominibus necessaria: A primo Ecclesiæ sæculo, licet exemplo potius, quam scriptis celebrare virtutes conarentur Patres, in lucem prodire Tractatus de Morum Doctrina, ut *Liber Pastoris* adscriptus Hermæ, Epistolæ Sanctorum Clementis Papæ, Ignatii martyris, & Polycarpi.

Consequentibus ævis tot de Doctrina Morum opera a Patribus edita fuere, ut cæterorum, quæ ab ipsis exarata fuerant, copiam superarent, præter innumerabilia, eaque præstantissima Philosophiæ Christianæ loca, quæ veteres isti Scriptores Dogmaticis lectionibus inferebant, exemplo Apostolorum, qui ad Christianæ Morum disciplinæ institutionem incumbebant, dum Theologicorum Dogmatum fundamenta jacerent.

Veteres Philosophi, quanquam densissimis Gentilitatis tenebris sepulti, universam Philosophiam ad morum institutionem accommodabant. Socrates Græcorum sapientissimus Philosophiam Antiquorum, qui in vagas, atque inanes de naturæ, quos percipere non poterant, affectibus subtilitates abibant, ad Morum præcepta traduxerat: nobilior Platoniciæ Philosophiæ pars in Morum Disciplina versatur; Aristoteles in Moralibus præstat, quam in Physicis, ac Metaphysicis: in Historia etiam Plinii animadversiones morales excellentiorem locum tenent; Academici Ciceronis Libri, quive *de Finibus*, atque *de Officiis* disserunt, ad Mores pertinent; quanquam enim universæ Philosophiæ, ut inquit præstantissimus iste Orator, velut amplissimæ regionis, solum incultum non est, nec derelictum, sed usquequaque fecundum, nullibi tamen ditior, atque feracior Philosophia, quam ubi regulas continet, & præcepta, quæ certam, constantemque vivendi normam præscribunt, moresque



que nostros ad honestatis, & virtutis leges componunt.

Demum quisquis vel leviter Græcos, Latinosve Philosophos antiquos versabit, dubitare non poterit, quin præcipua in eorum studiis fuerit mens mores instituere, atque moderari, qua re sublata, & Imperium, & Religionem sustolli necesse est. Patres Ecclesiæ, quum hæc optime perspecta haberent, cavērunt quammaxime, ne Morum Doctrinam negligenter, ea præsertim ætate, qua Paganis ad Christi Fidem turmatim convenientibus, maxima opus erat in Morum negotio attentione: sicuti enim Religione morum sanctitas, ita morum sanctitate Religio defenditur; extra omnem quippe dubitationis aleam est, statim atque mores vitari cœperunt, Religionem quoque nutare cœpisse, necnisi impellentibus Carne, & Sanguine inflatum spiritum contra Fidem Mysteriorum plerunque tumultuari.

In Dogmaticis Patrum Tractatibus difficultates quædam occurrunt, quibus solvendis non omnes se pares sentiunt: quæ vero de Disciplina Ecclesiastica graves illi Theologi scriptis mandarunt, magni quidem illa ponderis sunt, atque momenti, sed, ut colligantur, libera, otiosaque cessatione, & acriore ingenio opus est, quod paucis omnino conceditur; eorum in Scripturam Commentaria plurimum judicii postulant, atque laboris; in Morum autem Doctrina nemo unus est doctus,

vel indoctus, firmus, vel infirmus, qui alie quid progressus non faciat.

Quamlibet ingressus sit viam Lector, isthuc præstat ad Patres appellare, præsertim quum Morum non minus, quam Fidei Ecclesiæ depositarii sint, nec aliud faciendum proponant, quam quod ipsi ante fecerunt: etenim benenorunt, optimum eum non habendum in Morum Disciplina institutorem, qui fidissimus Christi Jesu in omnium virtutum exercitatione discipulus non fuerit. Gratia Servatoris, inquit Basilii, & Sacrarum Literarum studiis, ab erroribus humana traditione inductis gradum revocavi, & ad veritatis cognitionem, Divinique Amoris exercitationem perductus fui.

Hinc perspicuo liquet, quantopere fallantur, qui dicere audent, tenebras ab iis offundi, qui de Morum Doctrina consulunt Ecclesiæ Patres. Quid enim, amabo, ante natos recentiores Casuistas fieri solebat in Ecclesia? Nunquid universus terrarum orbis in ignoratione versabatur, atque caligine? minime gentium. Fortunatissimis illis temporibus, quibus Serpentis prudentia nondum vicerat simplicitatem Columbæ; quum primum nasceretur in re Morum controversia, illius solutio non a subtilitatibus Dialectices, non ab illecebris cupiditatis, non ab humanarum traditionum circuituionibus petebatur, sed singulæ Oves ad suum confugiebant Pastorem, Pastoresque singuli non aliam, quam Canonum, suæque Ecclesiæ

Ecclesiæ Ritualium regulam sequebantur: quod si opus fuisset, res deferbatur ad Sedem Apostolicam, vel ad Concilia, quæ sententias ferebant a Deo, mediis Ecclesiasticis Traditionibus, Divinisque Scripturis acceptas.

Itaque risu excipi merentur, qui effutiunt, æconomiam Ecclesiæ ab illis turbari, atque pessundari, qui priscos adeunt fontes, quasi vero non eadem hodiernis temporibus lex vigeat Evangelii, quæ primis obtinebat Ecclesiæ sæculis, quum Patres Scripturis Sanctis enutriti, Fidelium animos moderarentur. Ecquid metuendum, si ferreis, sive potius sæculentis, ad quæ devenimus, sæculis aureæ Ecclesiæ ætatis methodus revocetur? Errat profecto, qui eam non sequitur: ac procul dubio ea Ecclesiæ mens est, ut si non in omnibus antiquæ Disciplinæ Capitibus, quæ obsoleverunt, in iis saltem, quæ immutabilem morum puritatem spectant, Majorum vestigiis insistamus.

Verum minus leviter, absurdeque opponi posset, Patrum opera tanto numero esse, tantæque amplitudine, ut vix, ac ne vix quidem ab iis colligi possint omnia Morum præcepta, atque principia. Revera quidem in hac monumentorum multitudine Doctrina Morum nec initium ullum, nec finem habere videtur, atque res omnium expeditissima foret ad recentiores casuum Expositores recurrere, qui suas ex ordine alphabetico decisiones exhibent.

Hæc sane via omnium brevissima est, atque facillima; nec ingenii facultatem postulat, neque judicium; eaque posita non est, cur res funditus investigentur, vel difficultatum solutio, ac enodatio a primis principiis repetatur. Verum quid causæ est, cur tanta festinatio adhibeatur, ut homines juvenili, & inculta adhuc ætate tribunal Ecclesiæ conscendant? Annon satis foret, si in eo sederent post multos, atque seniles etiam labores in Scripturarum, ac Sanctorum Patrum lectione impensos, post diuturnas, firmissimasque meditationes, quibus inter lepram, & lepram sententiam ferre didicissent? Facilior res est, quam multis videatur; cui enim recta ratio, & ardens in Christum Charitas hæret altamente reposita, is Ecclesiæ Patres assiduo labore versans, illorum documenta ad pauca quædam universalia capita, e quibus rectissima, certissimaque conlectaria colliget, nullo negotio revocabit.

Et sane sicut ingens ille numerus mandatorum, quæ dedit olim Deus Populo Judaico, ad decem Capita revocatur, quæ ad duo maxima mandata Amoris Dei, & Proximi referuntur; ita universæ Patrum sententiæ ad aliquas præcipuas, quæ tandem in unum desinunt Amorem Dei, revocari possunt. Quippe amor Dei, si consilia nostra moderetur, & regat, cor, mentemque procul dubio illustrabit: ut enim inquit D. Leo, quisquis hoc lumine illustratur, atque succenditur, omnia legit in corde suo, quæ

Apo-

Apostoli, & Patres in Conciliorum Canonibus sanxerunt.

Qui ita comparatus est animo, nullo negotio vitabit insidias, cavillationesque ex nimio sui amore profectas, necnon mentales restrictiones a Tertulliano contra Marcionem primitibus jam sæculis condemnatas; tantum enim abest, inquit, ut fraudulentis hisce responsis fidem suam liberare quis possit, quin potius arctiori eam vinculo obfirmet, atque hujusmodi subterfugiis utens, omnium in se odium concitet, indignationemque.

Prisci Fideles uno Evangelii lumine ducti vel ipsam fraudis, atque mendacii speciem, metuebant, atque a pejerando tantum abe-  
rant, ut etiam, ubi necessitas postularet, iurandum dare formidarent; omnia bona dimittebant potius, quam iudicio contenderent, omnemque furti speciem a se procul abigebant; usuram coloratis involucris tegere non studebant, sed palam, & omnino damnabant, nec æquo animo tulissent iis temporibus Magistros, qui affirmare non erubescunt, usuram quibusdam cancellis circumscriptam Reipublicæ necessariam esse; qua in re æquior illis videtur Paganus, qui roganti cuidam quid de usura sentiret, respondit, quid tibi videtur  
,, de homicidio?

*Cic. de  
Offic.  
lib. 3.*

## CAPUT

## CAPUT XV.

*Qua ratione comparare se debeat Lector  
ad perdiscendam Patrum Ecclesiæ de  
Moribus Doctrinam, necnon de  
optimo quorundam hac in  
re delectu.*

UT ad lectionem Patrum Ecclesiæ de Morum Doctrina se se comparet Lector, initium ducat oportet a *Moralibus* Divi Basilii: opusculum hoc, quod veluti collectionem quandam præcipuorum Evangelii, & Apostolorum præceptorum continet, Christianæ Morum Disciplinæ fundamentum esse potest.

Similia fere scripserunt Augustinus in *Speculo*, Cyprianus in libris *Testimoniorum*, atque Athanasius in sua *Synopsi Scripturæ Sacræ*: ex huiusmodi Operum lectione, seu potius meditatione (quippe meditatione magis indigent, quam lectione) duplex duci potest emolumentum; Patrum inprimis Doctrina ad Scripturæ Doctrinam revocabitur, deinde certo quodam ordine disponentur omnia, quæ apud inclytissimos hosce Theologos de Morum Disciplina, præstantiora occurrunt.

Qui Scholasticam disciplinam Positivæ jungere cupiunt, magno illis adjumento esse potest

est ordo, quem servat Divus Thomas in *Secunda Secunda*, ut cognitiones ex priscis fontibus haultas mandent memoriæ.

Posito hoc fundamento, initium fieri jam poterit a libris *Moralium* Gregorii Magni, qui non modo Christianæ Religionis spiritu ducitur, verum etiam cor humanum, ejusque motus, & affectiones optime perspectas habet, qua in re cæteris Patribus cunctis longius progressus est. Atque, quum utpote homines, alii alii communem vitam ducamus, præclarissimæque virtutis, & sanctitatis exempla cæteris ad imitandum proponere debeamus, post *Moralia* Divi Gregorii, convertat se Lector ad *Officia* Divi Ambrosii. Opus hoc præstantissimam exhibet Christianæ honestatis imaginem ex tabella Charitatis expressam, sine qua vel placere Deo, vel cum hominibus versari nemo potest.

Clemens Alexandrinus in *Pædagogico* omnia tradit præcepta, quibus Viri prudentes, & probi uti queunt: Epistolæ Sanctorum Paulini, Augustini, & Bernardi ad inflammandos animos Christiana charitate, honestateque aptissimæ sunt: his accedit Tractatus Divi Augustini *ad Consentium contra Mendacium*, ut exhorrescat animus, sicuti par est, vitium istud turpissimum, idemque mirifice blandiens, quod vitæ consuetudinem, & morum honestatem funditus evertit.

Hinc gradus fieri poterit ad Sermones Divi Chrysostomi, qui Philosophiæ Christianæ summam continent: juvabit etiam omnes ejus  
Sermo-

Sermones pervolvere, necnon Tractatus Morum, & Pietatis, eos præsertim, in quibus agit de dolore Cordis, & Pœnitentia, quæ secunda est post naufragium tabula.

Divum Chrysostomum proxime excipient Epistolæ Divi Hieronymi; atque quum plurimum conferant exempla ad exercitationem virtutum, sine qua theoresis nihil aliud dici potest, quam vana prorsus, & inanis umbra, legi poterunt, quæ scripsit Ambrosius de vita veterum Patriarcharum.

Si quis vero integrum unius, ejusdemque Auctoris Theologiæ Moralis corpus exoptet, adeat Augustini Tractatus, & Epistolas Morales, quæ in novæ Editionis volumine sexto collectæ inveniuntur.

Longum nimis esset opera omnia recensere, quæ hoc in genere ab antiquis Patribus summa cum laude scripta sunt. Non omnibus etiam fortasse probaretur noster delectus, quum sua quisque voluptate trahatur, & sensu, de quo non est disputandum. Quædam tamen extant adeo communi omnium sensu probata, ut asseveranter proponi possint, quin jus cuiquam tollatur, tanquam in publico convivio, manum, quibus maluerit, admovendi.

Sic justum, bonumque Virum ab ingratis vexatum magnopere levabit lectio Homiliz Divi Chrysostomi *de Saule, & Davide*; stomachosus homo, & ad iram fervens præclarum sibi remedium comparabit ex Tractatibus Tertulliani, Cypriani, & Augustini *de Patientia*



*Patientia:* avarus ex Tractatu Clementis Alexandrini, ubi querit, *quis dives salvetur*, & ex libro Sanctissimi Presbyteri Salviani *contra Avaritiam*, satis hauriet unde turpissimum hoc vitium contra ipsum avarum deleviens a se repellat. Qui se fallacibus mundi blanditiis irretiri sivit, discat ex libro *de Spectaculis* adscripto Divo Cypriano mundum temnere, tanquam vanum scēnæ apparatus, qui vix oculis objectus evanescit illico, nullamque post se veram oblectationem relinquit.

Inimilicordes pariter, qui æneo corde instructi, trucibus oculis, duroque animo egenissimorum fratrum inopiam excipiunt, ad pietatem moveri poterunt lætione Tractatus *de Operibus Misericordiæ*, quem Divus Cyprianus velut antidotum illorum morbo proponit. Invidis, qui prosperam aliorum fortunam iniquo animo ferunt, idem Cyprianus Tractatum exhibet *de Invidia* aptissimum, ut eos ad Charitatem inducat, & a vilissimo hoc, animique vere Christiani nobilitate, & præstantia prorsus indigno motu expediat, attolatque. Qui in omnem intemperantiam effusi, ingluviem comprimere refugiunt, magno cum fructu legent Homilias Divi Basilii *de Jejunio*.

Stupidos sæculi amatores, qui Christianum nomen, & speciem vix, ac ne vix quidem servant, ad frugem facile revocabunt Tractatus D. Gregorii Nysseni *de Christiana Fidei Professione*.

Qui

Qui ad altissimum, sanctissimumque Christianæ Fidei gradum eveſti, temnendas creaturas, quæ nihil sunt ante Deum, Idololatrarum adinstar infano cultu prosequuntur, si attente legant, quæ de *Idololatria* scripserunt Tertullianus; & Cyprianus; maximo tanti sceleris, ex Gentilitate prognati horrore concutientur; ac cæteri etiam eodem morbo magis infecti, Divi Augustini *Confessionibus*, & *Soliloquiis* sanari fortasse, & immoderatam animi licentiam submovere poterunt.

Virginibus, Viduis, & Conjugibus Basilus, Ambrosius, Hieronymus, & Augustinus plura suppeditant, quibus in suo quisque statu sanctitatem servet; majoremque in dies perfectionem acquirat.

Presbyteri vero, atque Pastores uberrimè invenient pabula apud Chrysostomum in *Libris de Sacerdotio*; Gregorium Papam in *Pastorali*; Julianum Pomerium in *Libris de Vita Activa, & Contemplativa*, & Divum Bernardum in *Libris de Consideratione* ad Eugenium Papam inscriptis.

Regibus, & Principibus Synesius in *Sermone de Modo Christiane Regnandi*, & Divus Chrysostomus pluribus in locis præstantissima tradunt pie, sapienterque in rerum publicarum administratione vivendi præcepta.

Qui in turpissima scelera delapsi sunt, a Basilio, & Ambrosio Pœnitentiæ documenta desumant.

Qui

Qui vero Religiosi cujusdam Instituti vinculo se obstrinxerunt, uti possunt ejusdem Basilii Tractatibus *de Vita Monastica*, *Regulis brevius tractatis*; necnon *Regulis fusius tractatis*; *Constitutionibus* item *Monasticis*; ac demum *Pœnis in Monachos delinquentes*: Extant etiam apud Augustinum in Libro *de Opere Monachorum*; atque in *Codice Regularum* Orientis, & Occidentis eximia solitariae vitæ instituta, quibus adde *Institutiones*, & *Collationes* Cassiani, Opera Sanctorum Nili, & Bernardi; quæ velut Enchiridion Viris Religiosum aliquod Institutum profitentibus aptissimum quovis tempore habita sunt.

Ad promovendam illorum pietatem, qui rebus divinis, ac cœlestibus se totos addicunt, proderunt Sermones Marci Eremitæ; *Centum Capitula* Diadochi; *Instructiones* Sancti Eucherii; atque Tractatus Gregorii Nysseni *de Oratione*.

Uno verbo, quisquis omnes animi virtutes adipisci cupit, tutaque via incedere, instar ingeniosæ apis, varios, lectissimosque Patres libabit, ut ab antiquis hisce fontibus sapientiæ, & Christianæ pietatis mel suavissimum exugat. Indubitatum quippe est, cætera quandoque studia intermitteri posse, ab studio autem Doctrinæ Morum nunquam vacandum; quum nullum sit vitæ tempus, immo neque momentum, quo a corrigendis, perficiendisque Moribus suis abstinere debeat Vir Christianus.

## CAPUT

## CAPUT XVI

*De lectione Patrum Disciplinam Ecclesiæ  
exponentium.*

**N**Ullum fere invenitur inter antiqua Patrum opera, in quo non aliqua Disciplinæ Ecclesiasticæ lineamenta reluceant; sed quia nonnisi diuturno labore colligi possunt, eam ob rem, antequam isthuc devenias, præcipuos Patrum Tractatus evolves, qui locupletissimum hoc argumentum data opera pertractant, exponuntque.

Inter eos primo loco se offerunt *Constitutiones* Divo Clementi adscriptæ, quas Morinus in libris *de Pœnitentia* totius disciplinæ in Ecclesiis Orientalibus ante Constantini Magni Imperium servari solitæ, exemplar habendas affirmat. Divus Clemens ea solum, quæ ab Apostolis acceperat, in illis colligere curaverat; successu autem temporis adjecti sunt *Canones Conciliorum Orientalium*. Hæc tamen Collectio, quæ magno olim in honore habebatur apud Græcos, parvi a Latinis pensata fuit; ac demum ab iisdem Græcis in Concilio Trullano rejecta, tanquam opus, quod a Sectariis vitiatum, nonnisi summa circumspectione

Etione legendum esset. (19)

His Lector addere poterit Libros de *Hierarchia* sub nomine Dionysii Areopagitæ. Singularem quoque Liturgiis, Sacramentariis, & Ritualibus Patrum operam dabit, non omis- sis, quæ scripsere de Divinis Officiis.

Apologetica Patrum, pleraque Tertulliani, Cypriani, & Optati opera, multique D. Augustini Tractatus, ac singillatim ejus ad *Dulcimum* responsa præstantissimas annotationes continent, quæ ad præsens faciunt argumen- tum.

Præsertim vero legendæ Patrum Epistolæ, ac præ cæteris Cypriani, Basilii, Hieronymi, Ambrosii, Augustini, Cyrilli Alexandrini, & Theodoretæ, quæ ad Disciplinam Ecclesiasti- cam spectant.

Pervolvendæ omnes Epistolæ vulgo Clemen- tis Papæ, nec non Sanctorum Ignatii, & Po- ly-

X

ly-

(19) Ponere videtur hoc loco Auctor Operis *Constitutio- nes Apostolicas* D. Clemen- ti adscribendas, eisque tem- poris successu adjectos Ca- nones Conciliorum Orien- talium; quod quidem a ve- ritate alienum prorsus est. Neque enim Canones so- lummodo, verum etiam Opus ipsum suppositū fuisse D. Clementi, duo mani- festissime probant. Primo, silentium omnium Eccle- siasticorum Scriptorum ad quartum usque sæculum,

quod tamen non infrequens se se obtulerit occasio eas proferendi. Secundo, Do- ctinam illæ continent a re- cta Fide, adeoque a D. Cle- mente prorsus alienam, ut, contra Divinitatem Filii, & Spiritus Sancti; rebapti- zandos etiam docent Hære- ticos; quartas Nuptias con- demnant &c.: quæ quidem omnia a D. Clemente tam sanctis temporibus, & Apo- stolorum ætati adeo proxi- mis scripta fuisse nemo cre- diderit.

Ilycarpi : item , quæ Cœlestini Papæ ad Provincias Viennensem , & Narbonnensem , ad Episcopos Apuliæ , atque Calabriæ ; Literæ , atque Tractatus Divi Paciani *de Baptismate* , omnes etiam Gregorii Magni ad amussim expendendæ , ac demum Epistolæ Canonicæ , atque Paschales Dionysii Alexandrini , Theophili ejusdem urbis Episcopi , Gregorii Nysseni , Basilii , & Gregorii Thaumaturgi .

In hisce , ut ita dicam , Librorum summariis , atque scriptis confabulationibus Patres Ecclesiæ mentem suam familiariter aperiennes , nitidis , firmisque rationibus innumeras explicant difficultates , quas casus illorum ævo non prævisus temporis progressu excitavit in rebus spectantibus ad Disciplinam , quæ vinculum est Charitatis , & concordie Fidelium : nihil aptius , feliciusque hisce Patrum Epistolis ad mores recte instituendos conducit , eosque optime informandos , qui ad curam Pastoralem , rerumque Ecclesiasticarum moderationem divinitus vocantur .

Cæterum a Patrum lectione recedere nequam censebitur , qui antiquos Canones legat , quum nulli ferme sint , qui non vel ab his Doctoribus Sanctissimis in Conciliis , ad quæ convenerant , statuti , vel ex operibus , & ex illorum doctrinæ penu depromti fuerint .

Atque hanc ob causam Ecclesia , quæ regulam , & normam ex Canonibus sumit , eorum Collectionem semper haberi curavit : So-

cra-

crates primo *Historiæ* Libro ait, res a Patria Cap. 1.  
 bus universim sancitas, ab iisdem subscribi,  
 & in Ecclesiarum Archiviis deponi consuevisse.  
 Eodem teste Historico viguit antiquitus  
 hæc consuetudo duplicis generis Canonum.  
 Collectiones elucubrandi, alteram Dogmatum  
 Fidei, alteram Disciplinæ Ecclesiasticæ; pri-  
 mam συναγωγή των συνόδων dictam, posteriorem  
 βιβλίον κανόνων.

Præter has Collectiones, quæ ad uniuscujus-  
 que singillatim Ecclesiæ usum servabantur, aliæ  
 quædam sunt generales, quas Canonum Ex-  
 positores ad universæ Christianæ Reipublicæ  
 Institutionem perfecere. Apud Latinos Isido-  
 rus Mercator ex Summorum Pontificum Epi-  
 stolis, & Conciliorum Canonibus ea collegit,  
 quæ ad mentem suam magis conferre puta-  
 bat. Post amplissimam hanc Collectionem,  
 altera brevior prodiit sub nomine *Corporis Ca-  
 nonum*, cujus Summi Pontifices Nicolaus, &  
 Leo Quartus meminerunt apud Gratianum.  
 Antonius Augustinus, doctissimus postremo  
 sæculo Canonum Interpretæ affirmat, has duas  
 Collectiones duos veluti fontes haberi totius  
 in Ecclesia Latina Juris Pontificii.

Inter Græcos Alexis Aristenes, Johannes  
 Zonaras, & Theodorus Balsamon Collectiones  
 elucubrarunt; atque pro more Juris Consul-  
 torum, qui Jus Civile interpretationibus suis  
 illustrant, Commentariis locupletarunt. Ju-  
 stinianus principio vetuerat, ne Leges suas Auth.  
DucK L.  
1. c. 9.  
 quisquam interpretaretur, verum experientia

edoctus non omnes, qui evenire poterant casus a se prævisos, mutata Sententia facultatem dedit, ut secundum Juliani, & Adriani Imperatorum Sanctiones adhiberetur, ubi opus foret, expositio. Revera Jurisperiti Julianus, Ulpianus, & Pomponius testantur, solis Legibus non omnes, qui consingere possunt eventus, comprehendendi. (20)

Extant etiam Collectiones Johannis Scholastici, Photii, Matthæi Blastares, Constantini Harmenopuli, & Arsenii, qui Canones ad quosdam titulos retulerunt, adjectis una Legibus, atque Sanctionibus Imperatorum, unde *Nomocanones* dicti sunt.

Decretum  
Gratiani  
Iulianus  
Gregorius  
XIII.  
emenda-  
tum fuit  
an. 1580.

Latini Canonici Jurisperiti Græcorum methodum fere tenuerunt. Magno quidem illi numero, sed non pari virtute. Dionysius Exiguus, Ivo Carnotensis, & Gratianus cæteris præstant; præcipue vero Gratianus, qui etiam si nonnullis scateat erratis, in publicis

ta-

[20] Tot inter Canonum Collectiones, quarum aliquæ vetustissimæ sunt, ac præstantissimæ, vix paucas recenset Auctor Operis, easque tum ætate, tum accuratatione, & Fide cæteris longe postponendas. Ejusmodi est præcæteris Collectio Isidori Mercatoris anno 836. perfecta, in qua passim, nulloque adhibito delectu undique congesta, permixtaque vera falsis reperiuntur monumenta, ut

Isidoro in mentem veniebant. Quamobrem antiquiores adhibet Lector Collectiones, puta quam Stephanus Ephesinus perfecit paullo post Sancti Johannis Chrysostomi obitum, & antequam celebraretur Concilium Chalcedonense, vel Collectionem Johannis Scholastici sæculo sexto. Temenda etiam non est Collectio Dionysii Exigui, ejusdem ævi Scriptoris.



tamen Scholis semper legi consuevit.

Quum leviori quandoque utantur Canonici Jurisperiti diligentia, eam ob rem Concilia ipsa, sive Particularia, sive Generalia legisse præstat: etsi enim Conciliorum Particularium Canones cum Generalium Canonibus auctoritate comparari non debeant, plurimi tamen æstimandi, immo in iis, quæ in Œcumenicis Conciliis non finivit Ecclesia, indubitata fidei habendi sunt.

Minorum etiam Conciliorum Canones tanti fecit antiquitas, ut præter illorum Collectionem, quibus universa regebatur Ecclesia, particularium etiam Canonum, quibus particulares Ecclesiæ utebantur, Collectionem servaret.

Cujus rei argumento est Canonum Africanorum Collectio, quam Patres tanquam veteris Ecclesiasticæ Disciplinæ Thesaurum existimarunt. Hæc Collectio primum sancita in Synodo sexta Carthagenensi prodiit, paullo post in Orientalibus, & Occidentalibus Ecclesiis sub nomine Códicis Canonum Ecclesiæ Africanæ. In eodem Concilio lecti sunt Canones plurium Africæ Synodorum temporibus Aurelii Episcopi Carthagenensis; qua re ostenditur, recentem investam non esse consuetudinem Conciliorum, sive Provincialium, sive Nationalium Canones colligendi, ut inde sanctioris vitæ norma derivetur.

Ecclesia Gallica consuetudines principio servavit, quas primi illius Pastores, ut Poti-

nus , & Irenæus ab Antecessoribus suis acceperant ; verum post Concilium Arelatenſe anni tercentefimi decimi quarti propriis Canonibus uſa eſt , donec Concilium Nicænum accepit , ac demum Collectionem in Concilio Chalcedonenſi probatam adhibuit.

Eccleſiæ Hiſpaniarum , & Angliæ propriis etiam Canonibus regi voluerunt . Tandem quocunque vertere nos libeat , ubique Eccleſiarum videre eſt cultum , reverentiam , obedientiamque Sacris Canonibus præſtitam , uſque adeo , ut Petrus Cellenſis dicere non dubitarit , Deo ſic jubente , revelatos Episcopis Sacros Canones , qui complementum eſſent Evangeliorum , & Librorum , quos Apoſtoli , & Prophetæ reliquerunt ; parumque abeſſe , ne eodem , quo Evangelii verba , in honore habendi ſint.



## CAPUT XVII.

De Methodo servanda in lectione Patrum  
Disciplinam Ecclesiasticam  
exponentium.

**D**Ivus Augustinus, unam esse Fidem, in-<sup>Ep. 84.</sup>  
quit, Ecclesiæ, multas vero consuetudi-<sup>ad. Jul.</sup>  
nes, & cæremonias. Quamobrem secernenda  
apud Patres ea, quæ Disciplinam, ab iis, quæ  
Fidem spectant. Ad hæc animum satis non  
advertentes nonnulli Scriptores minus eruditi,  
ut notat Leo Allatius, Græcos recentiores, ut <sup>De Eccl.  
Orient. & Occi-  
dental.  
consens.</sup>  
hæreticos traduxerunt, licet alios ab Ecclesiæ  
Latina ritus illa Fidei universalis unitate ser-  
vare potuerint. Quod pariter animadvertit Mo-  
rinus inquiring, quosdam Scholasticos, satis non  
distinctis variis Ecclesiarum ritibus in admi-  
nistratione Sacramentorum ab eorundem Sa-  
cramentorum substantia, immerito prorsus du-  
bitasse, rata sint, necne apud Græcos Sacra-  
menta Baptismatis, & Ordinationis. (21)

Quamvis enim præcipua Ecclesiasticæ Disci-  
plinæ instituta ab Evangelio primitus eruan-  
tur, firmissimæque perinde sint, ac ipsummet  
Evangelium, nihil tamen adeo varium est,

X 4

ni-

[21] Non illud exprobrat Mo-  
rinus Scholasticis, invali-  
das ab iis habitas Græco-  
rum Schismaticorum Ordina-  
tiones, quas ipsemet Mo-  
rinus irritas esse censet, sed  
hanc solum ob causam re-

jectas, quod non eosdem  
cum Latinis ritus servarent.  
Morinus autem hanc so-  
lum ob causam rejicit, quod  
nempe Græci ad Schisma  
defecerint.

nus, & Irenæus ab Antecessoribus suis acceperant; verum post Concilium Arelatenſe anni tercentefimi decimi quarti propriis Canonibus uſa eſt, donec Concilium Nicænum accepit, ac demum Collectionem in Concilio Chalcedonenſi probatam adhibuit.

Eccleſiæ Hiſpaniarum, & Angliæ propriis etiam Canonibus regi voluerunt. Tandem quocunque vertere nos libeat, ubique Eccleſiarum videre eſt cultum, reverentiam, obedientiamque Sacris Canonibus præſtitam, uſque adeo, ut Petrus Cellenſis dicere non dubitarit, Deo ſic iubente, revelatos Episcopis Sacros Canones, qui complementum eſſent Evangeliorum, & Librorum, quos Apoſtoli, & Prophetæ reliquerunt; parumque abeſſe, ne eodem, quo Evangelii verba, in honore habendi ſint.



## CAPUT XVII.

De Metodo servanda in lectione Patrum  
Disciplinam Ecclesiasticam  
exponentium.

**D**Ivus Augustinus, unam esse Fidem, in-<sup>Ep. 86.</sup>  
quit, Ecclesiæ, multas vero consuetudi-<sup>ad Celsi.</sup>  
nes, & cæremonias. Quamobrem secernenda  
apud Patres ea, quæ Disciplinam, ab iis, quæ  
Fidem spectant. Ad hæc animum satis non  
advertentes nonnulli Scriptores minus eruditi,  
ut notat Leo Allatius, Græcos recentiores, ut <sup>De Eccl.  
Orient. & Occi-  
dental. consens.</sup>  
hæreticos traduxerunt, licet alios ab Ecclesia  
Latina ritus illæsa Fidei universalis unitate ser-  
vare potuerint. Quod pariter animadvertit Mo-  
rinus inquiring, quosdam Scholasticos, satis non  
distinctis variis Ecclesiarum ritibus in admi-  
nistratione Sacramentorum ab eorundem Sa-  
cramentorum substantia, immerito prorsus du-  
bitasse, rata sint, necne apud Græcos Sacra-  
menta Baptismatis, & Ordinationis. (21)

Quamvis enim præcipua Ecclesiasticæ Disci-  
plinæ instituta ab Evangelio primitus eru-  
antur, firmissimæque perinde sint, ac ipsummet  
Evangelium, nihil tamen adeo varium est,

X 4

ni-

[21] Non illud exprobrat Mo-  
rinus Scholasticis, invali-  
das ab iis habitas Græco-  
rum Schismaticorum Ordina-  
tiones, quas ipsemet Mo-  
rinus irritas esse censet, sed  
hanc solum ob causam re-

jectas, quod non eosdem  
cum Latinis ritus servarent.  
Morinus autem hanc so-  
lum ob causam rejicit, quod  
nempe Græci ad Schisma  
defecerint.

nihil tam mutabile, quam Ecclesiastica Disciplina; quum Christus Dominus Pastorum, prudentiæ commiserit, ut quas magis congruere arbitrarentur, ex universalibus illis institutis deductas Leges singillatim constituerent. Certissimum porro, & constantissime acceptum semper fuit in Christiana Religione, sine Pœnitentia comparari non posse Vitam Æternam; nihilo tamen minus hujus Pœnitentiæ exercitatio, immoto prorsus, cui nititur fundamento, tot modis distingui potest, atque variari, ac revera distincta fuit ab exordio Ecclesiæ ad præsentem usque ætatem, quot eam variari ad creditarum sibi ovium utilitatem, & salutem necessarium existimarunt Pastores. [22]

In-

[22] In hac Ecclesiasticæ Disciplina mutatione sedulo, & accurate distinguendi sunt peculiare Ritus, & consuetudines a Spiritu, & sine, quo regitur Ecclesia. Varii quidem fuere Ritus, at unus semper, idemque Spiritus. Variarum quippe consuetudinum, alias circumstantiarum varietas induxit, ut Communionem sub una, vel utraque specie; alias remissior Christianorum Charitas, sive illorum imbecillitas, ut refectiunculam vespertinam die jejunii, & pœnitentiæ publicæ abrogationem; alias prudens, & œconomica tolerantia, ut creberrimas dispensationes &c.; alias de-

num, quas nec probat, nec patienter tolerat Ecclesia, immisit pessima quorundam indulgentia, ut faciliorem absolvendi a peccatis consuetudinem &c. In hisce tamen omnibus mutationibus uno semper, eodemque Spiritu ducitur Ecclesia, nimirum majoris Christianæ Religionis emolumentum, sive probans, sive improbens mutationes. Igitur in Ecclesiastica Disciplina consuetudines quidem variæ sunt, & mutabiles, at Spiritus tamen, quo ducitur Ecclesia in illarum usu, unus semper, idemque est, ac immutabilis.

Institutiones Ecclesiasticæ ab Jure Divino profectæ immutabiles sunt, ac perpetuo tenendæ; quæ autem a Jure Positivo derivantur, nec perpetuo, nec ubique, nec eodem semper modo servantur.

Alia fuit prioribus Ecclesiæ sæculis, alia posterioribus agendi ratio. Ex. gr. quod uno sæculo impedimentum Sacris Ordinibus habebatur, alio sublatum omnino fuit. Olim sola manuum impositione collati fuere Sacri Ordines; deinceps additus Vasorum, Sacrorumque Librorum contactus. Non cogeantur antiquitus Clerici omnes Ministerii sui gradus conscendere, ut ad altiorem pervenirent; a Lectoratus gradu statim, & illico ad Presbyteratum, vel Diaconatum, vel etiam Episcopatum (23) evehebantur. Paucissimi enim iis temporibus Clerici singulos tenebant gradus, ut altissimum assequerentur: quod Socrates satis non intellexisse videtur de Sancto Basilio ser-

(23) Quod ait hoc loco Auctor Operis, id moris aliquando viguisse in Ecclesia, ut Clerici a Lectoratu ad Episcopatum, omissis mediis Ordinibus, eveherentur, nullo prorsus universæ antiquitatis exemplo monstrari potest. Immo vero contrarium ab Historiæ monumentis suadetur. Sic Præsules Sardicenses apud Theod. l. 2. cap. 8. quum Ischyas ab Arianis Episcopus, omissio Presbyteratu,

creatus fuisset in præmium calumniæ Athanasio impactæ, irritam censent ejusmodi Ordinationem eam solum ob causam, quod Presbyteratus Ordine insignitus antea non fuisset &c. Et sane Episcopus, ut Summus Sacerdos, nunquam esse, vel dici poterit Episcopus, nisi antea Sacerdotalem gradum percurrerit, qui fundamentum est Episcopatus.

sermonem faciens , qui quum Lectoris officio duntaxat fungeretur , Presbyter *per saltum* consecratus fuit , non evolutis nimirum , ut hodie mos est , mediis Ordinibus .

Quædam consuetudines non semper vigere , quod in perpetuum institutz non essent ; hujusmodi sunt Ritus Legales , quos Apostoli ad certum duntaxat tempus servarunt . Aliæ vero quavis ætate valuerunt , nec nisi quibusdam in circumstantiis immutatz sunt , ut quum , integro manente antiquissimo Signi Crucis Ritu , in ejus modum invecita est mutatio , nunc ad unum , nunc ad alterum Mysterium indicandum , extensis scilicet , elatisque modo duobus digitis , ad significandam duplicis in Christo naturæ unionem , modo tribus primoribus , ad Trium in una Essentia Personarum distinctionem exprimendam .

Nonnulla instituta piis de causis modo aucta , productaque , modo imminuta , contractaque fuerunt . Ad excitandam Populorum pietatem Episcopi Liturgias plurimum amplificabant ; verum quum ob nimiam prolixitatem oneri essent Fidelibus , Divus Chrysostomus , & Basiliius , teste Proclo Constantino-politano Archiepiscopo , easdem Liturgias contraxerunt .

Aliquæ vero consuetudines , cæteroquin bonæ , aliis , a quibus pendebant , obsolescentibus , minus laudabiles evasere . Antiquitus ad Mensam Eucharisticam quotidie accedebant Laici , unaque secum Oblationes ferebant ;



verum refrigerent paulatim studio frequentis Communionis, Presbyteri, (quod valde indecorum est) Oblationes ostiatim rogare coacti fuere.

Alii e contrario Ritus decoris causa, atque ad graviora vitanda incommoda deleti. Ejus generis fuit Eucharistiam erecto corpore sumere, manu, aut velo eam accipere, domum transferre, sibi ipsi eam ministrare, ejus usum sub utraque specie Laicis concedere.

Nonnulli vero sensim sine sensu, & nata occasione in alios migrarunt. Ita occasione Clinicorum, qui scilicet extremis vitæ momentis Baptismate in lecto donabantur, inolevit paulatim consuetudo aspersione tantum conferendi Baptisma, sublata, quæ prius adhibebatur, immersione. (24).

Aliquos etiam Ritus mutavit, vel abrogavit indulgentia erga infirmos. Sic publicæ Pœnitentiæ severitas in peregrinationes, elemosynas, & orationes abiit; sic austerius Quadragesimale jejunium ad vesperam usque  
duo.

---

[24] Parum omnino videtur in causa fuisse Clinici, cur immersio in aspersiōnem mutaretur. Tribuenda potius hæc mutatio periculo, ne pueris per immer-

sionem aliquod detrimentum inferretur, vel etiam mulierum pudori adscribi potest, quæ ægre admodum Baptisma per immersionem suscipiebant.

duodecimo etiam sæculo produci solitum.  
(25) paullatim sublatum est.

Alii pro temporum, & personarum varietate mutati sunt: ita iustis de causis Sacerdotes in Hæresim lapsi, postquam resipuerunt, ad Ordinum suorum exercitium recepti fuere.

Quasdam etiam Consuetudines Ecclesiæ, ægre admodum, nec nisi postquam diu, fortiterque obstitisset, abrogavit: ejusmodi est electio Antistitum, cujus olim jure fruebantur Clerus, & Populus. Aliæ vero, quum semper servatæ sint, alio tamen, & alio modo executioni mandatæ fuerunt. Quod notat Onuphrius in electione Summorum Pontificum, quæ ad nostram usque ætatem septem, vel octo, & decem diversas subiit formas.

Alias invexit cessio juris; ut quum Episcopi Græci tertio sæculo, & Latini quinto Presbyteris copiam fecere, ut coram ipsis Concionem haberent; alias extensio juris ad ea loca, ubi ante non obtinebant; ut quum in

Ora-

(25) Jejunium Quadragesimale ad vesperam productum non fuit usque ad sæculum duodecimum, sed decimum solummodo. Etenim undecimo jam sæculo, tepescente in dies pietatis studio, Concilii Rhodomagensis Patres per necessarium duxerunt Canonem statuere, quo prohiberentur Fideles, ne ante

horam nonam cibum sumerent diebus Quadragesimæ. „ Nullus [inquiunt „ Can. 21.] in Quadragesima prandeat, antequam hora nona peracta, vespertina incipiat: non enim jejunat, qui ante manducat „ Convocatum fuit hoc Concilium anno 1072.

Oratoriis , & Monachorum Ecclesiis Parœciæ , & jura Parochialia instituta sunt.

Aliæ dum antiquarentur , recentibus locum dedere ; cuncta olim Officia Ecclesiastica Sacris Ordinibus in unaquaque Ecclesia jungebantur : altera Cleri pars affidebat Episcopo , altera in Titulos , & Parœcias civitatis tributa : interim vero prima hæc Cleri pars se ab Episcopo segregans Canonicos , & Capitula instituit , quorum regimini præsum Decani.

Quasdam Consuetudines tempus obliteravit , quasdam induxit : hinc obsolevit mos adstanti assidue Divinis Officiis , Diurnis , Nocturnisque , inde Sacrorum numerus in immensum excrevit , increbuere secretæ Confessiones , aliaque pietatis opera exercendi mos invaluit .

Nonnullæ piæ exercitationes ab erroribus originem sumserunt , ex. gr. Græci diebus jejunii Sacra non faciebant rati, sumtione Corporis , & Sanguinis Christi Domini infringi jejunium ; quam opinionem refellit Tertullianus Tractatu *de Oratione Dominica*. Ante tertium decimum sæculum nonnulli rudes , & ignari in animum sibi inducentes , suscepto extremæ Unctionis Sacramento , abstinendum deinceps ab usu carniū , & Matrimonii , quamvis ejusmodi sententiam damnassent Concilia , in causa fuere , cur ægroti nonnisi ad extremam vitæ periodum redacti infirmorum Unctione muniri voluerint ; unde ortum habuit

*Synod.  
Oxon.  
Cap. 6.*

buit consuetudo, quæ etiamnum viget, morientibus nonnisi post Viaticum extremæ Unionis Sacramentum conferendi.

Immo etiam Hæresis nonnunquam ad aliquot pietatis operum institutionem conduxit. Eutychetis sectarii magnum causæ suæ patrocinium collocantes in titulo *Marris Dei*, quo merito, & jure Beatissimam Virginem vocat Ecclesia, occasionem inde arripuerunt majori, quam apud Catholicos mos esset, eam cultu prosequendi. Primus omnium Petrus Fullo cunctis orationibus nomen *Sanctissime Deiparæ* inseruit. Quum vero non omnia, quæ ab hæreticis profisciscuntur, hæretica sint, iccirco Catholici eam consuetudinem a Sectariis, quorum Hæresim aspernabantur, inveciam, tuto, ac pie sequi se posse putarunt.

Quædam instituta in omnibus universim Ecclesiis ab initio ad præsentem usque ætatem servata fuerunt, ut celebratio Missæ; Scripturæ Sanctæ lectio, usus precum, cantus Psalmorum, & Canticorum; quædam vero ab Ecclesiis singularibus optata apud alias in usu non sunt. Die Sabbati Romæ, & Tagastes jejunabant Fideles, non autem Mediolani. Apud Africanas Ecclesias id moris erat, ut in honorem Martyrum adferrentur cibi ad eorum sepulcra, quam consuetudinem Divus Ambrosius, pravam illius usum, & consequentem ex ea licentiam metuens, in Ecclesia sua damnavit.

Non.

Nonnulli ritus in quibusdam Ecclesiis perire, in aliis diutius viguere. Ita in Dicecesi Rhotomagenſi ad annum uſque milleſimum ducentefimum trigefimum ſextum, qui Sacris Ordinibus iniciandi erant, ad Episcopum, vel Pœnitentiarium delictorum Confeſſiones deferabant, quo Confeſſarius certo dignoſceret, an Sacros Canones uſpſiam violaffent.

Quidam etiam ritus adeo ſingulares ſunt, ut in una ſolum adhibeantur Eccleſia. Hujus generis eſt, qui ſexto ſæculo in Eccleſia Arelatenſi vigeſat, Divina ſcilicet Officia græce, & latine celebrandi.

Alios Græca, alios Latina ſolum conſecratur Eccleſia. Apud Latinos Oleum ab Episcopis, apud Græcos a ſimplicibus etiam Presbyteris conſecratur. Apud Latinos Extrema Unctio morientibus ſolummodo adhibetur; apud Græcos etiam iis, qui integri ſunt, & ſani, quum delinquunt, ut a venialibus delictis mudentur (26). Latini Sacerdotes a

Nup.

[26] Si conſulas Goarium, alioſque Rituum Orientalium Scriptores, non ad venialia, ſed ad lethalia crimina delenda adhiberi videtur Pœnitentibus Sacra Unctio apud Græcos. En verba Goarii in ſuis ad *Sancti Olei Officium* notis:  
 „ Ritus, quo gravioribus  
 „ ſubditi peccatis, licet  
 „ ſint omni ex parte ſani,

„ quia tamen ægrotorum  
 „ delicta Sanctam Unctio-  
 „ nem curare noverunt,  
 „ illam deinceps pro Ca-  
 „ none, id eſt Pœnitentia  
 „ acceptam, & a Sacerdo-  
 „ tibus tota precum harum  
 „ ſerie ſe expiandos, &  
 „ infirmorum unctiōe ve-  
 „ lut adverſ. animæ vale-  
 „ tudine affectos, & me-  
 „ dandos offerunt.

Nuptiis abstinent; Græci vero, qui Uxorem ante ducunt, quam ad Sacros Ordines promoveantur, Matrimonio uti possunt.

Quorundam in Rituum usu, quod præcipuum est, utraque servat Ecclesia; differt tamen in adjunctis. Ex. gr. Græci simul, ac Latini in Sacramento Confirmationis adhibent Sanctum Chrisma, quod oleo constat, & balsamo; sed Græci secus a Latinis, quinque præterea, & triginta admiscent aromaticum genera, sive totidem herbarum bene olentium succos, unaque paucillum vini.

Aliqua tenent Græci tanquam vetustissima, quæ Latini aliquandiu adhibita postmodum deseruere. Penes Græcos Presbyteri, juxta ac Episcopi Confirmationis Sacramentum conferunt, quod penes Latinos uni venit (27) Episcopo: quanquam in Ecclesiis Galliæ, & Hispaniæ etiam Presbyteri ministrarint antiquitus Sacrum Chrisma recens baptizatis, quibus deinde Episcopi manus imponebant.

Græci Sacerdotes quoddam Tonsuræ genus adhibent pueris, dum eos baptizant, vel octo post Baptisma diebus. Eadem erat olim apud Latinos disciplina, sed evanuit temporis progressu, nec amplius, nisi eruditis rerum antiqua-

---

[27] Presbyteri quidam Latini contulere Sacramentū Confirmationis a sæculo 6. ex indulgentia Gregorii Magni Summi Pontificis,

ad sæculum usque nonum; Græci autem conferunt hodiernis etiam temporibus, ex tacita saltem Ecclesiæ concessione.

liquarum studiosis comperta fuit. Apud Græcos septem inducuntur Presbyteri ad Sacramentum Extremæ Unctionis, apud Latinos unus; quanquam plures etiam olim convenirent; denique Græci in Sacrificio Eucharistiæ utuntur Pane Fermentato, quem Latini, utentes Azymo, dereliquerunt, ut consentiunt Viri in antiquitate veratissimi.

## C A P U T XVIII.

*De Ritibus, quos Ecclesia ex Judaïs desumpsit, atque Paganis.*

**B**Ene multas consuetudines a Veteri ad novam Legem, a Synagoga ad Ecclesiam translatas apertissimum est. Etsi enim Christi Jesu, & Apostolorum consilium fuerit, ut Judæorum Ritus deleantur; quidam tamen ad tempus tolerati, quidam aliqua sui parte caeremoniis, & Ritibus nostris permixti, hodierna etiam ætate supersunt.

Hac re offenduntur summo opere Græci, indeque ansam arripiunt traducendi Latinos, tanquam Rituum Judaicorum sectatores, quod utantur Azymis, Unctionibus, Purificationibus, aliisque id genus: quasi vero non ipsi quoque multos, immo plures, quam Latini, Judæorum mores sequerentur. Quum enim Græca Ecclesia antiquis Ritibus magis addicta fuerit, quam Latina, veri admodum simile  
Y est,

est, plura Græcos, quam Latinos Judæorum instituta fuisse amplexos.

Ut ut res sit, mirum videri non debet, priuscos Fideles, quorum maxima pars a Judæis profecta, una cum iis creberrime in Templo, & Synagogis versabatur, nonnihil retinuisse Judaicæ Disciplinæ, cujus etiamnum in nostris cæremoniis quædam supersint vestigia: præcipue quum ad ætatem usque Imperatoris Hadriani, omnes Jerosolymorum Episcopi, scilicet ii, quorum erat tradere Disciplinam, & Christianis circumcisis deligerentur, atque omnes fere illius Populi Fideles una jungerent Judaicæ, & Evangelicæ Legis observationem (28).

Verum quid tandem absurdi fuerit, si modo e. g. Concilia cogantur ad exemplum magni Judæorum Synedrii: si Sacerdotes nostri Veteres quodammodo æmulentur, qui sub uno Præfide, vel Episcopo Synagogas regebant; si prisca ætate nullum, nisi Episcopi, & Presbyterorum Tribunal Fideles agnoscerent; si Ecclesia Synagogam imitata ad instituendos Ministros manuum impositionem adhibeat; si apud nos

[28] Hæc Judaicæ una cum Evangelica Lege observatio ad Imperatoris usque Hadriani tempora produci nullo jure potest. Etenim a Christi morte Lex Judaicæ mortua habita est ad destructionem usque Jerosolymorum, & sufficien-

tem Evangelii promulgationem. Deinceps vero evasit mortifera, adeoque servanti exitiosa. Porro Jerosolymorum Civitas everfa fuit anno circiter 73. æræ vulgaris, Hadrianus autem suscepit Imperium anno 120.



nos Diaconi, cæterique Ministri inferiores, sicut apud Judæos Ministri Templi, ac Synagogæ, rebus omnibus, quæ in Ecclesia fiunt, pervigilent; si nobis Cantores sint, & Ostiarii, quemadmodum Judæis Levitæ, qui januas aperirent, & clauderent, qui Pulpitum ascendentes canebant, dum Sacra fierent; si Christiani eodem, quo Judæi modo, certum quoddam tempus orationi assignarint; si qua demum interesse videatur inter Christianorum, ac Judæorum Festa similitudo? Hæc, & alia id genus sexcenta nihil absurdi continent, nulloque jure profecto de iis quispiam conquereretur. Quum enim una sit, eademque Christianæ, & Judaicæ Religionis natura, unus utriusque finis, nempe cultus Deo debitus, non est, cur quisquam miretur, aliquas Judæorum cæremonias a Christianis acceptas: quippe nonnisi magno esse possunt emolumento in Ecclesia, quæ illas in proprium usum transferens, sanctas reddit, atque perfectas.

Quidquid ad cæremonias mere legales attinet, ab Ecclesia exulare debet, ac revera exulat. Verum alii quidam Ritus, experientia duce, non sine magna utilitate adhiberi possunt. „ Origenes arbitratur, Legem Primitiarum, aliasque plures, quæ in Evangelio „ aboletæ non fuerunt, ad apicem servandas „ esse; præsertim vero Legem Primitiarum, „ quam Servator firmavit, inquit, qui Altari servit, de Altari vivere debet; eo vel „ maxime, quod postulet omnino recta ratio,

*M.  
Fleur.  
Hist.  
Ecc.  
L. 2.*

„ ut qui Ecclesiam ingreditur , ejus Presby-  
 „ teros , atque Ministros participes faciat fru-  
 „ ctuum , quos summa D. O. M. benignitate  
 „ accepit , quippe qui solem quasi lumen  
 „ accendat , & opportune pluviam immittat  
 „ ad terrarum fecunditatem .

Aliquas etiam cæremonias a Gentilibus mu-  
 tuari potuit Ecclesia , ut iis nonnihil indul-  
 geret , qui ab Idolorum cultu ad Christianam  
 Religionem vocati , in eos Ritus propende-  
 bant ; præcipue , quum se solis indifferentes ,  
 in optimum , & laudabilem usum converti  
 possent . Baronius , Vicecomes , P. Fronto , alii-  
 que plures Theologi doctissimi multa Ritibus  
 nostris inesse fatentur ex Gentilitate delumta ,  
 quæ in Ecclesiam translata , quum novam ,  
 ut ita dicam , naturam induant , summam ve-  
 rationem merentur .

Divus Gregorius Thaumaturgus æquo animo  
 ferebat , ut recentes Christiani diebus Marty-  
 rum Festis convivia celebrarent , uti mos erat  
 apud Paganos in Numinum suorum sollemni-  
 tatibus ; atque ad verum ii accedere videntur ,  
 qui sentiunt , cultum Martyribus exhiberi so-  
 litum , quum in Sanctorum numerum adscri-  
 buntur , ab eo depromptum esse , quam in suis  
 Apotheosis exhibebant Gentiles eximiis Vi-  
 ris de Republica optime meritis : credibile  
 etiam est , antiquissimam consuetudinem inscri-  
 bendi Calendariis Sanctorum nomina , origi-  
 nem habuisse ex Paganorum more , qui præ-  
 stantiorum Virorum nomina Fastis inscribe-  
 bant .

bant. Sollemnitas etiam Anniversariæ dici, qua Ecclesia aliquorum ex suis Episcopis inaugurationem celebrare solet, ex Romanorum instituto fluxisse videtur, qui Anniversarium diem Consecrationis Imperatorum Festum agere solebant (29).

Hæc, aliaque plura affirmari certo possunt, testante Divo Clemente Alexandrino, aliqua Ethnicorum Mysteria sanæ doctrinæ fundamento niti, atque ad veram Religionem quodammodo præparare: „ Non abs re ergo in My-  
„ steriis quoque apud Græcos primum locum  
„ tenent Expiationes, & Lustrationes, sicut  
„ etiam apud Barbaros Lavacrum. Post hæc  
„ autem sunt parva Mysteria, quæ habent  
„ aliquod fundamentum doctrinæ, & præpara-  
„ tionis futurorum (30).

Multo

[29] Fatendum sane, in allatis exemplis nonnihil similitudinis interesse inter Gentilium, & Christianorum Ritus, ac exæmonias. At quæcunque tamen sit ea similitudo, satis firmum non suppeditat argumentum, quo ostendatur, Christianam Disciplinam ab Ethnicis desumptam fuisse. Etenim potuere Christiani inconsultis Paganis, naturali lumine duce, eosdem Ritus instituire, atque servare. Quid enim rectæ rationi magis consonum, quam præstantissimos Viros

de Republica optime meritos colere, ac venerari? [30] Non ait D. Clemens Alexandrinus, desumpta Christianorum instituta a Paganis, sed agnoscit solummodo in Ethnicorum Ritibus aliquam Christianæ Religionis figuram; „ habent [ inquit ] aliquod  
„ fundamentum doctrinæ,  
„ & præparationis futurorum. „ Quamobrem laudata Divi Clementis verba ad Auctoris propositum parum omnino conducunt. De cætero, quod attinet ad figuram Christianæ Religionis,

Multo sane præclarior est, Ecclesiam Sacram fecisse res profanas, in usum Christianæ Religionis convertendo, quam Gentilibus violanda reliquisse. Divus Gregorius Papa, quum Idolorum Tempia in Anglia subverti primum mandasset, iussit postea Episcopo Melito, ut ea mundaret, atque consecraret, quo in gloriam cederent veri Dei, quæ ante ad cæcæ dæmonum cultum usurpata fuerant.

Iustis itaque de causis Ecclesia in proprium usum transferre potuit non modo Tempia, verum etiam aliquas Græcorum, Romanorum, Ægyptiorum, aliarumque Nationum cæremonias, eoque potiori jure, quod Pagani eas fere omnes inique sibi adscivissent, haurientes ex Libris Moyſis Ritus, & Sacra, quibusturpissimo errore ad falsæ suæ Religionis cultum abutebantur,

ligionis, quam Divus Clemens agnoscit in cæremoniis Paganorum: commendandum sane est Sanctissimi Doctoris studium, quo ad Christianæ Fidei laudem convertere nititur quidquid ad illam referri potest, de illa vero figura magnus dubitandi locus subest.

Quum enim Deus O. M. Judæos solummodo in peculiarem sibi Populum adscivisset, verisimillimum est, a Judaica solum Natione figuris ea prædicta fuisse, quæ Servator Mundi, humana carne suscepta, operari debebat.



**CAPUT**

## CAPUT XIX.

*De Consuetudinibus Ecclesiæ, quarum origo  
evidenter non innotuit, atque erro-  
ribus, ac laxamentis a  
Disciplina.*

» **Q**Uum aliquarum consuetudinum origo <sup>Trad.</sup>  
» tam involuta est, & obicura, ut <sup>de l'E-</sup>  
» de ea nihil certi affirmari possit, <sup>glis. 2.</sup>  
» tunc (inquit quidam Auctor) vel a Christo  
» Auctore repeti debent, qui voce tenus illas  
» Discipulis suis tradiderit, vel ab Aposto-  
» lorum institutione, vel a tertio quodam Tra-  
» ditionis genere, quæ aliud non est, quam  
» testimonium, quod perhibet Ecclesiæ Doctri-  
» næ, quam accepit, vel accepisse se putat ab  
» Apostolis, utpote quod eam pleræque Ecclesiæ  
» ab Apostolis principio constitutæ defendant.

Deinde, quum omnes Ecclesiæ Consuetudi-  
nes aliquibus nitantur Fidei Dogmatis, ad  
hæc iccirco recurrendum, ut perspicuo dignos-  
catur, an Consuetudo, cujus origo eviden-  
ter nota non est, Apostolos habeat auctores.  
Si enim cum Fidei Dogmatis cohæreat, ar-  
gumento est manifestissimo, eam divinitus in-  
stitutam; quemadmodum colligitur, Dogmata,  
quorum nulla fit mentio in trinum, quatuorve-  
priorum sæculorum monumentis, ab Apostolis  
tradita fuisse, modo id cæremoniæ, & Ritus ab-

initio servati teneantur, licet mystica quædam, obscuraque ratione; „ Traditione ( ut *De Spir. S. C. 27.* „ inquit Basilii ) in mysterio, idest in occulto tradita.

Fatendum tamen, invaluisse quandoque in Ecclesia Consuetudines, quæ quum illius auctoritate non firmentur, corruptelis adnumerandæ sunt, quas vel immoderata libido, vel turpis ignorantia, vel imbecillium superstitio intrulerit.

Ejusmodi abusus nunquam probarunt Ecclesiæ Patres, quamvis illorum nonnullos ad tempus tolerare coacti fuerint, nempe, donec remedium efficax adhibendi opportuna se se offerret occasio: „ Non enim ( inquit Augustinus *De Morib. Ecc. 61. C. 11.* „ de Presbyteris, & Episcopis ) sanatis „ magis, quam sanandis præiunt; perpetiendæ „ sunt vitia multitudinis, ut curentur, & „ prius toleranda, quam sedanda pestilentia.

Germani, sincerique Animarum Pastores legitimas duntaxat Consuetudines commendarunt; quas autem ignorantia, error, vel infirmitas induxit, parvi omnino fecere. Et sane apud illos instar axiomatis est, non ea solum ratione amplectendam Consuetudinem, quod antiqua, verum etiam quod Ecclesiæ Traditioni consentiat, aperteque declarant, de iis, quorum usus invaluit, non inanis, prævæ, ac inveteratæ Consuetudinis præiudicium, sed unam veritatem consulendam.

Si quando autem Patres ipsimet antiquæ Disciplinæ limites prætergressi, ab illius severitate

tate

tatē pauxillulum deflexerint, gravissimis id certe fecere rationibus, licet nobis ignotis, vel metu, atque ut Regiis Sanctionibus, & Jure Civili morem gererent; vel dispensatione, siue prudenti juris, & regulæ relaxatione, quæ condemmanda profecto non est, modo illam honesta comitetur, & utilis compensatio.

„ Exemplo est Divus Cyprianus, qui licet Neo-  
 „ phytus, ad Sacerdotium evehctus fuit, ideoque *Fleur. Hist. de l'Egl. L. 9.*  
 „ solutus a lege, quam refert Divus Paulus (31).  
 „ Verum affirmari etiam potest, tantum ex hac  
 „ Cypriani in Sacerdotium cooptatione utili-  
 „ tatis fructum sperasse Pastores, ut labe Eccle-  
 „ siæ Disciplinæ illata quodammodo relarta vi-  
 „ deretur

Equidem legis laxamentum non sine prudenti consilio permitti debet. Hinc antiquæ Synodi cavebant quæmaxime in sanciendo Canonibus, ne novas inducerent Consuetudines, quas Christiani, ut ait Dominus *Fleury*, *Ibid. L. 116* paullatim violarent, adeoque ab illarum observatione absolvi peterent.

Baronius primum Schisma in Ecclesia Romana subortum existimat occasione privilegii ad Sacros Ordines, Novatiano irrogati, qui Sacro Baptismo clinice donatus fuerat; atque, quod mirum magis, convalescens Signum Domini ab Episcopo non acceperat.

Ali-

---

[31] 1. ad Timotheum Cap. 3. v. 6. *Non Neophytum,* | *ne in superbiam elatus, in judicium incidat Diaboli,*

Aliquando Patres Ecclesiæ nonnihil accuratioris Disciplinae remittebant, quo, ut diximus, Imperatorum, Legumque Civilium potestati concederent. Hanc rationem ipsamet Concilia secuta videntur; ac nemo inficias iyerit laxatam multoties Disciplinam, dum certam spem conciperet Ecclesia, fore ut pristino splendori, & integritati restituta erigeret se se, atque in grassantes abusus vires exaceret suas.

*Var. 10.* Concilium Arelatense eos, qui conjuges suas in adulterio deprehendunt, hortatur, ne viventibus uxoribus, licet adulteris, alias accipiant, Hortatur, inquam, non autem iubet, ut aliquam Legum Civilium rationem, haberet, quæ subsequens facto divortio Matrimonium non condemnabant.

*Mar-  
culph.  
Form. L.  
2. C. 30.* Et sane divortio locus erat in Ecclesia Latina, atque, ubi semel jure factum pronuntiaverant Judices, Maritus, & Uxor quam maluissent, in conjugem sibi deligere poterant, Prævum hunc fuisse usum, & Christianæ Legi omnino adversum nemo inficiabitur, diu tamen tolerari debuit, antequam ab Ecclesia depelleretur omnino, & eliminaretur.

Hæc constantissima Patrum sententia est, ut ea ferantur humanissime, quæ ferri queunt, & fortiter repudientur, quæ sine ipsius Evangelii contemptu tolerari non possunt. Itaque quomodocunque spectentur, studium suum, optimumque consilium manifeste produnt. Verum vel aliquando prave intellecta, vel perperam



peram executioni mandata fuere, quæ Patres rite susceperant. E. g. Libros pœnarum injungendarum Rituales composuerant, qui Confessariis facem præberent, & frânos delinquentibus; illos imitandi prurigo quibusdam incessit, qui ducti non Spiritu Dei, sed Carne, & Sanguine, fucata quadam specie auctoritatis, ea affatim corruerunt, quæ antea sola veteris hominis persuasione corrumpi cœperant.

Qui animadversionibus hisce alias addere cupit, commodè id faciet, si adeat Auctores, qui hac in re excellunt; præcipue Divum Augustinum in duabus *ad Januarium* Epistolis *de Ritibus Ecclesiæ*, quæ contemnendæ profecto non sunt.

F I N I S

T E R T I Æ P A R T I S,



DE OPTIMA  
LEGENDORUM ECCLESIAE PATRUM  
METHODO.

PARS QUARTA

De usu Patrum Ecclesiae.

CAPUT I.

*Magna Auctorum, & Librorum copia;  
quos ad acquirendam Ecclesiasticam  
Scientiam haftenus propojuimus,  
Lectorem detertere  
non debet.*



Axima illa Librorum, Auctorumque multitudo, quos haftenus usque laudavimus, quempiam forte perterrefaceret, nisi certum esset, exploratumque, tempore, ac labore omnia vinci, multoque longius, quam dictum sit, humani ingenii vires efferri posse. Horæ, diei, vel etiam mensis spatium perexiguum esse videtur: vir tamen prudens, qui nullum temporis punctum perire siverit, multos præter opinionem gravissimis in studiis progressus faciet.

Cele.

Celeberrimus postremi sæculi Scriptor, de Literaria Republica ob incredibilem librorum copiam optime meritus, tempus cum agro fecundo conferebat, cui omnigenæ eruditio- nis semina commisisset, uberrimamque inde segetem collegisset: „Tempus ( agebat ) mea „ possessio „. Et sane concessum videtur ho- mini tempus a Divino Numine, tanquam præclarissimum bonum, cujus ope cætera om- nia sibi comparare queat, præsertim vero scien- tiam, quæ nonnisi diuturno studio, multoque labore acquiri potest.

Hæc suprema ( si ita loqui fas sit ) inge- niorum dominatrix duo postulat a nobis, vi- delicet, ut in ea tempus omne, otiumque consumamus, & voluptates omnino repudie- mus. Salomon eam adeptus via omnium bre- vissima, divino scilicet afflatu, nonnisi multo labore, atque industria ut plurimum acquiri faretur.

Divus Hieronymus refert, Platonem immen- sos subiisse labores, patriam, suosque dese- ruisse, ut errantes in variis provinciis, ac veluti profugas Musas sequeretur. Atque ut solo Patrum exemplo utamur, Clemens Ale- xandrinus proprio victus experimento facilius esse putabat Camelo transire per foramen acus, quam studiosum divitiis affluentem veræ Phi- losophiæ arcana pervadere. Origenes, ut nar- rat Eusebius, diem, noctemque ducebat in- somnem, humi cubabat, ac solo pane vesce- batur, & aqua, ut attentius Sacrarum Litera- rum

rum intelligentiæ vacaret. Neque vero aliam iniit viam Sanctus Hieronymus, ut tantam, qua pollebat; eruditionem sibi compararet. Omnes, uno verbo, præstantissimi Viri exemplo suo aperte docent, scientias non pati, ut alio cultores sui ducantur, quam illarum, amore, vel alio, quam in illis adipiscendis infumant tempus, quod omnino sibi vindicant.

Omnibus hæc persuasa sunt, neque defunt, qui proprio probent experimento, verum, perpauci in finem usque perseverant, quod certum quoddam vitæ institutum non teneant, ac statum quotidiano studio tempus non impendant. Præterea non unus omnibus est mentis ardor, non par facultas. Viri literati viatorum fere similes sunt, quorum alii propriam regionem, vicinasque provincias, alii remotas nationes invisunt, alii longissima aggrediuntur itinera, totumque terrarum orbem perlustrant.

*Vir.  
Card.  
Prof.*

Ita Macrobius, Aulus Gellius, aliique ne periculo se committerent, nihil suscipere, quod sui ingenii, & artis modum excederet. Cicero, Plutarchus, & Plinius longius progressi, multiplicem, uberiolemque eruditionis copiam sibi fecerunt. Contra Democritus, Teophrastus, & Varro nullis adstricti legibus, cuncta nosse, & experiri voluerunt.

Enimvero ingeniorum alia sunt angusta, quæ paucis contenta esse debent, alia tam ampla, ut cuncta aggredi, & comprehendere  
se

se posse confidunt. Illa, quum sui oblita, æquare conantur posteriora, caligant, aberrant, ac vanitatis studio abrepta ex mediocri etiam sede labuntur, in qua merito constitissent, nisi ea immoderatæ laudis amor ad altiora tulisset.

Qui autem ampliori sunt ingenio, quum non omnem facultatem suam satis perspectam habentes, loco recedunt, se seque in inferiorum ordinem cogunt, rursus demum excidunt, non, ut temerariis mos est, prætergredientes metam, sed ut solent inertes, & ignavi, qui deficientes animo, eo non valent contendere, quo cæteroquin virtute sua ferri possent. Hac fere ratione illorum virtus paulatim dilabatur, imbecilles evadunt, ac nimia in res exiguas propensione, ad majora minus apti reddantur, ad quæ nati videbantur.

Equidem maxima etiam ingenia ad res levissimas se demittere, mediocria vero ad altiora se se pro viribus suis extollere quandoque debent; hinc enim nihil contemnendum, inde vero corroborandum, amplificandumque est constanti, & firma exercitatione ingenium: eo tamen modo, ut nimius labor optimorum studiorum contemptum, vel fastidium, & satietatem non pariat.

## CAPUT II.

*De tempore in studiis infumendo, quo  
utilis, & constans in iis  
opera collocetur.*

**P**ERficiendis studiis alii nocturnum, diurnum alii tempus magis accommodatum existimant. Qui nocturnum aptius, potiusque ducunt, ajunt, quietem, ac silentium, in quo cuncta jacent, ad acerrimas, attentissimasque cogitationes plurimum conferre; atque meditationem, sine qua optima studia institui nequeunt, nunquam opportunius, quam hoc tempore fieri posse, quo sensus ab objectis vacui, quibus interdum percelluntur, expeditam, solutamque mentem relinquunt, ut intimas cogitationes promovere queat.

*Plin. L.  
3. Ep. 1.*

Addunt, Romanos sub mediam noctem toto fere anno surgere conlueville, ut studio vacarent; atque complures Viros eruditione inclutissimos proferunt, qui clarissimos dies in obscuras noctes mutarunt, includentes se domi, velut mortui in sepulcris, medias inter lampades ( unde vocantur à Seneca *Lychnobia* ), quo magis tranquillam studiis operam darent.

*Marfil.  
Ficin.  
de son.  
tuend.*

Qui vero diurnum tempus anteponunt, Viris literatis nihil infestius affirmant, quam longas vigilias; tum immoderata hac curaplulquam cæteris ingenii acumen obtundi, corporis

poris etiam valetudinem conteri: quod argumentis ostendunt, ex astrorum, elementorum; humorumque affectione depromtis, immo ex ipsa cerebri natura, in quo sedes est frigidi, & humidi.

*Hippocras. de Carnib.*

Aristoteles hac in re versatissimus studiosos hortatur, ut surgant primo diluculo, quod tempus corporis, & mentis sanitati omnium est accommodatissimum, atque ad verum Philosophiæ progressum maxime conducit. Origenes scribit, in divinorum Oraculorum lectione, atque meditatione illud temporis spatium impendi solitum, quod a summo mane ad tertiam usque, vel quartam horam vespertinam fluebat. Cardinalis Perronius matutinum tempus studiis infumebat; atque sapientissimus quidam nostræ ætatis Scriptor, diurna studia commendat, vespertina vero, nocturnaue prorsus improbat. Augustus tamen politiorum literarum amantissimus, a cœna lucubratoriam se in lesticulam recipiebat, ut optimarum artium studiis vacaret.

*Apu. Cede. Suid.*

*Suet. in August.*

Ast, ut verum fatear, proprias quisque vires, ac proprium animi studium hac in re opportunius consulat. Etenim in omnibus fere gerendis inest nobismetipsis velut insita regula quædam, quam & sequi tenemur, & prætergredi nefas esset. Quocunque tamen se quisque vertat, vel animi propensione, vel alia quavis de causa, ibi consistat oportet, nec diem ullam prætereat, qua non aliquid memoria dignum didicerit.

*Vide Gabriel Naudæ quæst. an matutina studiis vespertinis salubr.*

Z

Quidam

*L. 3.  
Ep. 1.* Quidam extant homines adeo laboriosi, tan-  
taque corporis valetudine, ut vita carere  
mallent, quam a studiis abstinere, quemad-  
modum refert Plinius Junior de avunculo suo  
Plinio Historico. Verum non omnes eadem  
vi pollent, eodemque robore; alii per saltum  
hac, vel illa die student, ut vel cupidine,  
vel curiositate impelluntur; alii semel quoti-  
die aliquot horis plus, minusve; alii demum  
bis, vel ter summo mane, post meridiem,  
& ad vesperam repetitis vicibus studia  
exercent.

Hoc unum affirmari certo potest, quemad-  
modum non intermisso cibo opprimerentur cor-  
poris vires, sic continuis studiis animum he-  
betem fieri, stupidumque; & sicuti quampri-  
mum frangeretur corporis, minus quam par  
est, enutriti valetudo, ita mens infirmaretur  
omnino, quæ satis alta non foret. Simili enim  
modo, quo levem quotidie cibum adhibentes  
tenuantur, & macie tabescunt; pariter qui le-  
viori semel in diem studio utuntur, nunquam  
Posterorum memoria dignos fructus edere po-  
terunt. Infirma hæc studia, obiterque perfe-  
cta cum iis conferri possunt Procerum cænis,  
quas Renatus *de Beaune* lepide vocat *Cænas  
ambulatorias*.

Consistentaneum magis videtur bis, vel ter  
iteratis vicibus quotidie studere, quam vel  
animo tabescere illorum more, qui paullulum  
studio vacant, vel hebescere, ut illi, qui im-  
moderato æstu nimium student. Tantum quie-  
tis,



tis, & otii sibi quisque sumere debet, quantum opus est, ut sumta digerantur, & perficiantur; atque curandum, ut gravioribus studiis leviora misceantur, quæ levaminis instar, & oblectamenti reficiant animum, eumque ad diutius, acriusque cogitandum instaurent. Sapientis est famem nec omnino explere, nec modum excedere: quum experientia duce optimi quique cibi præter modum adhibiti nequaquam prosint, multaque sæpius fugiant immoderate legentem; ac demum qui libris volvendis nimium vigilat, plerunque dormitet. Sicuti enim quidam ajebat Philolophus, ita *Corres.  
Epiß.* mens nostra comparata est, ut multa indigeat relaxatione, ad aliquam temporis partem in inquisitione veritatis utiliter insuendam.

Qui moderatione non utitur, corporis valetudinem periculo committit, quæ alterum est, ut ita dicam, in optimis studiis fundamentum, non secus ac facilis memoria, & præcellens ingenium. Sapientissimus *Charon* acquisitioni scientiarum anteponebat quodammodo sanitatem: nec injuria sane, quum sublata valetudine jaceant scientiæ, atque languescant; ac licet oneri nequaquam sint, parum tamen omnino prosint, parumve delectent.

„ In gravioribus studiis, non secus ac in *Fr. Ful.  
vit. de  
F. Pass-  
lo.*  
„ ludis, intemperantiores multi sunt „ Innumera Eruditorum exempla proferri possent, quos acrior in studiis exercitatio confecit,

quive nimia mentis intentione, atque immo-  
dica studiorum libidine immatura morte obie-  
runt. Nam inter Parnassi, juxta ac cæterarum  
orbis partium cultores, alii sunt imbecilles,  
ac fastidiosi, alii deliciarum amantes, alii de-  
mum immoderati. „ Legendum est ( ut ait  
„ antiquus quidam Scriptor ) multum, non  
„ multa. Manent ( inquit Cicero de Catone )  
„ ingenia senibus, modo maneat studium, &  
„ industria: habet aliquod tanquam pabulum  
„ studii, atque doctrinæ; nihil est otiosa se-  
„ neſtute jucundius.

Plato annos natus plusquam octoginta,  
calamum præ manibus habens, vita excessit.  
Isocrates, quum annum jam ageret quartum,  
& nonagesimum, opus scribebat, cui titulus  
*Panathenæicus*. Ejus magister Gorgias septimum  
supra centesimum annum attigerat, quin a-  
legendis, scribendisque libris unquam desti-  
tisset. Pater Sirmundus dulce Eruditorum de-  
cus, ac venustissimus ætatis nostræ Criticus  
ad Isocratis usque ætatem perfecta fuit cor-  
poris valetudine. Adrianus etiam Politus Se-  
nensis, vir doctissimus, testante *Rossy* ejus  
temporum Scriptor, tres, & octoginta annos  
vixit, nec Medico, nec Caufidico unquam  
usus: felix sane, fortunatusque, tum jucun-  
dissima animi tranquillitate, tum etiam inte-  
gra corporis valetudine, quæ duo maxima  
bona, longioris vitæ decursu, vix, ac ne vix  
quidem una concurrunt.

## CAPUT III.

*Quæ adhibenda sit in studiis accuratio,  
ac diligentia.*

Satis habendum non est, ingenii sui vires  
compertas habere, ac tempus ordinate  
disponere; plurimum præterea in lectione  
adhibendum diligentia, atque cavendum sum-  
mopere, ne manum aliis rebus admoveas, &  
priora deferas, antequam ea perfecte nota  
sint, explorataque. „ Lectio libera est ( in-  
„ quit Quintilianus ) nec actionis impetu Instit.  
L. 10.  
C. 1.  
„ transcurrit, sed repetere licet, siue dubi-  
„ tes, siue memoriæ penitus affigere velis.

Quoties Liber aliquis evolvendus sit, certo  
definiri non potest: procul tamen dubio toties  
versandus est, donec probe perspectus fiat, ac  
undique notus. „ Repetamus autem, & tra-  
„ ctemus, & ut cibos mansos, ac probe  
„ liquefactos demittamus, quo facilius dige-  
„ rantur; ita lectio non cruda, sed multa  
„ iteratione molita, & velut confecta memo-  
„ riæ, imitationique tradatur.

Attamen nisi sermo fiat de rebus difficilli-  
mis, atque implicatissimis, vel de intricata  
principiorum collectione, cui multiplex, &  
ardua subsit significatio, cujus generis sunt,  
in Scientiis profanis, Aphorismata Hippocra-  
tis, & Elementa Euclidis; in Scientia vero

Theologica Sententiæ Petri Lombardi, *Summa* Divi Thomæ, aliaque similia. Unum, eundemque librum ter legisse sufficiat; primo, ut videatur, quæ de re, & quo modo agat; secundo, ut analytice, & ad amussim expendatur; tertio demum, quo ejus doctrina, ordo, & ratiocinatio ita Lectoris menti inhæreant, ut de iis scienter, ac perite dicere, aliosque, si opus est, valeat erudire.

Verum utilissimam hanc legem servare non semper necesse fuerit; non enim latet, optimos extare libros, quos semel vidisse sufficit, aliosque, a quorum lectione nunquam abstinendum: ut Sacræ Scripturæ, iique omnes, qui studiorum veluti basis habentur, ac fundamentum. Hac de causa nonnulli Theologi Augustinum, & Philosophi Aristotelem, atque Platonem nunquam e manibus dimittunt. Pari quoque ratione Critici artis suæ proprios libros volvunt, revolvuntque: quo modo Henricus Valesius iterum, iterumque Harpocrationem in decem Oratores Athenienses legebat.

*Henric.  
Vales.*

Generatim tamen illud affirmari potest, sive nimis crebram, sive nimis infrequentem libri lectionem periculo non vacare. Qui enim minus legit, quam par est, non omnia, quæ velut in occulto latent, apprehendit; qui vero sæpius, eo tandem devenit, ut ea etiam, quæ procul absunt, inspiciat; ea fere ratione, qua nonnulli curiosi immoderata alicujus rei estimatione

stimatione ducti iterum, iterumque fixo oculorum obtutu, lepores, & elegantias detegunt, quæ, quum uni illorum hæreant cerebro, cæteros omnino latent; vel ut de quodam Auctore dictum est, qui iterata Poetarum lectione ea se demum invenisse putavit, quæ Poetæ ipsimet ne somniant quidem. In hoc itaque rei cardo vertitur, ut dignoscatur Lector quid magis, vel minus universis rebus insit, & huic discrimini, sive varietati pro necessitate, & prudentia se se accommodet.

Equidem, qui ad summum perfectionis apicem contendit, eximium Auctorem, quem imitari satagat, in patronum sibi adsciscere debet. Verum nisi singulari naturæ beneficio selecti Auctoris ingenium aliqua saltem parte sortitus quis fuerit, parum omnino delectu suo juvabitur. Illud naturæ beneficium si tollas, cuncta evanescunt, atque imagines ab exemplaribus omnino specie differunt. Petrarca, quum Virgilium præ oculis haberet, ab ejus stylo magnopere distat: Calvinus, qui omnia Ciceronis opera semel quot annis legebat, Senecæ magis, & Cornelii Taciti, quam Ciceronis stylum expressit; atque parum absuit, ne universa juvenus, quæ incunte hoc sæculo Justum Lipsium, a cujus ingenio multum aberat, imitandum sibi propoluit, quidquid puræ Latinitatis adepta erat, amitteret.

Reprehensione minus digni videntur ii, quibus librum anteaquam percipiant, quadragesies lecto opus est, ut contigit Avicennæ,

quam qui perfunctorie solum lustrantes nihil omnino intelligendi periculo se se exponunt. Perfunctoriæ hujus methodi usuræ iis ad summum concessa est, qui felix, perspicacissimumque ingenium sortiti, cuncta, ut ita dicam, scientiarum semina in se ipsi continent, vel, qui in earum cultura adeo provec̃ti sunt, ut oculis in Auctorum libros vel leviter injectis, statim, & illico detegant, si quod est illis ignotæ eruditionis Caput. Librum non legisse quandoque parvi refert; at illum, quisquis demum sit, non ea, qua oportet, attentione legisse plurimi interest, immo periculo nunquam vacat. Qui enim non legit, incitiæ solummodo arguitur; qui vero perfunctorie, & perperam legit, in errorem impingat necessum est.

Nequicquam compendium temporis facere putant, qui molli duntaxat brachio perstringunt Auctores, quibus inquit, diutius non immorandum; satius enim multo erit non legisse, quanquam ex vulgari opinione cuncta legenda sint, bona æque, ac mala. Plinius Senior nullum esse, aiebat, adeo ineptum opus, ex quo non aliquod colligeret emolumentum. Verum ille de Historia differebat, quam conscribendam susceperat, cujus incæptum adeo amplum erat, ut illius perfectionem undique mutuari cogeretur. Deligendi tamen ab eo erant paullo accuratius Auctores, ne inconsiderate, ac justo confidentius tot gesta referret.

Spero

Spero Speronius, quum in eadem versaretur Plinii sententia, alia prorsus ratione ducebatur, ut libros etiam contemptissimos evolveret: Etenim rogatus, cur ineptis ejusmodi opusculis immoraretur, respondit, callidi Latronis esse, in abditis locis, & ab hominum frequentia remotis clanculum furari. Quod tamen responsum probo, honestoque viro minus dignum esse videtur, qui ita animo comparatus esse debet, ut nonnisi præstantissimos Auctores imitari velit, ac debitam illorum nomini, quorum ope profecit in scientiis, laudem tribuere non omittat.

#### C A P U T I V.

*Ab Antiquis, ut fieri potest, Studiorum Methodus est reperenda.*

**Q**UI libris apposite, apteque ad rem suam utitur, in literis plurimum profecisse existimandus est, utpote quum inde optimus, felicissimusque Studiorum successus omnino pendeat. Suam quisque sequitur peculiarem studendi rationem; quæ tamen recta dici debeat, una est, in eo sistens, ut ingenii vires omnes, quoad fieri potest, exercentur, augeanturque.

Apud Antiquos alia vigeat ab hodierna Studiorum ratio. Quum ob librorum inopiam paucioribus operam darent, vires suas experiri

riri commodè poterant, atque diuturnæ meditationis subsidio insolita lumina, præclarissimæque scientiarum ornamenta adferebant, unde percipere opinio, vel cœlestem ab iis ignem surreptum, vel singulari quodam Numine afflatos, & illustratos esse, quanquam non alius iis adesset Genius, quam eximium a natura ingenium, assiduo labore, studioque excultum, perfectumque. „ Nullum Dæmonem, aut Genium mihi  
*Cardan.* „ adesse cognosco ( aiebat quidam Philosophus, qui peculiari Numine ductus censebatur )  
*in vita* „ illud bene scio, mihi pro bono Genio datam  
*sua.* „ rationem, patientiamque in laboribus magnam, bonum animum. „ Quibus verbis Julium Scaligerum mendacii arguit, cujus ea opinio erat, extare hujusmodi Genios in præstantissimorum Virorum mentem subtiliter se se insinuantes.

Nimiam lectionem improbat Seneca, ab eaque cavebant Philosophi; atque Homerus, qui ante certos quosdam inventos ordines, & modos florebat, meditatione magis, quam lectione ad tantæ perfectionis apicem provectus videtur, ut non modo Poetarum, verum etiam Philosophorum exemplar habeatur. Etenim Plato non sola ingenii sublimitate Homeri exemplum secutus est, sed etiam rerum, verborumque magnificentia, & ubertate.

Græcis, quibus magistris Romani disciplinas referre debent acceptas, proprio contenti sermone, nec alienis incumbentes, totum in meditatione tempus collocabant, quod in Linguarum



guarum jacentium studio, quas nemo unus perfecte assequi valet, a nobis infumitur.

Socrates, Arcefilaüs, aliique Græciæ Sapientes bene, recteque cogitandi arte Auditores suos imbuebant; & quum universa, quæ tractabant, ad amussim expenderent, & singulas illorum partes attento animo intuerentur, per amplissimas regiones cursum aperiebant, ut facile videre est apud Platonem, Aristotelem, & Hippocratem.

Hæc meditandi voluntas a centum circiter annis incessisse videtur insignibus quibusdam Viris, ut inelyto Cardano, qui majorem librorum copiam scripsisse fertur, quam legisse; ac Julio Scaligero, qui singulari cum laude, dicitur ingenio magis, quam studio valuisse, contra quam quod de ejus filio Josepho dictum sit, qui studio nimirum, quam ingenio præstitit; qua in re alter Antiquorum, alter Recentiorum magis secutus est exemplum.

*Thom.  
Illustr.  
Vir.  
Elog.*

Celeberrimus per totam Italiam Theologiæ Doctor Socratem imitatus fuisse fertur in instituendis Auditoribus suis: siquidem præmissis rerum delectu singillatim expendebat quidquid eis inerat firmi, vel infirmi, rectum etiam, vel pravum earundem usum, errata, & abusus, qui paullatim irrepsierant, nec nisi ex optimis, solidisque principiis argumenta ducebat. Singularis videtur hic ordo, neque omnibus fortassis arridet, verum acquirendæ rerum cognitioni latissimam viam pandit: A paucis ille teneri solet, quod inani pompa, & ostentatione

tatione careat: ast metam attingit celerius, meritoque in fine curriculi præmio donatur.

Ecclesiæ Patres meditationi se plurimum dederunt. Solos fere Sacros Codices præcipue primoribus sæculisolvebant. Divus Hilarius (ait D. Peronius) uni, ac soli Scripturæ Sanctæ Libro studuerat. „ Clerici antiquitus, & „ Monachi operam omnem suam in perdi- „ scendis Sacris Literis collocabant. In earum „ scientia sistit universa veterum Patrum Theo- „ logia; nec aliud profecto continent eorum „ opera, quam Scripturæ Sanctæ verba variis „ modis exposita, simulque confectaria ex illis „ deducta.

*Matill.  
de stud.  
Monast.*

Qui vero profana eruditione cæteris præstabant, quidquid in politioribus literis profecerant, ad Verbi Divini intelligentiam conferebant. Origenes in Scholis omnes Philosophiæ, & Mathematicæ partes tradebat, quæ ad Scripturæ Sacræ explanationem, Christianamve morum institutionem revocari poterant. Divus Hieronymus quidquid ab Oratoribus profanis, atque a Poetis hauserat, ad Sacrorum Bibliorum interpretationem convertebat; eodemque utebantur consilio Chrysostomus, & Theodoretus.

Scripturis Sanctis instructi Ecclesiæ Patres secreta loca petentes, altissimoque silentio sepulti, animum extollebant ad Divinæ Sapientiæ contemplationem, cujus suavissimo lumine eo magis illustrabantur, quo arctioribus cum illa Charitatis vinculis erant conjuncti. Ut enim scribit

scribit Augustinus: Charitas, quæ Deo jungimur, nos edocet, & informat. Revera quidem acerrimum cordis, ac mentis studium in Divini Præcepta Magistri plurimum confert ad prosperos in optimis studiis progressus; neque potior ulla ratio adduci potest, cur tot præstantissimi Viri, qui ad Ecclesiæ defensionem hætenus usque scripsere, tantis divinitus beneficiis cumulati videantur.

Quanto fuerit emolumento hæc meditandi ratio, dum viguit, vix dici potest, aut credi. Verum deficientibus temporis successu antiquis fontibus, atque una primævis ingeniis, hæc mentis contentio paullatim remittere cœpit. Expeditius visum est, atque facilius veterum monumenta Patrum adire, ac debitum illis honorem præbere, quam contemptus periculo se se committere, recentia proprio Marte fingendi libidine. Itaque, qui posterius florere Scriptores, seposita meditatione, longissimis se totos dedere lectionibus, sed parum utilis, quæ sitim afferunt, ne dum expleant.

Eorum, qui hanc viam inierunt, facile princeps dici potest Divus Hieronymus, nodos identidem propositos solvendi necessitate compulsus. Quum enim non ita semper vacuus esset, ut tantum meditationi tempus concederet, quantum opus esse videbatur, Antiquorum doctrinam referre satis habebat. Divus Augustinus, eam rationem minus crebro adhibuisse videtur, præcipue in Libris Polemicis, in quibus propria ejusdem Augustini medita-

tio

tio pluries se prodit. Verum post Gregorium Papam, qui totum fere exscripsit Augustinum, plerique Scriptores Ecclesiastici, semotis proprii ingenii fœtibus, potiore in eo curam posuere, ut antiquos Patres describerent, ac illorum studiis, atque laboribus fruarentur: tum scientia non ex novis, ut olim inventis, sed ex uberiori lectione, atque ex majori locorum communium copia æstimari cœpta est.

Hinc Compendia, & Epitomæ, quas Cancellarius Bacco *Vadum Scientiarum* vocat, quod in altitudinem fere depressa non sint. Hinc quædam opera sub *Catenarum* nomine, quod in iis varia Auctorum placita de uno, eodemque argumento connexa videantur. Inde etiam petenda est quorundam operum origo, quæ, quum majori diligentia elaborata sint, nihil tamen continent præter collectas Patrum sententias potius, quam verba.

Hoc scribendi genere præstitit Venerabilis Beda, octavo Ecclesiæ sæculo; sic enim Antiquos descripsit, ut de suo nonnihil addiderit. Bedam complures imitati sunt magis, minusve prospero successu, pro majori, vel minori ingenio, ac facultate. Quamvis enim Sapientes deficere viderentur, sublucebant identidem. parvæ quædam scintillæ ex Veterum cineribus excitatæ.

Sub ea tempora Antiquorum documenta in ordinem cogi, ac Religionis Dogmata ad suprema quædam capita revocari cœpere, quibus

bus velut totidem membris conflatum tandem est univērsæ Theologiæ corpus, quo hodiernis temporibus utimur. Ast dum florerent Compilatores, peculiaris studiorum methodus excogitata fuit, quæ tum propter antiquitatem, tum ob Ecclesiæ utilitatem pluris faciunda est. In transcribendis Patrum operibus ea versabatur; quamobrem & multæ lectionis libidinem explebat, & meditationi, in qua studium fere omne ponebant Veteres, locum præbebat. lis enim persuasum erat, fore ut iterum, iterumque transcriptos Auctores demum imitari discerent. Demosthenes bis, & vigesies Thucididis opera transcripserat, quo ejus eloquentiam imitatione sibi compararet. Andreas etiam Dudithius Lutheranus, Vir apprimè doctus, qui postremis hisce temporibus Antiquorum exempla sibi proposuerat, ter integrum transcripsit Ciceronem.

Aliam instituit Divus Bernardus sæculo duodecimo, eamque nobiliorem studiorum rationem, sive potius antiquam, longo prudentissimorum Virorum experimento probatissimam recepit. Quamvis enim Sanctorum Augustini, & Gregorii Papæ volvendis operibus incumbere, Sacris tamen Libris studebat inprimis, atque meditatione potius Verbi Dei, quam Commentariorum lectione veritatem indagabat. Ita demum res tractare consuevit, ut antiquos Ecclesiæ Doctores non tam exscribere, quam scribendo æquare videretur.

Sæculo sequenti eandem iniit viam Doctor Angelicus. Quum enim plurima uteretur lectione, seque totum disputationi dedisset, nunquam tamen ad Christum Jesum, velut ad præcipuum Institutorem suum non revertebatur. Verum Scholastica Christianas Scholas invadens, immoderatam secum una laxitatem inexit, atque derelictis Scripturis Sacris, necnon Ecclesiæ Patribus, Theologiæ studiosi ad inanes speculationes, futilissimasque cavillationes, quæ infirmi potius, quam acris ingenii argumenta sunt, se totos converterunt.

Patrum, & Conciliorum studia jacuerunt omnino, atque mos inolevit, ut nihil eorum addisceretur, præter pauca, quæ in Scholasticorum Summis, & Juris Canonici Peritorum operibus collecta reperiebantur; Magistri vero compilatorum errata, & hallucinationes velut oracula, atque inconcussa axiomata bona fide tradebant.

Ultima tandem, eaque maxima perturbatio allata est, quum scriptis præcepta tradendi perniciosissimus mos invaluit: tunc enim autographa Antiquorum monumenta omnino neglecta sunt. Quum primum Aristoteles in Parisiense Lyceum inductus fuit, nonnulli duntaxat ejus Libri legebantur: progressu autem temporis quædam a Magistris Scripta tradi cœnerunt, quibus non tota contineretur Philosophia, sed solæ illius prælusiones, ac paucae quæstiones, quæ *Prolegomena* dictæ, quum ad solvendas difficultates conducirerent,

ad

ad Philosophiæ studium adolescentum ingenia præparabant.

Excrescentibus in dies Magistrorum Scriptis improbari cœpit hæc docendi methodus, ac Professores, vulgo dicti Lectores (quod antiquitus Scripta legerent solummodo, non autem dictarent) jussi sunt a dictando abstinere, totumque tempus in legendis, ac viva voce explicandis antiquis Philosophis insumere.

Prisci Ecclesiæ Presbyteri, teste Clemente Alexandrino, a scribendo abstinabant, ne tempus meditationi necessarium, vel tradendis præceptis destinatum alio impenderent. Viget ea consuetudo etiamnum in nonnullis Societatibus, ut omissis Scriptis, sola Antiquorum lectio adhibeatur.

Non infior quidem, Scriptis memoriam juvari, iisque Auditores de plurimis rebus, quæ attentissimos etiam, diligentissimosque fugiunt, fieri certiores. At experientia tamen liquet, hac methodo segnes reddi potius, ac inertes, quam doctos Viros, qui Reipublicæ profint, mediisque Scriptis, quæ nunquam fere leguntur, non scientias adquiri, sed scientiarum speciem, & umbram, ut inquit egregie Plato.

Verum quia contra torrentem niteretur, qui consuetudinem in omnibus hac tempestate Athenæis receptissimam condemnaret, præcipue quum defensoribus suis, suisque commodis non careat, poterit quisque singillatim recentium quorundam Eruditorum exemplo

Scripturas Sacras adire, Concilia, & Patres, atque optimos inde fructus altiori, graviori-  
que meditatione colligere.

## C A P U T V.

### *Quis usus Annotationum, & Collectionum.*

**I**N more positum erat apud Græcos, atque  
Latinos ad ea, quæ probanda, vel impro-  
banda videbantur, notas apponere. Svetonius  
*Suid.* Notarum Collectionem ad hunc usum confecerat; Diogenes Laertius de Annotationibus loquitur, quæ sua ætate Platonis adhuc operibus appositæ legebantur, atque ad indicandas peculiæres Auctorum opiniones, graves sententias, ac quidquid demum emendatione, mutatione, vel detractiõne dignum est, a Criticis adhibebantur.

Quidam Aristophanis Interpres Notarum calculum exhibet, quibus Poetæ, publicæ præ cæteris censuræ obnoxii, distinguebantur. Aristarchus Homeri flagellum peculiæres scripserat Annotationes, live potius jam inventis pro libito utebatur. Atticus miniata cerula notare solebat, quæ in Libris Ciceronis reprehendenda existimabat. D. Hieronymus Asteriscos memorat, & Obelos, quos adhibebat Origenes, & adhibuit ipsemet post Veteres Grammaticos Scholiis in Sacram Scripturam.

Apud



Apud Divum Epiphanium, & Isidorum Hispalensem nomina extant, & signa veterum Annotationum, una cum earundem expositione. Duplex illarum genus agnoscit Sixtus Senensis: *Notæ Literatæ, & Notæ Illiteratæ*. Priores selectæ sunt alphabeti literæ; posteriores autem signa ex industria facta, quibus, ut lubet, uti quisque potest.

Hæc omnia manifestissime ostendunt, quanta olim diligentia, & accuratione legerentur Auctores, nihilque Veterum censuram effugisse; neque enim satis habebant illi res omnino malas suggillare, dubia præterea, æquivoca, obscura, supervacanea, mutilata, supposita, transposita, necnon assuta notabant.

Nonnulli hodiernis temporibus atramentum, rubricam, vel alium colorem eodem fine adhibent. Verum, qui libris suis pro arbitrio uti queunt, omissis coloribus hisce, vel aliis, ut placet, inventis signis, Annotationes suas indicare poterunt. Itaque, quum notata relegent loca, copiosissimos brevi tempore laborum suorum fructus percipient. Hæc via est omnium brevissima, eademque tutissima. Quum enim suo quæque loco sita maneant, facilius multo explanantur dubia, si quæ occurrunt, quam si in unum collecta forent; nam si proprio loco amoveantur, ægre admodum intelliguntur, propterea quod iis, quæ in toto opere antecedunt, vel consequuntur, connexa nequaquam sint. Hinc bene multi suis, vel aliorum Collectionibus unice freti Scrip-

turis sæpe Sacris, Ecclesiæ Patribus, atque Auctoribus, alienam prorsus ab eorum mente interpretationem affinxere. Fieri quippe vix potest, ut a proposito non deflectat, qui loca solum expendit a propria libri sede sejuncta.

Præter Annotationes in usu etiã erant apud Antiquos Collectiones. Plinius Senior, ut a Juniore refertur, una simul *adnotabat*, *excerpebatque*. Seneca Philosophus ex iis, quæ legerat, optima quæque colligere consueverat; quod & Augusto familiare fuit, qui factas Collectiones amicis benigne, ac liberaliter impertiebat.

Erudiendis filiis suis Noctes Atticas elucubravit Aulus Gellius, quas ex optimorum Auctorum lectione, atque illustriorum amicorum colloquutione collegerat.

*Strom.*  
1.

Divus Clemens Alexandrinus *Stromata* sua commendat, appellans „sepositos Commentarios, quasi viaticum senectutis, & oblivionis remedium; ut (inquit) sint nobis imago quædam, & species adumbrata efficacis illius, animatæque doctrinæ, quam a Viris beatis, & commemoratione profecto dignissimis audire meruimus. Horum alter in Græcia Ionicus, alter in magna Græcia fuit.... Alii autem in Oriente vixerunt, &c. (1).

Quum

[1] Quem hoc loco præcipue commendat Divus Cle-

mens Alexandrinus, docente Eusebio Hist. Eccl.

„ Quum aliquid memoria dignum accepif-  
 „ sent Vetères, quod per tempus scripto man-  
 „ dare non possent, *ponebant signa*; scilicet  
 „ generalibus quibusdam observationibus ad-  
 „ instar analysis illud notabant, ut omnes illius  
 „ partes memoria tenerent, quum per otium  
 „ literis consignare liceret.

Id genus adnotationes Philosophi vocabant  
*ὑποσημείωσις*, & Plato in quodam Theeteti  
 loco appellat *ὑπομνήματα*, ubi Euclides Ter-  
 pioni roganti de colloquio, quod habuerat cum  
 amico suo, respondet, difficulter omnino ejus-  
 modi confabulationem viva voce describi posse:  
 verum, inquit, domum reversus nonnullas An-  
 notationes in habitum colloquium exaravi,  
 deinde vero, quum liceret per otium, adje-  
 ctis observationibus meis illud scripto con-  
 signavi.

Ad illarum, ni fallor; exemplum fiunt hoc  
 sæculo Collectiones, quibus memoranda præ-  
 stantissimorum Virorum dicta ab oblivione  
 servantur. Ast, ut verum fatear, multum, at-  
 que adprime necessarium desideratur in illorum  
 selectu judicium.

Eadem fere dici possent de multis, quas le-  
 gendo plerique faciunt, Collectionibus. Ea-  
 rum

L. 5. Cap. 11. ille est, Pan-  
 „ tænus Philosophus, qui,  
 „ (ut ait idem Eusebius Cap.  
 „ 10.) Alexandriæ præfuit  
 „ Scholæ, ubi partim viva

„ voce, partim scriptis  
 „ Divinorum Dogmatum  
 „ thesauros exposuit, tem-  
 „ poribus Clementis Ale-  
 „ xandrini.

rum usus magnopere commendandus est; at ita plerunque indiligenter, & inconsiderate fiunt, ut noceant magis, quam utilitatem, ullam adferant. Ut vero non inutiliter fiant, ea imprimis ætate suscipiendæ non sunt, quæ mens suam maturitatem nondum affecuta, admirari obvia quæque apta est, potius quam sedulo dijudicare; vel, si ea ætate suscipiantur, Magistro duce, qui singulari doctrina, exquisitoque judicio præstet, sunt perficiendæ.

Deinde nihil omnino ab Auctoris cujuscunque libro excerpendum, antequam totum, & quidem pluries perlectum fuerit, ne fucato nitore quis deceptus nugis, atque quisquiliis intentus, a proposita lectione deflectat. Ea quidem vigeat antiquitus consuetudo, ut qui transcribendo librorum studiis vacarent, ad calcem uniuscujusque paginæ, dum atramentum siccaretur, Collectiones suas apponerent. Verum otium, quo fruebantur Amanuenses, ad res optime deligendas, digerendasque, illius methodi vitium supplere videbatur.

Tertio loco tam apte disponere, eoque ex ordine suas collocare oportet Collectiones, ut in illarum usu mixtum inveniatur utile dulci. A plerisque enim ita factitari solent Collectiones, ut res continenter, atque ut ante oculos illis obversantur, scribere satis habeant, ea tamen mente, ut tabellis postea recorrent, atque ad vocabularii formam redigant.

Alii

Alii vero accuratiores in disponendis Collectionibus suis ordinem Magistri Sententiarum, vel Divi Thomæ sequuntur, qui rebus Theologicis accommodatissimus est; utpote quæ seriem postulent, atque connexionem, ut iis Lector cum laude uti possit.

Nonnulli vero ordinem Decreti Gratiani sectantes, ea, quæ excerpunt, ad generales quosdam Titulos referunt, ac characteribus arithmetice Lectorem ad loca annotata remittunt. Quo pacto Cardinalis *Caraffa* ex Epistolis Gregorii Magni insignia loca collegit, quæ Disciplinam Ecclesiasticam spectant. Sic quæ in hujus Pontificis Epistolis ad Ecclesiæ Præsulum inaugurationem attinent, ad Titulum *de Consecratione Prælatorum* reducit, atque characteribus arithmetice indicat loca Epistolarum, ex quibus Gregorii Magni mens, & verba dignosci possunt. Hæc methodus Juris Canonici Peritis sollemnis, ac familiaris, bene multas tollit supervacaneas lucubrationes, ac dummodo conjunctam habeat in proferendis Auctorum locis diligentiam, & fidem, plurimum levat, adjuvatque Lectorem.

Omnium autem pulcherrima, necnon utilissima Collectionum methodus illa est, quam tenet Photius in sua Bibliotheca, ubi Libros recenset, quos pervolverat, dum in Assyriam legatus foret. Nihil est non perfectum, nihil non summe probatum, ne ipsa quidem excepta, qua scribere videtur, incondita simplicitate. Nulla utitur arte, at sincerus tamen

ille, naturalis, minimeque fucatus lepor, cui immensa eruditionis varietas conjuncta est, Lectorem admiratione capit, summeque delectat.

Schottus hanc Photii Bibliothecam nimis oscitantiae redarguit; quamobrem memoriae magis juvandae, quam Libri, Posteris mandandi causa ab eo scriptam fuisse existimat. Pontanus vero non solum indigentiae in exponendis Librorum argumentis insinuat Photium, verum etiam inconsiderantiae, atque temeritatis, aitque, nullo delectu adhibito, ut a Notariis acceperat, ab eo vulgata fuisse. Verum ad depellendam a tanto Viro hujus culpae suspicionem, plurimum facit, quod ait Henricus Valesius, multa scilicet, quae in hac Collectione leguntur, assuta fuisse; ac vero similiter a compilatoribus supposita, qui augendae Bibliothecae studiosi eam omnino fœdarunt, atque deturparunt.

Utcunque se res habeat, omni prorsus erroris periculo vacat, qui ex ista Photii methodo Auctoris, quem legit, nomen, Patriam, mores, aetatem, qua floruit, quot etiam, & quae sunt illius opera, atque prae cæteris singularem illius styllum, & ingenium distincte notat. Hæc enim omnium est aptissima ratio, ad multas Auctoris vias indagandas, certeque persequendas.

Si vero rei dignitas postulet, Auctoris doctrina fuse, lateque exponi debet. Illius Analysis primum instituenda, tum præcipua Auctoris,

toris, ejusque Adversariorum argumenta, & allata responsa notanda sunt. Non enim nisi auditis utrinque disputantium momentis, æquum de disputatione judicium ferri potest. Sin autem controversia, vel auctoritate Ecclesiæ, vel communi Doctorum consensione finita sit, sententiam totidem, quibus concepta est, verbis describet.

Photius Tractatum, quos legerat, ampla etiam excerpta quandoque exhibet. Quam in re plurimam apud Posterios inivit gratiam, quum ex veteribus Autographis monumentis non pauca interierint. Modiernis vero temporibus, quum plerique manuscripti Codices typis vulgati sint, operam perderet, qui iis exscribendis vacaret, nisi forte fortuna perire forent, maximique momenti.

Sicuti Auctori diutius immorandum non sit, silentio præterire poteris, vel paucis omnino verbis perstringere, quæ de illo, ejusque operibus dicenda sunt.

Immo vero ab optimis etiam Scriptoribus non omnia colligenda, quæ animum illico percellunt, neque in omne argumenti genus longius excurrendum. De Fidei quidem Dogmatis paullo uberius disserendum, quod plurimum interfit eas res copiose, nitideque exponere, quæ levissimam etiam suppositionis speciem refugiunt. Historica gestorum narratio contractius fieri debet, eodemque modo tractari, quo Disciplinæ capita, ita tamen, ut præcipua non negligantur adjuncta, quorum  
filen.

silentium plurimam in statu questionis varietatem asserre potest.

In explanandis Sacris Literis majori etiam incedendum est circumspectione. Cavendum, ne quid iteretur, ne levioris momenti Annotationes fiant, alioquin infinitum excrescerent.

Ad Morum Doctrinam quod attinet, nunquam satis diligens præparatio, & cautio adhiberi potest. In eam quippe ut plurimum irrepunt errores, quod multa fucato colore, & quadam virtutis specie ornata, sponte sua se offerant, nulloque negotio colligantur. Sententiarum sententiis congeruntur; ac quum non omnes Lectores exquisito semper iudicio sint, inconsiderate, a videque cuncta excipiunt, quæ mox eadem facilitate relinquunt: uti pueris evenire solet, qui conchas in litore primum inventas præpropere festinatione colligunt, quas statim, & illico abjiciunt, ut alias pari inconsideratione congerant, ac tandem domum vacui revertuntur, nec alium laboris sui fructum referunt, præter maximum fastidium, magnamque virium lassitudinem.

Præter res magni momenti, breves etiam a Patribus excerptæ sunt, acerrimæque sententiæ, quibus amplissimæ notiones, ac multa eleganter, nervoseque dicta continentur; quanquam illorum eloquentiam qui sibi parare studeat, memoriæ potius figere debet, quam literis exscribendo mandare.

Quæ



Quæ ad singularem gratiam, & *unctionem*, ut ajunt, in operibus Patrum dispersam attinent, missa facimus; eadem cura, eademque sollicitudine, qua ab Israelitis Manna colligenda est. Verum hæc ad cordis officium, de quo nihil ad præsens institutum.

Quum novas Lector cognitiones adipisci pergit, tollet a Collectionibus quidquid superfluum videtur. Notis eas illustrabit, atque pro viribus perpoliet, perficietque. Satiùs quippe multo fuerit exacto Auditorum curriculo vel unum librum scripsisse, ut præstitit Phozius, quam multa locorum communium, spissa volumina, quæ nullius futura sint utilitatis.

Ac ne laborum fructus amittat, diem singulis hebdomadis, hebdomadam singulis annis religiose statuatur, ut excerpta recognoscat, seriatim meditatione consideret. Hæc, vel similia ni præstet, quæ longo annorum spatio collegit, difficile admodum perspecta habebit, explorataque.

Doctissimus quidam hujus ætatis Scriptor nonnihil ex suis Collectionibus stata singulis diebus horæ ediscebat; quæ ratione, quum memoria teneret, quæ ex optimis Auctoribus sapientissime delegerat, Vir omnibus numeris adeo absolutus esse videbatur, ut meliorem illo Scriptorem non quæreres.

Ut autem hæc prospere succedant, quæ diuturno labore collegit, illa sui juris facere assuecat, eamque teneat in finiendis controversiis

*Infans  
celebras  
per le-  
urs stu-  
des.  
Verjus.*

versis rationem, quæ lucernam non olea, præstantiora Auctorum loca imitari studeat; atque de suo nonnihil addat: ut enim ait Quintilianus „ nihil crescit sola imitatione „.

## CAPUT VI.

*Quis adhibendus sit modus in eorum usu, quæ ab Ecclesiæ Patribus colliguntur.*

**Q**UUM Lector evolvendis Patribus multos inlumerit annos, atque multiplici eruditione ornatus fuerit, manum operi admovere potest, suorumque laborum fructus modeste, liberaliterque in vulgus edere.

Quæ res, quum multis modis præstari queat, ab ea nemo pene dixerim se jure excusare potest. Revera quantulumcunque sit Lectoris ingenium, ea, quæ in amplissima Patrum Ecclesiæ lectione collegit, facillime reportabit, atque opus Posterorum existimatione dignum componet.

Ea quisque ut plurimum excerpit, ad quæ propriam habet a natura facultatem. Orator Eloquentiam, Historicus Historiam, Philosophus Philosophiam, &c. Ecclesiæ Patrum lectio, cui generatim apponi possunt Annotationes de Vocibus, de Doctrina, de Eloquentia, ac verborum Constructione, omnibus faciet satis. Grammaticus, vel Criticus pro studio suo, suæque

suzque artis regulis optimas Patrum Editiones Scholiis, atque eruditis Notis locupletata vulgabit, vel Vocabulariis eorum loquendi rationem illustrabit; Theologus Fidei Dogmata explanabit; Orator illorum opera eleganter, diserte, eruditeque disponet: quæ quidem ornamenta præ cæteris summam Operibus existimationem conciliant.

Verum ad hæc prudentibus Viris, atque perspicacibus opus est, qui facultatis suæ conficii, & æquissimi rerum æstimatores nullam ineant viam, qua non recta ad propositum finem ducantur; alioquin omnia susdeque vertentur, atque tantum aberit, ut Literaria Respublica eximiis ditetur operibus, quin potius monstruosis expilationibus, turpissimisque lucubrationibus repleatur.

Non omnis fert omnia tellus, ac bene ordinatam rerum seriem perturbat, qui postulat a simplici Grammatico, ut Theologicas, atque Polemicas agitet quæstiones, vel contra petat a Scholastico, ut Oratoris personam gerat; nisi forte ejusmodi sint illorum ingenia (quod raro admodum contingit) ut quodvis argumentorum genus digne, &, ut par est, pertractare valeant.

Nihil adgreditor, quod non ante probe dispositum habeas, atque ad felicem exitum perducere queas. Parata sint omnia, & quidem prudenter delecta; nec quidquam temere, & casu colloces, sed ex præconceptæ operis formæ. Tanta demum res dexteritate

tra-

tractentur, ut ab Auctoribus erat, novam in Architecti manibus formam suscepisse videantur.

Cicero, quum Libros *de Officiis* scribere proposuisset, ab antiquis Philosophis, ac præsertim à Panaetio excerpfit, quæ ad hunc finem felicius conducere putabat. Hæc tamen aliunde sumta tam apte disponit, ut non ab aliis mutuata, sed ex ipsius penu depromta videantur.

Eandem secutus est viam Plinius in *Historia Naturali*, quæ aliud fere non est, quam perfectissima innumerabilium, quos hac mente pervolverat, Librorum Collectio. Propria Auctorum, quibus utitur, vocabula rarissime usurpat. Ea pro arbitrio componit, ac tam solerter, venusteque exornat, ut sua omnia, nihilque externum esse videatur.

Latini, quum proprio sermone scriberent, de verbo ad verbum haudquaquam exscribebant Latinos Auctores, quibus utebantur; Græcos autem, quum proferrent, ut legentibus magis probarentur, latine reddebant.

Patres Ecclesiæ, præsertim vero, qui quarto, & quinto sæculo florere, superiorum lectione adjuti, quidquid optimum excerpserant, summatim perstrictum, operibus suis perinde inferebant, ac si proprio Marte finxissent.

Sæpe tamen alia incedendum est via, puta in Tractatibus Polemicis, atque Disceptationibus Theologicis, quarum definitio ex Scripturis Sanctis, & ex Traditione pendet. Ea

quippe

quippe loca omnia, quæ ad rem faciunt, iisdem omnino verbis sunt proferenda.

Eadem in operibus Critices servanda ratio, sed moderate tamen, Auctorum locis sedulo distinctis; adeo ut bene composita, ordinataque partium structura ingenii ubertatis, atque iaventionis defectum suppleat.

## CAPUT VII.

*Novas Patrum Editiones vulgare ad eos  
solummodo jure quodam spectat, qui  
in eorundem Patrum lectione  
diu, multumque se  
exercuerunt.*

CERTUM est apud omnes, indubitatumque, novas Patrum Editiones ab iis jure quodam duntaxat in vulgus proferri, qui diuturnum tempus in iisdem legendis consumserunt. Tot enim, tantæque difficultates objiciunt se se adgredienti, ut nisi diuturno experimento, altissimaque eruditione fuerit ornatus, eas superare nullo modo possit.

Antiquissimis, ac melioribus exemplaribus uti, singula expendisse, necnon invicem contulisse, errata notasse, varialque lectiones collegisse, hæc, inquam, omnia magna quidem, sed non satis sunt; atque nisi altera alteri lectio, vel emendatio anteponatur, quod sine perfecta

perfecta Auctoris linguæ, & doctrinæ cognitione fieri nequit, genuinus Auctoris sensus a falsis, incertisve conjecturis secerni forte fortuna non poterit.

Nisi Patrum doctrina funditus nota sit, perspectaque, iis affingentur sensa ab eorum mente prorsus aliena, universaque demum Theologia susdeque vertetur. Hoc modo quidam Critici non bene explorata Origenis Doctrina, & Librariorum errore decepti, qui in undecimam illius in *Leviticum* Homiliam irrepsit, Origenem sensisse putarunt venialia & lethalibus delictis non differre, quum tamen inter hæc duo apertissimum alibi ponat discrimen\* (2').

Similiter, qui Auctoris stylo, ejusque ætatis sermoni non assueverit, ut vitet barbarismos, qui apud quosdam Auctores notandi non sunt, utpote illorum ingenio convenientissimi, facillime unam pro altera lectionem accipiet, atque germanum sensum turbabit.

Erratum hoc apposite notavit *D. du Gange* in quibusdam Criticis, qui mediæ ætatis Scriptores

[2] Præcipue vero Hom. 9. in *Ezech.*, ubi ait: „quod „inæqualia sint peccata „Scripturis utentibus nul- „li dubium est. Alia quip- „pe magna, alia minora „ab iis esse dicuntur. „Lege etiam Hom. 10. in *Exodum*, Hom. 12. in *Levit.*, & Hom. 23. in *Nu-*

*meros*. Demum Hom. 15. in *Levit.* „in gravioribus „( inquit. ) criminibus „semel tantum Poeniten- „tiæ locus conceditur; „ista vero communia, quæ „frequenter incurrimus „semper Poenitentiam re- „cipiunt; & sine inter- „missione remittuntur.

tores corrigere aggressi, deletis audacter barbaris vocibus, alias in earum locum reponunt, quas argumento magis accommodatas putant, magisque convenientes, quanquam iis in locis aptiores illæ non sunt, quæ ad Latinæ Linguæ puritatem magis accedunt, sed quæ, qualescunque demum, ad Autographum Scriptoris exemplar revera pertinent.

Marculphus, qui colligendis antiquæ Jurisprudentiæ Formulis operam dedit, Barbarissimis undequaque scatet, crassissimisque solæcismis. D. tamen Bignonus, qui Marculphum edidit, eruditisque Annotationibus locupletavit, hæc maculas non modo non abstulit, verum etiam ex industria reliquit, tanquam monumenta antiquitatis, sive potius styli, qui Marculphi ætate vigeat, quum ignoratione, atque barbarie cuncta tenerentur.

Eadem fere se prodit linguæ rusticitas apud Gregorium Turonensem, atque Eginardum, quos incauti quidam Critici emondandos suscepunt. Qua in re ab Auctorum mente plurimum aberrarunt, præcipue Divi Gregorii, qui Historiæ suæ initio declarat, Grammaticæ regulas a se infractas fuisse, non ignoratione, sed ut tempori morem gereret; ac Populis, qui rustico huic sermoni assueverant, ut loquuntur Patres Concilii tertii Turonensis, qui *rusticam Romanam Linguam* illum appellant.

Plerique postrema ætate Critici proprio magis ingenio ducti, quam accurata Patrum

doctrinæ, ac styli cognitione, omnia inverte-  
runt in illorum operum Editionibus. Non mo-  
do meris, levibusque conjecturis primigenia  
exemplaria emendarunt, verum etiam, quod  
longe maximum, suas pseudocorrectiones tex-  
tui inferere ausi sunt, ut erudite notat Abbas  
*De-Billy* in Editione Arnobii a Galeno vulga-  
ta. Quamobrem illorum temporum Editiones  
pluris habendæ non sunt, quam rudes quæ-  
dam, & impolitæ illarum formæ, quæ ab octo-  
ginta circiter annis prodierunt. Neque vero  
movent nos duo, quæ profert argumenta.  
Guillelmus *Cave*, inter Anglicanos Novatores  
Scriptor non ignotus, ut ad primas Patrum  
Editiones recurrendum ostendat; scilicet, quod  
ex optimis, fidissimisque Manuscriptis, quæ  
hodie non extant, perfectæ sint; deinde quod  
ante natas Catholicos inter, & Sectarios con-  
troversias vulgatæ, corruptionis argui nequeant.  
Etenim, qui novas suscipiunt Editiones, nun-  
quam non consulunt veteres, quas Guillel-  
mus *Cave* tanti æstimat: deinde ut omnis per-  
fidia, ac corruptionis suspicio amoveatur, cu-  
rant quammaxime, ut varias Lectiones, adeo-  
que omnes notiones referant, quæ Patribus  
Ecclesiæ subesse possunt. Præterea illarum  
Editionum pleræque mutilatæ sunt, numero  
etiam paucissimæ lucem aspexerunt. Omnium  
vetustissima est Divi Augustini Editio anno  
1468. vulgata, quo ex tempore ad Reforma-  
tam usque, ut ajunt, Religionem, atque  
cor-



correctam, vix paucæ prodierunt (3). Quod enim attinet ad Editiones Erasmi anno circiter 1516. vulgari cœptas, parum illius testimonio fidei tribuendum est, quum propriis hic Auctor conjecturis paullo liberius confiderit.

Monachi Benedictini Congregationis Sancti Mauri felici prorsus successu Ecclesiæ Patrum Editiones vulgarunt, quod bene multis fruerentur commodis, quæ nemini fere concessa sunt. Magna inprimis Manuscriptorum multitudine potiuntur, quæ si tollas, nihil erit satis castigatum, nihil probe authenticum. Hæc desiderantur plerunque privatis viris, qui ejusmodi opera aggrediuntur, ut exemplo sunt Rhenanus, & Horstius, quorum primus Cyprianum, alter Bernardum vulgantes, quum maximo cæteroquin pollerent ingenio, ac facultate, Codicum Autographorum inopia, Literariæ Reipublicæ satis omnino facere non potuerunt.

Sicui vero res feliciter successit, ut Savilio in Græca Divi Chrysostomi Editione, infini-

Bb 2

tis

[3] Editæ sunt anno 1408. Lutetiae Parisiorum *Epistolæ Divi Polycarpi ad Philipenses*, una cum Operibus Dionysii Areopagitæ adscriptis, necnon undecim Epistolis, quæ sub nomine Sancti Ignatii circumferuntur. Prodiit etiam *Apologeticus* Tertulliani *Venerabilis* anno 1497., una cum

operibus Lactantii, ac nonnullis D. Chrysostomi Lucubrationibus, & Eusebii præparatione Evangelica &c. Anno autem 1512. complura Origenis Opera vulgata fuere Parisiis &c. quæ quidem omnes Editiones contemnendæ profecto non sunt.

Epist. s. tis opus fuit laboribus, & sumtibus, quibus plerique eruditi impares sunt; quemadmodum testatur doctissimus iste Anglus amico suo Sebastiano Tengenagelo roganti, ut Principes Dominos suos duobus Chrysostomi exemplaribus donaret. „ Chrysostomi exemplar octo „ constans magnis Voluminibus, infinitis laboribus, immensis sumtibus conquisitum „ facilius erit vestris Principibus emere, quam „ mihi donare, jam prope omnibus facultatibus exuto. (4)

Deinde privatus quilibet vir in ejusmodi operibus longius progredi nequit, ac multum sane laudis meretur, si toto vitæ tempore, vel unum mediocriter amplum Auctorem consulto, accurateque in lucem proferat. Erasmus quidem plures Græcos, Latinosve Patres edidit. Verum non omnes Erasmo pares; atque (absit invidia verbo) de Literaria Republica multo meritis fuisset, si pauciora agressus, accuratius ea, & diligentius perfecisset. Conjecturas facere, nullius illi res erat negotii, labor autem instar ludi; atque quum tanta effect

[4] Immo vero nec ipse quidem Savilius ob eandem Codicum Autographorum inopiam satis omnino facere potuit Literariæ Reipublicæ. Bene multa reliquit loca mutila, imperfectaque, præsertim vero in Homiliis; quæ quidem nonnisi postremis temporibus emendata fuerunt, & absoluta,

auctore D. Montfaucon, qui Italiam peragrans, easdem Homilias Manuscriptas invenit, unaque simul complures alias Divi Chrysostomi lucubrationes, quæ nunquam in lucem editæ fuerant. Eas autem vulgare coepit anno 718. tredecim Voluminibus contentas.

esset nominis celebritate, ut nemo unus cum illo congredi auderet, æquo, vel iniquo quorundam animo maximam lucubrationibus suis existimationem, & auctoritatem conciliabat,

Hoc etiam cæteros superant Monachi Benedictini, quod a pluribus annis studia sua conferentes in hoc eruditionis genus, quo Patrum Ecclesie opera pristinae integritati restituantur, perfectissimam Critices scientiam adquisiere, cum in lecernendis Manuscriptis, tum in universæ antiquitatis, atque Linguarum Orientalium, quarum etiam rudimenta tradunt, altissima cognitione.

Demum ea præcipue ratione illorum Critice tuta est, quod quum unanimem operam conferant, ac mutuam sibi lucem præbeant, & opem, facilius errores vitant, in quos prius aliorum consilio non utentes impingere solent. D. Rigaltius vir adprime doctus, sed alieni consilii impatiens, Tertulliano, ac Cypriano supposuit, quidquid suæ satisfacere videbatur prurigini miram ubique eruditionem ostentandi, parum attento Auctorum, quos vulgabat, proprio, legitimoque sensu. [5]

Bb 3

Eo

---

[5] Duo autem præcipue peccat: primo, Romanorum Pontificum auctoritatem suis in ea loca Annotationibus deprimere nititur; secundo, Baptisma infantibus conferri solitum Apo-

stolici negat esse instituti. Propter quos, aliosque nonnullos errores, parum abfuit testante Gregorio Episto ad Salmasium, ne publica Hæreseos nota inurgeretur.

Eo quoque præstant Congregationes, quod studiis in plures dispertitis, nemo labore obruitur; atque alio editionem emendante, alter Chronologicis Tabulis Opus illustrat, Præfationibus, Summariis, & Indicibus, quæ non sine magno Lectoris detrimento negligi queunt.

Nullius momenti videtur esse Præfatio, si tamen recte, apteque composita sit, ad altissimam Auctoris cognitionem, cui viam parat, atque subsidium, recta perducit. Antiqui Præfationes Sermonibus, perinde ac Cytharædi prælusiones concentibus, præmittebant. Harum Præfationum exempla non desunt in Scripturis Sanctis. Prima duo Jobi Capita divini hujus Poematis Præfatio sunt, vel Prologus. Nepos (6) Jesu Syrach *Ecclesiastici* Libro Prologum præfixit, in quo Interpretationis suæ causam fuscè satis exhibet. Pleræque tamen Bibliorum Præfationes contractiores sunt, ut videre est apud Divum Lucam, sive in Evangelio, sive in Actis Apostolorum.

Apud Ecclesiæ Patres occurrunt passim admodum Epistolarum Præloquia, quum omnia fere illorum Scripta aliud non sint, quam responsa ad amicorum quæstiones, vel Tractatus illorum rogatu, & precibus exarati. Sic

Gre.

[6] Quid dicitur Latine *Nepos*, Gallice non *Neveu*, ut habet Auctor Operis, sed *peregrinus Filius* vocandus erat. Quippe Jesus Filius Sirach Au-

ctor *Ecclesiastici* non patruus fuit, vel avunculus interpretis, sed avus, ut ait ipsemet Interpres in Prologo.

Gregorius Magnus Libros suos Morales in Jobum Leandro Hispalensi Archiepiscopo, ad cuius preces eos elaborarat, longa ad Epistolæ modum Præfatione nuncupavit. Augustinus pariter Libros *de Peccatorum Meritis, & Remissione* Comiti Marcellino inscribit, velut responsa ad Pelagianorum quæstiones, ab eodem Marcellino ex Carthaginensi Civitate missas, atque propositas.

Credibile est, id genus Prologos labente tempore nuncupatoriis Epistolis locum dedisse, quæ ad ostentationem ita plerunque adhibentur, ut ob id prudentissimi viri, vel tollenda omnino duxerint Præloquia, vel ad id solum adhibenda, quemadmodum antiquitus fieri solebat, ut indicetur, quis sit Auctor, quæve duci possint ex illius operibus emolumenta. Verum e contrario hac solum mente usurpantur, ut electus Mæcenas summis laudibus extollatur, atque in Deorum censum, si fieri posset, referatur. Quid vero ridendum magis, quam levissimis sæpe de causis illorum, quibus facta est nuncupatio, familiam, atque progeniem inquirere, Historiam summam, saltem describere, ac pluribus demum Mæcenatis laudes celebrare, quam Auctoris, cuius Opera vulgantur?

Postea quam in Epistolis nuncupatoriis de rebus ab argumento Librorum prorsus alienis agi cœpit, alia præscribi opus fuit nova, quadam ratione Præloquia, quæ ab opere toto sejuncta maximam lucem adferunt ad illius

explanationem. Principio quidem breves esse solebant, at eo denique ventum est, ut quædam ex illis longos Tractatus, & integros Libros exæquent. Prolixarum id genus Præfationum Auctoribus optime quadrat, quod agebat olim Diogenes quibuldam Civibus, qui amplissimam angustæ urbi portam extruxerant: „custodite urbem, ne per portam „elabatur.

Omnium præclarissimæ sunt Præfationes, novis Sanctorum Ambrosii, Augustini, Hilarii, & Bernardi Editionibus præfixæ, tum Marci etiam Mercatoris, & Opusculorum B. Sirmundi, aliorumve quorundam Patrum, quibus velut pulcherrimi prospectus exemplaribus uti quisque potest ad præstantissimorum operum decus, & ornamentum. Verum non omnibus id feliciter succedit; singulari ad id opus est facultate, & multis quidem optimos Libros vulgare, non semper tamen accuratam Præfationem scribere concessum est.

Præci Scriptores, qui Prologis, atque Proemiis opera sua ornare studebant, Epilogis etiam absolvere consueverunt, vel Annotationibus obliographis, aut scriptis reclamationibus adversus illos, qui exemplaria vitare, vel adulterare auderent.

Auctor Libri secundi Machabæorum Opus suum comiter, urbaneque concludit; Photius Bibliothecam duodecim plus minus lineis absolvit, quibus quodammodo claudit Præfationem

pem instar Epistolæ, ad Amicum Tarasium initio Operis inscriptæ.

Antiquissimis temporibus scribendi mos obtinuerat sine ulla verborum distinctione, adeout totius orationis lineæ non aliud esse viderentur, quam continuata Literarum series, æqualibus inter se spatiis diffitarum, ea fere ratione, qua literæ alphabeti scribi solent. Hinc lepidum illud Hebræorum effatum, totam Legem uno verbo contineri.

Verum cognita, perspectaque verborum distinctionis necessitate, ut illorum sensus determinetur, quo certis limitibus circumscriptus Lector, temeritate, vel imperitia alio ferri non posset, utilissimus interpunctionis usus a Sapientibus inventus est. „ Minutissima quandoque puncta intersunt quamplurimi. Exemplo est locus ille Divi Pauli ad Romanos, ex quibus est Christus secundum Carnem, qui est super omnia Deus benedictus in sæcula, cui pro triplici diversâ interpunctione, quam refert Erasmus, triplex subest diversâ significatio. [7]

M. Sim.  
Hist. Crit.  
tig. du  
N. Te.  
Rom. 1.  
c. 22.

Am-

[7] Prima: si fiat interpunctio post illa verba, qui est super omnia, sequentia autem verba gratiarum actionem continent hoc modo: ex quibus est Christus, qui est super omnia; deinde Deus benedictus in sæcula. In secunda Lektionē totus

sermo sibi cohæret, eaque est communis Catholicorum expositio. In tertia Lektionē fit interpunctio post illa verba: ex quibus est Christus secundum carnem; deinde, qui est super omnia Deus benedictus in sæcula.

Ampliora dein opera in Libros, Canones, Titulos, Sectiones, Capita, Verlus tributa fuere, additaque majoribus partitionibus Summaria, quæ generalem operis intelligentiam suppeditant.

*Id. Id.*  
7.

„ Hilarius in *Divum Mattheum*, ( ut notat *D. Simon* ) totum opus in tres, & triginta Canones distribuit, quibus velut totidem Sectionibus, aut Titulis Evangelii sui textus constabat. Canones vocat, quod Græci appellant κεφάλαια, idest Capitula. In vetustissimis Latinis Exemplaribus extat vox *Canon* ad Titulos, vel Summaria Sacræ Scripturæ Librorum indicanda. Fleraque Patrum Commentaria, anteaquam noster distinguendi modus in usu foret, ab Hilarii methodo parum aberant. Quod dicitur *Canon* hoc in loco, *Capitulum* in nonnullis Exemplaribus, in aliis vero *Breviarium* appellatur; quam methodum Latini a Græcis hausere.

*Id. Id.*  
Ch. 25.

„ Qui Manuscriptis Exemplaribus utuntur, ut Patres Ecclesiæ, aliove Scriptores Ecclesiasticos in lucem edant, eorum in tribuendis Libris rationem negligere non debent. Multis enim, qualiscunque demum ea sit, emolumentis non caret.

Summaria longissimis partitionibus adjici solita maximi momenti sunt, eaque in novis Patrum Editionibus contemnere nefas esset. Summaria in Tertullianum magna cum laude concinnavit Pameliuss, ac jure, meritoque in postremis antiqui hujusce Scriptoris Editionibus



bus a multis hodiernis etiam temporibus servantur.

Hac nostra tempestate mos inolevit, maxima laude dignus, Editiones Patrum Chronologicis Tabulis locupletandi, quæ plurimum juvant, ut illorum lucubrationes, ac præsertim Epistolæ, quæ in primis Editionibus permixtæ sunt, atque confusæ distinguantur, læcernanturque. Paulus Manutius, qui probe norat necessarium Chronologicum ordinem in pervolvendis Auctoribus, qui ad historiam aliquo modo referuntur, proxime superiori sæculo hunc ordinem dare suscepit Epistolis Ciceronis ad Atticum, quæ sine hoc subsidio facile intelligi nequeunt. Eandem in plerisque veterum Patrum Epistolis confusionem, ægre ferens doctissimus Pamelius, Ecclesiæ utilitatis studiosissimus, omnes Divi Cypriani Epistolas ex annorum ordine disposuit. Insignis huiusce viri exemplum secuti alii complures Critici, accurate notarunt loca, & tempora, quibus Literæ, Homiliæ, & cætera monumenta ab Ecclesiæ Patribus exarata fuere.

Antiqui Scriptores indices rerum notabiliorum, ut hodie fit, nequaquam describebant. Sat illis erat Tabellam, vel Summarium Capitum præmittere, quo Lector dignosceret, quid in toto opere contineretur. Ita se gessit Plinius in Historia Naturali, ejus Liber primus totius operis summam exponit; quem plures Scriptores Ecclesiastici imitati sunt.

Euse.

*Prolog.  
Marr. in  
Div. S.  
Hieron.  
Biblia.*

Eusebius Cæsareensis in sua Ecclesiastica Historia paullulum divertum secutus est ordinem, nimirum Tabellam capitum unicuique singulatim Historiæ Libro præfixit. Alii satis habuere Summaria ad marginem apponere iis in locis, ubi Sectiones operis inveniebantur: quem ordinem adhibuit Divus Hieronymus in transferenda Epiphaniî Epistola ad Johannem Jerosolymitanum Antistitem, ut testatur ipsemet scribens ad Pammachium *de optimo Genere interpretandi*.

Indices omnino expungere præstat, quam perperam describere; si autem rite fiant, pro sunt quam plurimum. Quamvis enim non ii simus, qui Libros in Tabulis legendos esse putemus, illarum tamen usus viros etiam diligentissimos juvat, ut vilo uno, vel altero verbo res ad memoriam revocentur, quæ invitam etiam mentem, animumque perläpe fugiunt.

Extat & alia Indicis forma non levis fæne ponderis in Editionibus Patrum. Colligit ille Scripturæ loca, quibus veteres Doctores in operibus suis elucubrandis utebantur; quæ tamen in re, ut apte notatur in Oxoniensi D. Cypriani Editione, ab illorum errore abstinendum, qui Scripturæ loca, non ut extant apud Patres, qui Græcam. LXX. Interpretationem sequebantur, sed ut habentur in Vulgata, referre solent; quod & a recta ratione alienum est, & maximam confusionem parit. Addi  
ni-

nilominus posset Vulgata in hisce Tabellis  
Græcæ LXX. Interpretationi, quo Lectionum  
varietas magis elucesceret.

## CAPUT VIII.

*De Commentariis, Animadversionibus,  
Dissertationibus, Scholiis, & Notis,  
quibus Viri in lectione Patrum  
exercitati eorum Monu-  
menta illustrare  
possunt.*

**V**iri Criticæ artis periti, probe perspectis  
impedimentis, quæ ad perfectam Eccle-  
siæ Patrum intelligentiam contendentibus ob-  
stant, omnes industriæ nervos intenderunt,  
nullumque non moverunt lapidem, ut illorum  
operum locis etiam abditissimis lucem adfer-  
rent.

Alii amplissima scripsere Commentaria, alii  
prolixas Dissertationes, alii bene multas Ani-  
madversiones, alii demum, ut paucis omnia  
complecterentur, Scholiis, atque Annotationi-  
bus obscuriora Patrum loca illustrarunt.

Quam veterum Theologorum opera satis  
ampla sint, Commentariis autem ampliora  
sunt, istud ideo explicandi genus minus  
hoc loco aptum esse videtur, minusve conve-  
niens.

niens . Optabilem quidem exitum sperare possumus , verum periculosa res agitur , sæpiusque operam perdimus , quemadmodum contigit Mendosæ , qui in exponendo Concilio Elliberitano , ut explanaret locum , qui ne sex quidem paginas implet , spissum Volumen in folio edidit . Ea ratione Lacerda in Tertullianum se tam immoderate effudit , ut multis jam vulgatis Voluminibus , ad propositum finem nondum pervenerit . Quin & ipse Pamelius , qui suis Commentariis majorem sibi laudem profecto quam Lacerda comparavit , ingenii sui præstantiam , atque eruditionis copiam ostendendi libidini plus æquo indulgisse videtur .

Majori laude digni sunt , qui omiſſis Commentariis , in quibus exiguæ quælibet res , minutissimæque tractantur , Dissertationes in præcipua Patrum Ecclesiæ loca elaborarunt . Qui ad istud scribendi genus se conferunt , potiori conditione sunt , quod obscuris duntaxat quæstionibus , & explicatione dignis intenti , summo fruuntur otio , ac libertate ad eas funditus pertractandas , adeout Lectori divinandum nihil supersit . Quam rem utilissimam esse nemo non videt , quum bæc multæ difficultates occurrant apud Patrès , quæ brevissima oratione solvi haudquaquam possunt , & nisi omni sui parte explicentur , nullo modo clariores fiunt .

Ut autem probentur omnibus Dissertationes , Argumenta imprimis optime delecta sunt .

to; exquisita dein eruditione, dilucidaque oratione exponantur; tum Auctor sic in præcipua quæstione consistat, ut inopportunis digressionibus a proposito liberius non abeat. Dissertationes in Divum Leonem editum sub finem sæculi superioris sunt numeris omnibus absolutæ, etiamsi nonnullis Censoribus paululum quandoque discedere videantur a Summi Pontificis Epistolis, quarum doctrinam exponit Interpres.

Qui maximum incommodum animo præviderant, quod provenire solet ex Dissertationibus accurate satis non elaboratis, absolutisque, Animadversiones scribere satius duxerunt; quæ quum medium inter Dissertationes, ac simplices Annotationes teneant locum, Lectorem minus, quam illæ fatigant, eumque magis erudiunt; quam posteriores. Exemplum hæc in re præbere possent Animadversiones Petavii in Divum Epiphanium; ac eruditissimus iste vir, quum immenso rerum proferendarum pondere premeretur, longius e cursu quandoque digressus est.

Rigaltius autem methodum secutus est omnium aptissimam in suis ad Divum Cyprianum Animadversionibus. Optimæ etiam existimantur, quas scripsit Abbas *De-Billy* in Patres Græcos; verum quum paullo contractiores sint, iis, quibus mediocris est facultas, minus profunt.

Ad Latinorum Patrum explanationem *Maille* in suo *de Studiis Monasticis Tractatu*

*Har. Lat.  
tini Vi-  
tro. Bi-  
bliot. Sa-  
cræ, &  
profana.*

*Epistola  
conjectu-  
ra ob-  
jecta  
dem.*

*Vid. ed.  
Oxford.  
S. Cypri.*

tu commendat plurimum Bibliothecam, *Epistolae*, Animadversiones, & Conjecturas Latini Latini. De illo tamen magnopere con-  
questi sunt Angli, alique vulgo *Protestantes*, quod Latinius, Clericus alioquin doctissimus, Viterbii in Italia natus, Sacram corruperit Antiquitatem, Patrum Opera mutilarit, ac quidquid demum Catholicorum Sententiæ minus cohærere videbatur, audacter sustulerit. Cujus rei in exemplum proferunt celeberrimam Firmiliani Cæsarensis Epistolam, quam in Editione Divi Cypriani typis a Manuio impressa relcidit. Bona in omnibus fides procul dubio servari debet, neque vero quidquam periculi subest in vulgandis sincere veterum Scriptorum monumentis, quæ Adversariis nostris parum plerunque favent. Aliquot abhinc annis Novatores vehementer obstrepere, propterea quod D. Faber Doctor Sorbonicus Epistolam Divi Chrysostomi ad Cæsarium Monachum, quæ *Transsubstantiationis* doctrinam everti autumabant, ab opere D. *Bigot* sustulisset. Verum Harduinus ex illa Chrysostomi Epistola nullum ab iis subsidium, nullumve pro causa sua argumentum peti posse, monstravit.

Omniū autem, quæ ad illustrandos Ecclæsiæ Patres adhiberi possunt, longe accommodatissima methodus illa est, quæ in scribendis Scholiis, sive breviusculis Annotationibus sistit; multum quippe sublevar Lectorem, qui in evolvendis Patribus moræ impatiens

occurrentium difficultatum solutionem paucis verbis contentam desiderat. In hoc scribendi genere excellebat Sirmundus, a proposito suo nunquam deflectens, adeo ut nihil ab eo scriptum supervacaneum affirmari possit. Hujusmodi exempla proponere sibi quisque deberet, ut nihil non necessarium scriberet, nihil non perspicuum, ne *Ænigmata* videantur potius, quam *Annotationes*.

Recens inventum non est Scholiorum usus. Hæc principio illorum ars erat, qui propter altissimam rerum originis, & antiquitatis cognitionem *Antiquarii* vocabantur. Notas ad Librorum marginem apponebant ut plurimum, quo Auctorum sermonis, & styli perspicuitatem, quæ desiderari videbatur, hac explicandi ratione perficerent, eo quippe fine adhibendæ sunt *Annotationes*.

Sunt inter eruditos nonnulli, qui magnam sermonis obscuritatem consecretantur, non, inquam, ridiculam insulsi illius Literatoris, qui apud Quintilianum agebat, „ præstantissimum illud est, nec ego quidem intelligo; „ sed mysticam quandam obscuritatem illius fere similem, quam sectabatur Heraclitus, dum per *Ænigmata* loqueretur, ut a vulgi captu se se subduceret, unde a Græcis cœvis σκοτεινός nomen accepit.

Ad eam quandoque accessisse videntur primi Ecclesiæ Patres, quum Religionis nostræ Mysteria tam involute exponerent, ut qui eorum

Doctrinam aliunde notam non habuisset, penitus illa percipere non valeret.

Quum de obscuriori hoc dicendi genere jam alias actum sit, non est cur in eo diutius immoremur. Caveant interim Interpretes, ut ejus causas adducant, ubi postulet occasio, ne forte Lectores, quemadmodum Hæreticorum mos est, ex ejusmodi obscuritate confectaria Fidei, perpetuæque Ecclesiæ Traditioni contraria colligant.

Verum est & aliud obscuritatis genus apud Patres, quæ quum omnium, qui scientias docent, communis sit, quippe in vocabulis unicuique scientiæ peculiaribus versatur, dilucida explicatione indiget in illorum gratiam, qui priscæ Theologiæ parum periti hosce loquendi modos lucis tantum filiis notos ignorant.

Nonnulli vero Patres obscuri sunt, propterea quod nimium sermone concisi, ut Divus Ambrosius, qui plura ponit, quam dicat: alios obscuros facit nimia vocum exquisitarum confectatio, vel prava Regionis, in qua nati sunt, loquendi consuetudo, quam confidenter sequuntur.

Quorundam autem obscuritas ex insolito, & peculiari, quod sibi proponunt argumento, originem habere potest. Ejus generis est *Traктatus de Pallio* apud Tertullianum, ad cujus intellectum perfecta plurimarum rerum, quæ nos hodie latent, cognitio requiritur.

Quamo-



Quamobrem de hoc Opusculo illud dici jure posset, quod olim agebat Vigenarius de Stenographia Trithemii, scilicet intercindendum esse [ quemadmodum olim interfectum fuit Poema Cassandræ auctore Lycophrone ] ut introspectiatur, quod extus non apparet.

Cæterum eruditos solummodo Criticos spectat, & acri judicio præditos, qui de se, vel de auctore suo magnifice non sentiant, dilucidandis Patribus operam dare; qui enim mediocri solum est facultate, multa illum facile fugient, quæ expendenda forent, ac multa vicissim detinebunt omittenda; qui vero minus acre judicium habeat, licet non indoctus, eruditionem suam male collocabit, vel falsa ex suis principiis consectaria deducet; demum qui excellentia quadam proprii ingenii elatus sit, auctoris loco haberi volet, vel si Auctorem altius, quam par est, extollere, eique splendorem animadversionibus suis addere contendat, ejus errores vel prætermittet, vel contra fas omne tuebitur.

Petavius, qui ab hoc vitio summo opere abhorrebat, contraria prorsus Methodo Divum Epiphanium, quem Notis illustrat, depri-mendum suscepisse videtur. Libera, & incorrupta hæc ratio, quam tenuere Salmasius in Solinum, ac D. Simon in suis ad Jesuitæ Dandinii Itinerarium Annotationibus, iis non displicet, quos in Literarum, non secus ac in Romanorum Republica identidem vidisse

delectat audaces, atque magnanimos Viros; qui Scipiones deprimebant, ut Imperii gloriam, splendoremque magnificentius augerent.

## C A P U T I X.

*Vocabularia colligere, quæ ad antiquorum Ecclesiæ Patrum intelligentiam conducunt, illorum est solummodo qui in eorundem Lectione diu, multumque versati fuerunt.*

**Q**uibus ea non est ingenii facultas, ut Ecclesiæ Patres Commentariis, Dissertationibus, Animadversionibus, Scholiis, atque Annotationibus illustrent, in id operam suam conferre poterunt, ut Vocabularia conficiant, quibus Lectori plurimum levaminis affertur.

Tertulliani effatum est a recta ratione profectum, intelligentiam Sententiarum ex vocum cognitione pendere, quum verba sint cogitationum imagines; „ Fides nominum est intelligentia Sententiarum „ . Quibus Tertulliani verbis quanta sit Lexicorum necessitas, satis dignoscitur, cognitio quippe vocum tam late fere patet, ac rerum scientia. Quamobrem in Editionibus Patrum inferenda forent. ad initium, vel calcem operis vocum minus frequen-

quentium, minusve faciliū Glossaria, qualia invenire est apud classicos quōdam Auctores.

Omniū autem utilissima res esset cunctarum vocum, quas Ecclesiastici Scriptores præter morem usurpant, absoluta in unum corpus collectio. Quæ res illorum opera, & studio indigna nō est, qui in volvendis Patribus diu multumque versati, illorum Doctrinam, atque sermonem optime perspectum habent.

Eccur non idem fiat ad Theologiam, quod ad humanas scientias promovendas profani Auctores perfecerunt? Timeus, referente Photio, propria Platonis verba in unum volumen collegerat, quod etsi reapse bonum, quum tamen nonnullis vocibus deficeret, Bohetus absolvendum suscepit. Quia vero secundum hoc Vocabularium satis absolutum non erat, novam idem Auctor Collectionem adgressus est *de Dubiis apud Platonem Vocibus*, quæ primis duabus uberior erat, atque locupletior.

Salmasius, qui in Literarum Republica clarissimum sibi nomen comparavit, turpe sibi non duxit complures ambiguas voces, quas in legendis Auctoribus notaverat, in unum colligere.

Atque ut graviori utamur exemplo, Divus Hieronymus Regionum, & Urbium nomina, quarum in Scripturis Sanctis fit mentio, singillatim excerptit, ac propria Hebræorum

nomina, quæ iisdem in locis occurrunt, explicuit, explanavitque.

Extat in Bibliotheca Imperatoris, teste Lambecio, Lexicon ab Anonimo vetustissimo compositum hoc titulo: *Interpretatio Alphabética difficiliorum quorundam vocabulorum, quibus Sanctus Dionysius Areopagita in Operibus suis utitur*. Magnum ex illo emolumentum duci posset ad novam Sancti Dionysii, ejusque Interpretis Divi Maximi Editionem cæteris omnibus emendatiorem.

Eruditissimus Abbas *de Billy*, qui probe norat quantum conferre posset ad faciliorem Græcorum Patrum intelligentiam Vocabularium, a centum, & amplius annis ejus fundamenta jecit in opusculo, cui titulus *Lectio- num Græcarum Volumen*. Illius consilium absolutum fere invenies hodierna ætate in *Ecclesiastico* Gasparis Suicerii *Thesauro*, sive amplissimo Græcorum Patrum Vocabulario, ac brevium instar dissertationum ordine alphabetico dispositum, quæ res longe utilissima est; in ejusmodi quippe operibus non utcunque exponenda sunt verba obscuriora, sed fuse, copioseque, præcipue quum aliquod continent eruditionis arcanum.

Sunt tamen hac in re certi quidam fines, atque vitanda, ut fieri potest, duo vitia, quorum alterutro laborant plerunque Dictionaria. Ut enim bene notat Photius, plerunque vel justo breviora sunt, vel nimium prolixa,

lixa, atque animadversionibus, & iterationibus supervacaneis referta.

In eo, quod proponimus Vocabulario ad Latinorum Patrum explicationem [ quod enim ad Græcos attinet, perfectum illud jam est, absolutumque ] æquissima hæc mensura servari potest, ut ea solum colligantur, quæ alicujus momenti videntur, & annotatione digna. Atque ut rite fiat, ea deligere fas erit, quæ Sapientiores Critici in annotationibus ad Ecclesiæ Patres explicuerunt, tum accurate proferre annotationum auctores, ac demum proprio Marte adjicere, quæ ab aliis prætermissa fuerunt.

Perdifficili, gravissimoque huic operi par non est mediocris ingenii Auctor, qui veterum scripta obiter, & perfunctorie attingat. Diligentiores etiam Viri, Doctrinaque magis exculti, nec quidquam ad exitum pervenire sperent, aliorum ope, & consilio non utentes, qui eos a lapsu continere valeant, in dubiis firmare, atque animos addere, quum arduum quidpiam, & difficile audendum est. Nihil enim tam operosum, nihil tam rarum, quam Vocabularium numeris omnibus absolutum. In reliquorum operum disquisitione certus quidam est criticæ finis, ast in Lexicorum castigatione fere nullus; nunquam enim non aliqua vel addenda, vel detrahenda nunquam, quæ scripta sunt, non emendanda, vel illustranda.

## CAPUT X.

*Patrum Opera interpretari illorum est  
solummodo, qui in eorum lectione  
se dudum exercuerint.*

**Q**UUM de Interpretationibus in secunda huius Operis Parte plura jam dixerimus, duo nobis ostendenda supersunt. Inprimis quanti interfit monumenta Patrum interpretari, deinde hanc illorum esse duntaxat operam, qui multa lectione, diuturnaue meditatione gravissimos hosce Scriptores medullitus perspectos habent, exploratosque.

Quod ajunt nonnulli, Interpretationibus inertiam gigni, & Linguarum Orientalium ignorantem, cum experientia manifestissime pugnat. Indubitatum enim est æmulatione bis centum, & amplius annis investa antiquos Auctores interpretandi, innumeros viros ad Linguarum studia compulsos esse, quæ vel neglecta omnino fuissent, vel jejune, leviterque delibata, nisi in arte interpretandi se diu, multumque exercuissent.

Præterea quum non omnes Linguarum amore ducantur, atque illarum amantes non semper curarum vacui sint, vel iis sedulo incumbere velint, ut Auctorum monumenta primigenio sermone exarata percipiant, multa, & magna in eos officia conferet, qui dum  
cem

cem se , ac interpretem illis præbeat . Ambrosius Camaldulus eruditissimus, politissimisque ætatis suæ solitarius latinam D. Ephrem Interpretationem Laurentio de Medicis nuncupans, acute inquit, venusteque , quum hic Ecclesiæ Doctor in solitudine ipsum visitasset, illius ingenii elegantia , & morum Castimonia illectum operam ei suam obtulisse , ut in Regiam Florentinam introduceretur, in quam suos Doctrinarum sales effunderet , eique quominus iret, ignotum Regiæ sermonem causanti, interpretem se pollicitum fuisse, ut præstantissima illius verba bono forent exemplo, multisque proderent .

Interpretationes modo accurate fiant, hoc præsertim emolumentum adferunt , quod Commentarii locum teneant , quum fieri profecto nequeat , ut perfecta interpretatio non illustret exemplar , ejusque præcipuas difficultates non diluat. Interpres enim, qui auctorem explanare studet , illum inprimis omnino perspectum habeat necesse est, atque in optimo pro viribus lumine collocarit .

Plinius Junior nihil tam utile studiosis proponi posse existimavit , quam meliores quosdam Scriptores frequenter ex Latino in Græcum, vel ex Græco in Latinum transferre sermonem. Hoc consilium, subdit, adeo bonum est , ut ab Institutoribus bene multis tanquam præceptum tradatur; sola quippe interpretandi crebritate Linguz puritas, atque elegantia comparatur . Illius ope locupletissimus

mus, ut ita dicam, figurarum Thesaurus colligitur. Inde fluit singularis in exprimendis animi sensibus lepor, atque venustas, ac qui optimos Auctores frequenter exscribit, supra vires suas quodammodo fertur, eorumque exemplo eo tandem devenit, ut digna, quæ ab omnibus describantur, opera componat. Deinde quantacunque sit in pervolvendis Auctoribus diligentia, fieri nequit, ut multæ dicendi videres Lectorem non fugiant, quæ Interpreti se se paullatim offerunt, ejusque menti peropportune obversantur.

Quam apte animum perficiat ars interpretandi, vix dici, aut credi potest. Cicero, & Plinius uterque in ea se se exercuerunt, hujusque laboris sane non exigui subsidio posteriorum temporum Scriptores talem, ac tantam adepti sunt elegantiam, atque venustatem, quæ ante illorum ætatem vix, ac ne vix quidem innotuerat.

Quamobrem dubitari non potest, quin plurimum intersit celebriorum præsertim Ecclesiæ Patrum interpretatio, quum tot inde manent, ac tanta in Literarum Rempublicam, Morumve Doctrinam commoda, atque emolumenta. Revera tamen illius exercendæ potestas iis duntaxat jure concedenda est, qui multis laboribus, atque assiduis vigiliis eam adipiscuntur. Enimvero non omnes interpretis partes implevit, qui Linguas caller; omnino præterea auctorem suum mente completatur necesse est. Quis vero auctorem peni-



tus complecti valeat, nisi cœvos Scriptores, immo etiam superiores, quibus quodammodo conjunctus est, probe perspectos habeat, ut si qua dubietas suboriat, vel error in Textu, collatum cum illis, qui cum communes habet sententias, corrigere valeat, atque emendare.

Hac porro ratione, qui Divi Ambrosii *Hexameron* interpretari aggrederetur, *Hexameron* inprimis Divi Basilii consulere poterit, quod Sanctus Ambrosius sui quodammodo juris fecit. Qui vero Divum Cyprianum, perolveret inprimis Tertullianum, quem Carthagenensis Antistes Magistrum suum vocabat. Qui denique Prosperum, vel Fulgentium, versabit accurate Augustinum, cujus Patres isti velut adminicula sunt, atque instrumenta.

Adversarios etiam Patrum, quos interpretari suscepit, probe norit, oportet, in re quippe Literaria contraria contrariis magis elucescunt. Itaque Ruffinum Hieronymo jungens, Julianum Augustino, Theodoretum Cyrillo Alexandrino, in vertendis istorum Patrum operibus bene multos extricabit nodos, quibus solvendis alia non suppetit via.

Patres Ecclesiæ alii aliis hærent, arteque connexi sunt, quo fere pacto corporis musculi innumeris modis etiam contrariis, quive sub sensus non cadunt, nectuntur invicem; adeo, qui vel unum perfecte assequi cupit, non eos solum omnes, qui consentiunt, verum etiam qui dissentiant, comprehendisse de-

debeat. Quæ nisi accurate ierventur, in Fidei Dogmatis facillime quis aberrabit.

Neque vero levior est circa Disciplinam, Ecclesiasticam difficultas, in ea quippe perraro Auctorum mentem in exemplari contentam reddere possumus, nisi fontes ipsos adeamus, e quibus illi Doctrinam hauserunt. Equidem non inficior, Auctorum, qui exponuntur, nonnullos adeo esse perantiquos, ut illorum ætate nullum superiorem invenias, quem consulas: at cœvos tum consulere fas erit, immo etiam inferiores antiquitatis noticia eruditos.

Ad Historiam quod attinet, luce meridiana clarius est, haudquaquam feliciter Patrum, qui de illa scripserunt, interpretationem fieri posse, nisi cumlata Scriptorum omnium noticia prius acquisita, qui ad Auctorem interpretandum referri ullo modo possunt. Ita qui Optatum de Schismate Donatistarum transferre aggreditur, Auctores adibit ejusdem ætatis, qui de maxima hac Ecclesiæ labe, atque perniciæ scripserunt; eo saltem fine, ut vitia emendet, quæ in hujus Auctoris exemplaria irreplere.

Denique quum duplex sit interpretandi ratio, altera quæ literam, alia quæ sensum magis sectatur (7), expendendum sedulo, quibus

[7] Inter hæc duo interpretandi genera aliud quoddam medium agnoscendum videtur, quod quum

a litera non recedat, aliquam tamen sibi vindicat in reddendo sensu libertatem, ut postulat phrasia,

bus locis, quave occasione alterutra opportunius adhiberi queat. Qui ea solum mente interpretari aggreditur, ut animum, ac stylum formet, perficiatque, vel ut in sermone generalem de Patrum Doctrina rationem reddat, latiore viam inibit, seque jejune, exilique literæ serviliter non addicet. At verum quum de controversiis agitur, ac Fidei Dogmata definite, diligenterque exponenda sunt, accurati Interpretis est propria significatione Vocabula studiosius reddere, quidquid sit de styli elegantia, ac venustate; tunc enim nitendum, ut mens Lectoris non tam delectetur, quam persuadeatur, atque ad veritatis cognitionem ducatur.

Ex hisce animadversionibus judicari facile potest quanta Interpres pollere debeat intelligentia, quantave cognitionum ubertate. Gravissimos igitur Scriptores, nimirum Ecclesie Patres in alteram Linguam transferre eorum est solummodo, qui acerrimi judicii, atque omnigenæ eruditionis fastigium attigere. Eo qui pervenerunt, interpretationibus Patrum, quas ipsi duntaxat, ut par est, præstare queunt,

Li-

---

& elocutio Linguae, qua fit interpretatio. Hæc igitur differt ab interpretatione literali, de qua differit Auctor, quod non reddat auctoris sensa de verbo ad verbum; ab ea vero interpretatione, qua

sensum magis consecratur, quam literam, in eo differt, quod literæ nihil addat, vel detrahat, sed ejus ordinem duntaxat immuret, ut alterius Linguae phrasia postulat.

Literarum Reipublicæ plurimum proderunt .  
 Gesnerius hinc ortum habuisse putat Interpretationum contemptum , quod sprete ab Eruditis ,  
 velut abjecta , vilissimaque interpretandi ars ,  
 ab iis solum factitata fuerit , qui tenue , angustumque a natura ingenium sortiti , operosam hanc molem subire non poterant .

## C A P U T X I .

*Qui in Patrum lectione se se exercuerunt ,  
 instituendæ tum Scientiis , tum  
 Moribus Juventuti prodesse  
 possunt .*

**O**ptima Juventutis Institutio tanti momenti est , tamque necessaria , ut prudentum hominum judicio ad Religionis Sanctitatem , atque Imperii administrationem nihil ea utilius existimetur .

Atque hanc ob causam Græci , & Romani instituerunt Academias , ac Libros edidere ,  
 cujus generis sunt , qui supersunt Xenophontis ,  
 Ciceronis , & Plutarchi , ut adolescentes , in quibus spem omnem suam ponebat Respublica , legis , ac rationis præcepta præ oculis habentes , ea violare erubescerent .

Apud Judæos in Prophetarum ædibus , infantes

fantes Divinam Legem edocebantur (8), in qua tota sita erat hujusce gentis Doctrina, quippe quum profanas artes aspernaretur. Libri Salomonis juventutis instituendæ præceptis referti sunt. Salomon ipse se prodit sub nomine *Samuelis* [9] Matris suæ Confilia

[8] Desumpta sunt hæc a Richardo Simone Oratorii Presbytero, qui non interruptam Scribarum, & Prophetarum seriem excogitavit ab ætate Moysis usque ad Christum Servatorem. Vide not. 27. 2. par. Verum huic Simonis commento multa ob stare videntur. 1. Silentium Scripturarum, quæ, quum sæpe memorent Prophetas, & cuneos Prophetarum, præsertim ab ætate Samuelis usque ad ætatem fere Babyloniam, nullibi tamen referunt eos Ludimagistros egisse. 2. Loca, quæ incolebant Prophetæ, adolescentium instituendorum commo-  
do parum apta fuisse videntur; etenim Prophetæ in montibus, vel desertis locis ab Jerosolyma, aliisque Civitatibus non parum diffitis morabantur. Demum interrupta admodum fuit Prophetarum successio. Pauci identidem prodibant ante Samuelem. Postea ad

Captivitatem usque Babyloniam, vel 135. post annos, nimirum ad Malachiam usque, qui inter Prophetas novissimus creditur, non intermissa fuit illorum series. Porro autem a Malachia Propheta ad Christum usque Servatorem, nemo amplius Prophetiæ dono illustratus fuit, teste Josepho, & D. Hieronymo, cui consonat univèrsa Ecclesia. Quonam ergo abiere Judæorum Scholæ toto illo temporis spatio? Mirum profecto a Viro Catholico tam insulsa, tamque aliena a communi Catholicorum sensu commenta excogitata fuisse.

[9] Non video prorsus quo fundamento nixus affirmet Auctor Operis, Salomonem se prodere sub nomine Samuelis. Nullibi enim de Samuele verba facit neque in Libro *Proverbiorum*, neque in Libro *Ecclesiasticis*, neque in Cantico Canticorum. Cap. quidem 4. *Proverb.* se

pro-

lia reverenter excipientis, eaque ratione filiis adolescentibus præbet exemplum, ut dum tenella sunt ætate, mollium instar furculorum, in bonam se partem flecti sinant.

Christianis etiam Gymnasia, Magistri, atque Instituta non desunt. Extant imprimis Libri Evangeliorum Fidelium omnium ingenio accommodati. Nullum prorsus erroris periculum subit, qui ab illis præcepta depromit ad informandos adolescentum animos; sunt enim Incarnatæ Sapientiæ Verba, & Sententiæ. Atque etiamsi in Christianis Scholis unica traderetur Evangeliorum, quemadmodum in Scholis Judaicis una erat Divinæ Legis Doctrina, satis nobis inde promanaret Eruditionis, atque Sapientiæ; nihil enim ulterius ei desiderandum superest, qui salutis scientiam adquisivit.

Quum tamen in hac mortali vita aliis alii arctissimis vinculis jungamur, quæ si tolerantur, actum erit de Societate Civili, nitendum iccirco totis viribus, ut omnia comparentur, quæ ad servandam hanc Societatem, Cœlestis, ad quam contendimus imaginem, conducere possunt. Itaque non ea solum addi-

scenda

prodit sub nomine *Filii Tenelli*, & a Matre sua dilecti. Nam & ego *Filius fui Patris mei, Tenellus, & Unigenitus coram Matre mea*. Verum quid hæc cum Samuele? Tum enim Samuel non fuit unigeni-

tus; tum laudata Salomonis verba non de vero unigenito sunt intelligenda, sed de filio perinde dilecto a Matre sua, ac si illi unicus fuisset; tum denique Salomon ibi non nominat Samuelem.

scendâ sunt, quæ Salutem Æternam, verum-  
etiam, quæ Scientias spectant humanas, ea  
tamen mente, ut referantur in Deum, quo  
auctore, *omnia cooperantur in bonum iis, qui  
secundum propositum vocati sunt Sancti.*

Quamobrem Patres Ecclesiæ duplex operum  
genus elucubrarunt, quorum alia exponunt  
Religionis Capita, & Mores vitæ instituunt,  
alia de humanis Scientiis differunt ad Æter-  
nam Beatitatem consequendam. Hoc quip-  
pe differunt Paganorum, & Ecclesiæ Patrum  
lucubrationes, quod illæ ad inanem Scientia-  
rum jactantiam unice referantur, istæ vero  
Charitatem spectent, in qua Christianæ Re-  
ligionis perfectio sita est.

Supervacaneum omnino videtur Patrum  
Opera singillatim recensere, quæ de Juventutis  
Institutione tractant. Satis ea norunt Eru-  
diti, nulloque negotio invenient, si colligere  
velint, atque summam perstringere, ut ado-  
lescentes Christianos a Librorum Gentilium  
servitute vindicent, qui dum animum infor-  
mant, mores vitiant, atque corrumpunt.

Isthuc conducere potest imprimis magna sui  
parte *Pædagogus* Clementis Alexandrini; acce-  
dunt præstantissima Mörum Instituta, quæ ab  
Ambrosio, Hieronymo, Augustino, & Sido-  
nio Apollinari traduntur.

Hiscæ adjungentur apposite Libri *de Ordine* <sup>L. II.</sup>  
Divi Augustini, qui medium veluti locum te-  
nere possent inter studia Mörum, & Litera-  
rum

rum humaniorum. Ibi Augustinus ostendit, Scientias bifariam adquiri, Auctoritate, atque Ratione. Duplicem esse docet Auctoritatem, Divinam, & Humanam; Rationem vero nobis concessam, ut prudenti consilio utamur, atque Scientias aliud non esse, quam Rationem ad multas res contemplandas admotam, quæ Ratio dici potest quidam animi motus, quo res copulantur, vel distinguuntur, ut assidua meditatione, ac studio altius memoriæ figantur.

Quibus principio positis de unaquaque singillatim Scientia agi potest, atque omnia, quæ apud Ecclesiæ Patres optima inveniuntur, excerpti; quæ sane non pauca eleganter, & ornate dicta, adolescentibus exemplo esse possent, ut ad summam Oratoris perfectionem eveherentur, una discantes bene dicere, & operari.

Johannes Damascenus Logicam suppeditat, quæ in Galliis ante Aristotelis imperium tradi solebat; atque etiam si ea intercideret, vel una, quæ apud Augustinum extant principia, satis essent ad optimam Dialecticam perficiendam.

Universa Augustini Philosophia, quum hodiernis temporibus in septem exigua Volumina redacta sit sub Titulo *Philosophiæ Christianæ*, adhiberi commode posset, paucis adjectis, quæ ex Philosophicis Divi Anselmi, aliorumque quorundam Patrum Tractatibus desumentur.

Quam.



Quamvis veteres isti Doctores in Physicam rerum meditationem plerunque non incumberent, explicandis tamen Naturæ effectibus, quædam eorum animadversiones inutilles existimari non debent. Ut enim fatentur Doctiores Philosophi, vera rerum naturalium Scientia aliunde petenda non est, quam ex Divinarum Perfectionum fontibus, in quarum contemplatione Patres Ecclesiæ omnem fere mentis aciem intenderunt.

Multa quoque sunt apud Patres, quæ ad Scientiam Metaphysicæ non parum conducere possent. Atque qui Divi Anselmi Libros *ad Guenilonium*, & Augustini *Soliloquia de Ideis*, & Cognitione Dei consuleret, adjectis ejusdem Augustini Tractatibus *de Immortalitate, & Quantitate Animæ*, longe sane, multumque proficeret.

Ea de re Gregorius etiam Nyssenus Tractatum scripsit longe utilissimum. Tum enim varias Philoſophorum, atque Hæreticorum de Origine Animæ sententias refert, tum etiam probe demonstrat, Animam substantiam esse Spiritalem, atque Immortalem, quæ conjuncta Corpori illud penetrat, in eoque operatur.

Omnium autem absolutissimum hoc in genere Claudiani Mamerti opus *de Natura Animæ*, in quo ita convenit Mamertus cum Metaphysicis quorundam recentiorum meditatio-

420 *De optima legendorum*  
nibus, ut cum recentes Philoſophi deſcripſiſſe  
videantur [10].

## CAPUT XII.

*Qui in Patrum lectione verſati ſunt,  
Sacras explanando Scripturas  
Eccleſiam juvare poſſunt.*

**Q**Uandoquidem Eccleſiæ Patres Bonorum  
omnium conſenſu locupletiffimi habentur  
Traditionis teſtes, cujus ope exponitur  
Verbum Dei, atque illuſtratur, certum  
eſt,

(10) Negare proſecto non  
auſim, duce ipſamet ex-  
perientia, eruditionem  
proſanam ab omni prorsus  
Chriſtiana Inſtitutione ſe-  
junctam, formandis ado-  
leſcentium animis obefſe  
potius, quam prodeſſe. Il-  
lud etiam ultro fateor, lu-  
benterque ex operibus Pa-  
trum quamplurima, eaque  
præſtantiffima excerpti poſ-  
ſe teſtimonia, quæ ad In-  
ſtituendos adoleſcentes,  
perficiendaque illorum in-  
genia mirum conducere  
poſſent. At non video ta-  
men, cur e Chriſtianis  
Scholis omnia Proſanorum  
Scriptorum opera ſint eli-  
minanda; quum Eccleſiæ  
Patres iſdem non ſine  
maximo fructu uſi fuerint.

Deinde eruditiffimi Viri

Arnaldus Libro *de Arte  
cogitandi*, Rollinus in op-  
tima, quam tradit Metho-  
do cultiores Literas perdi-  
ſcendi, *D. Pluche* in ope-  
re, cui titulus, *Speſtacle  
de la Nature*, & alii ſa-  
tis oſtendunt quam felici  
ſucceſſu humanæ, proſa-  
næque Scientiæ ad Chri-  
ſtianæ Fidei decus, & uti-  
litatem adhiberi poſſint.  
Quidquid enim Pagani  
Auctores de ejuſmodi  
Scientiis ſcripto manda-  
runt, ad Chriſtianam illi  
Fidem ſumma cum laude  
converſerunt. Non itaque  
neceſſe fuerit Proſanos adi-  
re Scriptores, dum eos  
Sacri, & Eccleſiaſtici co-  
mirentur. Deinde confer  
hoc caput cum cap. 8.  
ſecundæ partis.

est, indubitatumque, illos, qui Patres penitus perspectos habent, omnium aptissimos esse, iisque nihil amplius desiderari ad Sacras optime interpretandas Scripturas. Linguarum quidem peritia comparari debet, quum clavis Scientiarum existimetur; at quum Linguis verba solum, Traditione autem res ipsæ illustrentur, Traditionis notitia Linguarum studium licet perutile, longissime superat.

Præstantissima, quæ postremis hisce temporibus prodierunt in Scripturas Sacras Commentaria, auctores habent viros, qui ex Ecclesiæ Patrum Doctrina tanquam ex feracissimo solo, quod diligenter excultum lectos, & uberes fructus edit, illa excerpserunt. Jam vero duplici modo adhiberi potest lectio Patrum ad Scripturæ intelligentiam: primo, quum in auxilium vocantur ad ea perficienda, quæ Lector proprio Marte protulit: altero modo, quum ea, quæ Interpretes Antiqui adumbrarunt, omnibus suis partibus explentur, atque absolvuntur.

Duplex hic modus duplici respondet ingeniorum speciei, quorum alia facillime quidem fœtus procreant, sed quum satis doctrinæ non habeant, ad aptiora confugere coguntur, ut ea, quæ se solis ediderunt, confirment, perficiantque: alia vero minus fertilia, rudes, & inchoatas aliorum notitias sua, qua pollent eruditione perpolire valent, atque ad summum perducere.

Haudquaquam enim ii aspernandi sunt,  
Dd 3 qui

qui quum se solis nihil proferre possint, aliorum tamen sententias illustrare, ac perpolire, vel saltem colligere, ac in bono ordine collocare valent. Hæc exercitatio, licet specie tenus mediocris ingenii esse videatur, a præstantissimis tamen Viris, quorum in numero sunt eximii Ecclesiæ Patres, neglecta nequaquam fuit. Enimvero Divus Basilus, ac Gregorius Nazianzenus, quum Scripturarum Sanctarum studiis se totos dedissent, dedignati tamen non sunt præstantiora Origenis loca in Sacros Codices deligere, quæ extant etiamnum sub nomine *Philocaliæ*.

Præclarissimum hac Methodo confici posset Commentarium, ab exquisitissimis Patrum animadversionibus in Scripturas Sanctas excerptum. Eorum Scholia literalibus explanationibus bene multis, iisque aptissimis referta sunt, quibus adjectæ accommodatiores, Mysticæ, ac Spiritales eorum Annotationes Librum conflarent, qui & omnigena eruditione præstaret, & careret jejuna illa exilitate, ple-  
 rorumque recentioris ætatis Commentariorum, in quibus Critices quidem studium plurimum viget, pietatis vero spiritus omnino languescit.

Neque leviter existimandum, propterea quod Patres in Allegorias paullo nonnunquam liberius excurrere videantur, omnes iccirco eorum Allegorias repudiandas. In quovis argumento translationes facile est adhibere, quum vel in ipsam Homeri Iliadem fuerint adhibitæ. Illud autem cavendum quo spectent, quo-

quove modo usurpentur. Sunt inter Allegorias nonnullæ, quæ nihil aliud esse videntur, quam acutæ, subtilioresque cogitationes, & vani effervescentis ingenii conatus; at non desunt etiam certæ, appositæque, quibus Ecclesiæ Patres tanquam fundamento utuntur, ut ad sublimem Prophetarum intelligentiam erigant se se, quas Origenes *contra Celsum* Mysticæ Theoreſis nomine donat. Optimus illarum delectus & Fidelibus prodesſet quamplurimum, & Sectariis ora obstrueret, qui Allegorias bene multas explodunt, cæteroquin convenientiſſimas, easque paullo liberiores, ac simplici, magisque obvio Scripturæ sensui omnino contrarias dictitant [11].

Fieri etiam possent exemplo Græcorum, Latinorumve mediæ ætatis *Catena*, sive delecta

Dd 4

sta

(11) Ridendi autem Sectarii, qui, quum Allegorias explodant, adeoque plures Prophetias infirmant, rejiciantque, ad sensum tamen allegoricum nonnunquam confugere coguntur, ut sese expediant a difficultatibus, quarum definitionem a literali, quam tantopere jactitant, eruditione frustra perquirunt. Exemplo est Grotius, qui alium a literali sensu contemnens, quum gravissimis difficultatibus Chronologicis in Historia Judithæ premeretur, ad al-

legoricam explicationem a sano sensu prorsus alienam confugit, inquiens, intelligi debere nomine Judithæ, Judæam, pro Bethulia Templum; Nabuchodonosore vero indicari Dæmonem; Holoferne autem ejus Ministrum, ac demum Eliachim esse Deum Judæ defensorem. Ecquis sanæ mentis hæc auserit affirmare? Atque nisi hæc scripsisset ipsemet Grotius, tulissetne æquo animo quempiam ita disferentem?

Etia Sanctorum Patrum in Scripturas verba, ac sententiæ ex ordine disponi, vel simul arte quadam connecti. Qui enim varia Sanctorum Patrum loca promiscue, utque sub oculos cadunt, congerere solent, immensum, nulliusque omnino fructus laborem suscipiunt.

Multæ id genus *Catene* Typis editæ sunt, at longe plures in amplissimis Bibliothecis pulvere conscriptæ jacent. Præstantiores quædam deligi possent, atque ad magnam Literariæ Reipublicæ utilitatem vulgari. Quanquam enim Græci recentiores permulta proprio Marte hisce operibus adscripserint, indeque sub Patrum Ecclesiæ nomine in vulgus ediderint, atque hujusmodi Compilatores nec satis exquisiti judicii, nec satis accuratæ fidei esse cenleantur; immo vero Auctorum nomina mutare, ex uno plures, vel ex pluribus unum Auctorem facere, loca, quæ proferunt, pro lubito amplificare, vel contrahere, atque illa non totidem, quibus Auctor, sed aliis sæpe verbis reddere consueverint; nemo tamen inficias ibit, eos prospero quandoque successu adlaborasse, atque non parvam in Sacrarum Scripturarum studiis utilitatem adferre posse. Revera nempe illorum Methodus aptissima est ad varias Auctorum opiniones continuate, levique labore addiscendas, necnon ad Veterum quorundam Interpretum Sententiam certo noscendam, quorum exemplaria vel omnino interierunt, vel vitiata sunt, aut mutilata.

Est

Est, & aliud compilationis genus, quod accuratiori ordine fit, atque diligentia; quam in Catenis adhiberi soleat. Colliguntur nimirum omnia, vel multa unius, vel alterius Ecclesiæ Patris in aliquem Scripturæ locum testimonia, ex quibus una, eademque confletur oratio. Sic D. Paterius Sancti Gregorii Papæ in universam Scripturam interpretationes vulgavit, atque Gazeus annotationibus ex diversis Patribus sumtis octo priores veteris Testamenti Libros exposuit. Sic Petrus Abbas Tripolitanus, teste Cassiodoro, depromptum ex Divi Augustini Operibus Commentarium in Epistolas Divi Pauli tanta arte confecit, ut ab ipsomet Augustino scriptus esse videretur, Eandem Methodum secuti sunt Venerabilis Beda, & Diaconus Florus.

Et sane magis jucunda videtur hæc compilandi ratio, magisque æquabilis, quam præcedens. Cavendum tamen, ne dispositis pro arbitrio Auctorum Testimoniis aliena ab illorum mente sententia fingatur. Quemadmodum enim Oratio transpositis illius verbis a se ipsa discrepans effici, ita transpositis unius ejusdemque Patris Testimoniis universa illius Doctrina turbari potest, ac novus veluti Auctor suboriri, cui nihil commune sit cum primo, præter verba, quæ in omnem sensum pertrahi possunt.

Ut autem optima sit collectio, illius artifex Auctorem, quem tractat, perfecte prius norit, oportet, ejusque ingenium, doctrinam  
in-

integram omnino relinquat, ordini studeat, accurato sit ingenio, rectaque voluntate, ne alio, quam Auctoris, fine, ac mente illius opus regatur, neve Lector a proposito fine, ad quem contendit, quam longissime aberreret.

### C A P U T X I I I.

*Theologiam docere ad illos jure quodam  
spectat, qui Patres dudum  
versarunt.*

**F**Atendum sane, merito, & jure augusto Theologi nomine donandos esse, qui Scripturas Sanctas, & Ecclesię Patres funditus exploratos habent. Hac solum via Scholasticam tuto adire possumus, eam explere, ac illius errata emendare, quo modo publicę olim staterę ad stateras Sanctuarii expensę corripiebantur.

Duplex est tractandę Theologię ratio, altera verus, recentior altera. Prior Oratoriis ornamentis exculpta, posterior magis rigida eloquentiam parvi facit, subtilitatem autem conlectatur. Unius ornatus alterius simplicitate temperari potest, ut Theologia accuratior fiat omni cavillatione remota; tum solida, jucundaque, quin mollis nimium sit, floribusque distincta.

Ad Athanasii, aliorumque veterum Patrum laudem dictum est, argumenta sua polite, ni-  
ti.



rideque eos exponere, optimisque momentis graviter adversarios premere, necnon ad exponenda Mysteria aptissimis uti Vocabulis, atque difficultates simplici prorsus ratione, omnique semota subtilitate illustrare.

Hoc modo Positiva, & Scholastica invicem jungi possent, ac mutuam sibi lucem, cum vim, atque leporem præbere, Theologia Scholastica exilitatem, & cavillationem exueret, Positiva vero uberrimis ornamentis locupletata ordinem assequeretur, atque distinctionem, quibus illius dignitas, ac pretium summo opere augetur. Hujus rei exemplum supeditant recentiores quidam Theologi, quos inter præstat Petavius, qui de Theologicis Dogmatibus ita differuit, ut Positivam, & Scholasticam Theologiam una conjunxerit, adjectis etiam, quæ ex Judaica, & Pagana Eruditione utiliora, simul ac jucundiora colligere potuit.

Opponunt nonnulli, interdum assidua Patrum lectione Studiosorum memoriam obrui, ingenium vero parum omnino exerceri. Verum dicant, amabo, qua ratione docere quispiam possit, quod non didicit; vel etiam, quæ in rebus Theologicis ratiocinatio institui aliis innixa, quam, quæ ex Scripturis Sanctis, & Ecclesiæ Patribus petuntur, fundamentis? Exercendum quidem ingenium, verum hæc exercitatio stabilis, certissimæque doctrinæ nitatur oportet.

Quid autem foret absurdi, si Theologus  
Patres

Patres exscriberet, quum id ipsum illi præstiterint? Divus Cyrillus Alexandrinus Tractatu contra Antropomorphitas Epilogum. adjecit, ex variis Divi Gregorii Nysseni *de Natali Christi die* orationis fragmentis excerptum; quidquid etiam Marius Mercator contra Pelagianos scripsit, & Nestorianos, ex variis Ecclesiæ Patrum Operibus contra eisdem hæreticos desumptum est.

*Perron-  
ian.*

In re Theologica, ajebat Cardinalis Perronius viam omnium tutissimam esse ab Auctoritate nunquam recedere; multo quippe magis expedit facti, quam juris quæstiones persequi. Theologiam eodem se modo tractare profitetur Vir ille præstantissimus, quo Cujacius Jus Civile; ita scilicet, ut Historicum potius gesta narrantem, quam Philosopherum disputantem ageret.

Hæc methodus in Theologia præsertim Polemica locum habet. Etsi enim Scholastici de controversiis diligenter agant, quæstiones etiam funditus investigent, difficilius tamen victoriam referunt, quam ii, qui, omni altercatione seposita, ad Traditionem, & Auctoritatem Antiquorum recurrunt.

Hicce argumentis eo demum rediguntur Sectarii, ut vel se victos, vel purissimos Veritatis fontes a se derelinqui turpissime fateantur. Præterea longe majoris sunt emolumenti, quam subtiliores, inanesque ratiunculæ, quas pauci admodum percipere valent.  
„ Subtiliores disputationes (ait quidam ætatis nostræ

„ nostræ Scriptor ) sua habent commoda, sua  
„ etiam incommoda. Quæ superfluere videntur,  
„ necessaria aliquando sunt, sed Christianorum  
„ vulgo nec necessaria, nec utilia,  
„ immo vero ipsis etiam Doctoribus pernicio-  
„ siosa, si neglecta Scripturarum meditatio-  
„ ne, atque Antiquitatis Ecclesiasticæ studiis,  
„ ea immoderato æstu consèctentur.

Qui Catechismum Concilii Tridentini composuerunt [ in quo Theologiæ quodammodo compendium ad Christiani Populi usum continetur ] de subtili methodo in exponenda Christi Doctrina, deque discutiendis, Scholasticorum more, principiis solliciti haudquam fuere; sed Veterum potius Patrum in Catechesibus exemplum secuti, Veritates Evangelicas brevi, facilique ratione, & omni semota disputatione Fidelium oculis subjicere sategerunt.

Theologiam vero Moralem, qui legendis Patribus assueverunt, felicissimo successu tractabunt. Quum enim fontes iis pateant, e quibus sanctissima vivendi instituta hauriuntur, ea depellent, quæ ab omni veritate aliena, impellentibus Carne, & Sanguine, in hominum mentes irreperunt, ac primas in iis sedes occupant.

Illud quidem cavendum, ne misceantur omnia, ne severiorum hominum exemplo, nulla virorum, vel temporum ratio habeatur. Est modus in rebus; neque enim Spiritus Dei Prudentiam séjungit a Zelo, vel Misericordiam a Justitia.

Hæc

Hæc in mente habeant Ecclesiæ Pastores, quorum munus, & juris est quæstiones morum finire, atque ex universalibus Evangelii, Patrum, & Conciliorum principiis instituta colligere, ut oves suas, inter hujus mundi illecebras periclitantes ad optatum finem tuto perducant.

Illud inchoant postremis temporibus Sanctissimi Præsules. Quum enim ad memoriam revocarent, quæ Antiqui Patres ob impensum Ecclesiæ morem perfecerant, Tractatus Theologiæ Moralis vulgarunt, priorum temporum puritate non indignos.

Idem consilium capeffendum duxere quidam Theologiæ Doctores, qui licet in inferiori ordine constituti, ampliori tamen facultate præditi, quæ defunt Episcopis, omnino suppleant. Itaque major, quæ desiderari potest in re Morum, puritas, & accuratio, inconcussis Justitiæ principiis innixa, hodiernis temporibus obtineri cœpit.



CAPUT XIV.

*Qui legendis Patribus assueverunt, rerum  
Historiarum, necnon Antiquitatum  
Ecclesiæ studio, de Christiana  
Religione mereri plurimum  
possunt.*

**I**Nter multa, quæ Viri legendis Patribus affueti Christianæ Religioni adferre possunt emolumenta, nullum habetur præstantius, quam Ecclesiasticam Historiam conscribere, vel saltem consilio, collatisque annotationibus scribentes juvare. Celeberrimus Nicolaus Faber, Vir cæteroquin eruditissimus, atque iis, quæ diuturna meditatione privatim comparaverat, evulgandis adprime idoneus, moderatione quadam, atque modestia satis habuit aliis Scriptoribus, ac præcipue Baronio laborum suorum fructus communicare.

Nihil est hac in re non præclarum, summaque laude dignum honesto Viro, & gloriæ nimium non appetenti. Verum quamcunque teneat Methodum, sive hanc, quæ minus splendoris habet, minusve periculi, sive maius operi admoveat, atque in Auctorum classem cooptari velit, procul dubio Historia Ecclesiastica non alia melius ratione, quam Testimoniis Patrum confici, ac illustrari potest; quidquid

quidquid nonnullis videatur hominibus, quibus hæc via minus probata est, minusve jucunda.

Hanc Methodum secutus est Cardinalis Baronius, quam antea tentarant Centuriatores Magdeburgenses. Hæc secretiora quæstionum abdita penetrat, quæ diffidiis, Schismatibus, atque Hæresibus locum dedere. Hæc in Spiritum, & regimen Ecclesiæ recta ducit, Antiquæ Disciplinæ fontes aperit, omnemque Traditionum seriem, & connexionem exponit.

Innumeras reperire est in Apologiis Patrum, in Panegyricis, Concionibus, Commentariis, Laudationibus Funebribus, Collationibus, Disputationibus, & Epistolis animadversiones, quæ Ecclesiasticam Historiam confirmant, multaque facta obscura, quæ alioquin illustrari non possent, enodant, elucidantque.

Ut hæc omnia adhibeantur, necesse non est universæ Ecclesiæ annales conscribi. Satis quisque habeat pro modulo ingenii sui unum, vel alterum antiquitatis Caput exponere, vel unius Concilii Historiam perscribere, vel, si placeat, Hæreseos, puta Arianorum, Pelagianorum, Nestorianorum &c. Satiùs quippe multo fuerit vel unam rem funditus tractare, quam plures jejune, exiliterque, immo etiam jucundius multo, atque facilius unum quidpiam singulatim expendere, quam plura simul, quod confusionem parit, quum ea sæpe connexa non sint, atque permultas, easque diversas cognitiones postulent.

*Alius*

Alius Sanctorum vitam, alius Martyrum gesta colliget, vel Scriptorum Ecclesiasticorum Historiam, quæ in re Ecclesiastica non infimum locum tenet; vel denique Historiam Theologiæ, quæve fuerit singulis Ecclesiæ sæculis Doctrina, accurate notabit. Ut enim inquit apposite Abbas *Fleury*. „ Historia  
 „ Religionis non modo sistit in notandis tem-  
 „ poribus electionis, vel mortis Summorum  
 „ Pontificum, & Episcoporum, in enarrandis  
 „ miraculis, & suppliciis Martyrum, vel cruciatibus, quibus Monachi corpora castigare solebant; sed illud longe præstat Doctrinam  
 „ ipsam exponere, quam firmabant Miracula,  
 „ & Martyres testimonio suo tuebantur. Qui  
 „ Philosophiæ Historiam scribere adgrederetur, satis profecto non haberet Philosophorum vitam, & gesta referre, sed & illorum  
 „ Dogmata exponeret. Atqui Historia Ecclesiastica veræ Philosophiæ Historiam continet, ac præcipua, quibus constat, gesta  
 „ illorum temporum Doctrinæ, ac Disciplinæ innixa sunt.

*Hist. de  
l'Egl.  
T. 3.  
Pref.*

Verum enimvero si cui consilia hæc non arrideant, quod vel ab insignibus Viris perfecta jam sint, vel illorum facultatem excedant, colligere poterit a Patribus, quæ ad illustrandam Historiam, & antiquitatem Ecclesiæ opportunius conducere videbuntur. Poterit quisque pro facultate sua in castigandis, absolvendis, vel defendendis veterum, recentiumque Scriptorum Historiis se se exercere. Ut paucis

E e omnia

omnia complectar; Annotationibus suis uti poterit ad semetipsum erudiendum; atque ad depellendum in rebus bene multis errorem, quæ ob parum accuratam investigationem satis non innotescunt. In re quippe historica nemo unus est, cui negotia, tempus, experimentum novam quotidie lucem, & consilium non præbeant; ita ut eo tandem devenire fas sit, quo nihil eorum nobis innotuisse intelligamus, quæ principio funditus callere putabamus, atque indignanter repudientur, quæ principem antea locum in nostra mente tenebant.

- „ Nunquam ita quisquam bene subducta
- „ ratione ad vitam fuit,
- „ Quin res, ætas, usus semper aliquid ap-
- „ portet novi;
- „ Aliquid moneat, ut illa, quæ te scire
- „ credas, nescias,
- „ Et quæ tibi putaris prima, in experiendo
- „ repudies.





C A P U T X V.

*Qui Ecclesiæ Patrum Doctrinam funditus  
norunt, Populos Sacris Concionibus  
præ cæteris erudire queunt.*

**Q**UI ad erudiendos Sacris Concionibus Populos a Deo vocantur, omnia procul dubio ad illud opus feliciter exequendum necessaria possident, si eximie illorum Charitati, ac studio accedat Scripturarum, Sanctorumque Patrum cognitio, qui non tam Doctrinæ, quam Eloquentiæ Magistri habendi, colendique sunt.

Neminem latet, trifariam pro triplici hominum genere, neophytorum scilicet; provectorum, ac perfectorum, Religionis instituta tradi posse. Neophytis quidem Catechismos, provectis familiares in Evangelium Sermones, perfectis vero fufas, difertasque Orationes.

Triplicis hujus institutionum generis exempla suppeditant Ecclesiæ Patres, scilicet Catecheses, quæ ab hodiernis Catechismis parum distant, ac duo Homiliarum genera, quorum aliæ Fidelium captui accommodatæ ad familiares in Evangelium Orationes facile revocantur; aliæ, quas sublimiorem Doctrinam continentes, Johannes Chrysostomus vocat διδασκαλίας ad Sermones referuntur, in quibus

quibus una cum præclara eruditione Eloquæ-  
tia Ecclesiastica splendet, eminetque.

Quodlibet autem consilium aliquis capiat,  
Auditores procul dubio sibi conciliabit, dum  
constanti, assiduoque labore dignum, fidissi-  
mumque se præbeat Ecclesiæ Patrum discipu-  
lum. Qui Fidei elementa proponit firmissimo  
hocce subsidio instructus, muneris sui partes  
cumulare implebit, plurimumque splendoris  
adferet huic officio, in quo Pastores Ecclesiæ  
præcipuam antiquitus operam collocabant,  
quamvis hodiernis temporibus parvi omnino  
pendatur. Prisci Antistites Christi Jesu, &  
Apostolorum exemplo ducti exponebant ipsi-  
met Fidei rudimenta Christianis, atque per-  
raro Clericis, vel Laicis, quantocunque pol-  
lerent ingenio, & facultate, hanc curam com-  
mittebant.

Si quis autem ad officium Pastoris imple-  
ndum, vel in ejus locum suffectus, Evange-  
lium Populo familiariter exponere debeat,  
nullo sane modo id melius perficiet, quam  
si Patrum Doctrinam funditus exploratam ha-  
beat, indeque Evangelii oracula Auditoribus  
suis simplici, faciliq; ratione communicet,  
explanetque.

Antiqui Ecclesiæ Pastores iis Sermonibus,  
quos ut plurimum imparati sponte proferebant,  
illius diei Epistolam, vel Evangelium com-  
mentabantur. Dogmata Fidei abique nimia  
subtilitate exponentes, semotis gravioribus  
difficultatibus, atque disputationum, & con-  
trover-

troversiarum argumentis, de Christiana Morum Doctrina, & de exercitatione virtutum longius multo tractabant.

Hoc munere fungi erga oves sibi creditas Episcopi, immo etiam Summi Pontifices adprimum necessarium ducebant. Divus Leo doctissimorum Ecclesiæ Pontificum nemini secundus ab eo nunquam destitit. Gregorius etiam Magnus, gravissimis licet curis distentus, adversaque valetudine afflictus, ab eo implendo ægerrime abstinebat. Sanctus Augustinus totius Ecclesiæ Africanæ negotiis occupatus, huic etiam curæ vacabat; neque defuerunt Antistites, qui quum facultatem in dicendo non haberent, Sanctorum Patrum Sermones legere aliquando maluerunt, quam Populum sibi commissum Spiritualis Cibi jejunum dimittere. Ita septimo Ecclesiæ sæculo Episcopi Sermonibus Divi Cæsarii ad erudiendos Fideles utebantur.

Etiam si plerique Sanctorum Patrum Sermones ex tempore prolati fuerint, non desunt tamen eruditi juxta, ac perpoliti, quos per otium, multa que cura, ac diligentia scripsere. Hujusmodi sunt Sanctorum Basilii, & Chrysostomi Sermones, qui præstantissimis Concionatoribus exempli loco esse possent.

Divus Gregorius Papa in Epistola ad Johannem Ravennatem Subdiaconum, testatur, se privatim emendasse Sermones, quos publice proferebat. Plerique, qui ad nos pervenerunt, summam continent longiorum Orationum,

E c 3

quas

*Regis.  
L. 10.  
Ep. 22.*

quas ad Populum habitas, privatim ad posterorum eruditionem perpoliebant.

Certo illud, constanterque affirmari potest de plerisque Sanctorum Sermonibus, ac præsertim Divi Bernardi, qui dimissa concione eos contrahabat, atque ita limabat; perficiebatque, ut sapientissimorum Virorum judicio, Græcorum Patrum, qui in dicendo præstiterunt, Orationibus anteponendi sint. Politioris elegantiae, qua Bernardus cæteros Patres, ac præcipue Latinos superat; hanc reddit rationem Mabillonius, quod illi ad rudes, & ignaros Populi Fideles, Divus autem Bernardus ad selectos; eruditissimosque sermonem haberet.

Quæ res non omni dubio caret, quum Divus Bernardus coram fratribus suis læpissime diceret, quos non omnes in Doctorum numero fuisse certum est, compertumque. Verum quidquid sit, non desunt apud Patres exempla, Concionum, atque Eloquentiæ, Morumque præcepta, quibus Evangelici Oratores commode uti possunt,

*De  
Sacerd.*

Episcopi, ut docet Divus Chrysostomus, Verbum Dei vehementer, eruditeque annunciare debent, Fideles edocere, Hæreticos refellere, omnes demum javare, ac Christo lucrifacere. Contempnendam æque ait ab Oratore affertorum laudem, & invidorum obtreactionem; nitendum, ut morum castimonia integram sui famam, nomenque turatur, atque a se procul invidentiam omnem expellat, qua

qua ob immoderatum sui amorem, innatamque nobis superbiam in eos invehi posset, qui pro ampliori facultate dicendi, majori cum laude, uberiorique fructu concionantur.

Lacrymas potius ab Oratore excitari cupit *Ad Nepot.*  
Hieronymus, quam populi plausus, & acclamationes; eumque talem vult esse, qui neque declamitet, neque mordaci verbo quenquam distringat, sed nitide, graviterque exponat Mysteria Fidei, & Evangelicam Morum Doctrinam.

Divus Augustinus a Sacro postulat Oratore, ut Fideles ad bonam frugem omni studio perducere nitatur; quidquid justum est, honestumque adhibeat, ut animos sibi conciliet, inertes excitet, ignaros edoceat, infirmos regat, obsecret, increpet, minitetur, ut moveat, penetret, frangat, superetque Auditorum animos. Cui vero hæc desunt, validioribus Sacrarum Scripturarum sententiis, ac testimoniis se se præmuniat. *De Doctr. Christ. L. 4.*

Præterea nitori studeat, atque perspicuitati, liberius non excurrat, ab utili facilius non divertat ad jucundum, atque quum res, de qua agit, gravis sit ipsa per se se, caveat quammaxime, ne gravitatem deponat, quamquam hilaritate nonnunquam orationem conspergere queat.

Julianus Pomerius, Illustris quinti sæculi *De Vir. cunctem. L. 1.*  
Scriptor, multum discriminis esse inquit inter Declamatorem, qui ea solum mente eloquentiam adhibet, ut popularem gratiam aucupe-

tur, & Sacrum Oratorem, qui ad Majorem Dei Gloriam, atque Animarum salutem totus contendit. Illum, inquit, magnificis, & ampullatis verbis res exiguas extollere; hanc vero sermonis sui simplicitatem illustribus, certissimisque sententiis confirmare: illum voluptatem magis consecrari, quam utilitatem; hunc vero firma, efficacissimaque oratione obduratissimos Auditorum animos vehementer movere, valideque percellere.

Ineunte hoc sæculo Sermones habebantur, quos jure dixeris sacræ, profanæque Eruditionis omnigenæ indigestam molem. Congerebantur promiscue omnium scientiarum cognitiones, atque innumerabilibus testimoniis ex eorum manibus per fas, & nefas ereptis, qui & ipsi ab aliis surripuerant, opprimebantur Auditores; adeo ut suggestum eo solum sine tunc temporis conscendere viderentur Oratores, ut immenso diuturnæ lectionis pondere se se exonerarent.

Equidem Concionatores, ubi norunt exosam omnibus futilem hanc eruditionem, qua sibi turpe quoddam nomen merebantur, quod silentio præterimus, ad veram eloquentiam pro viribus accedere nisi sunt. Verum plerique res insolitas magnifico stylo, inflatisque buccis proferendi studio, inanem Eloquentiæ larvam, vanumque simulacrum consecuti sunt. Tandem detecta fuit, atque contemta hujus simulacri illecebra, ac hodiernis temporibus Sacra Eloquentia ad summum perducere facile poterit.

poterit, modo ad illam accedat verus Ecclesiæ Spiritus, Pietasque perfecta, seu singularis Gratia, studium, & Charitas; quibus incensi Oratores antiqui tot, tamque mira operabantur (12).

Quæ res iis facile, feliciterque succedet, qui eorum vitæ puritatem, atque sermonis candorem imitari, necnon sententiis, & doctrina imbui studuerint, quive illorum ingenium penitus exploraverint assidua eorundem lectione, ac præcipue Homiliarum Divi Chrysostomi, quas inter principem locum tenens Antiochiæ scriptæ, antequam ad Sedem Constantinopolitanam eveheretur. Nam licet Divus Basiliius aliquid elaboratius exhibeat, atque limatius, quod plus Atticæ puritatis habeat, stylus tamen Chrysostomi, quippe Asiaticus, erudiendis Fidelibus accommodatior esse videtur. Populis enim paullo fufius exponi debent Christianæ Fidei Dogmata, ut illa utilius probent, atque jucundius.

Quum porro Ecclesiæ Patres Sacris Oratoribus in exemplum proponimus, non ea nobis mens est, ut ab iis exscribantur, quæ ab hodierno stylo abhorrent. Multis enim in rebus sine ullo erroris periculo relinqui possunt. Ita  
in

(12) Postquam in lucem editum fuit hoc Opusculum, non defuerunt inter Gallicos Oratores, qui Sanctorum Patrum exemplo, eloquenter, & erudite, simul ac pie, sanctissimeque Ver-

bum Divinum Fidelibus exposuerint: eos recensere supervacaneum existimo. Gallis quidem notissimi, Italis vero non incomparati sunt.

in Oratoris facultate est, Sermonem suum, ut libet, tribuere, quanquam abs re non faceret, qui in partiendis Sermonibus Divum Chrysostomum imitari vellet.

Præclarus iste Christianus Orator ab exordio nostris haud dissimili orationem inchoabat. Primam illud Sermonis sui partem quodammodo continebat. Inde ad alteram gradum faciens, qua Orationis corpus constabat, ibique magnum, immensumque sibi campum aperiens, majori, quo fieri poterat, nitore, ac perspicuitate literalem Scripturæ sensum explanabat.

Hæc hodierni Oratores vel exiliter admodum, vel nihil omnino attingunt, atque Fideles Sacrarum Scripturarum jejunos nullo negotio dimittunt. Revera quidem plurimo opus est ingenio, maximaque facultate, ut in Sacrarum Literarum expositione, in qua parum Eloquentiæ viget (13), politi Oratoris nomen dudum

(13) Siquidem Eloquentiæ nomine eam intelligat Auctor Operis, quam ineunte sæculo proxime superiori consueti solebant Concionatores, inficias non ibo, illam parum omnino vigere in Scripturis Sanctis, earumque explanatione. Sin autem intelligat veram, solidamque Eloquentiam in optimo rerum potius, quam fucato verborum delectu positam, dissentientes

habebit complures, eosque sapientissimos Viros, qui & contra sentiunt, & suam sententiam manifestissimo comprobantur experimento, editis in Scripturas Sanctas Commentariis, & Interpretationibus, quibus nihil perfectissimæ illius eloquentiæ desiderandum superest. Riusmodi sunt præ cæteris Explanationes complurium Scripturæ Sacre Librorum postremis hi-

scq



dudum fervetur incolume. Verum istud sapientis est Concionatoris, lenioribus modis Auditores suos huic methodo paullatim assuefacere, quæ quum sit simplicissima, maximam parit utilitatem.

Cohortationes etiam, quibus Homilias claudit Divus Chrysostomus, præclarissimæ sunt, dignæque omnino, quas una cum cæteris Orationis partibus imitentur hodierni Oratores. Uberrimam illæ Moraliū Sententiarum copiam exhibent, quæ ab expositis Scripturis sponte nascentes, impigris, sedulisque Auditoribus fructum adferunt incredibilem.

Quanquam verò Divus Chrysostomus hæc in re tantopere excellat, obmittendi tamen non sunt reliqui Patres, ac præsertim Divus Augustinus, qui præ cæteris plurimum habet Pietatis, acuti judicii, Doctrinæ, & Charitatis. Colligi etiam utiliter poterunt selecta illorum verba, atque sententiæ, quæ, ubi se præbeat occasio, opportune usurpentur. Immo vero longe præstat in legendis Antiquorum operibus tempus impendere, quibus animus, & mores perficiuntur, quam in evolvendis recentioribus Concionum Libris. Me quidem non latet, optimas extare illarum Collectiones, quas

Ille annis Gallico sermone  
vulgatæ, sub hoc titulo:  
*Explication de (e.g.) la Gen-  
nese: de la Prophetie d'Isaie:  
des Livres des Rois, &c., en  
selon la methode des Saints*

*Peres, on s'attache a decou-  
vrir les Mysteres de Jesus-  
Christ, & les Regies des  
Mœurs renfermées dans la  
sainte écriture.*

quas etiam legisse oportet. Verum vitanda est diligentissime illorum methodus, qui iis exscribendis se totos addicunt: quod facere plerumque solent, qui juvenili ætate ad Concionem animum convertunt. Hinc enim jacet, deperitque naturalis illorum facultas, atque a recto tramite, quo ad Eloquentiæ Ecclesiasticæ perfectionem devenirent, sensim sine sensu abducuntur.

## CAPUT XVI.

*Qui perspectos habent antiquos Patres,  
Scriptis suis Ecclesiam præ cæ-  
teris juvare possunt.*

CUR indigesta, atque incompressa Scripta prodeant, in causa præsertim illud est, quod Auctores ad scribendum se conferant, prius quam ea eruditionis suppellectile se instruxerint, quæ ad bene, perfecteque scribendum desideratur. Quanquam enim, qui optimi Scriptoris nomen sibi vult comparare, a tenera ætate se se in scribendo exercere debeat, illud tamen ad experimentum fit potius, quam ut edantur opera in vulgus. Neminem latet, viros bene multos, quos ineunte ætate prurigo hæc scriptitandi tenebat, temporis successu poenituisse, ac proprio detrimento novisse, fructus præcoces, quibus quædam inest portentosa species, propria maturitate, & sapore carere.

Immo

Immo vero ne illi quidem, qui maturam attigerunt ætatem, temere, & inconsulto se proderè debent, nisi ante reponantur ad aliquod tempus Scripta, uti suadent Horatius, & Quintilianus. Multa, ac diuturna opus est patientia, ut ingenii fœtus ad eam perfectionem ducantur, quâ merito lucem aspiciant; atque ad rem nostram facit, quod ait Salomon: *Doctrina Viri per patientiam nascitur.* Enimvero Auctorum tolerantia accepta referenda sunt perfectiora, quæ extant monumenta, aliorumque impatientia, ac præproperæ festinationi adscribenda opera vitiosa, quibus referta est Literarum Respublica. Prov. 29.  
v. 11.

Celeberrimus Mæseus quatuordecim solum, vel quindecim lineas scribebat singulis diebus; cujus rei ab amicis sæpe redargutus reponere sapienter, eos, apud quos opera sua emanarent, parvi facturos esse, plus ne, minusve temporis in iis scribendis insumisset. Ab eo tamen exemplum duci non debet: sunt enim nonnulli Scriptores felicissimo ingenio præditi, qui liberrimè prodeuntes, pleno gradu, secure, non secus ac, qui lento, incedunt. Immo non desunt, qui nimium lento gressu ab incepto moverentur, adeoque Rempublicam optimis rebus defraudarent, quas, si parumper festinasent, procul dubio perficere potuissent.

Duo extant apud Ecclesiæ Patres operum genera: alia ex tempore edita, nonnulla vero per otium cogitata, atque elaborata. Plerosque Sermones proferebant ex tempore, relicta interim  
Disci.

Discipulis suis cura eos colligendi, scribendique. Quum vero de præcipuis quæstionibus ageretur, vel de refellendis Hæreticis, plurimum otii adhibebant, ac meditationis. Nihil habetur tam elaboratum, nihil tam absolutum, perfectumque, quam D. Augustini Opera contra Julianam, aliosque suorum temporum Hætherodoxos. Apologiæ Patrum perpolitæ sunt, exquisitique iudicii: eorum autem Epistolæ tum eruditione, tum venustate refertissimæ. Gregorius Magnus, quum aliis scribendorum Sermonum curam committeret, Epistolas scribebat ipsemet, permagni quippe momenti est, Summum Pontificem interrogantibus decretorio modo respondere; quod satis indicat *Decretalium* nomen Summorum Pontificum. Epistolis inditum: enimvero Pastorum Ecclesiæ responsa in rebus gravioris momenti, tanquam Sanctiones, & Decreta sunt excipienda.

Neque verò opera sua in vulgus inconsulto proferebant Ecclesiæ Patres, sed accuratiori critica utebantur, suasque lucubrationes severius ipsi castigabant, & ad amissim expendebant. Testatum id faciunt Augustini, & Venerabilis Bedæ *Retractiones*, necnon Divus Hieronymus, qui plurima operum suorum loca emendare, ac delere, vel etiam mutare sententiam non erubuit; re maturius expensa, atque perspecta.

Etiam si nimia expolitione absumendum opus non sit, minuendumque, emendari tamen debent illius

illius errata, tollenda, quæ superfluum, quæ autem desiderantur, addenda. Salmasius, vir alioquin eruditione insignis, male apud nonnullos audit, propterea quod semel scripta expendere detrectarit, suasque lucubrationes Typographis omissa diligenti disquisitione tradiderit, tanquam oracula, quæ miseri mortales bibulis auribus excipientes se omnium beatissimos esse crederent. Hanc agendi rationem abhorrent Scriptores, qui vulgi iudicium æstimandum esse norunt. Plinius Junior prolatum palam, & publice Trajani Panegyricum quamplurimis rebus auxit, ac trium dierum spatio coram selectis amicis legit, ut coram istis pene dixerim iudicibus purgatus tuto, & impune in vulgus prodire posset.

Qui Scripturis, & Patribus probe perspectis, aliquod Opus ad utilitatem Ecclesiæ suscipiunt, omni studio nitantur optimam illius speciem efformare, tum accurata methodo disponere, nec nisi, quæ accommodatissima sunt, ad illius compositionem adhibere.

Præstantissimum præ oculis habeant exemplar, quod illorum mentem regat, imperus cohibeat, componat, ac moderetur. Verum hoc exemplar pro ingenii facultate deligere, illudque sic imitari, ut nimium non exscribas, hoc opus, hic labor. Etenim exemplaria, a quibus scribendi regula sumitur, & ingeniorum lumen derivatur, neque integra in proprium usum transferri debent, neque membratim abripi; quemadmodum ii facere consue-

fueverunt, qui, quum proprio Marte parum omnino producere valeant, consilia tamen adgredi præter vires non dubitant.

Si cui cupido inest inclyti cujusdam Auctoris vestigia premendi, eumque vel æquandi, vel etiam superandi, caveat inprimis, ne illius methodo se scrupulosius addicat, illiusque nãrias, & quisquilias, quæ contemnendæ omnino sunt, studiosius consectans, se se Lectorum ludibrio exponat: ut illi profecto contingeret, qui Augustinum imitari studens, ejus Antitheses, ac verba similiter desinentia ex industria usurparet.

Prudentis etiam est eam in argumentorum delectu rationem tenere, ut acta jam a celeberrimis Scriptoribus, perfecteque tractata non agat, nisi forte fortuna novi quidquam addendum supersit. Hinc notat apposite Cicero, Commentariis Cæsaris deterreri potius, quam excitari Auctores ad ejusmodi argumentum tractandum post talem, ac tantum Scriptorem.

Si quid vero novi inventum sit, vulgari facile poterit, omissis interim, quæ alii scripsere. Alienum quippe est a recta ratione, ob unum, vel alterum inventum complura volumina prælo subjicere, in quibus adjectæ sententiæ vix, ac ne vix quidem detegi possunt.

Ab Ecclesiæ Patribus Doctrina potissimum desumi debet. Licet enim postremis hisce temporibus nova fieri possint inventa, per-

pe tamen error obrepit. Neque vero inventis fidenter hærendum, nisi Ecclesiæ probatio accedat, quæ sane expectanda non est, si novæ sententiæ Traditioni, & antiquis Doctoribus nequaquam consentiant.

Desumi etiam potest, immo totis viribus, scilicet assidue fuis ad Deum precibus nitendum, ut induamur Spiritu Charitatis, quæ in Patrum operibus viget, ac quidquid eloquentiæ, & eruditionis desideratur, abunde supplet.

Ad stylum quod attinet, eadem ratione Patres Ecclesiæ imitari potes, quæ reliquos Auctores; abs re tamen foret eum sibi imitandum proponere, cui nihil singulare inest, præter duritiam in verbis, atque inauditam loquendi rationem. Sic abstinendum prorsus a stylo Tertulliani, qui vocabulis insolitis plerunque utitur, vel vulgatas, quas adhibet voces, alio prorsus a communi hominum sensu usurpat, adeo ut illum pauci admodum percipere valeant. Præterea sunt apud Tertullianum liberiores loquendi formulæ, quas imitari quum difficile sit, & arduum, periculo non vacat.

Eandem ob causam improbandi videntur Ecclesiastici mediæ ætatis Scriptores, qui in Augustini stylo vocis sonum, ac verba similiter desinentia imitando confectati sunt. Quæ in re non animadverterunt, Augustinum, quum occasio postularet, polite scripsisse, eoque solum fine in dicendo nonnunquam humilem,

abjectumque, ut Auditorum ingenio se se ac commodaret, quos veritas iis verborum jocos ornata magis delectabat.

Prudentius fuit illorum consilium, qui Divi Bernardi stylum sibi imitandum proposuere. Plurimum enim habet gratiæ, & venustatis in rebus Pietatis, ac Religionis; immo vero Divus Bernardus inter Latinos Patres unus esse videtur, quem ii, qui se se supra vulgus extollere cupiunt, in Ecclesiastici sermonis exemplum sibi proponant. Nihilo tamen minus, quod huic Sanctissimo Doctore ita eximium est, ut ei a natura datum esse videatur, putida in iis crederetur affectatio, qui illum studiosius imitari vellent, quum non æque perspectas haberent Sacras Scripturas, eaque carerent ingenii dexteritate, qua tantopere pollebat Bernardus, ut Divinas Scripturas in quamlibet significationem felici successu converteret.

Quum plerique Latini Patres parum accurato stylo utantur, poterit iccirco Scriptor Ecclesiasticus profanos Auctores adire, quibus Lactantius, Hieronymus, alique nonnulli, Linguz magistris uti non dubitarunt.

Porro, qui eximium Auctorem in patrum sibi adiscit, caveat sedulo, ne illius verbis pertinacius serviat, ne ab illo non adhibita usurpare detrectet. Qui tam anguste dicunt, merito improbantur, ac jure commendatur Erasmi libertas, præ Italicorum Scriptorum scrupulositate, quibus sæculo proxime  
supe-



superiori religio fuisset, vel unum verbum a Cicerone non adhibitum usurpare; cuius vitii reprehensionem quum meruerit Bembus in scribenda Venetiarum Historia, quis non redarguat Theologos de rebus ad Religionem pertinentibus differentes?

Perpendat insuper Scriptor oportet, quam personam gerat, quod argumentum tractet, quive demum ii sint, ad quos scribit. Quæ quum non caverit olim Philosophus Favorinus in Dialogis, falsus fuisse jure meritoque creditur. Caret enim illius stylus tum apta argumenti gravitate, tum eximia Philosophi dignitate.

Ubi stylus rebus, & personis conveniat, nitidusque sit, ac perspicuus, omnis querelis occasio tollitur, atque Lectoris ingenio satis omnino fiet, Opera tua evolvens (ajebat *Rossy* Hieronymo Alexandro, qui nitido, politoque stylo utebatur) doctissimum me esse sentio; contra vero ignarum, quum illorum scripta lego, qui obscuris, implicatisque vocabulis se se irretiunt, involvuntque.

Latinum potius, quam vernaculum sermonem adhibere in Auctorum facultate positum est. *D. Dupuy* in ea erat opinione, vernaculo sermone scribendas esse Historias, & Gesta, quæ nosse omnium interest. Hæc regula in Libris etiam Pietatis, & Morum, qui omnium manibus tractandi sunt, locum habere posset.

De Theologia gravior longe difficultas, præsertim vero de Scholastica, quæ vernaculè reddita, ægre admodum exponi potest; propterea quod illius vocabula omnino singularia, ac undique Philosophica, omni vi careant in vulgarem translata sermonem.

Theologiam vero Positivam plerique Patres indigeno sermone tractarunt: nec quidquam causæ est, cur hodiernis temporibus ab illorum recedamus exemplo, nisi de illis fortasse agatur, quæ ignaris, & imbecillibus sunt oculenda. In cæteris autem argumentis satis quisque muneri suo faciet, si proprium consulat studium, si illorum, ad quos scribit, ingenium exploret, suamque in scribendo facultatem, hæc potius, quam illo sermone, modo non obsoleverit. Qui enim e. g. Græce scriberet, omni pene careret Lectore. Revera, ecquis hodiernis diebus Epistolas legat, quas doctissimus Budæus ad amicos postremo sæculo scripsit? Ecquis Interpretationem Psalmorum Davidis a Petavio Græcis versibus elaboratam legere adgrediatur, quæ tamen ab æquissimis æstimatoribus perfectissimum, & omnibus numeris absolutum opus esse creditur?

Immo vero non desunt, qui ne unam quidem Græcam voculam, ut aliquid nervosius exprimatur, adhiberi æquo animo ferant. Istam mixtionem plerique improbant, quidam etiam nullo modo ferre possunt, præsertim vero in publicis scriptis. Inquiunt enim, Antiquos nihil extraneum lucubrationibus suis  
inse-

inferuisse; Latinos quidem eam facultatem sibi vindicasse, verum in Epistolis solummodo familiaribus; Græcos autem nullibi. Addunt, Plutarchum, in referendis, quæ scribit Horatius de magnificentia Luculi, cavisse religiosissime, ut e Latina in Græcam Linguam transferret, nequa in Græca sua Oratione videretur esse sermonis varietas: Ciceronem etiam, quum Græcum Epicharmi versum proferre deberet, omni cura, studioque, ut ipse testatur, vitasse variarum linguarum mixtionem. „ Scis enim <sup>Tuscul. L. 1.</sup>  
 „ ( inquit ) me Græce loqui in Latino ser-  
 „ mone non plus solere, quam in Græco La-  
 „ tine, & recte quidem „. Non est tamen, cur tam religiosa adhibeatur scrupulositas, præcipue in operibus eruditionis, & criticæ,

## C A P U T X V I I.

*Quibus facultas non est, vel voluntas  
 docendi, atque scribendi, ii Sanctorum  
 Patrum lectione ad suimet ipsorum  
 instructionem summo cum fru-  
 ctu uti possunt,*

QUI ea mente scribunt, vel loquuntur, ut Opera sua, vel Sermones in vulgus proferant, bene multis virtutibus instructi esse debent, quæ non omnibus concessæ sunt; immo etiam non desunt, qui, quum

illis non careant, palam prodire vel nolunt; vel non audent, siue modestia detineantur, siue Criticorum metu; atque, ut subducant se se a quibudam male feriatis hominibus ita animo comparatis, ut nec quæ bona sunt, probare, nec infirma, aut imperfecta excusare sciant.

Nonnulli etiam quantacunque polleant in legendis Auctoribus, & Ecclesiæ Patribus facultate, quæ tamen privatim, & secreto didicerunt, palam proferre non valent. Neque vero delerenda iccirco lectio Patrum Ecclesiæ; nihil enim est post Sacras Scripturas utilius, nihil jucundius, quam Sanctis Patribus familiariter uti, a quibus Gratia, Pietas, ac morum sanctimonia uberrime fluunt. Sanctissimæ istius exercitationis subsidio modestiam servabit modestus, & humilis humilitatem; ea quippe pro beneficiis divinitus acceptis cumulatissima nos intelligentiæ luce perfundit. Quod si quis in dubium vocare audeat, proprio probare potest experimento.

Enim vero perspicacissimi, amantissimique Ecclesiæ Patres, omnibus omnia fiunt, ut omnes Christo lucrifaciant. Parvulis lac præbent, perfectis vero solidum cibum; de sapientiâ, ubi se præbet occasio, loquuntur inter perfectos; ubi vero prudentia postulat, silentio premunt coram infirmis, quæ mediocrem illorum captum superant. Fertilia nacti ingenia, atque docilia, non gloriantur, sterilia vero, & infœcunda non fastidiunt. Ubique serunt  
( inquit

( inquit Augustinus ) nec a saxis perniciem timent, aut spinis. Cuncta a Deo accepta, cuncta ad Deum referunt.

Eos quisque adire potest, rogare, consulere, debita tamen reverentia; colique contemnere, vel negligere perinde est, ac evidentissima insipientiæ suæ, quæ & impietatem, oleat, argumenta præbere. Filiorum quippe præcipuum munus est Patrum documenta reverenter excipere, ac veræ sapientiæ argumentum ad illorum consilia recurrere. *Inter-* *Deut.*  
*12.*  
*roga Patrem tuum*, inquit Scriptura, *& annuntiabit tibi, majores tuos, & dicent tibi: in* *Ecclesiæ.*  
*8.*  
*multitudine Presbyterorum prudentium sta, & sapientiæ illorum ex corde conjungere, ut omnem narrationem Dei possis audire, &c. Verba Sapientium audiuntur in silentio, Sapiens narrationem Virorum nominatorum conservabit.* *Ecclesiæ.*  
*9.*  
*& 10.*

Procul hinc ergo, qui Paganos Auctores Ecclesiæ Patribus anteponendos esse autumant. Equidem apud Ciceronem, Senecam, Plutarchum, aliosque nonnullos Philolophos pulcherrima, utilissimaque inveniuntur ipsismet Christianis, quorum interest veritatem exquirere, eamque probare, ubicunque tandem reperiat, quoniam ab uno illorum Auctore, & Domino proficiscitur. Verum desideratur *Aug. de*  
*Doctr.*  
*Christ.*  
apud eos Scriptores res omnium præstantissima, videlicet Spiritus Fidei, & Charitatis, in quo Christianæ Religionis summa consistit.

Hæc

M.  
Du Bois  
pref. des  
Œuvres  
de Cic.

Hæc cumulate sufficiunt ad demonstrandam illorum sententiæ falsitatem, qui Paganorum lectionem Ecclesiæ Patribus præferendam censent. Ut enim sapienter notat *D. Du Bois*, vir eruditissimus, „ Nullum est in universis Gentilium operibus præceptum, quod ad rectam humanæ vitæ institutionem conducatur, nisi obedientia, quam propriæ quisque debet rationis dictamini. Cæterum vero omnes actiones humanas referendas esse, uti postulat Fides Christiana, ad æternam rationem, quæ una est, certissimaque vitæ nostræ regula, & a qua rationem accepimus, ut eam consulere, eamque studiose sequi possimus, nullibi scriptum legitur.

„ Carent etiam Gentilium monumenta eo doloris sensu, quem Religio naturæ humanæ corruptionem aperiens, in nobis excitare consuevit, quod proprium uniuscujusque experimentum satis superque confirmat, „ Neque vero illis probe explorata naturæ infirmitas, quæ talis, ac tanta est, ut quæ vere bona sunt, operari non valeamus, quæve propterea nos Deo perfecte subicit, atque ad implorandum assiduis precibus Gratiae auxilium impellit.

„ Nihil demum iis continetur, quod Christianæ Religionis Mysteria spectet; solius enim Christi Jesu revelatione ab hominibus edisci poterant; quæ tamen ejusmodi sunt, ut iis sublatis Philosophorum justitia corruat, atque inutilis omnino evadat ad

**Æternæ**

„ *Æternæ Beatitudinis consecutionem* „, Desiderantur scilicet ea omnia, quæ Ecclesiæ Patres exponunt, atque nos docent in amplissimis suis Doctrinæ, & Pietatis monumentis, quorum lectionem hætenus usque commendavimus.

Hæc fere nobis dicenda erant de usu Patrum Ecclesiæ; quæ tamen sic intellecta volumus, ut ab ea quisque via non defleat, qua a Deo vocatus est, ut suis erga Deum, Ecclesiam, ac semetipsum officiis accurate fungatur. Fieri quippe nequit, ut in tam salebroso, tamque longinquo itinere, studiosi, velut infantes manuducantur, eisque cuncta singulatim indicentur. Omnium autem aptissimæ res foret, generalia quædam principia constituere, rectæ rationi, ac sapientissimorum Magistrorum auctoritati subnixæ. Immo nec istud proderit, nisi studiosi integro polleant, & acri iudicio, unacum impensa laboris voluntate.

„ Illud quippe certum, & indubitatum est  
„ apud omnes (ut ait Vir quidam doctissimus)  
„ consilia quædam dari posse, haudquaquam  
„ vero iudicium, perfectamque facultatem,

*M. de  
la Ro-  
chef.  
Maxim  
mil,*



## E P I L O G U S.

**I**N prima hujus Operis Parte, in qua de Auctoritate Patrum agebatur, paucis expositæ fuerunt hac de re Hæreticorum, & Ecclesiæ Theologorum sententiæ. Atque quum Auctoritatem Patrum alii nimium contrahere, alii plus æquo augere videantur, in Theologorum sententiam concessimus, qui Sanctis Patribus una cum Ecclesiæ Catholica, cujus est ea de re judicium ferre, omnino consentiunt,

Hinc principio positis, ostensum paucis est, errores, antilogias, fallas prolationes, suppositiones, corruptiones, atque incuriam, quæ antiquis Patribus vulgo adscribuntur, nihil omnino illorum Auctoritati detrahere, quippe unanimi omnium, vel saltem plerorumque in præcipuis Christianæ Fidei Capitibus consensu subnixæ,

In altera hujus Operis Parte actum est de necessariis ad opera Patrum cum fructu legenda præparationibus. Eruditorum linguas ad id necessarias esse, ac præterea Criticæ, Philosophiæ, Eruditionem profanam, Scripturam Sacram, & Historiam demonstravimus, quæ quidem innumeras alias cognitiones involvunt.

Multiplex tertio loco legendorum Patrum Methodus proposita fuit; universa illorum Opera in quatuor Partes tribuimus, scilicet Sacrarum Scripturarum Expositionem, Dogmata



mata Theologiæ, Christianam Morum Doctrinam, & Disciplinam Ecclesiæ: De unaquaque parte singillatim sermonem instituimus, adjectis exemplis, quæ in tam longo, ac salebroso itinere lucem præbeant.

Tandem de usu Patrum verba fecimus in extrema Operis Parte, ubi postquam ostendimus, magna Scriptorum, quos legendos proposuimus, multitudinē deterrendum quæmpiam non esse, methodum aperuimus, quam tenere quisque potest, ut optimâ studia magnâ cum laude perficiat.

Studiorum rationem ab Antiquis haberi solitam, unde repeti debet totis viribus exemplum paucis exposuimus. Nonnulla dicta sunt de Annotationibus, de Collectionibus, atque illarum usu, vel abusu. Demum fuse, copioseque differuimus de maximis emolumentis, quæ Ecclesiæ adferre possunt, qui in Sanctorum Patrum lectione diu, multumque se se exercuerunt, vel illorum opera novis Commentariis, Dissertationibus, Animadversionibus, Scholiisve illustrata vulgantes, vel Vocabularia colligentes, vel illorum Monumenta in alteram Linguam transferentes, sive adquisitam Doctrinam in Scholis, atque suggestis effundant, sive privatis in ædibus publicæ utilitati inserviant, sive demum in id solum incumbant, ut animum suum informet, atque cumulatus perficiat.

F I N I S,

**Imprimatur. Vic. Gen. S. Officil.**

**V. Ab. COSTA S. F. P., & R.**

**Se ne permette la Stampa. MOROZZO  
per S. E. il Signor Marchese D'ORMEA  
Gran Cancelliere.**



97.579

100. A

100.



